

# Amsal

## Raja Salomo bira, weik kel deice arye, seklamuk yupu

---

Raja Salomo bira, 'Israel ninye nirya ara weik mambul ning kel kibikirye, diksukumuk unamak' tenen, nyabuk yupu

**1** <sup>1</sup> Ayupu ara, Israel mutuku ninye talibuka ulamuk ninye deiyoknye, Daud el mi Raja Salomo bira, fia weik kel bikna yupu deice arye nyabuk.

<sup>2</sup> Anyapnusin yupu deiyok ara ani. Yata ninye do nirya arye, dipkoprop fia weik kel bikna ning kel biknirye, 'Dipkoprop teleb un ning ara ani' tenena ap, tonda nong bol deice uk kum bukni, mambul yupu nong noutam ning uk, kel bikna ap ati, ayupu nirya nyapnusine. Ara, talye kanye bobuka una kum bukni, 'Malye ubipyak' tenen, moubuka tenekirye, diksukumuk ubuka, una kel bikna ati, ayupu ara nyapnusine.

<sup>3</sup> Tonda anyapnusin yupu kel bikmunyop ura, talye-talye kum unamlulume. Anggunce, 'E, diksukum un ning ara ani, ninye arye winilamak touk, teleb kibuka yupu bokolina ning ara ani.' Tonda, 'Na kayapu, tenena kum dib aryuk, yu kanye bolana kumce, ninye nirya ap neika teleb una ara ani' tenen, kel biknamlulume. Anyapnusin yupu moubuka kel bikmunyop ura, anggun nirya ara, talye mangkau asa una kum bukni, 'Malye ubipyak' tenen, moubuka tenepmunce, kalikelanamlulume. Tonda, 'Diksukumuk una deiyok ning ara ani' tenen, moubuka kel kipmunce, teleb asa ubuka unamlulume.

<sup>4</sup> Ninye ton mitik walwal unyak ninye arye, anyapnusin yupu moubuka kel kibikcop ura, sik babye fia weik kel bikna deiyok ning moubuka tenenamake. Tonda, wel ninye babye, ayupu moubuka kekebikirye, talye-talye kum unamake. Aning kum bukni, talye mangkau asa una kumce, 'Malye ubipyak' tenen, moubuka tenebikirye, diksukumuk unamake.

<sup>5</sup> Yata ninye do nirya, fia weik kel bikna deiyok ning akunum kel bikamik ninye babye, ayupu kekebicop ura, fia weik kel bikna deiyok

ning ton tabakuka, kel bikra banamake. Aning atouk, nong bol deice uk kum bukni, nong noutam ning akunum kel bikamik nang babye, ayupu kekebikirye, ‘E, bana teleb bisik ara ani,’ tenebikirye, diksukumuk upre banamake. <sup>6</sup>Anyapnusin yupu nirya ara, fia weik arye kel bikmunyop ura, domon yupu ikin weik ning ap, winipmanto yupu ap, deiyok ning aupmatu babye, moubuka kel bikinamlume. Tonda, fia weik kel bikamik nang arye, domon yupu nyanyak yupu ap, duknubuka nyanyak yupu ap ara, ‘E, ayupu deiyok ara, ani’ tenen, fia weik arye kel bikinamlume.

<sup>7</sup>Weik ikin yupu nyapnusin ning ara ani. ‘Weik kel bikna deiyok ning, moubuka tenepnirye, teleb uk unamne’ tenen, patalul ninye ara, minopce nun Ni Koproba Allah, el si Yahweh<sup>a</sup> ati, ‘Elda fia weik mambulnye’ tenen, ilil upliba, el si uk erebikirye, el amutam uk unyake. Bukni, kanye bona kumce, fia walwal asa unyak ninye ara, diksukum un ning nirya ati, ‘Nun like,’ tenenyake. Sikce fia weik kel bikna deiyok ning ap, tonda talye mangkau asa una kum bukni, ‘Malye ubipyak’ tenen, moubuka tenebikirye, diksukumuk un ning ati, ‘Nun like,’ tenenyake. Ara, fia walwal uk unyak ninye ati nyapne.

**Wel ninye arye, ‘Moubuka kekebikirye, teleb uk unamak’ tenen, nyabuk yupu**

<sup>8</sup>Na mapu nirya ara, anggun ni yapu arye peteresikce yupu nirya ara, moubuka kekepmunce, talinamlulume. Aning atouk, anggun nin yapu arye, nyasinyak yupu nirya babye, moubuka kekepmunce, fia kum batakanamlulume. Ayupu nirya ara, talibuka unamlulume. <sup>9</sup>Ara, anggun ni yapu ap, anggun nin yapu ap, sikce nyanyak yupu moubuka kekepmunyop ura, fia teleb uk unamlume. Winipmanto ara, ninye arye, urasin fia teleb ning dobuka, ‘Nun ninye deiyoknye ati, ninye nirya arye kwerya dolinamap’ tenen, el kisok deice dolilamak. Aning atouk, ninye arye, fia dekna weik ning dobuka, rantai tapu atonun ning kintinipdebikirye, weik sisin nang sik ngang dam karaklamak touk, anggun ni yapu ap, anggun nin yapu ap arye, nyasinyak yupu nirya ati, moubuka kekenamak mapu ara, fia teleb ulinamsile.

---

<sup>a</sup> 1:7 *Yahweh* – Allah el si koproba ara, ‘Yahweh’ ulule. Allah arye Musa ati, ayupu lakak arye nyabuk (Keluaran 3:14). Ibrani yupu deice arye ahuruf ‘YHWH’ aning uk sekenyake. Ibrani yupu nyanyak ninye arye, ‘Allah el si koproba lakak kum nyaptibye’ tenen, ilil ulule. Ilil ulula ati ara, sikce huruf ‘YHWH’ aning uk sekenyake. Bukni, Allah arye Musa ati, “Kume na si ara, ‘Yahweh’ unune. Asi Yahweh bikmunce asi uk erebuka na ati kinamnululume,” nyabuk. Ibrani kili sal arye huruf YHWH sekenyak bukni, ‘Ahuruf uk sekipyop ura, ayupu nyana ara, walwal upsilyak’ tenen, nunce ‘Yahweh’ sekenyabe. Indonesia Alkitab noutam ara, Allah el si Yahweh kum sekenyake. Sikda, ‘TUHAN’ sekenyake. Bukni, Indonesia Alkitab noutamak nirya, ‘TUHAN’ eipmunyop ura, ‘Ara Allah el si Yahweh sekenyak sukum,’ tenenamlulume. Allah el si Yahweh nyana ara, fia teleb uke. Tonda, laka nyana yupu nomor 49 dipdelulume.

<sup>10</sup>Se, na mio, malye un ning uk talibuka unyak nang arye, ‘Ami el kanye talima arukdebiba, malye unamle’ tenen, an dam yanuka yukupdopkicop ura, sik yupu fia kum kekenamlyame. <sup>11</sup>Winipmanto ara, amalye wininyak nang arye, nyanamkiyake.

“Anda nun melipsilyame. An ap, nun ap nun nirya arye, yuk nang talye obribatakanamabe. Tonda, malye kum upmakirye, mangkau kanye bobuka dabanamak nang ati, nun duknupmapya arye, anang yangakibuk, oltakanamabe.

<sup>12</sup>Ninye dibikiba, tuku lukikirye, sik nong nirya dobuka atuku fum bisik dongolamak touk, talye dabakce ninye obuka, batakibiba kum unamake. Sikda, wel nang tuba unyak bukni, nunce aninye obibiba, tuku lukikcop ura, dibinyak nang wekelbanyak sukumuk, binuka unamake. <sup>13</sup>Nun adib aryuk yuk nang sik aik bibirye, yo bok dekna weika arye deklamak fia weik mambul ning uk ubula doproprnamabe. Yuk nang talinyak ning ubula doprobibyop ura, nun aik koproba tamubuka yanuka delinamabe. Urasin fia teleb ning weika arye doprobibya deice arye, nun aik yanuka deibibyeba, aminyan talak nun aik langdipnamle.

<sup>14</sup>Wininamaba ati ara, anda nun melipsiminba, an ap nun ap neika ubula don ning weika arye, doprakda nun aik delilbalamipaya ani, aminyan talak aning-aning nirya weik uplyop ura, nun nirya arye, neika totouk aning bokuka dolanamabe,” nyabuka amalye un ning talibuka unyak nang arye, an ti nyabuka yukunamkiyake.

<sup>15</sup>Se, nai mio, malye un nang arye nyabuka yukunamkiyak bukni, anda sik anang ap melibuka bana fia meme. Sik malye nang arye banamak bisik ara, neika kum banamlulume. Anda tonok yan aniryuk kum banamlyame. Sik anang arye nyabikce yupu kekepmince, sik ap melibuka dobolbana fia meme. <sup>16</sup>Ara, talye ati kum nyapkine. Deiyok ara, sik anang ara, ‘Malye ning uk talibuka unamap’ tenen, minopce fol asa arye, malye un ning ati elbanyake. Aning atouk, sik anang arye, moubuka tenilena kum dib aryuk, yuk ninye ati yu upliba, oltakanyake. Talye kanye deibuka aik kum bunyak bukni, ‘Ninye ton opnamabe’ tenen, pol-pol asa elbanyake.

<sup>17</sup>Winipmanto ning ara, nyapnukine. Maka weika arye bulubuka amubikirye dinmakibuk, ninye arye, ‘Amaka tomopnuyabe’ tenen, maka tomon ning lakak uk delinyak do? Kume, sik lakak aryuk maka tomon ning deipmace talak, maka nirya arye, adeipmak ning akunum eibicop ura, aning fum tam kum wekenyake. Ara, kanye bona kum ning ara, wininyak bukni, sik malye ning uk talibuka unyak ninye arye aning atonun unyake. <sup>18</sup>Ara, talye ati kum nyapkine. Amalye unyak nang arye, ‘Yuk ninye mangkau kanye bobuka bakibuk, talya karin arye anang oplonamabe’ tenen, duknunyake. Bukni, sik amalye wininyak nang ara, sik bidamnye atibuk wena welanyake. ‘Yuk nang opnuyap,’ tenenyak

bukni, sik bidamnye arye, sik bidamnye ati olanyake. Aning ara, sik bidamnye uk tamubuka youlule.

<sup>19</sup>Aning atonun, yata ninye do nirya, ‘Nun patasulul ning ara, yuk nang sik nong obibirye, sik talinyak ning ara, mikip arye dalubuka ubula dolanamabe’ tenen, wininyak ninye nirya ara, amalye winin ning wininyaka deice arye dipnamake. Dipnamaka deiyok ara, ubula donyaka deice arye, sik nong uk dekelanyake.

**“Weik kel bikna deiyok ning ati, ‘Nun like’  
tenen, batakna kume,” nyabuk yupu**

<sup>20</sup>Winipmanto yupu deice arye nyapnusine. Weik kel bikna deiyok ning ara, kil atonun ulule. Akil ara, fia weik kel kiamuk kil ati ara, ninye banyak bisik noutamak arye, fia weik yupu deice arye, “Anggunda, ‘Kanye imun ning nun dam yanamsil’ tenen, anggun kanye mouplulume,” nyalule. Ninye asik fia weik arye dolamika noutamak, ninye bulubikiba, ‘Yupu nyanamak’ tenen, kintinibuka deibikba, lo ubuk noutamak yanuka tiklirye, fia weik yupu deice arye, “Na yupu nyapnusin ning ara, anggun kanye moubuka kekeplulume,” nyalule. <sup>21</sup>Tonda ninye weika arye, banyak bisik noutamak tiklirye, yupu fia weik arye nyalule. Tonda, ninye asik dolamikce, ongomkanim abuka, domik keil foka bisik bublan dam yanuka tikuka, fia weik yupu deice arye, “Anggun kanye mouplulume,” nyabuka, wenen yupu nyalule.

<sup>22</sup>Se, anggunda walwal ninye uk ululume. Kanye bona kumce, fia walwal deice aryuk umunye ning, fia malye weik ulamunye ning atibuk, kanye deibuka ululume. Yata talak tonap, amalye winin ning ati, kanye deibuka unamlum do? Anggun yep-yep alulum ninye ara, yata talak arye, yata karin arye tonap, talye kanye deibuka, yep-yep tuba nyanamlum do? Anggun kel bikna deiyok ning ati, ‘Nun like’ tenen, walwal kanye bobuka umunye ninye ara, yata talak karin arye tonap, walwal un ning uk winiltakanamlum do? Aning atonun, dan talak na nyasinye yupu ati, moubuka kekepmunce, kel biknamlum do?

<sup>23</sup>Na arye anggun ti, “Aning ara malye winipmalame,” nyabuka, wenepsise ning ara, kum kekenululume. Na arye, anggun ti, “Aning ara, malye umunye ning ara batakso,” nyabuka wenelamse ning, akunum kekepnutumto ura, na arye anggun ti bico tenebuka, fia weik kel kiamsa deice arye, na kanye talima fum tam tenenun ning nirya laka nyapsitinyeba, akunum bikamtume. Bukni, na nyasinye yupu nirya ara, fia kum kekenululume.

<sup>24</sup>Bukni, na arye anggun ti yukupsise talak ara, anggun nirya ara na ti, ‘Nun like’ tenen, batakamnulume. ‘Aninye melinamne’ tenen, na taruk erebuka anggun ti aripse bukni, anggun nirya arye, ‘Nun like’ tenen, na ti mangkau kanye bokuka batakamlamulume. <sup>25</sup>Na arye anggun ti,

“Teleb kibuka un ning ara ani, teleb kibuka ban bisik ara ani,” nyabuka, laka nyalamsise bukni, na nyalamsise yupu nirya ati, mangkau kina uk ulamlume. Anggunce, ‘Akil ara wenena yupu nyasulul ning ara, nun like’ tenen, yaniltana uk ulamlume.

<sup>26</sup>Na nyalamsise yupu nirya, yaniltana uk ulamnuluma ati ara, winitalak ara, fia weik ikin ning anggun nong deice yaliba, imun kanye bobuka unamlum talak ara, na arye anggun ti, ‘Dauplye’ tenen, aku tunamsine. Kanye imun ning anggun dam yalyop ura, na arye, “Akunum nyalamsise bukni, beta merekuka ikin upnamsile,” nyapnirye, yep-yep nyanamsine. <sup>27</sup>Winipmanto ara, fia weik kumanya ap, bebeya lingum ana ap, liman ap, talya karin arye yangalamle touk, aminyan talak fia weik ikin ning, anggun nong deice yanamsile. Tonda, kumanya mikip kumanya dobuka yalirye, min yuma buta-buta bobuka adib aryuk bobalamle touk, imun kanye ning anggun dam yalyop ura, na arye aku tunamsine. Aikin ning anggun dam yalye ura, dopropmunce, imun kanye bobuka bukmunye talak ara, talima uk dilamsiliba, fia teleb upmanto kum unamlume. Atalak ara, na arye anggun ti, “Kume na nyalamsise yupu kum kekelamluma dekna ara, ikin ning doproplume,” nyabuka, aku tunamsine.

<sup>28</sup>Aminyan talak, ikin ning weik anggun dam yalyop ura, anggunce na ti, “Se, nun melibuka lyepsilyame,” nyabuka moronamnulum bukni, na ara, “Aunmana ati ara, melipnusine,” kum nyanamsine. Anggunce moropnamnulum yupu ati, kekepnirye tamubuka kum nyapnamsine. Tonda, anggunce na ti, ‘Se, nunda fia weik kel bikna deiyok ning patasulula ati ara, dobuka kel kiptibye’ tenen, epra banamnulum bukni, fia kum eipnamnulum.

<sup>29</sup>Ara, talye ati kume. Deiyok ara ani. Anggunce, ‘Fia weik kel bikna deiyok ning ara, talye yupu ati ara, nun like’ tenen, mangkau kanye bomluma dekna deice arye winipnamlume. Tonda, anggun nirya arye, ‘Nun Ni Koproba Allah Yahweh, elda fia weik mambulnye’ tenen, el ti ilil kum tenyاملumce, el si kum erelalume. Ati ara, anggun malye ulamluma dekna ati winipnamsile. <sup>30</sup>Na arye anggun ti, “Teleb un ning ara ani, diksukum bana ati, teleb bisik ara ani,” nyabuka laka nyalamsise bukni, na nyalamsise yupu nirya, mangkau kanye uk bolamlume. Anggunce, ‘Aweik kel bikna deiyok ning lak len kil arye wenen yupu nyasulul ning ara, nun like’ tenen, yaniltana uk ulamlume. Ati ara, anggun malye ulamluma dekna ati winipnamsile.

<sup>31</sup>Aning ati ara, anggunce winilamluma dekna ara ikin ning doproprnamlume. Tonda anggunce, ‘Winibuka malye wininamabe. tenepce arye, malye winin ning uk talibuka unamabe’ tenen, malye fil uk dolamluma deice arye, dekna doproprnamlume. Aning deiyok ara talya ati kume. Anggun bidamnnye arye, anggun bidamnnye ati malye ulilalulume.

<sup>32</sup>Aning ara, talye ati kum nyapsine. Teleb un ning nirya ati, moubuka tenina kumce, walwal arye malye winin ning uk, talibuka unamak ninye nirya ara, sik bidamnye arye, malye wininyaka deice arye, olana atonun unamake. Sik bidamnye arye, sik bidamnye ati malye unyaka deice arye olanamake. Aning atonun, sik fia walwal uk unyak ninye ara, aning-aning nirya kel bikna kumce, ‘Weik kel bikna deiyok ning ara, nun like. Ayupu ara, talye yupu ati, dauplye’ tenen, unyak ninye nirya ara, sik walwal arye unyaka deice arye, opdanamake. Sik malye wininyak ning dekna arye, sik bidamang nang uk, malye kililanamake.

<sup>33</sup>Bukni, na arye fia weik kel bikna deiyok ning ati, laka nyasinye yupu moubuka kekece ninye nirya ara, fia kam unyakce, teleb uk unamake. Ara, sikce, ‘Se, yatato ikin ning arye nun dam yaliba, imun kanye bobuka unamap do?’ tenena kumce, talye kanye bobuka, fia teleb uk unamake. Aninye ara, ilil kanye bobuka, kum unamak bukni, kanye deibikirye darabuka unamake.

**Raja Salomo birye, el amutam ninye ati, ‘Kel bikna deiyok ning moubuka kel biknamake’ tenen, nyabuk yupu**

**2** <sup>1</sup>Se, na mapu anggunda, na arye nyanamsin yupu ara, anggun moubuka dolonamlulume. Winibuka dopropmunce, anggun kanye talima fum tam ara, ‘Aning ara wininamlulume, aning ara kum wininamlulume,’ nyabuka nyalinamsin yupu ara, fia moubuka kekenamlulume. <sup>2</sup>Ati ara, anggun amul deice arye moubuka kekepmunce, ‘Kel bikna deiyok ning kel bikinamap’ tenen, fia piribuka kel bikinamlulume. Tonda, anggun kanye mikip kipmunce, ‘Teleb una ara ani, malye una ani’ tenen, ‘Moubuka kel kipnamap’ tenen, dib tenebuka, kel bikinamlulume.

<sup>3</sup>Na amutam ululum ninye nirya ara, anggunce, ‘Se, fia weik kel bikna ning kel kiptibye’ tenen, weika arye moropmunyop ura, Allah arye aning arenamsile. Aning atouk, ‘Teleb una ara ani, malye una ara ani’ tenen, ‘Moubuka kel bikinamap’ tenen, weika arye moropmunyop ura, Allah arye aning arenamsile. <sup>4</sup>Winipmanto ara, ninye arye, ‘Aning ara fia weik mambule,’ tenelamikce, duknubuka delilamik ning, ‘Dopropnune,’ tenen, mambul kirikuka, elamak touk, ubuka enamulume. Ara, anggunce, fia weik kel bikna deiyok ning ap, moubuka tenena deiyok ning ap ati, enamlum ning ara, dekna weik kat ning, emas ap, perak ap ati, ‘Doproptinye’ tenen, elamak touk ubuka enamlume.

<sup>5</sup>Winibuka elamunya ani, eipmunyop ura, Allah Yahweh el winilul ning ati, moubuka bikmunce, anggun ilil unamsile. Tonda, Allah el fia weik kel bikna deiyok ning talibuka ulul touk, anggun babye, fia weik kel bikna deiyok ning uk, talibuka unamlume.

<sup>6</sup>Anyapmasina ara, talye ati kume. Deiyok ara, fia weik kel bikna deiyok ning ara, Allah Yahweh elcuk aresulule. Winibuka arisilye ning

ara, ‘Teleb una ani, malye winina ani’ tenen, moubuka kel bikna deiyok ning aresulule. Elce kel bikna deiyok ning ap, moubuka tenena deiyok ning ap, ninye nong deice arisiliba, dib tenebuka kel kinyabe. <sup>7</sup>Winibuka kel kinyaka ati, sik ninye kanye talima diksukum unyake, teleb winin ning uk unyak ninye ati, fia weik kel bikna deiyok ning aresulule. Tonda, kanye talima diksukum unyak ninye ati, Allah arye, ‘Na tenena ninye malye kibuka deipnicak’ tenen, melibuka kalikisulule.

<sup>8</sup>Tonda, sik diksukum teleb uk unyak ninye ati, Allah Yahweh arye melilule. Winibuka melilya ati, sik anang arye el tibuk, asum-asum niryane tenekirye, kanye deibuka unyake. Winibuka unyak ninye ati ara, elcuk melibuka kalikilule.

<sup>9</sup>Ati ara, anggunce, Allah ati dib tenepmunyop ura, anggunda ninye ati bico tenebuka melin ning ara, kel bikinamlume. Tonda, ninye ati, yupu lipsisikuka bokolinalum ning ara, tilila yupu nyana kum aryuk, dipkoprop yupu uk nyanamlume. Tonda, ‘Teleb una ara, ani’ tenen, moubuka tenepmunce, kel biknamlulume.

<sup>10</sup>Aning winibuka kel biknamlume. Anggun winibuka kel bikmunyop ura, dib tenebuka kel bikna deiyok ning, sik kanye talima fum tam wekuka langdipsiliba, kanye lamapdongobuka arye unamlume. <sup>11</sup>Anggun kel bikmunye deice arye, ‘Teleb ning ani, malye ning ani’ tenen, moubuka tenena deiyok ning anggun kanye talima fum tam akunum usilyop ura, anggun ti melibuka kalikinamsile. Tonda, anggun moubuka tenemunya deice arye, anggunce anggun bidamnye ati, kalikelanamlulume.

<sup>12</sup>Aning winipmunyop ura, anggun adib aryuk malye bisik balamak ning batakuka, diksukum bisik ban tam uk kinamlulume. Ninye sik si bam bol deice arye, tilila yupu nyanyak nang ara, sik ap neika una fia meme. Anggun leibuka yuk sukumuk unamlume. <sup>13</sup>Diksukum bisik uk bamunyop ura, malye unyak ninye ap neika kum unamlume. Ara, sik anang ara, teleb un ning ati, ‘Nun like’ tenen, nang ara, wininyake. Sikda, ‘Diksukum bisik ara, nun like’ tenen, kuna bisik uk patalule. Apatalul nang ara, sik kanye talima noutam ara, malye winin ning uk langdibukba unyake.

<sup>14</sup>Wininyak nang ara, sik talibuka unyak ning ati, ‘Nunda teleb ning talibuka unyaba’ tenen, aning si uk erebuka unyake. Aning ara, ‘Nun wininyap ning ara, fia malye ning uk unyabe,’ tenenyak bukni, ila tuba aning uk tuba patalibuk, kanye deibikirye, tuba malye uk unyake.

<sup>15</sup>Winipmanto ara, bai tam noutamak, ninye arye kwalin bisik balamak touk, anang arye yuk nang ati, tilila yupu nyabuka delinyak deice arye, malye weik ulinyake. Ati ara, anggunce, ‘Malye ning ani, teleb ani,’ tenemunce, diksukum bisik uk bamunyop ura, sik anang malye wininyak touk, kum wininamlulume.

<sup>16</sup>Tonda, anggunce, ‘Malye ning ani, teleb ning ani,’ tenemunce, diksukum bisik uk bamunyop ura, ninye arye talye yoltalamak kilapu

arye, yukulon yupu deice arye, teleb yupu nyapsikcop ura, fia kum kekenamlulume. Sik akilapu arye, talima lilona yupu nyapsikce babye, sik yupu kum kekenamlulume. <sup>17</sup>Akilapu nirya ara, sik ninye akunum domik bukni, sik akilapu arye, ‘Nunda, ninye akunum domupu,’ kum tenenyakce, sik minop talak kam ulamik kanye uk bopmakiry, Allah arye nyapdeiyamuk yupu ara, akunum yaniltanyake. Tonda, akilapu arye, ‘Nun ninye akunum erepsik nang ap, neika fia unamabe,’ nyalamik ning ara, batakalongonyake.

<sup>18</sup>‘Akilapu ap neika kum unamlume,’ nyapmasina deiyok ara, ani. Ara, anggunda akilapu sik aik dam bimunyop ura, anggunda kam un tam kum unamlulume. Winipmunce, otam binamlumak babye, ninye dibikirye wekelbalamak kunuklamle bisik uk binamlume. <sup>19</sup>Tonda, ninye aning-aning nirya talye yoltalamak kilapu dam binamak ninye nirya ara, fia tonok babye, ila tamubuka kum yanamake. Kam una deiyok bisik ara, fia kum binamake. Kuna bisik uk banyake.

<sup>20</sup>Winipnamaka ati, na mapu anggunda, diksukum nyanyak yupu uk, kekebuka dobolbanamlulume. Diksukum un bisik uk bamunce, anggunda ateleb yupu uk kekebuka, dobolbamunyop ura, anggun kam una ara, Allah el kam ulul touk, anggun babye fia kam unamlume. Tonda, Allah arye, ‘Wininamake,’ tenesilye touk, diksukum unyak ninye banyak bisik uk banamlulume.

<sup>21</sup>Anyapmasina deiyok ara ani. Ara, Allah arye nyapsuk touk, fil dobuka unyak ninye ap, sik kanye talima teleb kibuka unyak ninye ap, Allah arye aryamsuk mutuku noutamak uk fia unamake. Malye una kumce, fia diksukum unyak ninye ara, amutuku noutamak, fia tuba aunamake. <sup>22</sup>Bukni, ninye yu unyak nang ap, malye unyak nang ap, aninye nirya ara, ninye arye tukwak mutuku wa wiamica, dola kwelamak touk, Allah arye aninye ati dobuka, el min arye kintinipdeibuk mutuku noutamak dopkwetepnamle.

**Wel nang ati, kel bikna deiyok ning ara, “Winibuka  
kel bikinamlulume,” nyabuk yupu**

**3** <sup>1</sup>Se, na mapu, na arye anggun ti peterelamsise ning ara, luba kina meme. Na arye, “Aning ara wininamlulume, aning ara kum wininamlulume,” nyapdeiamse ning nirya ara, anggun kanye talima noutam deipmunce, fia tuba tenebuka unamlume. <sup>2</sup>Winibuka umunyop ura, lo tonap cang arye arisiliba, kanye deibuka teleb un ning uk umunce, kam fia unamlume. Na peteryamsise ning nirya, anggun kanye talima fum tam deipmunce, aning uk moubuka umunyop ura, aminyan anggun unamlum ning nirya ara, fia teleb uk unamsile.

<sup>3</sup>Anggunda teleb kibuka unamlume. Ara, na arye peteryamsise yupu ara, talye ning tenebuka batakna meme. Winipmanto ara, bace



duk ngang karaklamak atonun, na arye peteryamsise yupu moubuka talipmunce, teleb uk unamlume. Tonda, winipmanto ning ton, ninye arye, 'Ayupu ara mambul weik' tenen, kat ning deice sekuka deibikirye, dilamak atonun, na arye peteryamsise yupu anggun kanye talima fum tam moubuka tenepmunce unamlume. <sup>4</sup> Anggunce anyapmasin touk umunyop ura, Allah el kanye teleb ap, ninye sik teleb kanye ap, anggun deice delinamsiake.

<sup>5</sup> Anggun Ni Koproba Allah Yahweh atibuk, fia dib tenebuka unamlume. Angguncuk, anggun kanye talima fum tam tenelulum ning uk, 'Akunuma,' tenena meme. Tonda, anggunce, kel bikilulum ning ap, winitalak kel bikrabanamlum ning ap ati, 'Na ara fia weik kelye,' tenena meme. <sup>6</sup> Yata fil do nirya, dopmunyop ura, Allah ati moropmunce donamlume. Tonda, yata wirin ning do nirya, 'Allah melisilya deice aryuk afil donamabe,' tenenammlume. Tonda, 'Allah el si erena ati, afil donamabe,' tenebuka unamlulume. Allah ati, si eremunyop ura elce, "Fia diksukum un bisik ara, ani," nyabuka peterenamsile. Winipsilirye, anggun wininamlum ning nirya ara, teleb uk ulinamsile.

<sup>7</sup> Angguncuk tenebuka, kel bikamlum ning atibuk, 'Nunda fia weik kel nang' tenen, kwalina meme. Ati ara, malye winin ning nirya ara batakmumce, anggun Ni Koproba Allah Yahweh ati, 'Elda fia weik mambulnye,' tenebuka ilil unamsile. <sup>8</sup> Winipmanto ara, uk dilamle ninye, obat dibice talak lopliba bulongolamak touk, anggun Ni Koproba Allah ati, ilil tenebuka umunce, diksukumuk upmunyop ura, anggun nong ap, anggun kanya ap nirya ara, fia teleb uk unamlume.

<sup>9</sup> Anggun Ni Koproba Allah Yahweh ati, "Telebe," nyabuka, el si erena ati, arilyanganamlum ning nirya ara, fia teleb ning uk bobuka arelyanganamlulume. Tonda, anggun wa wibuka koupmunba, minopce paplirye, nong upnamle weinye ning ayala-ayala nirya ara, Allah el si erena ati, arelyanganamlulume. <sup>10</sup> Winipmunyop ura, anggun kounamlum ning ayala-ayala nirya ara, Allah arye weik aripsiliba, anggun din libuka yamunce, delinamlum aik ara, langdipnamle. Din ara, kum kum danamsile. Allah arye tuba-tuba yamubuka arisiliba, fia weik unamsile. Tonda, anggun anggur tapu duk purubuka, fia weik makau fum tam delinamlum sukum ara, kum kum danamsile. Aning ara, fia aunamsile.

<sup>11</sup> Na mapu, Allah arye anggun kel bikna ap, winilen ap ati, weik imun ning arisiliba, anggun dam yangasilye talak ara, 'Se, yata deiyok ati, nun dam yanmasil do?' tenen, kum teniltonamlulume. Malye winipmunba, Allah Yahweh arye wenenamsil talak ara, anggunce, 'Se, aning ara yata ati unmasil do? Aning ara, nun like,' kum tenenammlulume. <sup>12</sup> Anyapmasin yupu ara, talye ati kum nyapsine. Ara, Allah ati dib tenelulnye bira, Allah arye anye biti kanye deliliryne, el winilen ati, kanye ikin ning

arilule. Winipmanto ara, ninye sik mining delinyak mapu ati, ‘Malye winibicak’ tenen, moubuka wenelamak touk, Allah arye kanye delilul ninye ati, ‘Malye winibicak’ tenen, wenelule. Bico kum tenepsetuto ura, kum wenepsutue.

<sup>13</sup>Yatanye do nirya, ‘Weik kel bikna deiyok ning ap, ‘Aning ara telebe, aning ara malye’ tenen, moubuka tenena deiyok ning ap, doproptinye’ tenen, piribuka epdelirye, eibuka dololulnye bira, kanye deibuka unamle. <sup>14</sup>Anyapmasin yupu ara, talye ati kum nyapsine. Deiyok ara, fia weik kel bikna deiyok ning ap, ‘Aning ara telebe, aning ara malye’ tenen, ‘Moubuka tenena deiyok ning ap, doproptinye’ tenen, piribuka epdelirye, eibuka dololul ning ara, fia mambul weik ulule. Ara, dekna weik ning el si ara, perak ap, emas ap ara, teleb kat ning ulul bukni, aning ara mitik teleb uka. Bukni, fia weik kel kina deiyok ning ap, moubuka tenena deiyok ning ap ara, fia weik mambul ning ulule.

<sup>15</sup>Urasin fia teleb keil, el si ara permata, nyanyake keil ara, yo bok weika arye deklamak bukni, aning ara mitik teleb uka. Bukni, fia weik kel bikna deiyok ning ap, moubuka tenena deiyok ning ap ara, fia weik mambul ning ulule. Ninye arye, ‘Aning-aning nirya ara fia weik mambule ati ara, doproptibye,’ tenebuka patalul ning nirya ara, mitik mambul uk ulule. Allah arye ninye ati, fia weik kel bikna deiyok ning ap, moubuka tenena deiyok ning ap, arisilye ning ara, fia weik mambul ulule. <sup>16</sup>Weik kel bikna deice arye fia diksukum ning uk, moubuka tenepmunya deice arye, ouku weik tonap aripsiliba, fia kam unamlume. Weik kel bikna deiyok ning moubuka talimunyop ura, bon ayala-ayala ning nirya weika arye dopropmunce, bona utotoa talin nang unamlume. Tonda, yuk ninye nirya arye, anggun ti, ‘E, anang ara, mambul nang unyake’ tenen, si erenamsiake.

<sup>17</sup>Weik kel bikna deiyok ning dolonyak nang ara, kanye deibuka unamake. Tonda, aninye ara, yuk nang ati, yu upliba olana ap, yupu si dalana ap, malye kilana ap ara, kum unyake. Sik ap yuk ninye nirya ap, dukdongobuka neika teleb uk unyake. <sup>18</sup>Weik kel bikna deiyok ning moubuka talipmunyop ura, Allah arye ouku weik ton aripsiliba, kam fia unamlume. Teleb winin ning uk moubuka, mikip arye talinamak ninye ara, pin-pin asa arye kanye deibuka unamake.

**Allah el fia weik kel deice arye, tukwak mutuku ap, tukwak  
mutuku noutamak ulul ning nirya ap, kwepdeibuk**

<sup>19</sup>Allah el fia weik kel deice arye, tukwak mutuku ap, tukwak mutuku noutamak ulul ning nirya ap, kwepdeibuk. Aning atonun, elce, ‘Aning telebe, aning ara malye’ tenen, moubuka tenelamuka deice arye, im deice ulul ning ap, im noutamak ulul ning nirya, kwepdeibuk. <sup>20</sup>Allah el fia weik kel deice arye mek nirya kwepdeibukce, tuku dilikamukba

abisik arye, mek kutukuka balule. Atonun, mek fito dobuka, im deice dua noutamak deibukba, mok purwu tukwak mutuku nirya saklirye teleb ulule.

**Raja Salomo birye, el amutam ulamik ninye ati, 'Ilil una kumce, teleb uk unamak' tenen nyabuk yupu**

<sup>21</sup>Na mapu, anyapmasa ati, fia kum teniltonamlulume. Weik kel bikna deiyok ning ap, 'Aning ara telebe, aning ara malye' tenen, moubuka tenena deiyok ning ap ara, fia kum luba kinamlulume. Kel kibuka diksukum un ning uk umunce, anggun asing koproba babye moubuka kalikuka dilamunce unamlume. <sup>22</sup>Winipmunyop ura, Allah arye ouku weik tonap aripsiliba, fia kam unamlume. Winipmanto ara, ninye arye urasin teleb ning ngang karaklamak atonun, fia weik kel bikna deiyok ning moubuka talinamlulume.

<sup>23</sup>Winibuka umunyop ura, anggun ban bisik nirya babye, dipkoprop teleb aryuk banamlulume. Anggun keil yan dum duksiliba, kote kum sakanamlume. <sup>24</sup>Ati, anggun binuka mapnumunye talak ara, ton lukdamunce, ilil kum upnamsile. Tonda, alukunyan noutamak nirya ara, talye mangkau kanye bobuka, maplukuna uk unamlume.

<sup>25</sup>Tonda, anggun dam fia weik ikin ning ap, pirilen ning ap yalye talak ara, yuk ninye nirya sik ilil upliba, lukdakirye, kwarabuka bik-bik abuka banamake. Bik-bik abuka banamak bukni, sikda awininamle ning ati, ilil kum unamle. Aning atonun, anggun dam ara, talya karin arye fia weik mok piriripna mikip yanganamle talak ara, anggunce, 'Kume, Allah arye malye winin ninye ati wenebuka onmalce, unmala,' tenebuka ilil kum unamsile. <sup>26</sup>"Ilil kum unamsile," nyapmasina ara, urdem ati kum nyapsine. Ara, nu Ni Koproba Allah Yahweh arye, anggun ti melibuka kalikinamsile. Winipmanto ara, mana wena wemicak kapang mana mangkau arye banmalyak, wena tapu fum bisik wekliba youlamle atonun, kum upnamsile. Allah arye anggun ti, moubuka kalikinamsile ati, nyapsine.

<sup>27</sup>Imun kanye bobuka unyak ninye ati, eipmunce sik ti melipmanto ning aupmalyop ura, 'Melipnun do, kum do?' tenena kum dib aryuk, pi dobuka aninye ati melipnamlulume. <sup>28</sup>Yata ninye do nirya, anggun dam yakirye moropsikcop ura, anggunce aninye ati, "Arup ara daupmalye ani, ambusum nyapnamsin ati, kintinina uk upnamlume," nyana meme. Sik morobikce ning awapsilyop ura, amorobice sum uk, melibuka arina telebe.

<sup>29</sup>Anggun kwit capu, mining dam unyak nang ati, sik deiyok ton kum upmalibuk, 'Anang ati malye kipdeipnuyabe,' tenena meme. 'Sik talye mangkau kanye bobuka unmace nang ati, ititip singipmunyak' tenen, ayupu nyapsine. Ara, anggun dam unyak ninye arye, anggun ti, 'Anang

ara nun ti malye kum kilisinyak' tenebikirye, 'Anyaik nang ara, nun kwit capu koproba uka,' tenesinyake ati nyapsine. <sup>30</sup>Tonda anggun kwit capu nang arye, anggun ti malye kum kipdeipmasikibuk, anggunce sik ti fia weik yupu arye nyabuka, kum derenamlulume.

<sup>31</sup>Atonun, talima fum tam yu kanye bobuka, yu yupu nyanmalinye biti, 'Se, el unmal touk, nun babye atonun unamabe' tenen, tenena meme. Anggunce tonap tamubuka yu kilina kumce, batakuka namin kinamlulume. Tonda, aninye yu kanye bobuka unyak touk, anggun babye atonun, kum wininamlulume. <sup>32</sup>Aning ara, urdem ati kum nyapsine. Deiyok ara, anggun Ni Koproba Allah, el si Yahweh arye, sik malye winin ning uk talibuka unyak ninye nirya ati, 'Na like,' tenelule. Bukni, ninye ton diksukum winin ning uk, ulamak nang ara, Allah ap dukdongobuka unyakce, kam fia unamake. Winibuka unyak ninye ati, Allah arye tenelye ning laka nyalule.

<sup>33</sup>Aning atonun, malye unyak ninye, sik aik noutamak ara, Allah el si Yahweh arye wibuka malye kililule. Bukni, el nyalul touk, kanye talima lamapdongobuka unyak ninye ara, sik dam aulirye melibuka, sik ti fia teleb ulilule. <sup>34</sup>Tonda, ninye ton kanye talima erebuka unyak ninye arye, Allah ati, 'Elda mambul kume,' tenebikirye, el ti nalinyak ninye ati, Allah Yahweh arye, 'Aninye ara, na like ati ara, dadeptenge' tenen, eibuka batakalongolule. Bukni, sik talima darapdongobuka nimalyap asa, amutam unyak ninye ara, sik dam Allah ulirye melibuka, sik ti fia teleb kililule.

<sup>35</sup>Aning atonun, ninye ton fia weik kel bikna deiyok ning ap, teleb winin ning ap, upre bace nang ara, sik si teleb uk upra banamle. Yuk ninye nirya arye, anang eibikirye, 'Se, sikda mambul weik nang unyak' tenen, si erenamake. Bukni, sik malye ning uk ukirye, malye kibuka kekena kumce unyak nang ara, fia malye ning uk talibuka unamake. Winibuka ulamikiba, yuk ninye eibikirye, 'Anang ara, fia malye nang,' tenebikirye, eibuka mangkau kinamake.

**Raja Salomo birye, sik nin yapu ap, sik ni yapu ap, arye, "Sik mapu ati, 'Wininamlulume,' nyabuka, wenenamlulume," nyapdeibuk yupu**

**4** <sup>1</sup>Se, amapo, anggun ni yapu arye nyasinyak yupu nirya ara, fia moubuka kekenamlulume. Winibuka umunce, anggun ni yapu arye nyanyak yupu nirya ara, moubuka kekepmunyop ura, anggun kel bikna ning ara, fia weika arye kel bikinamlume. <sup>2</sup>Anyapmasina ara, talye ati kum nyapsine. Deiyok ara ani. Na arye anggun ti nyasinye yupu nirya ara, fia teleb yupu ati ara, anyasinye yupu ara anggunce talye kanye bobuka mangkau kina fia meme. Anggun kanye talima fum tam deibuka, tenina uk unamlume.

<sup>3</sup>Winibuka na mitikop arye na nin ap, na ni ap, sik aik ulamse talak ara, na ni el mi, el kanye delinanye ulamse. Aning atonun, na nin birye,

na ti, 'Na mi koproba,' tenelamnuke, na ti kanye fia delilamnuke. <sup>4</sup>Winibuka ulamse talak ara, na ni birye fia moubuka peterelamnuke. Na ni birye, fia moubuka peterelamnuke yupu ara, ani. Na arye an ti, nyakinye yupu ara, moubuka kekepmince, kanye talima fum tam deibuka, tenina uk unamlame. Tonda, ance na nyakinye yupu nirya ara, tonok ning babye, fia kum luba kinamyame. Na arye an ti, "Aning ara wininamlame," nyabuka nyamkise yupu ara, ninye taruk deice arye, 'Na tenen ning' tenen, talibuka bolamak ning atonun, tenebuka unamlame. Winipminyop ura, an fia kam unamlame. <sup>5</sup>Winibuka uminye talak ara, an fia weik kel bikna deiyok ning dopropralam talak ap, 'Aning telebe, aning malye' tenen, moubuka tenena deiyok ning ara, moubuka dopropralam talak ara, 'Na ni el yupu deice arye wenena yupu nyalamnuke ning ara, ani,' tenenamlyame. Tonda, ance, 'Ayupu ara talye yupu' tenen, doldonokna fia meme.

<sup>6</sup>Ance fia weik kel bikna deiyok ning ati bataknna meme. Fia tenenamlyame. Winipminyop ura, akel bikna deiyok ning arye, an ti fia melinamkile. Weik kel bikna deiyok ning ati, 'Aning ara fia weik mambule,' tenepniminyop ura, aning arye an ti, melibuka kalikinamkile. Winipkiliba, an kanye lamapdongobuka unamlame. <sup>7</sup>Anda, 'Weik kelye koproba unamne' tenen, patapkiliba fia weik mambul unamlam ning ara, ani. Min yuma ning ara, 'Weik kel bikna deiyok ning dopropranamne' tenen, pi dobuka enamlame. Tonda, yuk teleb ning ton dopropralam bukni, fia weik ikin ning ton ani. Ara, 'Teleb ning ani, malye ning ani' tenen, moubuka tenena deiyok ning ton dopropramlame.

<sup>8</sup>Ance, 'Weik kel bikna deiyok ning ara, fia weik mambule,' tenenamlame. Weik kel biknamlam ning moubuka taliminyop ura, aning arye an ti erelinamkile. Weik kel bikna deiyok ning ati, 'Aning ara fia weik mambule,' teneminyop ura, yuk ninye arye an ti, "Telebe," nyabuka, si erenamkiake.

<sup>9</sup>Yata ninye do nirya, fil fia teleb kibuka do bicop ura, yuk nang arye aninye sik si erena ati, yo kita sik kisok deice delinyake. Tonda, dekna weik kat ning, el si ara emas arye memebuka delinyak teleb ning, mahkota dobuka, fia weik ninye deiyok nang, Raja sik kisok deice delinyake. Aning winilamak touk, ance fia weik kel bikna deiyok ning ati, fia moubuka talimince, fil teleb kibuka dominyop ura, yuk ninye arye an ti, eipkikirye, si erenamkiake.

**Raja Salomo birye el mapu ati, "Diksukum  
bisik uk banamlulume," nyabuk yupu**

<sup>10</sup>Na mi anda, na yupu moubuka kekepnilyame. Na arye nyakinye yupu, fia moubuka kekepminyop ura, Allah arye an kam unamlam keteng tamun ara, ouku fia cang arye ariprabanamkile. <sup>11</sup>Minop talak na arye, 'Elda fia weik kel

bikina deiyok ning, weika arye kel kipnamle' tenen, peterelamkise touk, na arye, "Fia diksukum kam una deiyok bisik ara atia," nyabuka peterelamkise.

<sup>12</sup> Apeterelamkise touk kibuka ulaminyop ura, an bisik banamlam talak nirya babye, ikin ning ayala-ayala nirya arye, an banamlam bisik ara, kum sekenamkile. Tonda, ance, 'Wininamne,' teneminye ning nirya ara, fia kum sekenamkile. Winipmanto ara, an bik-bik abuka banamlam talak ara, keil yan dum dukliba saklamak touk, kum unamkile.

<sup>13</sup> Aning ati ara, minop talak na arye peterelamkise yupu ara, an moubuka tuba tenenamlyame. Ayupu ara, fia moubuka tenenamlyame. Deiyok ara, apeteren deice arye, an kam unamlam talak ara, ayupu fia melibuka kalikinamkile. <sup>14</sup> Winitalak arye dipdongobuka, doryanamle talak, upra banamlum talak nirya ara, sik malye winin ninye arye winilamak ning atonun, fia kum wininamlyame. Tonda, sik malye ninye arye winilamak ning, an ton eipmince, fia kum winilenamlyame.

<sup>15</sup> Winimince, anda aninye sik dam arye leibuka, fia yuk sukumuk unamlame. Unamlam talak ara, malye winin ninye sik winilamak ning eipmince, 'Sik wininyak ning ara, na ton winiptinye' tenen, 'Kanye talima bouku sukupkiliba, malye winipminyak' tenen, nyapkine. An kanye nirya ara, dobuka sik anang nong deice delina ara, fia meme. Tonda, an ti minop arye nyamkise yupu uk, talibuka dobolbanamlyame.

<sup>16</sup> Sik malye wininyak ninye ara, sik tenen ning, fia kum winipmacop ura, sik aik fia moubuka kum manyake. Wininyaka deiyok ara, sik anang ara, lukunyan babye, keteng noutam babye, berentam babye nirya ara, sik kwit capu dib tenena nang ati, 'Malye kipdeiptepeye' tenen, fia epra banyakce unyake. Ara, sik anang ara, yuk nang ati, malye kum kibuka deipmace talak ara, sik anang ara fia wi kum talilule.

<sup>17</sup> Sik amalye ning atibuk epra banyak nang ara, sik talibuka unyak ning ara, malye yu ning ap, malye wininyak ning nirya ara, kwaning ap, mek ap, dilamak atonun unyake. Dilamaka atonun unyakce, sik malye ning uk fia unyake. Tonda, yu nang arye kanye wangalamak mek, weika arye dibikiba, kanye wangabica deice arye, yu upliba yuk nang ati olamak touk, kibuka unyake.

<sup>18</sup> Wininyak bukni, sik diksukumuk unyak ninye ara, berentam keteng yalye talak ara, sika arye dawaplyani, keteng deiplirye, dirin ulamle touk unyake. Sik dib tenen ninye ara, tonok sum berekna deice arye, keteng deiplirye, dirina weik ulamle touk unyake. <sup>19</sup> Unyak bukni, sik amalye yu kanye bonyak ninye, sik banyak bisik ara, lukunyan bisik uk banyake. Ati, sik anang ara, ninye mangkau bisik bakiba, yan dum dukliba kote sakikirye, sik kel kum kilamak touk unyake. Aninye ara, 'Nun yan dum dukusila ara, ani,' kum tenenyake.

<sup>20</sup> Aning ati ara, na arye na mi an ti nyapdeiamkise yupu ap, tonda, wenen yupu deice arye, an ti nyamkise yupu ap, an amul deice arye

kekepmince, kel bikinamlyame. Ara, ‘Na ni birye, yata mambul yupu nyapnuni do?’ tenen, moubuka kekepmince, tenenamlyame. <sup>21</sup>Ayupu nirya ara, ance talye dobuka kum donokonamlyame. Bukni, an kanye talima fum tam fia moubuka delinamlyame. Ayupu nirya moubuka tenepmince, kalikelanamlyame.

<sup>22</sup>Aning ara, urdem ati kum nyapkine. Deiyok ara, ani. Na arye an ti, fia weik kel bikna ning ap, wenen yupu deice arye nyamkise ning ara, moubuka talibuka uminyop ura, Allah arye an kam unalam talak ara, ouku fia weik arye aripkiliba, fia kam upra banamlame. Winipmanto ara, uk dilamle ninye arye, ‘Obat dibikiba, uk lopropsilyop ura, kip unamap’ tenen, obat dilamak touk, na nyamkise yupu moubuka talipminyop ura, teleb uk unamlame.

<sup>23</sup>Ati ara, ‘Na mangkau arye malye winipnyak’ tenen, an talima fum tam fia kalikdamince unamlame. Ayupu nyapmasina ara, talye ati kum nyapkine. Deiyok ara, ninye arya kanye talima tenena deice aryuk banyake. Ati, an babye kanye talima tenena deice aryuk, ‘Abisik ara telebe, abisik ara malye,’ tenepmince, moubuka unamlame. <sup>24</sup>Winibuka ulamince, talye peteren yupu nirya ara, an si bam bol deice, ‘Ayupu ara nyanune,’ tenena meme. Aning nirya ara, minina yupu nyana ap, an kwit biti, ‘Lik’ tenena yupu nyana ap, nyabuka nyalamikiryte, ulamicak dam ara, batakmince, leibuka fia yuk sukumuk, unamlame.

<sup>25</sup>Ati an asing ara, ‘Talye-talye dipra banune,’ kum tenenamlyame. An asing dana-dana dipra bana kumce, pung bisik uk diprebuka banamlyame. An urasin menekuka banmalye bisik uk, banamlame.

<sup>26</sup>Abanamince, min kum binapminyete talak ara, ‘Nong bisik uk banune,’ tenebuka, an kanye talima fia moubuka tenenamlyame. Ance umince, moubuka tenemince, fil mikip arye piribuka donamlam ning nirya ara, nong upra banam kile. Tonda, sik malye unyak ninye arye unyak ning ara, ‘Na ton winiptinye,’ tenena kumce, an teleb uk uminyop ura, an wininalam ning nirya ara, fia teleb uk unamkile.

<sup>27</sup>Aning ati ara, yu kibuka malye unyak ninye ara, sik kanye arye, ‘Na ara diksukum bisik uk binun do? Kwalin bisik binun do?’ tenelalamak touk, fia kum wininamlyame. Tonda, an yan deice arye yanibuka, ‘Amalye ning dam binune,’ fia kum tenenamlyame. Teleb un bisik eibuka, akunum kel kipminyop ura, ‘Kwanim bisik binun do, sirik bisik binun do?’ fia kum tenenamlyame. Bukni, an amalye ning winina kumop ura, an adib aryuk, fia teleb diksukum ubuka, kam uk unamlame.

**Raja Salomo birye, “Talye ulamak kilapu ati, talye-talye yolana meme,” nyabuk yupu**

**5** <sup>1</sup>Na mapu anggunda, na yupu moubuka kekeplulume. Na arye anggun ti, ‘Aning ara telebe, aning ara malye’ tenen, fia weik kel

bikna deiyok ning deice arye, minop talak dorapce, nyapdeiamsise yupu ara, fia moubuka kekepmunce, tenenammlulume. Moubuka tenena deiyok ning deice arye, nyapdeiamsise yupu ara, anggun amul deice arye, winibuka kekepmunce, anggun nirya moubuka tenenammlulume.

<sup>2</sup>Ayupu nyapmasina ara talye ati kume. Ara, na arye anggun ti nyapdeiamsise yupu, moubuka tenina uk umunyop ura, mangkau arye malye kum unamlume. Teleb asa arye kel bikmunyop ura, ‘Teleb ning ani, malye ning ani’ tenen, moubuka dipdemunce, teleb ning uk talibuka unamlulume. Winibuka kel bikmunyop ura, anggun bimunce, yupu talinamluma nirya ara, fia weik kel bikna deice aryuk nyanamlume. Winipmunyop ura, mangkau arye malye yupu kum nyanamlume. Anggun si bam bol deice ara, yuk ninye arye, talye-talye yupu nyalamak touk, kum nyanamlulume.

<sup>3</sup>Ayupu nyapmasina ara, talye ati kum nyapsine. Deiyok ara, ani. Ara, sik ninye talye-talye yolalamak kilapu arye, sik si bam bol deice arye nyanyak yupu ara, madu mong mek dibikiba to teleb lelamle touk, yupu nyanyake. Tonda winipmanto ara, ninye arye minyak mek diklopmacak tilil arye, alap ulamle touk, akilapu arye nyalamak yupu ara, fia namin yupu nyabica deice arye, yukulonyake.

<sup>4</sup>Bukni, akilapu dam banyak nang ara, akilapu ap neika mabicop ura, aminyan talak nong upnamle ning ara, ikin weik ulule. Winipmanto ara, fia sik weik ning kapang mana mitu dibikiba, sik lelamle atonun, akilapu arye ninye kanye lilona yupu nyabikiba, ayupu kekebice nang ara, ikin weik ning sik nong deice unamle. Winipmanto ara, si dana-dana tam ulamle parang ya arye, ninye weik olamak touk, akilapu ap neika unyaka deice, akilapu arye ninye weik olamak touk, unyake. Ara, akilapu dam banyak nang ara, sik nong deice, ikin ning weik unamle.

<sup>5</sup>Sal arye talye-talye yolalamak kilapu ara, ninye dibikirye balamak sukumuk banyake. Akilapu banyak bisik uk dobolbanyak nang ara, akilapu ap, sik anang ap, neika uku din mutuku bisik uk banyake.

<sup>6</sup>Akilapu ara, ‘Kam una ati, diksukum bisik ara ani’ tenen, moubuka tenina kumce, kwanim bisik balamak touk, sik akilapu ara, diksukum bisik bana kumce, kwanim bisik uk banyake. Wininyak kilapu ara, ‘Nunda kwanim bisik banyaba,’ kum tenebikirye, talye kanye bobuka banyake.

<sup>7</sup>Ati ara, na mapu anggun nirya na arye nyapdeiamsise yupu, anggun adib aryuk moubuka kekenamlulume. Na si deice arye nyapdeiamsise yupu ara, talye kekeltakna kum unamlulume. <sup>8</sup>Sal arye talye-talye yolamak kilapu, sik dam arye leibuka, fia yuk sukumuk unamlulume. Tonda, el akil aik dam ara, fia kum unamlulume. Memepdakuka, fera sukumuk unamlulume.

<sup>9</sup>Anggunda, akilapu ap neika mapmumnyop ura, yuk nang arye, anggun ti, ‘Anang ara, teleb’ tenen, si erelamsiki bukni, aminyan talak



ara, anggun ti, 'Nun like,' tenenamsiyake. Oketeng tamun yupa weik deice arye, fil teleb ubuka dolamlumba, aning-aning nirya weika arye dolamunye bukni, akilapu ap neika mapmumnyop ura, yu nang arye yanuka dobuka tapu kouspikirye yupu lipsisiknamsiak talak ara, anggun talyamunye ning nirya babye, alapdopnamsiyake. Anang arye anggun ti bico kum tenepnamsiaka anya arye, ikin ning weik anggun nong deice delinamsiake. Minop talak arye, 'Nunda wininamabe,' tenelamlum ning nirya babye, nong kum upnamle.

<sup>10</sup> Akilapu ap malye-malye ulamunyo ura, anggun talibuka ulamunye ning nirya ara, yuk nang arye dibuka sirya daknamsiake. Tonda, anggun kwisi meka deice fil dolamunye ning ara, yuk mutuku nang, anggun kel kum bikamunye nang yakirye, aning nirya alapdopnamsiyake. Dopropsikirye, sik ning koproba atonun kipropnamsiake.

<sup>11</sup> Anggunda moubuka kekeplulume. Akilapu ap ansinibuka neika mapmumnyop ura, adeice arye, ikin weik uk dilamsilya ani, dipnumunye talak ara, anggun nong nirya ara, bol malye bobuka ekropnamsile.

<sup>12</sup> Anggun bol malye bobuka ekropsilyop ura, anggun nirya arye, 'Se, yata deiyok ati wenen yupu nyalamik bukni, kum kekelamse do? Tonda, yata deiyok ati, na kanye talima fum tam arye, wenena yupu ara, na like, tenelamse do?' tenelamunce, engenamlume.

<sup>13</sup> Tonda, 'Na ara yata ati na peteren nang arye nyapman yupu ara fia kum kekelamse do? Tonda, na peteren nang arye, nyapman yupu ara, amul deice arye fia moubuka kum kekelamse do?' tenelamunce, engenamlume. <sup>14</sup> 'Se, winitalak ara, malye weik winilamupe deice arye, ninye nirya bulubuka dinmasicak arye, sakuka poulbanyabe,' tenepdamunce, engenamlume.

<sup>15</sup> Winipmanto ara, ninye arye sik bidamnye arye, mek pu sukumuk mek kwebuka dilamak touk, anggun akunum domunye kilapu ap melipdamunce, neika uk unamlulume. Aning atonun, ninye arye, 'Mek dinamap' tenen, palibuka lokeibikiba, delilamle mekwen, sik bidamnye arye kwebuka dilamak touk, 'Na dopnamne' tenen moun dilamunye kilapu ati, anggun kanye tenen ning nirya ara, sik akilapu deice uk delinamlume. <sup>16</sup> Ninye arye, mek dina ati, deiamikiba delilamle mek ara, yata ati diklobikiba, ninye asik ulamikca deice talye-talye banamle do? Aning atonun, yata ati anggun domunye kilapu ati, yuk nang arye talye-talye alabuka dolonamsiak do?

<sup>17</sup> Anggun ap, anggun kilapu ap, anggun nong ara, anggun nang bitinye anggun mamun uka. Tonda, anggun ap, anggun kilapu ap, anggun nong ara yuk nang ap neika mana meme. <sup>18</sup> Ati ara, anggun wel ulamunye talak arye, taruk mourupsik kilapu ara, anggun kilapu koproba uka. Anya arye, akilapu atibuk bico tenepdamunce, unamlulume. Ara, anggun kilapu koproba atia. Anggunce anggun mining kilapu ati, teleb kibuka

melipmunyop ura, akilapu arye anggun ti, kanye deipsikirye, teleb ulinamsiake.

<sup>19</sup>Akam kilapu sik urasin teleb kibuka nelamikce talak, sik urasin ara, tuku deice balamle ning el si ara, kijang urasin teleb ulamle touk unyake. Ati anggunce anggun mining kilapu eipmunce, sik akilapu ati, kanye delinamlulume. Winipmanto ara, ninye arye kanye wangalamak mek dibikiba, kanye delilamak touk, anggunce anggun mining kilapu ati eipmunce, akilapu ati kanye delinamlulume. Atalak-atalak nirya ara, anggun kilapu koproba atibuk, neika ulamunce, kanye delilamlulume.

<sup>20</sup>Se, na mapu anggunda, yata deiyok ati, anggun kanye talima tenen ning nirya ara, yuk kilapu deice uk delinamlum do? Ninye akunum domlye bukni, akilapu arye yuk nang ap, talye-talye yolanyak kilapu ara, yata deiyok ati, akilapu ati anggun kanye delinamlum do? Tonda, ninye arye talye-talye yolalamak kilapu ara, anggunce akilapu ati, kanye deibuka irilamlum do?

<sup>21</sup>Ayupu nirya ara, talye ati kum nyanmasine. Deiyok ara ani. Ara, tukwak mutuku-mutuku nirya unyak ninye ara, sikce wininyak ning nirya ara, nun Ni Koproba Allah Yahweh arye, elisulule. Elisilirye, ninye wininyak ning nirya ati, 'Teleb ning ani, malye ning ani' tenen, yupu lipsisikuka bogolisulule. Aning-aning nirya disulula anya arye, tonok ning babye kum batakalule.

<sup>22</sup>Malye unyak ninye arye, sik malye wininyak ning deice arye malye winililanyake. Winipmanto ara, ninye arye wena tapu wemikiba, kapang mana mangkau arye wena fum bisik baliba, youlamle touk, sik malye unyak ninye arye, sikce sik bidamnye ati malye ulilanyake. <sup>23</sup>Sik anang dipnamaka ara, min yuma talak wenen yupu deice nyapdeiamik ning ara, moubuka kum tenelamika deice arye dipnamake. Sik bidamnye arye, moubuka kum kalikilalamikca deice arye, obdeipdakirye, dipnamake. Tonda, sik fia talye walwal arye ulamika deice arye, dipnamake.

**Raja Salomo birye, el mapu ati, 'Kanye moubuka tenilena  
kumce, malye winibicak' tenen nyabuk yupu**

**6** <sup>1</sup>Se, na mapu, yuk talak ara, anggun kwit capu nang tonoknye biti, anggunce anggun kum winipnamunye ning ati, 'Aning ara, na arye an ti, winibuka na aripnamkine. Tonda, winibuka melipnamkinarya,' nyabuka, talye kum nyaltakanamlulume. <sup>2</sup>Tonda, anggun kan-kan tonoknye birye, 'Winipnamkinarya,' nyabuka, talye nyaltakana deice arye, el bidamnye arye wena tapu youlalule. Winibuka youpdanamle deiyok ara, el mining si bam bol fum bisik uk, nyaltakalya deice arye, youpdanamle. Ati ara, anggun kayapu ati, talye nyaltakana meme.

<sup>3</sup>Bukni, anggunce anggun kayapu ati, anggun kum winipnamunye ning ati, 'Aning ara na arye an ti, winibuka na aripnamkine,' nyabuka,

talye nyaplopmunyop ura, teleb ulina ap, anggunce anggun bidamnye ati, lyelana ap ati, wininamlume. Anggunce talye nyaplopmunya deice arye, anggun kayapu nang arye, anggun ti tapu koulamak touk, akunum koupnamsiake. Ati, anggunce ayupu nyabuka, tilila nyaplopmalum ninye dam, minopce bimunce, 'Na talye nyamkisa anya arye, aning ton kum aripnamkine. Ati ayupu ara mangkau kinamlulume,' nyabuka yupu sekelongolbinamlulume.

<sup>4</sup>Aning ara, 'Yuk talak nyalbinamabe,' tenena meme. Adip aryuk minopce, anggun kwit capu dam bimunce, yupu sekelongolbinamlulume. Ati ara, anggun bimunce, asing kubuka mana meme. Atonun dikdik upsiliry, wi talepsiliba, binuka mabuka dikdik sena meme. Ati, anggunce, anggun kayapu ati, 'Na talya nyaplopse yupu ara, mangkau kinamlulume,' nyabuka yupu sekelongolbinamlulume. <sup>5</sup>Winipmanto ara, bai yua basam do, maka do, tapu wemikiba, tapu youplibuk, loplobuka balamak touk, tonda, 'Wena fum tam wekipyak' tenen, leibuka balamak touk, anggun babye moubuka dilamunce, unamlulume.

**Salomo birye, 'Fil dona nun like,' tenenyak nang ati, nyabuk yupu**

<sup>6</sup>Anggun fil dona lik ulamsil ninye ara, adib aryuk tulik arye fil donyak ning anyak dilbilulume. Winipmunce, 'Sikda yata wiribuka fil donyak do?' tenen kel biknamlulume. Tulik arye fia pi dobuka fil dolamak ning, kel bikmunyop ura, fia weik kel nang unamlume. <sup>7</sup>Tulik ara, sik fil donyak bukni, sik deiyoknye ton kum ulule. Tonda, "Fil ara winibuka dopnuyabe," nyananye ton kum ulule. <sup>8</sup>Bukni, sik tulik ara, dou li talak arye, din ning bulopdobikirye sik aik binuka, delilbalamica ani, akunum mok cena li uplyop ura, abinuka deiyamikce din uk dibuka, aik koproba uk unyake. Tulik ara, sik din ning bulubuka, delin talak uplyop ura, sikda bulubuka delinyake. Ara, 'Nun dinyap ning kum uplye talak ara, kum bulupdeipnamap' tenen, wininyake.

<sup>9</sup>Ati ara, anggun babye aning atonun uk, wininamlulume. Fil dona walwal arye maltakna uk ululnye bira, fia amaplopnalam do? Amaplopmaminya ani, dan talak buknaalam do? <sup>10</sup>El anye bira mapmalya ani bukliba, dikidik seplye talak ara nyalule, 'Mapmanu bukni, ila tuba wi talipmanila ati, tonap tamubuka mapnune,' tenepliry, taruk kisok ereipliry malule.

<sup>11</sup>Bukni el fia mana uk ululnye bira, aning-aning niry kum upliba, talye urdem uk ululce, aning-aning niry kum talilule. Winipmanto ara, ninye talye ubula dopra balamak nang arye, yuk nang beta kel kum kipmace, sukum ubula dopra balamak touk, afia maltakna uk ululnye bira, el talilul ning niry kum danamle. Winipmanto ara, yin talin nang arye, ninye on ning niry dopdobikirye, olbalamaka atonun uk, anye el talilye ning niry ara, adib aryuk minopce kum danamle.

**‘Malye ning uk wininamabe,’ tenenyak nang  
arye, wininyak ati, laka nyabuk yupu**

<sup>12</sup>Tonda, sik yu uplirye mun deilina ap, ubula dona ap wininyaka deice arye, minin yupu nirya bobuka balsusunmakirye, ayupu uk nyapra banyake. <sup>13</sup>Anye winilul ning ton ani. El pataplye ning ara, ‘Ubula doproprnun,’ teneplyop ura, asing ikre balule. Tonda, el ap yupu sisikinyak nang ati, asing iklirye, el kwit capu ati asing ikildongolule. Ton ning ara, el ubula dopmanto ning ara, ‘Aning ubula doproptinye’ tenen, pataplye talak ara, tikuka dipra banmalirye, el yan nimalyap asa yanibanmalirye, el ‘Se,’ teneplirye, dopropmanto ning dipra balule. Banmalirye, el dopropmanto ning eiplyop ura, el kwit capu ati, urasin odinmalirye, ‘Aning ara, adoproprnune,’ nyaplirye asing ikuka, el taruk mitik ton duknubuka taruk pukulule.

<sup>14</sup>El kanye fum tam ara, yu kanye bona ning uk ulula ati ara, el talima fum tam lyuna uk ululba, tilila ning uk panalule. El tenelye ning nirya ara, malye un ning uk tenelula anya arye, el balamle mutuku nirya ara, el malye ulye deice arye, yuk ninye nirya babye, kanye wilibuka bokolanyake. <sup>15</sup>Aning winilya ati ara, malye un ning talya karin arye, el deice uk yalirye, amalye un ning aniryuk, teikuka opliba, el nong ara kum danamle. Weik imun kanye bon ning anye, el nong deice akunum yalyop ura, ila tuba tonap teleb kum kipdeipdatue.

**Allah Yahweh arye, ‘Aning ara fia na like,’  
nyapdeiyamuk ning ati laka nyabuk yupu**

<sup>16</sup>Allah Yahweh arye, ‘Aning ara fia na like,’ nyapdeiyamuk ning ara, deiyok naku barye ulule. Tonda, deiyok tek barye ning ton, ‘Aning ara fia na like,’ nyapdeiyamuk ning ara, nyapnusine. <sup>17</sup>Tonok ning ara, kanye talima erelakirye, ‘Yuk nang ara, nun ti, sikda fia weik nang tenesinyake,’ tenelakirye, anang sik asing erebukabikirye, ninye kisok dup-dup dipribakiba, Allah el lik ulule. Bitinye ning ara, sitang deice arye tilila yupu nyanyak ninye ara, Allah el lik ulule. Winilye ning ara, deiyok ning ton kum upmalibuk, ninye sik taruk deice arye, oltakanyak ninye ara, Allah el lik ulule.

<sup>18</sup>Dum barye ning ara, ninye sik talima fum tam arye, ‘Malye unamap ning ara, winibuka malye unamabe’ tenen, patapliba, kintinilinyak ninye ara, Allah el lik ulule. Pamu barye ning ara, ‘Malye un ning ara, winilbinuyabe’ tenebikirye, bik-bik abuka balsusulamak ninye ara, Allah el lik ulule. <sup>19</sup>Naku barye ning ara ani. Ara, ninye yupu lipsisikuka bokolin talak ara, deiyok kum upmalibuk, minina yupu nyanyak ninye nirya ara, Allah el lik ulule. Tek barye ning ara ani. Tonok aik unyak mapu silip ara, tonoknye birye malye ulye deice arye, anyaik ninye

nirya arye, kanye wilibuka bokolanyake. Amalye yupu deiyok koubuka nyalulnye bira, Allah el lik ulule.

**Raja Salomo birye, el mapu ati, ‘Na nyapdeiamsise  
yupu moubuka talinamlulume,’ nyabuk yupu**

<sup>20</sup>Se, na mapuo. Na anggun ni birye yata wirin ning do nirya ati, ‘Aning ara wininamlulume, aning ara kum wininamlulume,’ nyapdeiamsise yupu ara, luba kina fia meme. Tonda, anggun nin yapu arye, yata wirin ning do nirya ati, ‘Aning ara wininamlulume, aning ara kum wininamlulume,’ nyalilamsik yupu ara, kum yaniptapnamlulume. <sup>21</sup>Anggun ni yapu ap, anggun nin yapu ap arye, ‘Wininamlulume, aning ara kum wininamlulume,’ nyalilamsik yupu nirya ara, moubuka kekepmunce, kanye fum tam deibuka unamlulume. Aning atouk, bace duk ngang dam karaklamak atonun, karakuka unamlulume.

<sup>22</sup>Anggun ti nyalilamsik yupu tuba tenebuka umunyop ura, ayupu aniryuk anggun banamlumak nirya ara, ‘Diksukum bisik ani, malye un bisik ani,’ tenebuka, kel bikinamlulume. Anggun mapnumunye talak ara, ayupu anyuk kalikuka melinamsile. Ara, anggun banumunye talak babye, lukunyan mapnumunye talak babye, bukuka banumunye talak babye, el dem arye talibuka basilirye, nyapri banamsile.

<sup>23</sup>Ati ara, wisi nang arye, ‘Winibuka unamlulume,’ nyalilamsik yupu ara, weisa ubikiba dirina ulamle touk, wisi nang arye nyalilamsik yupu ati, moubuka tenemunce, ‘Teleb un bisik ani,’ tenebuka, kel bikinamlulume. Tonda, wenen deice arye peteresinyak yupu ara, ‘Diksukum kam un bisik uk bakirye, malye kum unamak’ tenen, peteresinyake. Ayupu moubuka kekepmunyop ura, fia teleb uk unamlume.

**Salomo birye talye yolamak kilapu ati nyabuk yupu**

<sup>24</sup>Anggun ni yapu ap, anggun nin yapu ap arye, wenen deice arye peteresinyak yupu ara, ‘Diksukum kam un bisik uk bakirye, malye kum unamak’ tenen, peteresinyake. Ayupu moubuka kekepmunyop ura, talye-talye yolamak kilapu arye, yukulon yupu nyanyak ning ap, yuk nang domikce kilapu ap arye, kanye lilon yupu nyabicop ura, sik yupu fia kum kekenamlulume.

<sup>25</sup>Tonda na mapu, anggunce, talye-talye yolamak kilapu nong bol teleb kibuka urasin fia telebto upmaca ati, anggun kanye talima lipdopsiliba, fia kum tenenamlulume. Tonda, akilapu sik asing ikilanyaka deice arye, anggun kanye talima lipdoposiliba, ‘Malye winipmunyak’ tenen ati, fia moubuka kalikelanamlulume. Anggun kanye talima lipdopsikiba, eibuka dobolbimunyop ura, ‘Ara tapu koulongona atonun akunum kipnamsiake,’ tenenamlume. Ati winina meme, nyapsine.

<sup>26</sup>Talye-talye yolamak kilapu arye, yo bok morobikceba, ayo bok arilulnye bira, aminyan talak el talilamlye ning nirya kum daliba, fia bona utotoa talina kumnye unamle. Yuk nang domikce kilapu ap, neika malamice nang ara, sik fil dobuka dololamice ning nirya ara, kum uplya anya arye, ititinamle.

<sup>27</sup>Ura domon yupu ton nyapnusine. Ninye arye butum aling deice uku dinmatu yo lola deibuka takupdaka yangatop ura, uku arye el butum aling uku diptu do, kum do? <sup>28</sup>Aning atouk, ninye arye fia weik uku pakanmatu noutam yan yanibuka bitop ura, el yan uku arye diptu do, kum do? <sup>29</sup>Aning atouk, ninye ton anggun kayapu domikce kilapu ap neika mapmatiringba, yuk nang eibuka kel biktingop ura, ‘Amapmarak ning ara dauplye,’ tenebikirye, ‘Min kum wenepnuyabe’ tenen, batakanyak do, kum do? Kume, wenen uk upnamake.

<sup>30</sup>Ninye tonok, el din ning tonok ning babye kum wamliba, din ning ubula dopropmalinye bira, yuk nang eibuka kel kibikirye, anye biti, ‘Elda fia malinye,’ nyabuka, kum nyanyak bukni, tia ati wenebikirye, batakanyake. <sup>31</sup>Bukni, sik ubula uk dolonyak nang ara, yuk nang eibuka kel bikikirye, tongobuka tapu koubicop ura, nyanamake. ‘Anggunda, ubula dopropmalum touk, ila tuba tamubuka tonok ning uk kum aripnamsilyame. Anggunce, like tek barye deice arye, ila tamubuka arenamsilyame,’ nyabuka wenepnamake. Ati, sik ubula dolonyak nang arye, ubula dololamak ning, like tek barye deice arenamak deice arye, sik talilamikce ning nirya, kum kipdeibikirye, sirya dakdanamake. Sik aik koproba delilamikce ning nirya ara, kum danamle.

<sup>32</sup>Ninye ton sik kayapu domikce kilapu ap, neika malamice nang ara, fia walwal ninye unyak touk unyake. Yatanye birye do nirya, sikce yuk nang domikce kilapu neika mabice nang ara, sikce, sik bidamnye ati, ititildanyake.

<sup>33</sup>Aning atonun winilulnye bira, el bidamnye arye malye uplirye ikin ning delilanamle. Tonda, yuk nang arye, el wenena ati obikiba, dila weik upnamle. Anye bira, malye upliba, yuk nang arye el ti, ‘Anda fia malye ulyamnye,’ nyanamake ning ara, tuba nyanamaka ati ara, el anye bira, alye fia weik dakalanamle. <sup>34</sup>Anyapmasin yupu ara, talye ati kum nyapsine. Deiyok ara, ani. Ninye arye yuk nang domikce kilapu ubula dobuka neika mabicop ura, akilapu sik domikce nang arye, tuba anang ati, fia tenina uk unamake anya arye, anang ara kum batakanamake, fia tuba-tuba wenenamake. Akilapu sik domikce nang arye, sik malye wininyak nang ati, bico tenen babye, kum tenenamake.

<sup>35</sup>Tonda, akilapu ap neika mabice nang arye, akilapu sik domikce nang ati, “An ti malye winipkisa ati ara, teleb ning weika arye arenamkine,” nyaptua babye, akil domlya deiyoknye birye, el yupu fia kum kekenamle. Akil deiyoknye birye, amalye winiplinye biti, ‘Optinye’ tenena uk

unamle. Tonda, akilapu ap neika mabice nang, sik kayapu nang arye, akil deiyoknye binyak, 'Fia teleb arin ning, fia weika arye aripkitibyeba, nun kwit batakume,' nyabuka moroptinga babye, akil deiyoknye birye, ayupu fia kum kekenamle. Kil talye ubula yolana ara, fia malye weik winina ati nyapsine. Raja Salomo birye nyabuk.

**Raja Salomo birye, el mapu ati, "Anggunda talye-talye yolamak kilapu dam bana meme," nyabuk yupu**

**7** <sup>1</sup>Na mio, na arye an ti, "Wininamlyame," nyalamkisirye, "Teleb una ara ani," nyakunun yupu nirya ara, luba kina fia meme. An kanye talima fum tam arye, fia tenina uk unamlyame. <sup>2</sup>Anda na nyakinye yupu moubuka kekepmince, ayupu uk talibuka unamlyame. Winipmanto ara, ninye arye, 'Nun asing tulukdapyak' tenen, fia moubuka kalikilalamak touk, anda, 'Na ni birye nyanilye yupu ara, luba kipnyak' tenen, fia moubuka tenina uk unamlyame.

<sup>3</sup>Ayupu ara luba kipnyak' tenen, na nyakinye yupu nirya ara, sekuka an taruk koproba deice ketepdongobukapmince, unamlame. Ara, 'Ayupu tuba tenina uk unamne' tenen, unamlyame. Aning atonun, ninye arye mambul yupu sekukabikirye, 'Aning ara kum dasilyak' tenen, teleb ak delilamak touk, ance na nyakunun yupu dobuka, an kisok deice ap, an talima fum tam ap deipmince, fia tenena uk unamlame.

<sup>4</sup>Winipmanto ning ara ani. Sal arye, sik makal kilapu ati, 'Se, fia na bico tenenune,' tenelamak touk, fia weik kel bikna deiyok ning ati, 'Aning ara, fia weik mambule,' tenenamlyame. Aning atonun, anggunce anggun nong ninye ati, 'Weik arye bico tenenune,' tenelamlum touk, fia weik kel bikna deiyok ning ati, 'Aning ara, fia mambul ati ara, ayupu ara moubuka talinamne,' tenenamlyame.

<sup>5</sup>Weik kel bikna yupu moubuka tenepmince, fia talipminyop ura, ninye arye yo bok aribikirye, talye-talye yolamak kilapu, sik dam kum banamlyame. Aning atonun, yuk nang arye domikce kilapu arye, 'Nun neika utinimnye' tenen, teleb yupu nyabikirye, yukupkica babye, sik yupu kekena kumce, talye kanye bobuka, sik akilapu ap, neika una fia kum unamlyame. Memepdakuka unamlyame.

**Aik uk lamapdongobuka, dakeiyam asa kum bulamle kil ati, nyabuk yupu**

<sup>6</sup>Tonok talak ton, na aik koproba bukmasirye, jendela fum bisik arye dinmase. <sup>7</sup>Dinmasiba, kam nang weik ulamika noutamak arye, walwalnye tonok unmokba eipse. Anye bira, dipkoprop fia walwalnye ulamuk. Elda, 'Teleb winin ning ara ani, malye winin ning ara ani' tenen, moubuka tenilena kumnye ati ara, diksukum ubuka, kum ulamuknye ulamukba, eipse.

<sup>8</sup>Sintam kipmoka ani, akunum inibukce kunukukop ura, akamnye bira, yo bok aripna arye talye yolamik kil, ‘Sal arye yo bok aripnop ura, yolanamap’ tenen, kintinibuka tikilamak kilapu dam binmoke. Ara, ‘Atalya voltanyak kil el aik dam, binun’ tenen, banmokba eipse. <sup>9</sup>Awalwal kamnye unmokba, eipse talak ara, inipmokce, kunuknin banmok talak ara, akamnye bira, ‘Yuk nang arye kum eipnamniyak’ tenen, akil el aik dam banmokba eipse.

<sup>10</sup>Akil ara, fia darabuka, aik fum uk kum bulul kil ati ara, awalwal kamnye eibukce, ‘Anye ap neika maptinimye’ tenen, anye yanmok bisik, binuka epdarike. Akil ara, ninye kum domice bukni, talye voltalamak kilapu ongolamak butum aling ongopmokce, binmokba eipse. Akil el tenebuk ning ara, ani. Sal arye, na nong ap, na butum aling ap eibikirye, ‘Se akil ati yo bok aribibirye, yoptibye, tenenamniak’ tenen, el kanye talima fum tam ara malye winin ning uk tenyamukce, banmokba eipse.

<sup>11</sup>Akil ara, talima namin asa kibuka talye fia darabuka ulamuk kil kume. Akil ara, ilil ton kum ululce, ilil kanye fia bona kum kil ulule. Elda, el li yapu arye nyalamik yupu ton, fia kum kekelamukce, yaniltana uk ulamukce, fia weik yupu deice arye, “Anggunce nyanululum yupu ara na kum kekenamsine,” nyabuka malye weik ulamuk. Tonda, akil ara el aik koproba fia darapdongobuka kum ulul bukni, tuba balsusuna uk ulule.

<sup>12</sup>Akil ara, ‘Sal ton yukupnamne’ tenen, ton talak ara, ninye balamak bisikak uk, abinuka tikilule. Ton talak ara, anirye kisikdakuka ninye weik bulunyak sukum ap, bon-bona deklamak sukum ap, abinuka unmalya ani, ila tuba ton kisikdakuka, bisik dan-danya obinuka, ayanuka unmalya ani, batakuka balsusuna uk ulul kil ulule. Atalak ara talye ati kume. Ara, ‘Sal ton yukupniba, yo bok aripnica deice arye, yolanamabe’ tenen, winilule. <sup>13</sup>Winilul kil ara, atalak dinmasi bukni, ilil una kum dip aryuk, akamnye binuka talibuka iribukce, urasin mutubukce, talima lilon yupu nyabuka yukubuke.

<sup>14</sup>Asum ara, na si erenun ning si erena ati, teleb arin ning akunum arepmanue. Na si erenun ning ati, ‘Wininamne,’ nyabuka nyalin yupu nyapse ning ara, akunum winipmase. <sup>15</sup>Ati ara, na arye an elyanmakine. ‘Na ara anye ap, na ap neika utinimnye’ tenen, elyanmakin bukni, winitalak nun bitinye akunum epdanmanam ati, na kanye deipne. <sup>16</sup>Tonda, nun neika mapnamanam sukum ara, Mesir mutuku arye deklamak butum aling, urasin fia teleb, berwarna ning ara, na amsuna deice akunum deibuka kintinipmane.

<sup>17</sup>Winipmance, nintong fia teleb nyalamle ning, el si ara mur ap, cendana ap, gaharu yo atonun kayu manis ap, akunum purubuka deipse sukumuk mapnamaname. <sup>18</sup>Ati ara, na aik yangalyame. Arup ara, nun tenenyam touk kanye deibuka neika mabuka, yolanimanimnyani,



inipmalya bereknamale. <sup>19</sup>An ilil tenena meme. Na akanye bira, aik kum unmale. Elda fia pera mutuku biyuk ati, minopce tamubuka kum yanamle.

<sup>20</sup>Aning ara talye kum nyapkine. Elda yo bok fia weik bulubukabukce, el aling libuka biyuk ati ara, na kele, minopce tamubuka kum yanamle. Fia daulamlyani, owala noutamak uk tamubuka aik yanamle. Atalye-talya yoltalamak kil arye, walwal kamnye biti, nyabuka yukupdobukba, elce akil nyabuk yupu kanye deibuka kekebuk.

<sup>21</sup>Atalye-talya yoltalamak kil arye, akamnye biti, talima lilona yupu ap, kekena teleb yupu ap, tenepce arye nyabuka deice arye, anye adib aryuk yukupdobukba el aik birik. <sup>22</sup>El akamnye bira, moubuka kum tenebukce, akil nyabuk yupu kekebukce melibukba birik. Winipmanto ara, sapi basam opnamaca ati, bobuka banmace talak ara, asapi basam arye, ‘Na ara opnamaniyake atia’ tenen, beta kel kum kilul touk, winibukce, akil ap birik. Tonda, ninye arye, ‘Rusa basam tomopnamap’ tenen, mana wena webuka, kintinipmace sukum, rusa basam kanye bona kum aryuk, wena tapu wepmakcak, mangkau arye balibuk, youlamle touk, akamnye babye, moubuka kum tenebuka anya arye, akil ap birik.

<sup>23</sup>Akamnye bira, moubuka beta kel kum kibuka ati ara, winipmanto ara, rusa basam wena tapu wemikiba, youplirye tikamli bukni, binmanto kum ulamlop ura, ninye arye mal marabikiba, nong noutamak wekliba dibilamak touk ubuk. Akamnye birye, ‘Ikin weik ning upnamne arya,’ tenena kum dib aryuk, talye kanye bobuka, akil ap neika birik. Tonda ninye arye, ‘Maka mangkau arye balibuk, youpliba tomobibirye opnamap’ tenen, maka balamle bisik, maka youn ning deibikiba, mangkau arye abisik wekliba, youlamle atonun ubuk. Ara, maka arye, ‘Aning fum tam wekna arye, youpnilyop ura, tomobuka opnicake,’ kum tenelamak touk, kamnye babye walwalto winibuk. Akamnye birye, ‘Ikin weik ning upnamne arya,’ tenena kum dib aryuk, talye kanye bobuka, akil el aik birik.

<sup>24</sup>Ati ara, na mapu nirya ati, na arye, “Winibuka upnamlume,” nyabuka nyasinye yupu moubuka kekepmunce, kel biknamlulume.

<sup>25</sup>Anggun talye yoltanyak kil arye nyanamsil yupu ara, fia kum kekenamlulume. El malye ulye deice arye, anggun talima lilosulula ati ara, akil banamle bisik nirya, fia kum binamlume. El malye bisik uk banamle sukum ara, anggun ton abisik kirikuka, kum banamlulume.

<sup>26</sup>Sik talye yoltalamak kilapu arye, malye winilamaka deice arye, ninye fia weika arye, sik talima lipdobikiba, malye winin ning talibuka unyake. Akilapu ara, ninye fia weik, kum nukmanto yukulolamakba, sik yupu kekebikirye, malye unyake. Sikce ninye weik malye kililamak deice arye, dipkoprop ninye yupa fia kum nukmanto olinyake.

<sup>27</sup>Akil el aik ban bisik ara, ninye dilban bisik uk ulule. Akil el aik dam banyanyak nang nirya ara, aminyan dibikirye, diplamak ninye

anyak sukumuk binuka unamake. Ati, akilapu unyakak nirya ara, leipdopmunce, fia yuk fera sukumuk, binuka unamlulume. Raja Salomo birye, el mapu ati nyabuk.

**Kel fia weik bikna deiyok nang arye, “Ninye nirya, moubuka kel bikninge,” nyabuka nyasulul yupu**

**8** <sup>1</sup>Kel fia weik bikna deiyoknye elce, “Na yupu kekeplulume,” nyabuka nyalule. Tonda fia weik kel bikna deiyoknye elce, “Na yupu kekepnununyop ura, teleb kibuka un ning nirya, moubuka kel bikinamlulume,” nyabuka, fia weik yupu deice arye yukusulule. <sup>2</sup>El anye bira bisik bana lilunak mutuku taram deice ap, tonda bisik dandanya ap tiklirye, fia weik yupu deice arye yukusulule. <sup>3</sup>Tonda, fia weik kota mutuku asik dolamikke, antanabuka domik keil foka fum tam, wekelbanyak bublan dam nirya ap tiklirye, fia weik yupu deice arye nyasulule. Ati asukum arye nyasulul yupu ara ani.

<sup>4</sup>Se, na ara anggun ninye nirya arye, ‘Na yupu kekenamlum’ tenen, ayupu nyasunune. Aning atonun, “Anggun tukwak mutuku ululum ninye nirya arye, na nyasunun yupu ara, moubuka kekepmunce, kel bikipnululume,” nyabuka anggun nirya ati nyasunune. <sup>5</sup>Anggunda moubuka weika arye, kel bikna nang ara, min kum kel bikilulum ninye ara, na yupu moubuka kekepmunyop ura, teleb un ning, moubuka kel bikinamlulume. Aning atonun, anggun tuba walwal uk ululum ninye babye, na nyasinye yupu moubuka kekepmunyop ura, ‘E, teleb kibuka un ning ara ani’ tenen, nong bol deice ning kel bikna kum bukni, nong noutam ning ton, moubuka kel bikinamlume. Anggunda, yupu kekena kumce malye fia weik ninye ululuma anye arye, na nyasinye yupu moubuka tenenamluma deice arye, fia moubuka tenepmunce, teleb kibuka kel bikinamlulume.

<sup>6</sup>Na nyanun yupu ara, moubuka kekenamlulume. Ara, talye ati kum nyapsine. Deiyok ara, na arye nyasunun yupu ara, talye yupu kum nyaltakanun bukni, fia teleb yupu uk nyanuna ati ara, moubuka kekenamnululume. Na arye nyasunun yupu nirya ara, fia diksukum kibuka winin ning uk nyanuna ati ara, anggun nirya arye, moubuka kekenamnululume.

<sup>7</sup>Na ara talye tilila yupu peterelana, ‘Fia na like,’ tenenunye ununa ati ara, tilila yupu fia kum nyasunune. Ati ara, na arye nyasunun yupu nirya ara, fia dipkoprop un ning atibuk nyasunune. <sup>8</sup>Aning atonun, na si fum bisik arye nyasunun yupu nirya ara, diksukum kibuka un ning ati, dipkoprop yupu nyasunune. Malye yupu tonok babye ton, kum nyasunune. Kwalin yupu ap, tenepce arye malye nyaltakana yupu ap, ton fia kum peteresunune.

<sup>9</sup>Talye bol deice ning kum bukni, ikin yupu nong noutam ning ati, moubuka tenelinye birye, ‘E ayupu deiyok ara ani’ tenen, kel bikilulnye

bira, na nyanun yupu nirya ati, ‘Dib ayupu ara fia dipkoprop yupu uk nyapmale,’ tenenamle. Aning atonun, fia weik kel bikna deice arye, moubuka tenelunye bira, ‘Dib ayupu noutam ara, malye ning tonok babye, fia kum winilule. Ayupu nirya ara, diksukum yupu uk ulule,’ tenenamle.

<sup>10</sup>Ati ara, ton nang aryop ura, utenenyake. ‘Se, dekna weik ning, el si ara perak ap, urasin fia teleb ning emas ap ara, fia patasulula ati ara, aning uk elbanamabe,’ tenenamake. Bukni, anggun fia weik kel nang ara, aning kum tenenamulum. Fia teleb ning ara, na arye anggun ti, “Wininamlulume, aning ara fia kum wininamlulume. Fia teleb kibuka una ning ara ani,” nyabuka peteresinye yupu dopropmunce, aning uk talibuka unamlulume. Fia teleb ning ara akunuma.

<sup>11</sup>Na arye fia weik kel bikna yupu nyasununa ara, mambul weik ulule. Ninye arye, ‘Se, dekna weik keil, el si ara permata ap, batu delima ap ara, fia telebe,’ tenenyake. Bukni, na arye nyasunun yupu ara, dipkoprop fia weik mambul ulula ati ara, yuk dekna weik ning nirya ara, mambul kum ulule. Anggun patan ning ayala-ayala nirya ara, mitik mambul ulul bukni, na arye fia weik kel bikne yupu nyasununa ara, fia weik mambul ning uk ulule. Ati, ayupu nirya ara, ‘Se ayupu moubuka kel bikbtibye’ tenen, patalibuk, fia tenina uk unamlulume.

<sup>12</sup>Kel fia weik bikna deiyok ning ap, tonda, ‘Talye lukparabuka winilelamice ak, mangkau arye malye winipnuyap’ tenen, moubuka tenena deiyok ning ap, neika ururake. Na arye fia weik kel bikna ati, nyasinye yupu moubuka tenina uk umunyop ura, fia weik kel bikna deiyok ning ap, ‘E, diksukum una ati, bana teleb bisik ara ani’ tenen, deiyok ning ap dolonamlulume. Kel fia weik bikna yupu, kel biknumunyop ura, moubuka tenen ning babye, dolomunce, fia weik kel nang uk unamlume.

<sup>13</sup>Allah Yahweh ati, ilil upliba, el si uk erenyakce, el tam uk si erenyak ninye nirya ara, ‘Malye winin ning nirya ati, nun like,’ tenekiry, batakanyake. Na ara fia weik kel bikna deiyok ning arina deiyoknye ununa ati ara, na arye, ‘Aning ara na like,’ tenenun ning ara ani. Ara, malye winin ning uk, talibuka unyakce, sik talima erelanyak ninye ap, erepdanuka kwalibuka kwalina deice uk unyak ninye ap, tenen arye malye yupu nyaltakanyak ninye ap, malye ning ayala-ayala nirya, talibuka unyak ninye ap, sik nirya ati, yu uniliba, ‘Na fia like,’ tenenune.

<sup>14</sup>Na ara, fia weik kel bikna deiyok ning arina deiyoknye ununa ati ara, “Teleb un ning ara ani, malye un ning ara ani. Diksukum un ati, banamlum bisik ara ani,” nyabuka lak lena deiyoknye unune. Tonda, ‘Ado, ado?’ tenena fia kum dib aryuk, diksukum kibuka uniry, ninye ati yupu lipsisikuka bokolina deiyoknye unune. Tonda, fia weik kel yupu nong noutam ning babye, na kele. Bol deice ning kum bukni, na ara fia weik kel bikna deiyok ap, fia weik mikipnye ap, unune.

<sup>15</sup>Ninye deiyok kibuka, talinyak nang Raja-Raja nang nirya ara, na arye fia weik kel bikna deiyok ning, sik ti aripnyop ura, adeice arye, sik amutam unyak ninye nirya ati, teleb kibuka talinyake. Na arye fia weik kel bikna deiyok ning aresununa deice arye, yuk deiyok fil talibuka, donyak nang nirya babye, moubuka tenebikirye, sik amutam ninye ati, “Teleb kilin ning ara ani, malye winina ning ara ani. Aning ara, wininamlulume, aning ara fia kum wininamlum,” nyabikirye, mem yupu ap, wenena yupu ap, teleb ning uk sekelinyakce, talisinyake.

<sup>16</sup>Dan mutuku do nirya, sik fia weik deiyok kibuka talinyak nang nirya ap, fia weik ninye deiyok Raja kibuka, talinyak nang ap, sikce deibikiba, dadeipdanin, banamak ninye talinamak ninye deiyok nang nirya ap ara, na arye fia weik kel bikna deiyok ning, arinuna deice arye, sik amutam unyak ninye talibuka unyake.

<sup>17</sup>Sikke na ti patapliba, ‘Se, fia weik kel bikna deiyok ning ton doproptibye’ tenen, tuba teneninyak ninye ara, na arye sik ti bico tenenirye, melinune. Tonda, yata mutuku ninye do nirya, sikce, ‘Se fia weik kel bikna deiyok ning doproptibye’ tenen, na ti patapliba, fia pi dobuka, eninyak ninye ara, dipkoprop sikce fia weik kel bikna deiyok ning, akunum talibuka unamake.

<sup>18</sup>Kel fia weik kina deiyok ning tenebuka unyak ninye ara, bon-bona ap, dekna weik ning ayala-ayala nirya ap, doprobikirye, teleb kibuka ukiba, yuk ninye nirya arye, anang sik wininyak ning eibikirye, kinamake. Kel fia weik bikna deiyok keca moubuka tenekirye, diksukumuk unyak ninye ara, dekna weik ning fia ati aupliba sikce talinamake. Sik talinamaka ara, min kum danana kum upnamle. Tonda, sikce wininamak ning nirya babye, fia teleb uk unamle.

<sup>19</sup>Talye tukwak ninye arye, ‘Se, dekna weik kat ning, el si ara emas ap, perak ap ara, fia teleb ning uk ulul,’ tenenyake. Bukni, na arye dipkoprop nyapsine. Kel fia weik bikna deiyok ning tenebuka unyak ninye arye, dolonamak ning ara, fia teleb uk unamle. Emas ap, perak ap ara, mitik teleb ning uk ulule. Bukni, fia weik kel bikna deiyok ning moubuka tenekirye, diksukumuk unamake deice arye, dolonamak ning nirya ara, fia mambul weik ning ulule. Yuk teleb ning nirya ara, mitik teleb ulul bukni, fia weik kel bikna ning, moubuka tenenyak ninye arye, dolonamak ning ara, fia weik mambul ning ulule.

<sup>20</sup>Na banun bisik ara, fia teleb diksukum un bisik atibuk, melibuka banune. Tonda, na yan yanibuka banun bisik ara, diksukum un bisik atibuk banuna ati ara, ninye yupu lipsisikuka bokolin ati ara, “Teleb unmalum nang ani, malye unmalum nang ani,” nyabuka, fia diksukum kibuka, ninye ati yupu lipsisikuka bokolinune. <sup>21</sup>Kel fia weik bikna deiyok ning ati tuba tenenyak ninye ara, na arye sik ti, fia bona weik talin ninye kipdeipniba, dekna weik ning weika arye talibuka unamake. Tonda, na arye aninye ati, bon-bona delin aik weik langdipnamle.

<sup>22</sup>Minop talak Allah arye, aning-aning nirya min kum kwepdeiyamuk talak ara, Allah Yahweh arye, ‘Kel fia weik bikna deiyoknye’ tenen, wepdeiamnuke. Ara, fia min yuma talak Allah arye, el taruk koproba arye talibuka, fil donamik ning nirya ara, tonok ning babye, min kum domuk talak arye, ‘Kel weik bikna deiyoknye unamle’ tenen, wepdeiamnuke. <sup>23</sup>Allah arye, mutuku-mutuku nirya min kum kwepdeiyamuk talak arye, na ara min yuma akunum wepdeiamnuke. Tonda aning-aning nirya min kum wamuk talak ara, Allah arye akunum kwepdeipnukce, wepdeiamnuke.

<sup>24</sup>Allah arye, fia weik pala laut mekwen nirya, min kum kwepdeibukba, laut mekwen kum deiyamuk talak arye, na ara min yuma kwepdeiamnuke. Tonda, mek pu ap, balamle mek ayala-ayala nirya ap, min kum kwepdeiamuk talak arye, na ara min yuma kwepdeiamnuke. <sup>25</sup>Allah arye mutuku-mutuku nirya min kum kwepdeiamukce, kum bukamuk talak arye, na ara minopce kwepdeiamnuke. Tonda, mutuku dup kon nirya kum wamuk talak arye, na ara akunum kwepdeiamnukba, aulamse.

<sup>26</sup>Tonda, fia weik mutuku-mutuku nirya min kum kwepdeiyamuk talak arye, na ara minopce kwepdeiamnuke. ‘Ninye arye wa wipnamak’ tenen, wa tuku min kum kwepdeiamukce, teleb kum kipdeiamuk talak ap, tonda tuku butbuta min kum kwepdeiyamuk talak ap arye, Allah arye na akunum kwepdeiamnukba, aulamse.

<sup>27</sup>Allah arye im alip tam ap, im deice ulul ning nirya ap, kwepdeibuk tam ara, na akunum aulamsa anya arye eipse. Aning atouk, fia weik laut mekwen deiamukak arye wilibukce, fia weik laut mekwen yuk-yuk delina ap, mutuku sirya, im sirya kwepdeibuk talak babye, na aunmasirye, dinmasibuk winibuk. <sup>28</sup>Tonda Allah arye, ‘Daud bira, im alip tam unamle’ tenen, kwepdeibuk talak ara, na aunmasirye, dinmasibuk winibuk. Aning atouk, fia weik laut mekwen karu fum tam noutamak kutukuka balamle mikip mek pu dona nirya kwepdeibuk talak babye, na aunmasirye, dinmasibuk aning nirya kwepdeibuk.

<sup>29</sup>Allah arye, ‘Weik pala laut mekwen deilinak ara, asukum uk deipnamle’ tenen, amek ati, “Anda na arye kwepdeipkinak uk, asukum uk deipnalame. Yukak ton leibuka kum deipnamlame,” nyabuk talak ara, na aunmasirye, dinmasibuk winibuk. Tonda, “Tukwak mutuku amutam buknamle’ tenen, fia weik mutuku yangan keil nirya, kwepdeibuk talak ara, na babye aunmasirye, dinmasibuk winibuk.

<sup>30</sup>Atalak noutamak nirya ara nara, Allah el fil melinanye atonun ulamsirye, na fia weik kel bikna deice arye dilamsibuk, aning-aning nirya kwepdeiyamuk. Allah el dam asum-asum nirya tikuka dilamse talak nirya ara, kanye deibuka, teleb uk ulamse. Allah ara, na dam ulamukba, nun neika ulamnuma ati ara, pin-pin asa arye, kanye deibuka

ulamse. <sup>31</sup> Aning atonun, Allah arye tukwak im sirya, mutuku sirya nirya kwepdeibukba, dilamsirye, fia na kanye deibuka ulamse. Tonda, Allah arye tukwak im sirya mutuku sirya nirya unyak ninye kwepdeibuk talak ara, na ton dilamsirye, kanye deibuka, fia pin-pin asa arye ulamse.

<sup>32</sup> Ati ara, anggun na mapu nirya ap, anggun kam nang nirya ap ara, na nyasinye yupu moubuka kekenamnululume. Yata ninye do nirya, na arye, “Wininamlulume, aning ara kum wininamlulume. Teleb kibuka un ning ara ani,” nyalisinye yupu moubuka kekebikirye, talibuka dobolbana uk, unamak nang nirya ara, Allah arye melipliba, fia teleb uk unamake. Allah arye aninye nirya ati, kanye deiplirye, teleb ulinamle.

<sup>33</sup> Na arye, anggun ti, “Winibuka unamlume. Teleb kibuka un ning ara ani,” nyabuka peteresunun yupu ap, wenena yupu deice arye, nyasunun yupu nirya ap ara, moubuka talipmunce, unamlume. Ayupu ara, fia kum bataknamlum bukni, asok deice fia deipnamlulume. “Ayupu ara, talye yupu ati ara, dauplye,” nyabuka yanina meme. Na nyasinye yupu moubuka talipmunyop ura, dipkoprop fia weik kel kibuka, teleb uk unamlume.

<sup>34</sup> Yatanye do nirya, na nyanye yupu kekelulnye bira, ‘Se ayupu tonap kekeptinye’ tenen, fia pin-pin kanye bobuka ulirye, na aik dam yanuka kekelyanganamlanye bira, Allah arye melipliba, teleb uk unamle. Winipmanto ara, na nyanye yupu kekena ati, asum-asum nirya, na aik bublan dam yanuka bukuka kekeplirye, ‘Yata teleb yupu ton yanuka nyapnamanil do?’ tenen, tuba moubuka kalikinamlanye bira, Allah arye, anye biti melipliba, teleb uk unamle. <sup>35</sup> Yatanye do nirya, ‘Kel fia weik kina deiyok ning doproptinye’ tenen, na ti fia pi dobuka, enululnye bira, na ap epdanimnyop ura, anye bira, kam una deiyok ning ton dolonamle. El anye bira, Allah Yahweh arye, kanye deibuka melipliba, fia teleb uk unamle.

<sup>36</sup> Bukni, yatanye do nirya, ‘Kel fia weik kina deiyok ning, na walwal’ tenen, na ap kum epdanimnyop ura, elce el mining nong ati, malye kililalule. Aning atonun, na ara fia weik kel bikna deiyok ning ati, ‘Aning ara na like’ tenen, na ti batakaninyak ninye nirya ara, dipkoprop dipna deiyok ning atibuk, kanye delinyake. Aning atibuk, kanye delinyak ninye ara, ‘Dibina deiyok ning doproptibye’ tenen, patalibuk sik bidamnye arye, kintinilinyake.

Kel weik kina deiyok ning arina deiyoknye birye, ninye tukwak ninye nirya ati nyabuk.

#### Weik kel bikna deiyok ning ati, nyabuk yupu

**9** <sup>1</sup> Ura, winipmanto yupu ton nyapnusine. Ninye arye sik kwit capu melina ati, yukubikirye, teleb ning arelbalamak touk, ‘Kel fia weik kina deiyok ning ara, ninye nirya doproprnamak’ tenen,

akunum kintinipdeipsuke. Ninye arye, ‘Fia teleb aik dopnuyap’ tenen, kintinina ati, ayukumna yo tek barye ikikirye dobikiba, anyaik fia tunim alamle touk, ‘Kel fia weik kina deiyok ning ara, ninye nirya yanuka dopronamak’ tenen, akunum kintinipdeipsuke. <sup>2</sup>Winipmanto ara, ninye arye, kam ning obuka sekikirye, anggur tapu duk mek ap tabakuka deibicop ura, kwalya kwalibuka deibuka, din dipnamaca ati, kintinibuka delilamak touk, fia weik kel bikna deiyok ning, akunum kintinipdeipsuke.

<sup>3</sup>Tonda, fia weik kwalya kwalina deiyok nang arye, ‘Ninye weik yakiba, neika din dipnamap’ tenen, sik amutam fil don nang dopreibikiba, sik dana-dana tam unyak mutuku ninye nirya ati, yukulbanyake. Aning atouk, ‘Kel fia weik bikna deiyok ning ara, ninye nirya dopronamak’ tenen, akunum kintinipdeipsuk. Ara, weika arye erebuka bukuk mutuku deice, welebuka tikmakirye, mutuku-mutuku outam unyak ninye kekena ati, fia weik yupu deice arye, “Anggun nirya yamunce, kwalipmace din dilyalulume,” nyabuka yukulamak touk, fia weik kel bikna deiyok ning arina deiyoknye birye, ninye nirya ati, “Anggunda yalulume,” nyalule.

<sup>4</sup>Yata ninye do nirya, tuba walwal asa unyak ninye ati, nyalule. “Anggunda fia weik kel bikna deiyok ning, min kum dololuluma ati ara, na dam yamunba, na arye aning arenamsine,” nyalule. Aning atouk, ‘Teleb un ning ani, malye un ning ani’ tenen, moubuka tenina kumce, teleb asa arye kum unyak ninye ati ara, ayupu nyalule.

<sup>5</sup>Ninye arye fia weik kwalya kwalibuka deibikirye, sik kayapu ati, “Anggun nirya yalulume. Yamumce, fia teleb din ning, ayala-ayala nirya kintinipdeipsi ning ap, na arye anggur mek purubuka tabakuka deipse ning ap ara, yanuka dipnamlume,” nyabuka yukulamak touk, fia weik kel bikna deiyok ning arina deiyoknye birye, sik walwal asa unyak ninye nirya ati, “Amapo, ‘Kel fia weik deiyok ning aripnamsin’ tenen, kintinipdeipse ning ara, anggun dolyalulume,” nyabuka yukulule.

<sup>6</sup>Ayupu ton nyalule. Na dam yamunce, fia weik kel bikna deiyok ning, akunum dopropmumnyop ura, aning uk moubuka talibuka upmunce, anggun walwal arye winilamlum ning nirya ara, adib aryuk bataknamlulume. Winibuka aning nirya batakmunyop ura, fia weik kel bikna deiyok ning uk, talibuka umunce, teleb ubuka un ning nirya ara, kel kipra banamlulume. Aning uk talibuka umunce, fia teleb ubuka fia kam uk unamlume. Tonda fia diksukum un ning uk, kel bikmunyop ura, abisik uk melibuka dobolbanamlume.

<sup>7</sup>Bukni, yatanye do nirya, yuknye birye malye yupu uk nyapliiry, teleb kibuka un ning ati, “Aning ara talye ning uka,” nyabuka, yep-yep nyalulnye biti, “Anda malye unmalama anya arye, aning bataknamlyame,” nyabuka weneplyop ura, amalye yupu uk nyalulnye birye tamubuka, el wenenmalinye biti, el nong deice malye yupu nyalinamle. Aning atouk,

yatanye do nirya, malye ning uk talibuka unyak ninye ati, “Anggun malye ululum ning nirya bataklulume,” nyabuka wenebicop ura, sik malye un ning uk talibuka unyak ninye arye, yu upliba awenen yupu nyanyak nang ati, tamubuka opmanto ukiryee, sik nong deice ikin ning uk delinamake.

<sup>8</sup>Ati ara, malye yupu uk nyanyakce, teleb kibuka un ning ati, “Aning ara talye ning uka,” nyabuka, yep-yep anyak ninye ati, “Anggunda malye unmaluma ati ara, aning bataklulume,” nyabuka wenena meme. Sikce, yep-yep anyak ninye ati, wenepmumnyop ura, sik anang arye, anggun ti yu upliba, ‘Sikda nun like,’ tenenamsiake. Ati, awininyak ninye ati, ‘Sik daunmanyak’ tenen, bataknamlulume.

Bukni, ninye ton teleb un ning uk kel kibuka unyak ninye ati, sikce malye ubikiba, wenebuka lepsisikmumnyop ura, anang arye kanye deibuka kekenamsiake. Aninye arye, ‘Se, sik wenepmasiaka deice arye melibuka teleb ulinmasiake’ tenen, anggun ti, ‘Aninye ara, nun kanye deibabe’ tenen, bico tenepsikiryee, weika arye tabakuka kanye arenamsiake.

<sup>9</sup>Aning atonun, ninye ton teleb kibuka uliryee, fia weik kel bikilulnye biti, “Winibuka unamlame, teleb kibuka un ning ara ani,” nyabuka lipsisikuka peterepmunyop ura, elce tonap fia weik arye tabakuka kel biknamle. Tonda, diksukum un ning uk, talibuka unyak ninye ati, teleb ning ton tabakuka peteremunyop ura, aninye ara dipkoprop fia weik arye kel kibikiryee, teleb un ning uk, tabakuka upre banamake.

<sup>10</sup>Kel fia weik bikna deiyok ning deiyok kibuka, kel kipnamak ninye ara, Allah Yahweh ati, ‘Elda fia weik mambulnye ulule,’ tenebikiryee, ilil upliba, el si uk fia erenyake. Allah ati ilil tenenyak ninye ara, akunum deiyok kibuka, fia weik arye kel kiprebanamake. Tonda, Allah elda malye ning tonok ning babye kum uliryee, fia Diksukumuknye ulula anya arye, el nyalul yupu ap, el ulul ning ap kel kibikiryee, aning uk talibuka dobolbanyak ninye nirya ara, fia weik arye kel kiprebanyake. Kel fia weik kina ning ati, bol deice uk kum bukni, nong noutam ning nirya babye, moubuka tenenyake. <sup>11</sup>Kel fia weik kina deiyok ning, talibuka kel kiprebanamak ninye ati, sik kam unamak talak ara, ouku tonap cang arye unamake. Tonda, sik kam unamak talak nirya ati, keteng tamun tonap tabakuka arepliba, kam upre banamake.

<sup>12</sup>Akel bikna deiyok ning, moubuka kel bikmunyop ura, anggunce, anggun bidamnye atibuk, teleb winililanamlume. Bukni, yata ninye do nirya, sikce fia weik kel bikna deiyok ning ati, ‘Na like, aning nirya ara, talye ning uka,’ tenebikcop ura, sikce sik mining atibuk, malye kililanamake.

### **Talye yoltanyak kilapu arye, nyanyak yupu ati, nyabuk yupu**

<sup>13</sup>Walwal asa una deiyok ara, talye yolanyak kilapu atonun ulule. Ara, winipmanto ara, moubuka tenena kum kilapu ara, alye una fia kum dib



aryuk, fia weik arye, talye-talye yupu uk weik nyanyake. Sik akilapu ara, kanye bona kumce, walwal asa unyakce nyanyake. Bukni, sikda moubuka tenilena kum kilapu anya arye, ‘Na ara walwal uniryte, talye yupu uk nyabuka unune,’ kum tenenyake. <sup>14</sup>Atalye-talya yupu nyaltakanyak kilapu, sik bunyak sukum ara, kon deice bukikirye, outam ninye aik domicak eibikirye, sik aik bublan dam, delilamak teleb bun ning deice bukikirye, outam ninye aik dolamikcak dilamikiryte, outam aik unyak nang ati, malye yupu weik nyanyake.

<sup>15</sup>Ara, winibuka bunyak kilapu arye, outam asik dolamikak bisik banyak nang, sik yukulon ati kanye talima, lilon yupu weik nyanyake. Aninye kan-kan ara, teleb kibuka un ning aulul bukni, moubuka tenina kumce, ‘Nunce nun bidaman uk tenenyap ning uk, talye lukparabuka wininamabe,’ tenenyak nang ara, akilapu nyanyak yupu kekebikirye, sik talima lipdopliba, abisik uk dobolbanyake.

<sup>16</sup>Akilapu arye, sik fia weik kel bikna deiyok ning, moubuka beta kel kum kinyakce, walwal tuba unyak nang ati, nyanyake. “Anggunda nun aik yamunyeba, nunce anggun patasilye ning arenamsiabe,” nyabuka yukulonyake. Aning atonun, “Teleb un ning ani, malye winin ning ani’ tenen, moubuka kum tenebikirye, teleb kibuka, kum wininyak nang ati ara, ayupu nyanyake.

<sup>17</sup>“Amapo, ubula dobuka deiyamikce, mek dibikiba, fiato teleb lelamle touk ulule. Aning atonun, roti kwaning duknubuka dibikiba, fiato weik nyalamle touk, ulule. Aning atonun, anggunda nun aik duknubuka yamumnyop ura, kanye deibuka unamlume,” nyabuka yukulonyake.

<sup>18</sup>Winibuka talima lilon yupu nyanyak bukni, akilapu arye nyanyak yupu kekebice nang ara, fia moubuka beta kel kum kinyake. Ayupu kekebice nang arye, kum tenenyak ning ara ani. Ara, minop talak arye, sik talye yoltanyak kilapu dam binuka, neika ulamik nang niryte ara, akunum diplomikba, dibinyak ninye kanya wekelbalamak sukumuk, unyake. Ara, sik malye winin ning uk, weik winilamica deice arye dipnin bilamika ati, malye sukumuk kintinibuka wekelbanyake. Ati ara, ‘Anggun kanye moupnamlulume’ tenen, nyapsine.

**Salomo birye kam nang ati, ‘Teleb kibuka unamak’ tenen, nyabuk yupu**

**10** <sup>1</sup>Raja Salomo birye teleb yupu nyabuk ning ara ani. Fia kel weik bikikirye, teleb kibuka upra banamak mapu niryte ara, sik ni yapu arye, amapu ati, fia kanye delinyake. Bukni, malye ning uk winipra banamak mapu ara, sik winipra baca deice arye, sik nin yapu ati, malye kipdeibikiba, sik nin yapu koprop ara, talima uk dinamle.

<sup>2</sup>‘Bon-bona weik ning talibuka ubirye, kanye deibuka unamabe,’ tenekiryte, tilila yupu ap, tenepce arye nyana ap, ubula dona ap deice arye, dekna weik ning dolonamlum ning niryte ara, nong ton fia kum

upnamsile. Malye uk upnin banamsile. Bukni, malye un ning nirya ati, 'Na like,' tenebuka batakikirye, diksukum un ning uk, talibuka unyak ninye ara, sik nong dibica babye, kam fia unamake.

<sup>3</sup>Winibuka, malye un ning batakikirye, teleb un ning uk upre banamak nang ati ara, Allah Yahweh arye, melibuka kalikilya anya arye, din patana ap, ikin kanye bona ap, fia kum unamake. Bukni ninye ton, 'Malye uk winipribanamap,' tenenyak nang ati ara, Allah arye, 'Aning ara, na like,' tenelirye, sik patan ning kum arilule.

<sup>4</sup>Ninye ton, 'Fil dona na like,' teneplirye, talye kanye bobuka talya-talya urdem uk balamlanye bira, aning-aning nirya talibuka kum unamle. Elda bon-bona talina kumce, fia bona utotoa talina kumnye unamle. Bukni, ninye ton taruk mikip arye, fia pi dobuka fil donyak nang ara, bon-bona weik talibikirye, bona weik talin nang unamake.

<sup>5</sup>Yatanye do, dou malamle talak, min arye kouamlye ning akunum wisipliba, aning nirya bulubuka delilinye bira, fia weik kelnye ulule. Bukni, yatanye do nirya, dou malamle talak, koulamle ning ati, 'Lin talak akunum upliba, adin ning lin talak akunum unmale,' tenebuka kintinilina kumce, talye kanye bobuka ulula ati ara, tuba-tuba mana uk ulule. Winilamlanye bira, malye ulula anya arye, el li yapu arye el ti, alye dakalinamake.

<sup>6</sup>Ninye ton malye un ning nirya batakikirye, diksukum teleb un ning uk, winipra banamak ninye ara, Allah arye sik ti meliplirye, fia teleb uk ulinamle. Winipmanto ara, ninye arye, sik deiyok nang ati, 'Sikda fia weik mambul nang unyake, tenenamak' tenen, sik kisok deice teleb ning, el si ara mahkota, ongolilamak touk, Allah arye sik diksukum unyak ninye ati, weika arye meliplirye, teleb uk ulinamle. Bukni, malye un ning uk talibuka unyak ninye ara, 'Yuk nang arye, nun malye un ning kel biksikirye, wenepsicak' tenen, kunusa dokirye, tilila yupu nyanyake. Namin yupu uk nyanyak bukni, sik talima fum tam ara, malye un ning weik ulule.

<sup>7</sup>Ninye ton teleb ubuka ululnye diplyop ura, aminyan talak unamak ninye arye, el ti tenebikirye, 'Se, anye bira dipkoprop fia teleb uk ulamuka ati ara, nun kanye deibabe,' tenenamake. Bukni, malye un ning uk talibuka upre banyak nang dibicop ura, aminyan talak unamak ninye arye, sik si ara, luba kinamake. Amalye unyak ninye ara, sik si nirya kum upra banamle.

<sup>8</sup>Yata nang do, sik kanye teleb asa arye ukirye, fia weik kel bikinyak nang ara, sik deiyok nang arye, "Wininamlulume, aning ara kum wininamlulume," nyabuka wenebicop ura, moubuka kekebikirye, teleb uk unamake. Bukni, yatanye do el talima fum tam malye un ning uk upliba, walwal arye talye-talye yupu weik nyaltakalul walwalnye bira, aminyan talak saknamle. El winilul ning nirya, malye upra banamla anya arye, aminyan talak saknamle.

<sup>9</sup>Ninye ton, tilila yupu nyana kumce, diksukum ning uk talibuka ululnye bira, kanye lamapdongobuka teleb bisik uk banamle. Elda teleb uk unamle. Bukni, yata nang do nirya, tenepce arye minina yupu uk nyanyakce, kirikuka yuk malye un nang ban bisik banyak ninye ara, winitalak sik malye un ning kunusa donyak bukni, aminyan talak ara, yuk ninye nirya arye, sik malye un ning ati, kel kibikirye, lakak arye laka nyanamake.

<sup>10</sup>Aning atouk, yata nang do nirya, malye un ning ati, 'Dauplye' tenen, kunusa dobuka, mangkau kibicop ura, diksukum wininyaka deice, yuk ninye sik dam ara, ikin weik ning yanganamle. Tonda, yatanye do el kanye fum tam malye un ning tuba auplya deice arye, talye-talye yupu weik, nyaltakalul walwalnye bira, el winilul ning nirya malye upra banamla ati ara, aminyan talak saknamle.

<sup>11</sup>Ninye ton malye un ning nirya batakirye, diksukum un ning uk winibikirye, teleb yupu nyabikiba, yuk ninye kekebicop ura, sik kanye talima kwa dilule. Tonda aninye nyanyak yupu deice arye, yuk ninye ati teleb ulikiba, kam unamake. Bukni, malye un ning uk talibuka unyak ninye ara, 'Yuk nang arye, nun malye un ning kel biksikirye, wenepsicak' tenen, tenepce arye, tilila yupu uk nyaltakanyake. Namin yupu uk nyanyak bukni, sik talima fum tam ara, malye uk ulirye, malye un ning nirya duknunyake.

<sup>12</sup>Tonda, ton nang arye yuk nang ati, 'Aning ara nun like,' tenebikirye, kanye talima wilibuka, mal pipdacop ura, yu ning kutukuka, minopce olana uk unyake. Bukni, ninye arye yuk nang ati bico tenebuka kanye deipdacop ura, amalye tenenyak ning ap, yu tenen kanye ap, malye ulilanyak ning nirya ap ara, adib aryuk luba kinyake.

<sup>13</sup>Ninye ton kanye moubikirye, 'Teleb kibuka un ning ara ani, malye un ning ara ani,' tenebuka, diksukum unyak ninye ara, weik kel bikna yupu arye nyanyake. Sik yupu ara, fia teleb uk nyanyake. Bukni ninye ton, 'Teleb una ara ani, malye ning ara ani' tenen, moubuka tenena kumce, malye uk winipra banyak ninye ara, sik wenena ati, kama dobuka, sik balye deice opnamlulume. <sup>14</sup>Ninye ton fia weik kel bikna deiyok ning uk, talibuka unyak nang ara, teleb un ning uk unyakce, aning-aning nirya teleb kibuka, kel kibikirye, aning uk moubuka delinyake. Bukni, yatanye do, el talima malye un ning uk upliba, walwal arye talye-talye yupu weik nyaltakalulnye bira, aminyan talak saknamle. El ulul ning nirya, malye upra banamle. Bukni, malye un ning uk ululnye, el si bam bol fum tam arye, malye yupu uk panamliba nyalule.

<sup>15</sup>Sik bona utotoa talin weik unyak ninye arye, talinyak dekna weik ning dobuka, 'Nun dokola' tenen, moubuka delinyake. Ara, kota mutuku, fia weik asik domikirye, 'Yuk nang arye yanuka wekuka, ubula dopsicak' tenen, fia weik cang keil foka antanapdongobuka dobikirye, afoka fum

uk unyake. Bukni, sik talye bona utotoa talina kum ninye ara, weik imun ning uk, talibuka unyaka ati ara, sikda aning-aning nirya talibuka kum unyake. Bona utotoa talina kum ninye uk unyakce, amutam unyake.

<sup>16</sup>Ninye ton, malye ning nirya batakikirye, diksukum un ning uk, talibuka unyak ninye ara, teleb un ning uk upra balamica ani, aminyan talak dekne ning dopdobikirye, fia kam uk unamake. Bukni, malye kibuka ulirye, malye fil uk dolulnye bira, amalye fil uk dopra balamlya ani, aminyan talak ara, el fil dolul ning dekna ati, ikin ning weik doproprnamle.

<sup>17</sup>Yatanye do nirya, malye upmaliba, teleb kibuka unyak nang arye, wenen yupu deice arye peterebikiba, teleb kibuka kekelulnye bira, kam un bisik tam uk kilongolule. Bukni, yatanye do, malye winipliba, teleb kibuka unyak nang arye, wenen yupu nyabikiba, elce, 'Ayupu ara na like, fia kum kekenamne,' tenelulnye bira, malye winina dam anyuk balule. Tonda, el malye winipra balamle ning, yuk nang eibikirye, 'E, el winilul ning ara, nun babye atonun wininamabe' tenen, kel bikikirye, sik babye malye bisik uk banyake.

<sup>18</sup>Yata nang do nirya, sik sitang deice arye ninye ati, minina yupu nyabuka kunusa donyak nang ara, tilila yupu uk nyaltakanyake. Atonun, yatanye do, deiyok kum upmalibuk, yuk nang ati, tilila yupu ap, minina yupu ap, lululan yupu ap, nyaltakalulnye bira, dipkoprop kanye bona kum anya arye, fia walwalnye koproba ulule.

<sup>19</sup>Anggun nirya kanye mouplulume. Yupu weika arye nyabrabamunya deice arye, dipkoprop malye un ning ton, upra banamlume. Ara, 'Talye yupu weik nyabrabamunya deice arye, malye winipmunyak' tenen, nyapsine. Bukni yatanye do, 'Na mangkau arye malye yupu nyapnyak' tenen, el sitang moubuka kalikdalirye, nimalya arye nyalulnye bira, dipkoprop fia weik kelnye ulule.

<sup>20</sup>Ninye ton malye un ning nirya batakikirye, diksukumuk unyak ninye arye, nyanyak yupu ara, fia teleb uk ulule. Winipmanto ara, dekna weik ning, el si ara perak ara, mitik teleb ulul bukni, sik diksukumuk unyak ninye arye, nyanyak yupu ara, fia weik teleb uk ulule. Bukni, malye un ning uk talibuka ululnye bira, el talima fum tam babye, fia malye ning uk, weik ulule. El kanye talima fum tam tenelul ning ara, mambul fia kum tenelule. Elda talye ning uk tenelule.

<sup>21</sup>Tonda, malye ning nirya batakuka, diksukum un ning uk talibuka unyak ninye arye, nyanyak yupu peterebikiba, yuk nang arye kekebicop ura, ayupu kekece ninye nirya ara, teleb uk unamake. Sik nyanyak yupu deice arye, ninye fia weik teleb kililanyake. Bukni, 'Teleb un ning ara ani, malye un ning ara ani' tenen, moubuka kum tenebikirye, talye walwal uk unyak ninye ara, moubuka tenina kumce, malye ning uk winipribanyaka anya arye, sik bidamang uk, akunum olilanyaka ati, dipnamake.

<sup>22</sup>Allah Yahweh arye, ninye melina ati, kintinilisulul ning teleb ning ara, dolonyaba deice arye, bona weik talin nang kilisulule. Tonda, Allah arye bona weik talin ning arisilya atonun ning ara, ikin ning ap, kanye imun ning ap, ton tabakuka arisilya ak, ton kum dolanamabe.

<sup>23</sup>Kanye teleb bona kumce, talye walwal kanye uk bobuka unyak nang ara, malye winin ning uk, kanye deibuka unyake. Bukni, kanye moubuka tenelirye, ‘Teleb ning ani, malye ning ani’ tenen, teleb un ning uk winilinye bira, fia weik kel bikna deiyok ning atibuk, kanye deibuka ulule.

<sup>24</sup>Malye ning uk talibuka unyak ninye arye, ‘Se, weik imun ning nun nong deice yanuka upsilyak’ tenen, ilil upliba, mambul kanye donyak ning ara, dipkoprop aminyan talak, sik dam yaliba, dolona uk unamake. Bukni, malye un ning nirya, batakuka diksukumuk unyak ninye arye, ‘Se, fia teleb un ning uk unamsil’ tenen, kintinibuka dina uk unyak ninye ara, Allah arye sik patalul teleb ning arepliba, dolona uk unamake.

<sup>25</sup>Winilula ati ara, malye, el dam ara, fia weik kumanya mikip yalirye, amalye ululnye dam, yanuka puplirye, el nong bobiliba, kum danamle. Bukni diksukum teleb ubuka unyak ninye ara, pirilen ning ton, sik dam yatua babye, kum lulukdenamake. Fia tunimabuka teleb uk unamake.

<sup>26</sup>Winipmanto ning ara, ninye wekmace aik fum tam tulum wekliba, anyaik bukmace nang, sik asing uk dipliba malye kanye bonyake. Aning atouk, fia yu ning dibipyop ura, si uk arye malye kanye bonyabe. Aning atouk, ninye deiyok nang arye, ‘Mambul fil dopnamsil’ tenen, ninye tonoknye ton, wibuka dolinyak bukni, anye birye, ‘Ikin fil dona na like’ tenen, talye kanye bobuka, mana uk ulyop ura, sik deiyok nang ara, fia malye kanye bobikirye, lik weik ulule. Ninye yupu kekepmanto kumnye birye, el deiyok nang ati, sik kanye malye ulin uk ulule.

<sup>27</sup>Allah Yahweh atibuk, ilil tenebuka ukirye, ‘Elda fia weik mambulnye ulule’ tenen, el si uk erebuka, el tibuk kanye deibuka unyak nang ati, Allah arye, lo tonap ouku weik arepliba, keteng tamun weik tonap, kam unamake. Bukni, malye un ning uk talibuka unyak nang ara, Allah arye sik kam una ati, ouku kum arepliba, keteng tamun tonap ouku arye, fia kum unamake. Noutam karin arye, wisi kum danmakibuk, dibini uk unamake.

<sup>28</sup>Malye winin ning batakikirye, diksukumuk unyak ninye ara, fia teleb uk upra balamica ani, aminyan talak ara, pin-pin kanye bobuka unamake. Bukni, ninye ton fia malye ning uk ululnye birye, ‘Se aning uk uptinye’ tenen, patalul ning ara, fia dipkoprop nong kum upnamle. Elce tenelul ning nirya ara, kum danin banamle. <sup>29</sup>Allah Yahweh arye, “Wininamalulume, teleb un ati, ban bisik ara ani,” nyabuka, peteresulul yupu moubuka talibikirye, diksukum bisik uk dobolbanyak ninye ati ara, Allah Yahweh arye, aninye ati melibuka kalikinamle. Weik imun ning

ton, sik dam kum yanamle. Bukni, malye winin ning uk winibikirye, malye bisik uk dobolbanyak ninye ara, Allah Yahweh arye aninye ati, wenebuka oltakanamle.

<sup>30</sup>Malye winin ning batakikirye, diksukumuk wininyak ninye ara, kanye deibuka teleb uk unamake. Allah arye, sik unamakak ati, teleb mutuku areplyop ura, ikin ning anggun dam yatua babye, sikda fia diksukum unyak ninye ati ara, fia kanye darabuka unamake. Yukak leibuka kum bindopnamake. Bukni, malye winin ning uk talibuka ululnye bira, fia kanye darabuka ulirye, el mutuku koproba ton, talibuka kum unamle. Ikin ning yalyop ura, yukak leibuka bindopnamle.

<sup>31</sup>Ninye ton malye winin ning niry a batakikirye, diksukum kibuka unyak ninye ara, sik si bam bol fum bisik arye, teleb yupu nyanyak ning ara, fia weik kel bikna ning uk nyanyake. Bukni, malye ning uk talibuka ululnye, el si bam bol deice arye nyalul yupu ara, tilila yupu ap, minina yupu ap, nyalul yupu niry a kum danamle. El sitang babye, seklobikba, yupu kum nyapmanto unamle.

<sup>32</sup>Ninye ton sik talima diksukumuk unyak ninye, sik si fum tam arye nyanyak yupu ara, ninye niry a kekebikirye, sik kanye talima niry a, kilkil upliba, kanye delinyake. Bukni, malye winin ning uk ulamak nang arye, nyanyak yupu ara, tilila yupu ap, minina yupu ap, lululan yupu ap, tenepce arye nyan yupu ap niry a, ansinibuka nyanyakba, yuk ninye kekekirye, sik kanye talima like ulule.

**Fia malye ning talibuka wininyak nang ap,  
diksukumuk unyak nang ap ati, nyabuk yupu**

**11** <sup>1</sup>Ura ninye arye, ‘Dekna ning ati, ikin yata barye do?’ tenen, kiklilen ning, timbangan malye kibuka kiklinyaka ara, Allah arye, ‘Aning ara fia na like,’ tenelule. Bukni, ninye arye, ikin kiklilen ning el si ara timbangan, kiklipdekirye, timbangan dipkoprop ulamle touk nyabikirye, auang yo bok dipkoprop ning arinyak nang ara, ateleb wininyak ninye ati ara, Allah arye el kanye weik delilule. <sup>2</sup>Ninye ton kwalina ap, erepdanuka kwalilan uk ululnye bira, aminyan talak malye uk ubikiba, yuk ninye eibikirye, talima erenanye, alye dakdanamle. Bukni, ninye ton talima namin asa arye ululnye bira, aminyan talak, fia weik arye kel biklirye, teleb uk unamle.

<sup>3</sup>Ninye ton fia diksukumuk unyak ninye ara, sik talima fum tam ara, ‘Tilila yupu kum nyanamabe. Tonda, dipkoprop ning uk talibuka unamabe,’ tenenyaka deice arye, sik fil donamaka ap, sikce wininamak ning niry a ap ara, ‘E, teleb kin ning ara, ani,’ tenebikirye, moubuka unamake. Ara, sik talima fum tam ara, diksukum ning uk ulula deice arye, fia weik kel bikinyakce, teleb uk unyake. Bukni, yuk nang ara, malye winin ning uk talibuka wininyaka ati ara, sik talima noutam ara,

fia malye uk unyake. Kanye talima malye nang uk unyaka ati ara, adeice arye, malye winin ning ap, tilila yupu nyanyak deice arye, sik bidamnye arye, sik bidamnye atibuk, malye winililanyake. Aminyan talak ara, sik winin ning ap, sik ap, kum upnamake.

<sup>4</sup>Allah arye ninye tukwak ninye nirya ati wenepnamsil talak, el yu ning nun nong deice deipnamsil talak ara, bona utotoa talin weik nang uptibye babye, aning arye kum melipsetue. Bona utotoa ning deice arye, kum lyepdatibye. Bukni, malye winin ning nirya batakikirye, diksukumuk unyak ninye ara, Allah arye sik wininyak ning ap, sik talima ap dipdelirye, teleb kibuka unyak ninye ati, lyepnamle. Sik diksukumuk unyak ninye ati, wenebuka opliba, kum dipnamake. Allah arye sik ti lyepropliba, kam fia unamake.

<sup>5</sup>Ninye ton teleb un ning uk, talibuka ululnye bira, el banamle bisik nirya ara, fia diksukumuk ulule. Diksukum bisik uk banamle. Bukni, malye winin ning uk talibuka ululnye bira, el balamle bisik nirya ara, kwalin bisik anya arye, el malye winin ning uk, talibuka ulye deice arye, malye kililalule. Malye wininyak ninye arye, sik mining atibuk, malye winililanyake. <sup>6</sup>Aning atonun, ninye ton el talima diksukumuk ululnye bira, ikin ning el dam yatus babye, el diksukumuk ulye deice arye, aminyan talak teleb uk unamle. Bukni, ninye ton malye winin ning uk tenebuka ululnye bira, el malye ulul ning deice arye, malye kililalule. Winipmanto ara, ninye arye, ‘Bai basam tongopnamap’ tenen, wena tapu deibikceba, basam mangkau arye banmalebuk, wena tapu youlamle touk, sik malye unyak ninye arye, sik mining atibuk, malye winililanyake.

<sup>7</sup>Fia malye ning uk talibuka, unyak ninye diamice talak ara, sik kam ulamice talak noutamak arye, ‘Aning wininamabe, ateleb ning talinamabe,’ tenelamice ning nirya ara, kum danamle. Atonun, amalye wininyak nang arye, ‘Nun cuk mikip kipedabirye, mikip weik ninye akunum ubibyop ura, aning-aning nirya talibibirye, fia weik mambul nang unamabe,’ tenenyake. Winibuka tenenyak bukni, dibice talak ara, sikce, ‘Wininamabe,’ tenelamice ning nirya babye, nong ton kum upnamle. Anang ap, sik ning ap, talya dem uk upnamle.

<sup>8</sup>Ninye ton teleb un ning uk, talibuka unyak ninye ara, ikin ning sik dam ton kum yanamle bukni, ikin ning sik dam akunum yalyop ura, Allah arye sik ikin unamake noutamak arye lyepnamle. Bukni, ninye ton yu ning uk tenebuka unyak ninye, imun kanye sik dam yangalye talak ara, ‘Se’ tenen, malye kanye bobuka unamake. Ikin ning teleb unyak ninye, sik nong deice yanmanto uplye ning ara, sik malye winin ning uk talibuka unyak ninye ara, sik nong deice yanamle.

<sup>9</sup>Allah arye nyalul yupu ap, Allah arye winilul ning ap ati, ‘Aning nirya ara, na like,’ tenelinye, el fia malye yupu nyalya deice arye, el dam unyak ninye ati, malye ulilule. Elce nyalul yupu kekebikca deice arye, malye

uk winipra banyake. Anye birye, malye yupu nyana ap, malye winina ap, ulye deice arye, sik diksukumuk unyak ninye ati, malye kipdeiptu bukni, sikce weik kel kinyaka deice arye, el malye nyalul yupu ara, batakalongonyake. ‘Elda talye nyanmala’ tenen, mangkau kilongonyake.

<sup>10</sup>Dipkoprop ning uk, talibuka unyak ninye arye, fil dopra bakirye, sik winin ning nirya, teleb upra balyop ura, amutuku noutamak unyak ninye nirya arye, kanye deibuka unyake. Aning atonun, sik malye ning uk, talibuka unyak ninye dibicop ura, sik mutuku neika unyak ninye arye, kanye deibuka unyake. Ara, ‘Naie, nun ti malye kililamsuknye bira, merekuka dipmale. Elda akunum kum danmala ati ara, winitalak ara, nunda teleb uk upra banamabe,’ tenebikirye, kanye deibuka unamake.

<sup>11</sup>Aning atonun, diksukumuk unyak ninye arye, sik mutuku noutamak ulamikca deice arye, amutuku unyak ninye nirya babye, teleb ning dolonyake. Yuk mutuku ninye arye, ateleb unyak ninye eibikirye, ‘Se, sikda fia teleb kibuka unyake. Sikda mambul weik unyake,’ tenenyake. Bukni, yu kanye uk tenebuka, ulinye birye nyalul yupu deice arye, el ap neika unyak ninye ati, fia malye uk ulilule. El malye yupu nyalula deice arye, yuk ninye nirya ati, malye kililule. El malye ulul ning sik nong deice sakalongolule.

<sup>12</sup>Yatanye, ‘Teleb una ara ani, malye winina ning ara ani,’ kum tenelinye birye, el kwit capu koproba ati, malye yupu nyalilya deice arye, anang ati malye kililule. Bukni, ninye ton fia weik kelnye bira, elce tenelul ning nirya ara, ‘Talye lukparabuka lakak arye nyapnune,’ kum tenelule. Aning kum bukni, sik kel nang arye, fia kanye darabuka kat asa, teleb uk unyake. Yupu talye kum nyaltakanyake. <sup>13</sup>Tonoknye, el kwit koproba ati, el talima ikin ulul ning ati, laka nyaployop ura, el kwit koproba kekepnamle bukni, yuk ninye kekenak talye lukparabuka, kum laka nyalbinamle. El talima noutamak uk, duknubuka tenelule. Bukni, sik talye minina yupu nyabice ninye ara, sik kayapu nang arye, mambul yupu nyabikiba kibicop ura, moubuka tenena kumce, yuk ninye kekenak talye nyabuka banyake.

<sup>14</sup>Tonda, fia weik mutuku negara tonok talina deiyok nang dam, “Winipnuyabe. Teleb una ara ani, malye ning ara ani,” nyabuka yupu lak lena deiyok nang kum ucop ura, walwal arye winipra balamicaba, yuk mutuku ninye arye, amutuku ninye nirya ati, obuka sirya daknamake. Bukni, “Teleb una ara ani, malye ning ara ani,” nyabuka, yupu lak len deiyok nang, sik amutuku talina deiyok nang dam unyakce, teleb yupu melibuka nyaptingop ura, amutuku unyak ninye arye, teleb uk unamake. Yuk mutuku ninye arye, sik ti, talye lukparabuka, obuka sirya kum daknamake.

<sup>15</sup>Neika kum elilamikinye, tonok sum uk yalirye, ‘Na yo bok aripnilyame, aryamninyeba, aminyan talak tamubuka



punupnamkinarya. Aning dipkoprop tamubuka na aripnamkine,' nyaployop ura, kum kekenamlyame. Kekepmince, arepminyop ura, dipkoprop aminyan talak ikin upnamkile. Deiyok ara, anang arye, 'Punupnamkinarya,' nyaplomice touk, kum pununyake. Bukni, talye daunya nang arye, morobikce ning, kekebuka kum arenamlanye bira, teleb uk unamle. Aminyan talak ikin kanye kum bonamle.

<sup>16</sup>Kil ton talima teleb kibuka ulirye, yuk ninye ati, bico tenebuka melilul kil ara, fia teleb un ning uk, tabakuka upra banamle. Yuk ninye arye, akil eibikirye, 'E, dipkoprop akil ara, talima teleb kil ulule,' tenebikirye, akil ati kanye delinyake. Bukni, ninye ton, bico tenena kumce, yu weik unyakce, yuk ninye ati, ikin ning weik, sik nong deice delinyak nang ara, bona weik talin ning weik doproptinga babye, yuk ninye arye anang ati kanye kum delinamake. Yuk ninye arye anang ati, 'E, sikda talima teleb nang unyake,' fia kum tenekirye, anang ati kanye kum delinamake.

<sup>17</sup>Aning atonun, ninye ton kanye talima lamapdongobuka amutam kibuka ululnye birye, yuk ninye ati melilulnye bira, elce el bidamang atibuk, teleb kililalule. Yuk ninye melilula deice arye, el bidamang atibuk melilalule. Bukni, ninye ton yu kanye uk bobuka ulamlanye bira, yuk ninye ati bico tenena kumce, ikin ning weik, sik nong deice delilulnye bira, elce el bidamang atibuk, malye kililalule. Anye birye el bidamang nong uk, ititilalule.

<sup>18</sup>Malye wininyak ninye arye, yo bok ap, bon ning ap, weika arye dolonyak bukni, aning ara tia talak uk talinamake. Aminyan talak ara, sikce talinyak ning nirya ara, kum danamle. Atalak noutamak ara, sikce sik mining atibuk, 'Kume nunda bona utotoa talin fia unamabe,' tenebikirye, tilila ning uk tenelilanyake. Sikce talinyak ning nirya ara, talya-talya urdem uk ulule. Winipmanto ara, teleb yala ning uk, taliplirye balulnye bira, aminyan talak fia teleb ning ton talinamle. Ati ara, yata ninye do nirya, diksukum ning uk talibuka unyak ninye ara, aminyan talak Allah arye, dekne ning weika arye arepliba, fia teleb uk unamake. Atalak dopronamak ning ara fia kum kum danamle. Afia unamle.

<sup>19</sup>Yatanye do nirya, diksukum un ning uk talibuka upra balamlanye birye, aminyan talak dipkoprop fia kam una deiyok ning doproplirye, fia kam unamle. Bukni yatanye do nirya, malye un ning uk, talibuka dopra balulnye bira, aminyan talak kam kum unamle bukni, elda dipna dam anyuk binamle.

<sup>20</sup>Ninye ton sik talima fum tam yu ning ap, malye winin ning ap uk, tenebuka unyak ninye ati, Allah Yahweh arye, 'Aninye ara na like,' tenelirye batakalule. Bukni, ninye ton sik kanye talima fum tam yu kum tenebikirye, malye winin ning talibuka winina kumce, diksukum bisik uk banyak ninye ara, Allah Yahweh arye, 'Aninye ara, na kanye delinamne,'

tenelirye, fia melibuka lyelule. Aninye ap, Allah el ap dukdongobuka unamake.

<sup>21</sup>Na arye nyapnusin yupu ara, fia dipkoprop yupu ati ara, ayupu ara fia kum luba kinamlulume. Talye kum nyapsine. Yata ninye do nirya, malye ning uk tenebuka unyak ninye ara, aminyan talak dipkoprop wenen ning, sik dam yanuka aunamle. Allah arye aninye ati, fia weik arye wenepnamlarya. Bukni, malye winin ning talibuka winina kum aryuk, diksukumuk unyak ninye nirya ara, aminyan talak Allah arye lyebuka, teleb sukumuk deipnamle. Diksukumuk unyak ninye ara, wenena ning sik dam ton kum yanamle.

<sup>22</sup>Winipmanto yupu nyapnusine. Talye basam arye, fia malye ulamtu bukni, abasam weina deiyok nang arye, dekna weik ning, el si emas deice arye, kintinibice tapu dobuka abasam el u fum bisik kirikdongoptinga babye, talye basam uk ulirye, talye malye dem uk unamle. Yuk ninye abasam eibikirye, ‘Se, yata deiyok ning ati, el u fum bisik dekna weik ning dongobik do?’ tenebikirye, abasam weina deiyok nang ati, aku tunamake.

Aning atonun, yata kilapu do nirya, sik urasin fia teleb kilapu ulamting bukni, kanye moubuka tenena kumce, talye yoltalamak kilapu atonun ucop ura, yuk ninye nirya arye, ‘Kume akilapu ara, urasin teleb unyak bukni, tuba fia malye weik unyake,’ tenenamake. Ninye nong bol deice teleb una ati, kweirya ning weik donamak babye, ninye talima fum tam malye ning uk, tuba aupmalya deice arye, malye winin ning uk talibuka tuba unamake.

<sup>23</sup>Teleb kibuka ulinye birye, ‘Se, teleb ning uk uptinye’ tenen, fia weik arye, patalul ning nirya ara, aminyan talak nong teleb kibuka upnamlarya. Bukni, malye winin ning uk talibuka ulinye birye, ‘Se, aning ton winiptinye,’ tenelul bukni, el tenebuka ulul ning nirya ara, aminyan ara nong kum upnamle. Aminyan talak ara, Allah arye sik malye winin ning uk, tenebuka unyak ninye nirya ati, fia yu weik arye wenebuka oplopnamle.

<sup>24</sup>Tonoknye birye, ‘Teleb arin ning dobuka, na kayapu nang ati arenamne,’ tenelirye, weika arye yamubuka arilul bukni, aminyan talak ara, Allah meliliba, teleb ning weika arye doproplirye, bona utotoa talin nanye kipnamle. Bukni, tonye birye, el talilul ning nirya ati, ‘Kume aning nirya ara, na tenen ning anya arye, yuk nang ati melibuka kum arenamne,’ tenelirye, aning nirya fia talibuka ulule. Bukni, anye bira, aminyan talak fia bona utotoa talina kumnye unamle. Anye birye, ‘Na bidamang ning uk, talibuka unamne,’ tenebuka ulul bukni, aning nirya kum daliba, aminyan talak tamubuka, talye bona utotoa talina kumnye unamle.

<sup>25</sup>Ninye ton el winin ning dobuka, el kwit capu ati bico teneplirye, bokuka arilulnye bira, el winilya deice arye, el winin ning weika arye

ton, tamubuka el dam yanamle. Elce wininamle ning nirya teleb uk upribaliba, bona weik talinanye unamle. Aning atonun, yatanye do nirya, sik yuk nang ati, 'Yata winiptinya deice arye, sik kanye talima kwa diptiniba, teleb kanye bobuka unamak do?' tenen, fia melilulnye bira, dipkoprop elce el bidamang atibuk melilalule. Tonda, yuk ninye arye, el dam ikin ning yanamle talak ara, bico tenebikirye, el ti fia melinamake.

<sup>26</sup> Aning atonun, din patan talak noutamak, ninye ton gandum wa wibikiba, teleb kibuka palamlirye, weika arye linyak bukni, sik kwit capu ap, yuk daunyak ninye ap ati, 'Kume, anggun ti kum arenamsine. Agandum din ning nirya ara, na dokola ning uk ulule,' nyabuka, bico kum teneplirye, yuk ninye ati, fia kum melilulnye bira, yuk ninye nirya arye anye biti, malye yupu nyabuka wililanyake. Sikce el ti, 'Anye nun like,' tenenyake. Bukni ninye gandum wa wibikirye, 'Aning ara nun dokola uk unamle,' tenena kumce, aning dobuka yuk ninye melina ati, dekelulnye bira, yuk ninye arye el ti, 'E, anye bira teleb uk ulule,' tenenamake. Tonda, Allah arye anye biti, tabakuka areplirye, teleb kilinamle.

<sup>27</sup> Yata nang do nirya, 'Yata teleb ning winiptibyeba, yuk nang ton teleb unamak do?' tenen, fia moubuka tenekirye, teleb ning atibuk, elbanyak ninye ara, dipkoprop teleb un ning uk eibuka dolonamake. Bukni, yata nang do nirya, 'Malye winin ning winiptinye' tenen, malye winin ning uk elbanyak nang ara, dipkoprop fia malye winin ning uk, eibuka dolonamake. Yata ninye do nirya, sikce dobolbanyak ning uk, eibuka dolonamake.

<sup>28</sup> Yatanye do nirya, el babye talilye ning atibuk, 'Aning talinamna deice arye, teleb uk unamne' tenen, el bon ning atibuk, kanye deibuka ululnye bira, aminyan talak aning nirya kum uplyop ura, mambul kanye bobuka unamle. Winipmanto ara, yo bok kouluplye talak dakalsaklamle touk upnamle. Bukni, yatanye fia diksukum un ning uk, talibuka ululnye bira, winiryuk yo burye tuba-tuba siliklamle touk unamle. Fia teleb uk unamle.

<sup>29</sup> Yata ninye do nirya, sikce malye ubica deice arye, sik neika ansinibuka unyak ninye ati, ikin ning sik nong deice deipnamak ninye ara, imun kanye bobuka unamake. Aminyan talak dengna ning kum dopronamak bukni, urdem uk unamake. Kum puplriry, balamle touk, talya urdem uk unamake. Sik anang ara kum winipnamake. Aning atonun, sik kanye moubuka tenina kumce, walwal kanye bobuka unyak ninye ara, aminyan talak teleb asa arye unyak nang, sik amutam ukirye, sik talye fil melin nang uk unamake.

<sup>30</sup> Winipmanto ara, duk teleb moulamle yo arye, yo duk fia teleb ning uk moulamle touk, sik malye ning tonok ning babye, kum talikirye, diksukum un ning uk, talibuka unyak ninye ara, aminyan talak kam

fia una deiyok ning dopdobikirye, kam fia unamake. Tonda, yatanye do nirya, ‘Yuk ninye ton, Allah ati dib tenebikirye, sik babye kam unamak’ tenen, Allah yupu moubuka peterebikiba, yuk nang kekebikirye, dib tenebikcop ura, apeteren deiyoknye bira, diksukum teleb fil dolula ati ara, elda fia kel weiknye unamle. Aminyan talak ara, Allah arye anye biti, dengna ning tabakuka arenamle.

<sup>31</sup> Anggun moubuka teneipdelulume. Diksukum un ning uk, talibuka unyak ninye arye, teleb uk winipra balamica ani, Allah arye sik winilamice touk, wenen ning ap, dengna ning ap arilule. Ninye yupu lipsisikuka bogolisulule. Talye mangkau kum kilule. Winilula ati ara, sik malye ning uk talibuka, malye weik unyak ninye ara, Allah arye sik malye unyak ninye arye, wininyak ning ton kum dilul do? Kume, tukwak mutuku noutamak kam unyak talak arye, wininyak ning nirya ara, Allah elilulce kel kilula ati ara, dipkoprop aninye ati, ninye yupu lipsisikuka bokeipnamle. Diksukum unyak ninye ati, mitiktonun dem weneppnamle bukni, sik malye weik wininyak ninye ati ara, fia weik arye wenebuka opnamle ati, fia weik ikin ning dolonamake. Ninye tukwak ninye nirya winilamice touk, Allah arye yupu lipsisikuka bokeipnamsile.

**12** <sup>1</sup> Yatanye do, ‘Kel bikne nang arye peterepnintinge. Tonda, malye winipnyop ura, lipsisikuka peterepnammnyake. Malye winipnyop ura, tonap weneppnamnyak’ tenen, pataplanye bira, weik kel bikinanye ulule. Aning patapliba ululnye bira, weik kel bikne ning ap, peteren ning ap, ‘Aning ara ilile,’ tenebuka kanye delilulnye ulule. Wenen yupu ababye kanye deibuka dolonamle. Atonye bira, dipkoprop weik kel bikne deiyok ning kel bikinamle. Bukni ninye ton, ‘Malye upniba, wenen yupu kum nyanamnulume. Ayupu gekena ara na like,’ tenelulnye bira, dipkoprop walwalnye ulule.

<sup>2</sup> Ninye ton teleb winin ning uk talibuka ululnye bira, Allah Yahweh arye kanye deiplirye, “Anye bira, telebnye ulule,” nyapliirye, anye biti teleb kililule. Bukni, ninye ton, ‘Malye winin ning uk talibibirye, tilila yupu ap, duknun yupu ap nyanamabe’ tenen, yupu sisikilulnye biti ara, Allah Yahweh arye, anye el deice wenen ning uk delinamle. Sirya talak ara, wenebuka oploppnamle.

<sup>3</sup> Yata ninye do nirya, tuba malye winin ning uk talibuka winipnin balamak nang ara, teleb uk kum unamake. Sikce, ‘Nun kanye tenenyap ning uk, winipnin balamipya ani, aminyan talak ara, fia teleb uk unamabe,’ teneptinga babye, dipkoprop aning nirya nong kum upnamle. Aminyan talak ara, sik ap, sik wininyak ning nirya ara, kum danamle. Winipnamak bukni, dipkoprop teleb winin ning uk talibuka unyak ninye ara, teleb uk winipnin bakirye, aminyan talak ara, kanye lamapdongobuka teleb uk unamake. Yuk nang arye sik ti kum malya kipnamake.

<sup>4</sup>Ninye don kilapu arye, malye una kum dib aryuk, teleb ubuka unyak ning ara, sik akanye yapu arye, ‘E, akilapu ara, fia teleb uk unyake’ tenen, kanye deibuka unamake. Yuk ninye arye, anang ati, kanye delinamake. Bukni, yata kilapu do nirya, malye-malye uk winipnin balamikiba, sik akanye yapu ati, malye ulinyakba, sik akanye yapu nirya alye daknamake. Akilapu malye unamak deice arye, sik akanye yapu, sik nong fum tam malye uplirye lyulamle touk unyake. ‘Se’ tenen, lik kanye uk bobuka unyake.

<sup>5</sup>Diksukum unyak ninye arye, ‘Aminyan talak wininamabe,’ tenebuka, winipnin banamak ning ara, teleb winin ning uk tenebikirye, unamake. Bukni, sik malye ning uk talibuka unyak ninye arye yuk nang ati, ‘Wininamlulume, wininamlume,’ nyabuka nyanyak yupu ara, tilila ning uk ulule. Malye winin ninye arye, tenenyak ning nirya ara, tilila ning uk ulula anya arye, aninye arye nyanyak yupu ara, fia kum kekenamlulume.

<sup>6</sup>Malye kanye bobuka yu tenenyak ninye arye nyanyak yupu ara, yuk nang arye kekebice ura, ninye oldana ap, yupu deice waldana ap uk unamake. Bukni, malye ning winina fia kum dib aryuk, teleb ulul ning uk, talibuka unyak ninye arye, nyanyak yupu ara, yuk nang arye kekebice ura, yuk ninye ati melibikirye, teleb ulinyake. Teleb unyak ninye arye nyanyak yupu ara, yuk ninye kekebikirye, ayupu deice arye, aninye ati lyelilule.

<sup>7</sup>Malye winin ning uk, talibuka unyak nang ara, aminyan talak yuk nang arye anang ati, lik upliba, obisibikirye, kum daneipnamake. Sik malye wininyak nang ara, kum danin banamake. Bukni, malye un ning talina kum dib aryuk, diksukumuk unyak ninye ara, fia teleb uk ukirye, tuba-tuba teleb upnin banamake. Sik ap, sik wininyak ning ap, sikce deibikiba dadeipdanin banamak ninye babye, kanye lamapdongobuka fia teleb uk unamake.

<sup>8</sup>Ninye arye fia weik kel bikne deice arye nyakiba, yuk nang kekebikirye, ‘E, anang ara, teleb yupu uk nyanyaka anya arye, anggunda teleb nang uk unyake,’ nyabuka kanye delinamake. Bukni, yuk nang ara, sik kanye talima malye uk unyak nang ara, kwalin yupu ap, kanye bona kumce, nyanyak yupu ap nyakiba, yuk ninye arye kekebice ura, ‘E, anang ara, fia malye ning uk nyanyaka anya arye, nun lik weike. Anang ara nun lik,’ tenen, batakanamake. Amalye ning tenebuka wininyak ninye ara, teleb unyak ninye arye, batakikirye, memepropanmke.

<sup>9</sup>Teleb ning ara, ‘Fia mambulnye unamne,’ tenena kumce, sik ap sik amutam fil melina nang ap, teleb fil uk dopnin balamunya ani, aminyan talak anggun patan ning ap, din ap upnamsile. Bukni, ton nang ara, ‘Yuk nang arye nun ti, se, sikda fia weik mambul nang unyake, tenepnamsiyak’ tenen, kwalibukabikirye, sik bidamang kanye erebikirye, kwalibuka dildanyake. Bukni, aning atonun wininyak nang ara, fil teleb

kibuka kum donyaka anya arye, aminyan talak sik din ning babye, kum danin banamle. Ikin uk unamake.

<sup>10</sup>Talima telebnye birye, teleb kibuka ulula anya arye, el basam do, el weilul ning nirya ara, teleb ubuka weilula ati, teleb uk unamake. Bukni, malye winin ning uk talibuka ululnye bira, ‘Teleb winipnamne,’ teneplirye, firilul bukni, teleb un ning kum winipmanto ulule. El kanye talimak ara, yu un ning uk winilula ati, el winilul ning nirya ara, ninye oldan nang atonun ulule. Elda, yuk ninye nirya ati, malye uk kililule.

<sup>11</sup>Ninye wa moubuka mikip arye wilamak nang ara, sik dam din ning weik upliba, teleb ubuka dinamake. Sik din ning aning-aning nirya weik upnamle. Bukni, yatanye do nirya, ‘Na ara weiknye uptinye’ tenen, kum winipmanto bukni, ‘Aning winipnamne do, aning winipnamne do,’ teneplirye, talye ning uk eibuka dobolbalulnye bira, talye-talye uk unamle. Elda, kanye moubuka kum tenepmantonye ulula ati, ‘Teleb ning ani, malye ning ani,’ teneplirye min kum wipmantonye ulule.

<sup>12</sup>Malye un ning uk, talibuka unyak nang arye, ‘Se, sik malye wininyak nang arye, ubula dolonyak ning ara, na babye ton doproptinye’ tenen, patapliba, kanye wililanyakce, yuk nang arye talinyak ning uk, tenina uk unyake. Bukni, malye una kumce, diksukum ning uk talibuka unyak ninye, sik bidamang fil teleb ubuka donyaka deice arye, dipkoprop teleb ning uk dolonyake. Winipmanto ara, teleb yo arye, teleb yo duk weik muolamle tonun, unyake.

<sup>13</sup>Malye yupu ap, tilila yupu ap, nyalulnye birye nyalye yupu ara, malye uk winilya deice arye, elcuk el bidamang atibuk wena youlalule. Bukni, teleb un ning uk, talibuka ululnye birye, nyalul yupu deice arye, lyelilalule. Kanye imun ning ara, sik diksukum ninye dam yanamle talak nirya ara, lyepdakirye, teleb uk unamake. Ikin ning ara, sik dam tuba-tuba kum unamle. <sup>14</sup>Ninye nirya arye, fia pi deibuka, mikip arye teleb fil uk dolamikca deice arye, teleb ning ayala-yala nirya, sik dam yangalule. Aning atonun, yata ninye do nirya, teleb yupu uk nyanyaka deice arye, teleb ning ayala-yala nirya, sik dam yanganamle.

<sup>15</sup>Tonda kanye moubuka tenena kumce, walwal ning uk wininyak nang arye, tenenyak ning ara, ‘Kume, nunce, wininamabe, wininamabe, tenenyap ning nirya ara, teleb uk tenenyaba anya arye, teleb uk unamabe,’ tenenyake. Bukni, sikda fia walwal uk unyake. Bukni yatanye do nirya, ‘Na tenenye ning ara teleb uk ulula anya arye, aning uk winipnin banamne,’ kum teneplirye, yuk kel bikne nang arye nyanyak yupu ton moubuka kekelulnye bira, dipkoprop fia weik kel bikinanye ulule. Kel bikne nang arye el ti, ‘Wininalyame,’ nyabuka peterenyak yupu moubuka kekeplirye, ulula anya arye, elda dipkoprop kel bikinanye ulule.

<sup>16</sup>Yuk nang arye, wenen yupu nyabikiba, walwalnye birye kekeplyop ura, adib aryuk yu teneplirye, minopce tamubuka yu yupu talye

lukparabuka nyalule. Bukni, sik kel bikne nang arye, kanye moubuka teninyaka anya arye, yuk nang arye sik ti, wenen yupu do, malye nyan yupu do, sik nong deice deibica babye, adib aryuk yupu tamubuka kum nyanyake. Sik kel bikne nang arye, 'Kume, teleb ning ara aning do, aning do, moubuka tenipdekiry, aminyan talak uk yupu nyapnamabe,' tenenyake.

<sup>17</sup>Yatanye do nirya, dipkoprop teleb yupu uk nyalulnye bira, ninye yupu lipsisikuka bokolina talak ara, diksukum yupu uk nyalule. Ninye dipkoprop winilamak touk, ubuka lakak arye, nyalule. Anye birye nyalul yupu ara, dib tenetibye. Bukni, malye yupu ap, tilila yupu ap uk, nyalulnye bira, ninye yupu lipsisikuka bokolina talak nirya ara, ninye arye winilamak touk, dipkoprop ubuka kum nyalule. Anye birye nyalul yupu nirya ara, tilila yupu uk nyalula ati, elce nyalul yupu nirya ara, dib kum tenenamleme.

<sup>18</sup>Ninye ton sik yupu nyapnuce talak ara, moubuka tenena kumce, talye-talye yupu uk, nyalamak ninye ara, sik yupu nyanyaka deice arye, ninye talimak parang ya tace arye, talimak lukliba, uk dilamle touk wininyake. Bukni, weik kel bikin nang arye nyanyak yupu ara, teleb yupu uk nyanyaka ati, sik yupu nyanyaka deice arye, ninye nirya ati, teleb ulinyake. Winipmanto ara, ninye kwetena deiyok nang arye, uk dilamle ninye kwetelamak touk, weik kel bikin nang arye nyanyak yupu deice arye, yuk ninye kekebicop ura, sik kanye talima melilanyakba, teleb kilinyake.

<sup>19</sup>El si bam bol deice arye, teleb yupu uk nyalulnye bira, fia ati kam uk unamle. Bukni, el sitang deice arye, malye yupu ap minina yupu ap, tilila yupu ap, nyalulnye bira, fia kam kum unamle. Anye bira, fia kam kum unamle. El ap, el nyalye yupu ap ara, fia kam kum unamle. <sup>20</sup>'Malye un ning uk wininamabe,' tenebikiry, yupu sisikinyak ninye, sik talima noutamak ara, tilila ning uk ulule. Bukni, 'Nun ap, yuk nang ap, talima dukdongobuka teleb ubuka, neika uk unamap' tenen, yupu sisikinyak ninye ara, sik kanye talima noutam ara, teleb kanye bobuka unyake. Sik kanye talimak ara, teleb tenen ning uk ulula anya arye, teleb ning uk tenekiry, kanye deibuka teleb yupu uk talinyake.

<sup>21</sup>Teleb ning uk talibuka unyak ninye, sik dam ara fia weik kanye imun ning ap, yuk ikin weik pirilen ning nirya ara, sik dam ton fia kum unamle. Bukni, malye un ning uk talibuka unyak nang ara, sik unamakak nirya ara, fia weik kanye imun ning ap, fia weik pirilen ning ap, tuba-tuba yangaliba, imun kanye bobuka unamake.

<sup>22</sup>Sik si fum bisik arye, tilila yupu uk fanalul nang ati ara, Allah Yahwa arye, 'Aninye ara na like,' tenelule. Bukni, teleb ubuka ukiry, dipkoprop yupu uk nyanyak ninye ara, Allah Yahweh arye, 'Aninye ara, na kanye fia deilinune,' teneliry, aninye ati melibuka teleb kililule.

<sup>23</sup>Weik kel bikamuknye birye, el kel bikamuk ning ap, fia weik kel arye tenelul ning ap ara, lakak aryuk weik arye kum nyalule. Ara elce, ‘E yuk nang nirya ara na ti, se elda fia weik kel bikilulnye ulule, tenenamniyak’ tenen, min kum nyalule. Elce weik kel bikne ning kel bikamuk ning ara, duknuna atonun ulule. Bukni, dipkoprop walwalnye birye, ‘Yuk ninye nirya ati, na ti, elda weik kel bikinanye tenepnamniak’ tenen, yupu weik arye nyalule. Bukni, elce nyalul yupu ara, dipkoprop walwal aryuk nyalula anya arye, ayupu kekenamak ninye ara, ‘Dipkoprop anye bira, walwal uk ulule,’ tenenamake.

<sup>24</sup>Ninye ton, fia pi dobuka, el taruk mikip arye, fil dolulnye bira, aminyan talak yuk nang eibikirye, ‘Elda teleb fil dolulnye binya arye, nun ninye deiyoknye upnamsil’ tenen, anye bira erepdeipnamake. Aminyan talak, anye birye, ninye deiyoknye unamle. Bukni lik upmalibuk, teleb kibuka fil kum dolirye, talye-talye uk ululnye, elda yuk nang amutam uplirye, talye fil melinanye unamle. Elce fil donamle ning ara, deken ning kum dolonamle. Talye uk unamle.

<sup>25</sup>Yatanye do nirya, elce, ‘Se, yata wiripnamnil do? Ikin ning na dam yanamle do? Yuk ninye arye, na ti, ikin ning dobuka, na nong deice deilinamniyak do?’ tenen, malye kanye bobuka ululnye bira, ilil kanye bobuka, talima noutam engena uk unamle. Bukni, yuk nang arye, anye biti eibikirye, el ikin ulye ning kel bikikirye, ‘Se, nun kwit melipnuyap’ tenen, el talima melina ati, teleb yupu nyabikcop ura, anye kekeplirye, aminyan talak tuba tamubuka kanye deibuka unamle.

<sup>26</sup>Malye un ning nirya batakuka, dipkoprop teleb ning uk talibuka ululnye birye, el kayapu nang ati, ‘Wininamlulume, wininamlume,’ nyabuka peterelul yupu ara, teleb yupu uk nyalule. Sikda teleb un bisik uk banamake. Bukni, sik malye un ning ayala-yala nirya talibuka unyak ninye arye, sik kayapu nang ati, nyanyak yupu ara, malye yupu uk nyanyaka ati, anang ayupu kekebikirye, dobolbacop ura, malye un ning aning-aning nirya weik tonap winipnin banamake. Malye un bisik uk banamake.

<sup>27</sup>Ninye ton lik-lik asa arye unyak nang arye, bai tam ulamle kam ning mal arye obicop ura, ‘Nun ap, nun kayapu nang ap arye, aning kwalibuka dinamap’ tenena kumce, lik upliba, aning talye batakanyake. Bukni, sik diksukum ning uk talibuka unyak nang arye, sik talinyak ning nirya ati ara, ‘Aning-aning nirya ara, teleb ning anya arye, aning nirya moubuka talibibirye, teleb uk unamabe’ tenen, wininyake. Dekna weik ning babye, dekna mitik ning babye, moubuka talinyakce, teleb fil uk donyake. Tonoknye babye, talye kum batakanyake.

<sup>28</sup>Ninye ton teleb un ning uk talibuka ukirye, diksukumuk un bisik uk banyak ninye nirya ara, fia kam una deiyok ning doprobikirye, kanye deibuka fia ati unamake. Diksukumuk unyak ninye ara, kam fia unamak



bukni, malye ning uk talibuka unyak ninye ara, sik banyak bisik ara, dipna dam uk banyake.

**13** <sup>1</sup>Kanye lamapdongobuka arye, fia diksukumuk ulirye, fia weik kel bikne mi ara, el li birye, wenen yupu nyalul ning ara, moubuka kekelule. Bukni, kanye erelan deice arye, el li yupu kum kekelul mi ara, el li koproba nyalamle yupu ara, moubuka kum kekelule. ‘Talye yupu nyanmanil’ tenen, kekebuka batakallule.

<sup>2</sup>Diksukum teleb uk ululnye birye, nyalul yupu ara, aminyan tam ara, yuk ninye ton kekebicop ura, el nyalul yupu deice arye, aninye ati teleb ulilule. Winibuka fia teleb uk uprabaliba, el anye akunum eiplyop ura, kanye deibuka unamle. Bukni, ‘Malye yupu ap, tilila yupu ap, minilan yupu ap uk, nyanamabe. Ayupu nyanamabe deice arye, yuk ninye ati malye ulinamabe,’ tenebikirye, malye uk unyak ninye ara, ninye walana ap, olana ap, yuk malye un ning ap ati, ‘Aning ara teleb uka,’ tenekirye, malye uk unyake.

<sup>3</sup>‘Na yupu nyapnya deice arye, yuk ninye ati, malye updeipnyak anye arye, moubuka tenepnirye, teleb yupu uk nyanamne,’ teneplirye yupu moubuka nyalulnye bira, el kam unamle talak ara, ouku weik unamle. Bukni, ninye arye yupu nyabikiba, kekeplirye, moubuka tenilena kumce, talye lukparabuka malye yupu ap, yu yupu ap, minopce nyaltakalulnye bira, yuk ninye ati malye kililule. Talye nyaltakalulnye bira, el dam ikin ning tamubuka yaliba dololule.

<sup>4</sup>‘Fil dona ara na like’ tenen, talya-talya urdem uk ulirye, moubuka kum tenelulnye bira, el kanye aniryuk, ‘Se, aning ton winipnamne. Aning ton doproptinye,’ tenelul ning ara, fia patalyeba, aning-aning nirya ati, tenelul bukni, atenelamle ning nirya ara, tonok ning babye nong kum upnamle. Elda talye atibuk tenelule. Bukni, yata ninye do nirya, pin-pin kanye bobuka unyakce, mikip arye fil donyak ninye ara, ‘Winiptipyop ura, aning ton doproptibye,’ tenelamice ning ara, atenelamak atonun, kibuka nong upnamle. Sik aninye ara mikip arye, fil donyaka deice arye, sik patan ning dolonamake.

<sup>5</sup>Allah arye, ‘Wininamlulume, aning ara fia kum wininamlulume,’ nyapdeyamuk yupu moubuka talibikirye, diksukum teleb uk unyak ninye ara, ‘Tilila yupu nyalana nun like,’ tenenyake. Bukni, aning tenena kumce, talye lukparabuka tilila yupu nyana ap, malye ning uk talibuka una ap, unyak ninye ara, sik mining dam anyuk, fia weik ikin ning yaliba doprobikirye, alye dakalanyake. Yuk ninye nirya arye, anang ati, ‘Sikda fia malye wininyake,’ nyabuka, batakalongonamake.

<sup>6</sup>Allah arye, ‘Wininamlulume, aning ara fia kum wininamlulume,’ nyapdeyamuk yupu moubuka talibikirye, diksukum teleb uk unyak ninye ara, sik kam unamak talak noutamak nirya ara, teleb uk unamake. Allah el yupu arye sik ti, fia melinamle. Bukni, aning tenena kumce, malye

ning uk talibuka unyak ninye ara, sik bidamnye arye, sik bidamnye atibuk, malye winililanyake. Sik bidamanye arye, sik bidamang ati ititilanyake.

<sup>7</sup>Ton nang ara, sik talinyak ning kum upmalibuk, tilila yupu deice arye, “Kume, na ara bona utotoa talina weiknye unune,” nyabuka nyaltakanyake. Ton nang ara, sik talinyak ning weik ululba, dipkoprop bona utotoa talina weik nang unyak bukni, sikce, “Kume, nunda bona utotoa talin weik nang kum unyabe,” nyabuka talye nyaltakanyake.

<sup>8</sup>Malye wininyak nang arye, yu kanye upliba, sik fia weik bona utotoa talin weik nang unyak ninye ati, “Anggun ti, opnusiabe, tenenmap bukni, yo bok weika arye aripsumunyop ura, kum opnusiabe,” nyabicop ura, sik bona utotoa talin weik nang arye, ‘Ayu nang arye opsicak’ tenen, yo bok weik arinyake. Bukni, yu kanye unyak nang arye, sik talye bona utotoa talina kum ninye ati, ‘Opnusiabe, nyabibya babye, anang arye yo bok kum aripsitinga ati ara, aninye ara, dauplye,’ tenekiry, sik bona utotoa talina kum ninye ati, malye yupu kum nyanyake. Mangkau kilongona uk unyake.

<sup>9</sup>Allah arye, ‘Wininamlulume, aning ara fia kum wininamlulume,’ nyapdeiyamak yupu moubuka talibikiry, teleb uk unyak ninye ara, sik kam unamak talak noutamak nirya ara, teleb uk unamake. Sikda pin-pin kanye bobuka unyakce, winipmanto ara dirina weik ulula noutamak arye unyake. Bukni, malye winin ning uk talibuka ululnye, el dam ara, ikin ning weik yanganamle. Winipmanto ara, upna lapmalya tangaplirye, kunuklamle touk unamle. El kam unamle talak ara, mitikanun aryuk unmalya ani, minopce dibinamle.

<sup>10</sup>Kanye talima erena ap, kwalina ap, una deice arye, ninye nirya fia walana ap, olana ap, dem uk unyake. Bukni, yata ninye do nirya, yuk fia kel bikamice nang arye, sik ti, “Teleb una ara ani, malye una ara ani,” nyabuka lipsisikuka nyan yupu nyabikiba, moubuka kekebice ninye ara, sik babye fia weik kel nang unamake. ‘Aning ara teleb, aning ara malye’ tenen, kel bikinamake.

<sup>11</sup>Ninye arye, “E, aning-aning nirya ton, winibibyop ura, minopce bona utotoa talin weik nang uk unamabe. Ati sikce, ‘Winipnamlulume,’ nyabuka nyasinyak yupu, kekepmunce, adib aryuk winipmunyop ura, minopce bona utotoa talin weik nang uk unamlume,” nyanamsiyake. Winibuka nyanamsiak bukni, ayupu atonun yupu nirya ara, fia kum kekenamlulume. Sik nyanyak yupu winipmunce, yo bok weik doproptuma babye, aminyan talak aning nirya minopce kum dananamsile. Bukni, fia pi dobuka mikip arye fil donmamunya ani, adeice arye yo bok weik dopropmumnyop ura, aning ara minopce min kum danapnamle. Fil teleb kibuka donmamunya deice arye dolonalum ning ara, min fola kume kum dananamsile. Fia aulirye, weik upra banamsile.

<sup>12</sup>Kanye fum tam aniryuk, 'Se, aning ton winiptinye, aning ton doproptinye,' tenelamlanye bira, atenelamlye ning kum uplyop ura, 'Yata deiyok ati kum upmanil do?' tenen, malye kanye bobuka ulule. Bukni, aminyan talak el kanye fum tam arye, 'Se, aning ton winiptinye, aning ton doproptinye,' tenelamle touk akunum yalyop ura, anye bira fia fin-fin kanye bobuka unamle.

<sup>13</sup>Yata ninye do nirya, yuk fia weik kel bikamik nang arye, sik ti, "Teleb una ara ani, malye una ara ani," nyabuka lipsisikuka teleb yupu nyabikiba, ayupu kekena kumce, 'Kume, lipsisikuka nyan yupu ap, wenen yupu ap ara, nun like,' tenebikirye, batakanyak ninye ara, aminyan talak, sik dam anyuk ikin ning weik yaliba dopdobikirye, ikin kanye bobuka unamake. Bukni, dan ninye do nirya, wenen yupu ap, lipsisikuka peteren yupu ap ati, 'Kume ayupu ara, nun dam peterenamsulume,' nyabuka fia weik kel bikna ning patalibuk, unyak ninye ara, teleb uk upre banamake. Sikce, 'Aning wininamabe, afil ara donamabe' tenen, piri buka donamak ning ara, nong upnamle.

<sup>14</sup>Kel fia weik bikamik nang arye, "Winina ara telebe, aning ara malye," nyabuka, lipsisikna yupu ap, wenen yupu ap nyasinyak yupu ara, fia teleb uk ulinamsile. Winipmanto ara, fia teleb mek pu ak arye mek kwebuka dipmunce, teleb uk ulamlum touk, aweik kel bikamik nang arye, nyasinyak yupu moubuka talimunce, upmunyop ura, teleb uk unamlulume. Sikce nyasinyak yupu moubuka kekebikirye, ayupu talibuka dobolbanyak ninye ara, malye un ning sik dam yalyop ura, adib aryuk, 'Kume, aning dobolbanyak ura, aminyan talak opniliba dipnyake,' tenebikirye, adib aryuk memelonyake.

<sup>15</sup>Moubuka tenepdelirye, teleb yupu nirya el asok deice delilunye bira, teleb uk upribanmalya ani, yuk ninye eibikirye, 'E, anye bira dipkoprop telebnye ulule' tenen, kel kibikirye, el ti kanye delinamake. Bukni, 'Malye un ning uk, talibuka unamabe,' tenenyak ninye ara, ikin ning, sik dam fia yanganamle. Winipmanto ara, amalye ning talibuka unyak ninye ara, keil fum weik likilul bisik noutamak uk, banyaka ati ara, ikin dib aryuk banamake.

<sup>16</sup>Kel fia weik kiamuknye bira, min kum winiPLYE talak, moubuka tenepdelirye, 'Aning winipnaman do, aning winipnaman do?' tenen, akunum moubuka teneplyop ura, el winin ning ap, el fil ap dolule. Bukni, sik walwal asa uk unyak ninye ara, min kum winibice talak fia kum tenenyake. Sik bidamang kanye aryuk tenenyak ning uk, talye lukparabuka wininyake. Tonda, sik moubuka kum tenilenyak ninye ara, malye kiplirye winipliba, yuk ninye kekenak ara, "Nun tenepmapu ning uk, talye lukparabuka winipmabe," nyabuka erepdanuka kwalibikirye talye nyaltakanyake. Aning ara, walwal asa aryuk, 'Malye winipmap do?' fia kum tenenyake.

<sup>17</sup>Malye un ning uk talibuka ululnye bira, ‘Nun mambul yupu lak nyalbinamle’ tenen, wipdeipmumnyop ura, moubuka kum tenepdelye dib aryuk, talye lukparabuka wininamla ati ara, aminyan talak ara, ikin ning uk bobuka anggun dam tamubuka boyanganamsile. Bukni, moubuka tenenanye wipdeipmunce, ‘Nun mambul yupu laka nyalbinamle’ tenen, dopdeipmumnyop ura, moubuka teneplirye, teleb uk unamla ati ara, aminyan talak ara, ninye teleb ulina ning uk, bobuka anggun dam tamubuka boyanganamsile.

<sup>18</sup>Yata ninye do nirya, yuk fia weik kel bikamice nang arye, sik ti, “Teleb wininmalum ning ara ani, malye unmalum ning ara ani,” nyabuka, lipsisikuka nyan yupu ap, wenen yupu ap nyabikiba, ayupu kekena kumce, ‘Kume, lipsisikuka nyana yupu ap, wenen yupu ap ara, nun like,’ tenebikirye, batakanyak ninye ara, aminyan talak, sik dam anyuk ikin ning weik yanganamle. Ato wininyak ninye ara, sik talinyak ning nirya, kum uprabanmalya ani, aminyan talak ara talye bona utotoa talina kum ninye uk unamake.

Yuk ninye nirya arye, anggun ti, “Kume aninye ara, malye uk winilamika ati, anang ara dauplye,” nyabuka, yep-yep abikirye, anggun ti bataknamsiake. Bukni, yata ninye do nirya, wenen yupu ap, lipsisikuka peteren yupu ap ati, ‘Kume ayupu ara, nun dam peterenamsumlume,’ nyabuka fia weik kel bikna ning pataliba wininyak ninye ara, teleb uk upra banamake. Yuk ninye eibikirye, “Aninye ara teleb uk unyake,” nyabuka kanye delinamsiake.

<sup>19</sup>Fia teleb ning ara, ‘Wimipnamnarya, aning ara fia se tenenune’ tenen, fia pi dobuka mikip arye fil dobibiba, aning tenelamak touk akunum nong kipliyop ura, ‘Aning ara fia telebe,’ tenebibirye, kanye delinyabe. Bukni, aning nirya moubuka tenena kumce, fia walwal kanye bobuka unyak nang ara, ‘Malye winin ning uk talinamabe’ tenen, fia malye uk wininyake. Aning ara, ‘Kume, teleb winin ning dolona ati ara, malye wininyap ning nirya batakanamabe,’ kum tenepmanto nang unyaka anya arye, malye winin ning kum batakmento ninye unyake. Ati ara, sik pataplye ning ara, nong fia kum upnamle. Talye-talye uk tuba unamake.

<sup>20</sup>Kel fia weik biklirye, moubuka tenelulnye dam melibuka balamlanye bira, el babye fia weik kel bikna deiyok ning, kel kiplirye, teleb uk unamle. Aning atonun, moubuka tenena kumce, walwal kanye uk bobuka, ululnye ap melibuka balululnye bira, el babye tuba walwal uk ulirye, el dam ara, ikin ning weik yanganamle. <sup>21</sup>Aning ara, talye ati kum nyapsine. Deiyok ara ani. Malye winin ning uk talibuka ululnye bira, el donga tam arye, malye una deiyok ning ton dobolyanganamle. Ati anye bira, ikin asa uk unamle. Aning atonun, diksukumuk ululnye bira, el donga tam arye teleb winin deiyok ning uk, tuba-tuba doryanganamle.

Ati, adiksukum ululnye bira, teleb ning uk dololirye, kanye deibuka unamle.

<sup>22</sup>Teleb unyak ninye, sik talyamice ning dobuka, sikce deibikiba, dadeipdanin, banamak mapu ati, aning aribikiba, amapu arye, ateleb ning dolonamake. Bukni, malye winilamice ninye ara, sik talyamikirye, bona utotoa talin nang ulamle ning nirya ara, batakikiba, aminyan talak ara, diksukum ulamak nang uk dolonamake.

<sup>23</sup>Tonda, sik bona utotoa talina kum nang ara, wa wibikirye, sik koulamak ning, teleb kibuka paplirye, nong neplirye, aning ayala-ayala nirya, weika arye aupmalye babye, sik malye wininyak ninye yakirye, aning nirya dalubuka, ubula dolonamake.

<sup>24</sup>Tonda, yata ninye do nirya, sik mapu malye winibice talak ara, 'Kume, nun mapu kum wenenamabe,' tenebikirye, sik mapu malye wininyak ning aupmalebuk, talye mangkau kilongonyak ninye ara, dipkoprop sik mapu ati, bico kum tenekirye, sik ti kanye kum delinyake. Bukni yata ninye do nirya, sik mapu malye ubice talak ara, adib aryuk, "Aning ara malye unmaluma ati, bataklyame," nyabikirye, sik mapu ati wenenyak ninye ara, dipkoprop sik mapu ati, bico tenekirye, kanye delinyake. Sik nin yapu ap, sik ni yapu ap arye, sik delinyak mapu ati, wenenyak ninye ara, dipkoprop sik mapu ati, bico tenebuka kanye delinyake.

<sup>25</sup>Allah arye, 'Wininamlulume, aning ara fia kum wininamlulume,' nyapdeiyamuk yupu, moubuka talibikirye, diksukum teleb uk, unyak ninye ara, sik kam unamak talak noutamak nirya ara, sik din ning dibikirye, boulule. Bukni, malye un ning uk talibuka, tuba-tuba malye uk unyak ninye ara, fil teleb kibuka kum donamaka anye arye, din ning mitiktonun dem dibikiba, bouna kumce, patana uk upliba, imun kanye bobuka unamake.

**14** <sup>1</sup>Fia kel weik kilapu arye, sik unyak ning ara, sik aik noutamak unyak ninye nirya ati, melilamikiba, sik talibuka fil donyak ning nirya ara, teleb uk ulule. Bukni, walwal uk unyak kilapu nirya, fil teleb ubuka kum donyak kilapu ara, malye winin ning uk talibuka ukirye, sik kam unyak talak noutamak nirya ara, sik neika unyak ninye nirya ap, sik mapu nirya ap, sik ap nirya ati, sik malye unyaka deice arye, aninye nirya ati malye ulinyake.

<sup>2</sup>Ninye nirya ara, Allah arye nyalye yupu moubuka kekenyakce, teleb ubuka diksukumuk unyak ninye ara, sik Ni Koprop Allah Yahweh ati ilil tenekirye, el tibuk si erenyakce, el si uk kinyake. Bukni, ninye ton diksukum ubuka kum ulirye, talye tilila yupu ap, tenepce nyana yupu ap, talye mangkau kibuka nyaltakalulnye bira, dipkoprop Allah ati, 'Na like,' tenelirye, Allah el si ati yanilirye, Allah ati alye dakalilule.

<sup>3</sup>Ninye ton walwal kanye bobuka unyak ninye arye, sik talima erelanyake. Winikirye, kwalina uk ukirye, malye winin ning uk

tenebuka, nyanyak yupu deice arye, yuk ninye kekebikirye, yu upliba, malye kanye bobuka dereldana uk unyake. Yu upliba sik malye yupu nyanyak nang wenena ati onyake. Bukni, anang opmaca deiyok ara, sik deice uk ulule. Bukni, yata nang do nirya, sikce nyanyak yupu nirya ara, moubuka tenipdekirye, teleb yupu uk nyanyak nang ara, wininyaka deice arye, dipkoprop sikce sik bidamang atibuk, melibuka kalikildanyake.

<sup>4</sup>Dan mutuku do nirya, ninye arye basam aik domikce bukni, basam dobuka, anyaik fum tam kum dongobicop ura, abasam aik urasin teleb uk unamle. Bukni, basam kum ulamlyop ura, abasam oplirye, yo bok ton dekuka kum dolonamle. Yo bok dolona kum ati, el patalye ning kum dekelonamle. Talye uk unamle. Bukni, basam weik weilulnye bira, el basam aik nirya ara, urasin malye unamle bukni, abasam dobuka dekelonamle talak ara, el fatablye ning nirya dekroplirye, teleb uk unamle. Ninye ton sapi basam awamline bira, asapi basam mikip arye melibuka weik wa wipliba, aminyan talak ara, el din ning nong weik upliba, libuka denamle. El weik wa wibuka kouamlya noutamak arye, paplirye nong uplyop ura, el patalye ning ayala-yala nirya ara, dekroplirye teleb uk unamle.

<sup>5</sup>Ninye diksukum ululnye bira, dipkoprop uk ulirye, ninye yupu lipsisikuka bokolina talak ara, el asing arye eipmalye touk, dipkoprop yupu uk laka nyalule. Bukni, yuknye ton, yuk nang arye wininmace ning, el asing arye kum eipmalya babye, talye minina yupu ap, tilila yupu ap, nyalulnye bira, ninye yupu lipsisikuka bokolin talak ara, fia talye yupu uk nyaltakalule.

<sup>6</sup>Ninye ton kwalina deice aryuk unyak nang ara, ‘Se, weik kel bikna deiyok ning ton kel kiptinirye, weik kelnye uptinye’ tenen, pataptu babye, weik kelnye dipkoprop kum unamle. Kwalina deice aryuk ulula anya arye, kel kum kipnamle. Bukni, ninye ton aning-aning nirya ati, ‘Deiyok dan do?’ tenen, moubuka tenipdelirye, moubuka tenelulnye bira, weik kel bikna deiyok ning weik arye tonap tabakuka, weik arye kel kipnin banamle.

<sup>7</sup>Ninye ton malye winin ning uk talibuka, walwal kanye bobuka ululnye ati, ‘Na kwit, na ap neika unaname,’ tenebuka una meme. Tonda, sik kilapu nirya arye, ato nang ati, ‘E, anye bira dopnutuba, neika utinimnye,’ tenena fia meme. Ara, talye ati kume. Deiyok ara, walwal kanye bobuka, malye uk ululnye birye, dipkoprop weik kel bikna ning ton kum peterenamsile. Tonda, el ulul ning eipmunce, ‘Aning ara, na ton wininamne,’ tenepmunce, kel bikmunyop ura, fia malye uk unamlume. Ati, sik fia walwal kanye bobuka malye uk unyak ninye ap, neika fia kum unamlume. Sikce nyanyak yupu babye, fia kum kekenamlulume.

<sup>8</sup>Ninye ton dipkoprop weik kel bikamik nang ara, sik winipnamak ning nirya ati, kabul talak arye moubuka tenipdekirye, namin asa arye unyak

ning ara, dipkoprop teleb uk unyake. Bukni, walwal kanye bobuka malye uk unyak nang ara, sik upnamak ning nirya kabul talak arye, moubuka kum tenildenyake. ‘Aning ara teleb do, aning ara malye do?’ tenena kumce, talye lukparabuka winipnin bakirye, teleb kum wininyaka anya arye, sik malye unyak ning nirya deice arye, sikce sik bidamang atibuk, tilila nyalildakirye, malye uk ulilanyake. Walwal kanye bobuka, malye ning uk ululnye bira, tilila ning uk talibuka unamle.

<sup>9</sup>Yata nang do nirya, Allah arye, “Wininamlulume, aning ara fia kum wininamlulume,” nyapdeiyamsuk yupu ati, ‘Nun like,’ tenebikirye, walwal kanye bobuka unyak nang ara, malye uk unyake. Sikce malye unyak ning nirya ati ara, tuba tamubuka moubuka kum tenenyake. Anang ara, malye ubikirye, ‘Akunum malye uk unyap bukni, yuk nang sik kekena ak, ‘Nun malye unmabe,’ nyabuka lakak arye nyabibirye, fia kum bataknamabe. Tonda, nunce yuk nang ati, malye winibupu ning ara, aning babye auplule. Lipsisikuka dobibirye, tuba tamubuka teleb kum kipdeipnamabe. Aning babye dauplye,’ nyabuka talye batakalongonyake.

Bukni, teleb ubuka unyakce, Allah el yupu moubuka kekebikirye, teleb uk unyak nang ara, moubuka tenipdekirye, ‘Yata wiribuka unamap do? Yata uptibya deice arye, yuk nang ap neika teleb ubuka uptibirye, kanye deibuka unamap do?’ tenen, tuba-tuba teleb ning uk unyake. Aning atonun, unyak nang arye, yuk ninye nirya ati, teleb winin ning uk sik ti winilinamake.

<sup>10</sup>Yata nang do nirya, sik kanye imun un ning upmaliba, sik kanye talima teniltona uk unmace nang ara, sik dem uk sik kanye talima noutamak ulul ning ati, kel bikilanyake. Yuk nang nirya arye ton, aning fia kum kel bikinyake. Aning atonun, yata nang do nirya, kanye talima teleb deice arye, kanye deibuka unyak nang ara, sik dem uk sik kanye talima noutamak ulul ning ati, kel bikilanyake. Dipkoprop yuk nang ton kum kel bikinyake. Ikin kanye bobuka unyak nang babye, kanye deibuka, teleb uk unyak nang babye, sik teninmace ning nirya ara, sik kanye talima noutamak uk ulule. Yuk nang ton kum teniptinge.

<sup>11</sup>Ton nang ara, teleb ubuka una kumce, malye winin ning uk talibuka winipnin bakirye, bona weik talin nang akunum unyakce, urasin fia teleb aik dobikirye, anyaik fum tam unamak bukni, aminyan talak anyaik ap, anang arye unyak malye ning nirya ara, dipkoprop kum upnamle. Bukni, ton nang ara, fia diksukumuk winipnin bakirye, talye butum bol arye, tia dolin aik fum tam uk unyak bukni, sik ap, sik kilapu ap, sikce deilinamak mapu nirya ap ara, fia teleb uk upnin banamake. Aninye ara talye noutamak ninye unyak bukni, sik min kum winipnamake.

<sup>12</sup>Ara, sik ninye nirya arye utenenyake. ‘Kume, nun wininyap ning ap, banyap bisik ap ara, diksukum bisik uk banyabe,’ tenebuka banyake. Bukni, tukwak ninye arye, malye ning uk talibuka unyak ninye ara,

dipna damak bisik uk banyake. Kwalin bisik uk ulula anya arye, sik abisik uk banyaka deice arye, sirya talak ara, sik dibikcop ura, uku dilamle bisik uk banyake.

<sup>13</sup>Ninye ton teleb ubuka unmace talak ara, kanye deibuka aku tubuka unmake bukni, aminyan talak ikin ning ton, sik damak yalyop ura, tuba tamubuka engena uk unamake. Aning atonun, unyak nang ara, weik ikin ning ton, sik dam aupmatu babye, sik kanye talima noutamak teleb ning ton tenebice ura, kanye deibuka unyake.

<sup>14</sup>Ninye nirya arye, Allah ati ilil tenebuka kum unyak ninye ara, Allah ati batakikirye, malye ning uk talibuka unyak bukni, aminyan sirya talak ara, Allah arye aninye nirya ati, weik arye wenebuka oplopnamle. Sik malye winilamak touk, wenen ning aripnamle. Aning atonun, Allah arye, “Wininamlulume, aning ara fia kum wininamlulume,” nyapdeiyamsuk yupu, moubuka talibikirye, diksukum winin ning uk talibuka, ulamice ninye ara, aminyan talak ara, Allah arye aninye ati, dekna ning weik tabakuka arenamle. Teleb ning weik arye doprobicop ura, teleb ubuka fia kam uk unamake.

<sup>15</sup>Walwal ning uk tenebuka unyak ninye nirya ara, yuk nang arye talye yupu nyaltakakiba, moubuka tenena kumce, anyapmace yupu nirya talye lukparabuka, dib tenebuka kekena uk unyake. Bukni, diksukumuk unyak nang ara, kanye fia moubuka tenebikirye, ‘Aning winipnamne do, kum do? Aning akunum winipnyop ura, aminyan talak, yata ning na dam yanganamnil do?’ tenen, moubuka unyake. Aninye ara, moubuka tenina kumce, talye lukparabuka malye un ning, fia kum unyake.

<sup>16</sup>Weik arye kel kinyak nang ara, Allah atibuk ilil tenebuka ukirye, tuba-tuba el si uk erebikirye, malye winin ning ap, malye wininyak nang ap unyakak nirya batakuka, teleb winin ning uk unamake. Sikce, ‘Malye ubipyak’ tenen, malye un ning ap, malye unyak nang ap unyakak nirya, fia leilonyake. Bukni, ninye ton walwal uk ululnye bira, moubuka tenipdelirye, yupu kum nyalula anya arye, ‘Yuk talak ara, yata wiripnamnil do?’ kum tenelule. Lik uk ulula ati, el kanye talima noutamak minopce yu welepliba, yuk nang ati, weik arye derelirye, sik ti malye ulilule.

<sup>17</sup>Ninye ton minopce yu kanye bobice talak ara, tuba-tuba yuk nang ati, derena uk ululnye bira, malye winin ning uk taliplirye, dipkoprop malye un ning ap, walwal un ning ap uk, unamle. Aning atonun, elce yuk nang ati, tenepce arye tilila yupu nyaltakalulnye ulula ati, yuk nang nirya arye, ‘Anye bira, nun like,’ tenenyake.

<sup>18</sup>Ninye ton, aning nirya moubuka tenekirye, kum unyak nang ara, sik un ning nirya ara walwal aryuk upnin banamake. Bukni, fia diksukum ubuka winin ning uk talibuka ulamlinye bira, weik kel bikna deiyok ning nirya, weik arye tabakuka kel kipnin banamle. Winipnamle ati, aminyan



talak ara, yuk nang eibikirye, ‘E, anye bira dipkoprop weik kelnye ulule,’ tenebikirye, el ti kanye delilanamake.

<sup>19</sup>Aminyan sirya talak ara, malye wininanye birye, teleb ubuka diksukum ululnye, el dam yalyop ura, el kisok kanupdongoplirye, anye biti kinamle. Aning atonun, ninye yuk nang nirya ati, tuba-tuba derebuka, malye ulululnye bira, teleb ubuka unyak ninye, sik aik bublan dam binuka buklirye, kisok kanupdongobuka bulbilirye, anang ati kinamake. Aning nirya ara, Allah el yupu noutamak arye nyalamsuk touk upnamle.

<sup>20</sup>Bona utotoa talina kum unyak ninye nirya ati ara, sik kayapu neika mining damak unyak ninye nirya arye, ‘Aninye ara na kayapu koprop’ tenen, “Nun aik weklulume. Neika dina dibibirye, yupu talinamabe,” nyabuka kum yukulonyake. Aning kum bukni, bona utotoa talina kum ninye, sik mining damak unyak ninye arye, “Sikda nun like ati, nun damak arye bindoplulume. Nun damak una kume,” nyabuka batakanyake. Bukni, bona weik talin nang ati ara, aning-aning nirya weik weinyaka anye arye, yuk nang nirya arye, ‘Se, anang ap eipdabirye, neika yupu sisikinmapiba, nun kayapu nang kekepsitinge’ tenen, kanye deibuka sik aik damak yanganyake.

<sup>21</sup>Yata ninye do nirya, sik mining damak unyak ninye ati, ‘Nun like,’ tenebuka batakanyak ninye ara, dipkoprop fia malye unyake. Utenenyak deice arye, malye kililanyake. Bukni, yata nang do nirya, sik kanye talima nirya, talye bona utotoa talina kum ninye ati, bico tenebuka, kanye deibikirye, teleb ubuka melinyak nang ara, Allah arye aninye ati, weik arye meliplirye, teleb ulinamle. Winipliyop ura, aninye sik unamak ning nirya ara, teleb uk unamle.

<sup>22</sup>Yatanye do nirya, teleb un ning nirya ara batakaliirye, ‘Malye winin ning uk talibuka uptinye,’ tenelirye ululnye bira, Allah arye anye biti fia bataknamle. Bukni, yata nang do nirya, sikce, ‘Se, yata teleb winin ning uk taliptibirye, teleb uk unamap do?’ tenen, unyak ninye ara, yuk ninye nirya arye sik ti, ‘E, anang ara, fia teleb nang unyake,’ tenebikirye, anang ati kanye deibikirye, bico tenenamake. Bico tenebikirye, anang ati fia melina uk unamake. Aning atonun, Allah elce aninye ati, fia kanye deiplirye, teleb ubuka melina uk unamle. Atalak noutamak babye, aminyan sirya talak babye, Allah arye sik teleb unyak ninye ati, fia kum bataknamle.

<sup>23</sup>Yata ninye do nirya, fil mikip arye pi dobuka, dolamak ninye ara, dipkoprop yuk talak din ning nong weik upliba, libuka weik arye libuka dinamake. Sikda teleb uk upnin banamake. Bukni, yata ninye do nirya, fil mikip arye kum dolamikirye, yupu uk talye-talye nyaltakanyak ninye ara, dipkoprop sikda talye urdem uk unamake. Deiyok ara, fil tonok ning babye mikip arye kum donyaka atia.

<sup>24</sup>Weik kel bikamik nang sikce weik kel bikna deice arye, fil teleb ubuka dopra balamicani, aminyan dolonamak ning ara fia weik unamle ati, yuk nang nirya arye sik ti kanye delilanamake. Bukni, walwal arye malye uk unyak nang ara, ‘Se, fia piribuka teleb utipya deice arye, nun bona ning weik upsutu,’ tenenyak bukni, dipkoprop nong kum unamle. Walwal kanye bobuka unyaka anya arye, talya uk unamake. Ati ara, ninye nirya arye, awalwal unyak ninye unamak ning ati, moubuka kel bikamica arye, ‘Nun babye atonun upsilyak’ tenen, leilonamake.

<sup>25</sup>Ninye yupu lipsisikuka bokolin talak ara, ninye tonoknye birye, fia teleb diksukum yupu dobuka nyalula deice arye, yuk nang ati lyelilule. Bukni, ninye yupu lipsisikuka bokolin talak ara, yatanye do, diksukum una kumce, tilila yupu uk nyalulnye bira, elce atilila yupu ap, minina yupu ap, nyalula deice arye, el kayapu nang koprop nirya ati, malye ulilule. Aning ara fia malye ulule.

<sup>26</sup>Yata nang do nirya, sik Ni Koprop Allah Yahweh ati, ilil tenebuka ukirye, el si uk erenyak ninye ara, kanye lamapdongobuka teleb uk unamake. Tonda, Allah Yahweh arye, aninye ati, fia melibuka kalikinamle. Aning atonun, anang sik mapu silip nirya ara, Allah arye melibuka kalikilirye, aning-aning weik tabakuka sik ti arenamle.

<sup>27</sup>Yata ninye do nirya, sikce Allah Yahweh ati ilil tenebuka, kanye deibuka, el si uk erebikirye, el ti kibuka si erenyak ninye nirya ara, sikda fia kam una deiyok ning uk talibuka unamake. Winipmanto ning ara, fia teleb mirin mek pu dipmakiba teleb ulamle touk unyake. Sik nirya ara, teleb uk upnin banamake. Allah Yahweh atibuk, tuba ilil tenebuka winipnin bakirye, el si uk fia ati erelamicop ura, Allah elcuk sik ti, kanye deibuka melinamla anya arye, aninye sik dam ara, kanye imun ning ap, dipna deiyok ning ap, tonok babye kum unamle. Allah arye sik ti, melibuka fia kalikinamle atia.

<sup>28</sup>Ninye deiyoknye Raja arye, el talilye ninye nirya ara, mapu weik deipdanin bakirye, sik wininyak ning nirya, weik wininyaka deice arye, fil teleb ubuka dopnin bakiba, yuk mutuku ninye nirya eibikirye, “Se, amutuku talibuka ninye deiyoknye bira, fia telebe. Elce talilye ninye ap, el talilye mutuku nirya ara, fia telebe,” nyabuka, el ti kanye delinamake.

Bukni, yuk ninye deiyoknye Sisinanye, elce talilye ninye nirya dibuka, kum danana ap, yuk mutuku bai tam sakuka balona ap, upnamake. Winibikiba, yuk mutuku ninye eibikirye, “Se, aninye deiyoknye Raja ara, el mikip ap, el un ning nirya ap, kum ulula anya arye, el amutam unyak ninye nirya ara, malye uk upnin banyake. Deiyok ara elcuka,” nyanamake. Tonda, “Aninye deiyoknye Sisinanye, elce talilul ning ap, ninye ap, kum kipnin banamak touk, el babye kum upnamle,” nyanamake.

<sup>29</sup>Weik kel bikamik nang arye, sik yupu nyapnuce ura, ‘Nun kayapu nang ati, weik yupu arye talye nyanmapirye, derepnyap’ tenen, kabul

nyapnuce talak ara, sik sitang moubuka kalikildakiry, yupu nimalye aryuk nyanyake. Bukni, walwal kanye bobuka malye uk unyak nang ara, aning atonun kum unyake. Sikda, yupu kabul nyapnuce talak, moubuka tenena kumce, yupu talye-talye uk nyaltakanyak deice arye, minopce yu upliba, sik kayapu nang ati, wana ap, malye ulina ap, unyake.

<sup>30</sup>Ninye ton, kanye teleb ubuka ukiry, kanye lamapdongobuka unyak nang ara, sik nong nirya babye, teleb uk ukiry kanye deibuka, kam unamak talak ara, lo weik upnamle. Bukni, ninye ton tuba-tuba kanye talima yu uliba, sik kayapu nang ati, 'Se, sik talinyak ning ara, na aryuk taliptinye' tenen, derenyak nang ara, sikcuk olilanyaka anya arye, minopce dibinamake. Winipmanto ara, ninye arye din ning talya ak deipmakibuk, minopce lyulamle touk, anang sik kanye talima malye upnin baliba, minopce dibinamake.

<sup>31</sup>Yatanye do, talye bona utotoa talina kum ninye ati, sik nong deice ikin ning weik arye delilulnye bira, bona utoto talina kum ninye kwepdeiamuka deiyoknye, Allah ati, 'Na like,' tenena atonun uliry, Allah ati yanilule. Bukni, yatanye do nirya, mitang ati imun kanye bobuka ukiry, talye bona utotoa talina kum unyak ninye ati, bico teneliry, teleb ubuka melilulnye bira, bona utoto talina kum ninye kwepdeiyamuka deiyoknye Allah atibuk, kibuka si erelule. Allah arye anye biti, kanye delinamle.

<sup>32</sup>Malye un ning ayala-yala nirya talibuka unyak ninye ara, sik mining malye unyak ning deice aryuk, talibuka deipliry olilule. Allah arye anye bira, el malye ulul ning dekna ati, weik arye wenebuka oplopliry, sirya daknamle. Bukni, ninye ton tuba-tuba malye un ning kum unyakce, Allah el nyalye yupu kekebuka, talinyakce, aning uk moubuka dobolbanyak ninye ara, dipnamak bukni, Allah sik damak uliry, tuba-tuba melipliba, teleb uk unamake. Deiyok ara, sikce teleb winin ning uk unyak ninye atia.

<sup>33</sup>Ninye nirya arye, weik kel bikna deiyok ning uk akunum kel bikamik nang ara, sik kanye talima noutamak weik kel bikna ning ap, teleb un ning ap, aning uk tenenyaka ati, sik teleb uk unamake. Bukni, ninye nirya arye, fia walwal kanye bobuka unyak ninye noutamak arye, sik unyak ning kabul winipmace talak arye, 'Aning ara teleb do, aning ara malye ning do?' tenena kumce, talye lukparabuka malye ning uk unyake. Sikda moubuka fia kum tenenyake. Ati, sik malye winin ning uk, tuba-tuba wininyak nang noutamak arye, tonoknye babye weik kel bikna deiyok ning kum kel bikinyake. Tonda, teleb un ning ton, fia kum tenildekiry, 'Weik mambul ning, el deiyoknye bira dan do?' tenen, fia kum tenilenyake. Walwal kanye uk, bobuka unyake.

<sup>34</sup>Yata mutuku do nirya, weik pala mutuku talibuka uca ak nirya ara, amutuku noutamak unyak ninye nirya arye, tuba-tuba Allah el yupu

nyalye touk kekenyakce, ayupu uk talibuka teleb ubuka ucop ura, yuk pala mutuku talibuka unyak ninye nirya eibikirye, nyanamake. “Se, amutuku ninye ara fia teleb uk unyake,” nyabuka kanye delinamake. Bukni, yata pala mutuku do nirya ara, amutuku noutamak ulul ninye deiyoknye, Sisinanye ap, el amutam unyak ninye nirya ap arye, fia malye uk upnin bacop ura, yuk pala mutuku ninye nirya eibikirye, nyanamake. “Se, amutuku ninye ara, teleb ubuka kum ukirye, tuba malye uk unyake,” nyabuka, malye yupu nyanamaka deice arye, amalye unyak mutuku ninye nirya, sik si malye nyapdeibikiba, alye weik daknamake.

<sup>35</sup>Ninye deiyoknye Raja arye, el amutam teleb kanye bomikirye, el fil dolamak nang ati, kanye deiplirye, ‘Anang ara telebe,’ tenelule. Bukni, el amutam fil melin nang ati, “Afil donamnulume,” nyabuka, fil aruklamlye ning, kum dolamicop ura, adeice arye, sik ninye deiyoknye Sisinanye biti, alye dakalinyake. Winibicop ura, aRaja arye, el amutam nang nirya ati, fia yu upliba, weik arye wenenlule.

**15** <sup>1</sup>Ninye ton yu tenebuka malye yupu arye, yupu nyabuka walace talak ara, sik yupu tamubuka nyapnumunyop ura, nimalye aryuk nyapnin bamunce, teleb yupu uk tenebuka nyanamlulume. El ti tamubuka nyapnumunyop ura, derelana deice arye, fia kum nyanamlulume. Talima nimalye arye, tamubuka nyapmunye ura, yu unmalinye babye, teleb kanye bonamle. Bukni, dereldanmace talak arye, tuba yu yupu uk tamubuka nyaldamunyop ura, atonun yu yupu nyapdanin bamunba, aning uk weik kipnin banamsile. Ara, minopce deiyok koubuka yu nyanmalinye ap, tabakuka nyanmalinye ap, yuk nang nirya babye kekenmamunce, melibuka dereldana uk unamlume. ‘Winipsilyak’ tenen, ninye dereldan talak ara, kanye talima namin asa aryuk, teleb yupu nyanamlulume.

<sup>2</sup>Ninye ton weik kel bikilulnye birye nyalul yupu ara, ninye nirya arye kanye deibuka kekebikirye, ‘Se, anye birye nyasulul yupu ara, fia telebe,’ tenebikirye, sik kanye talima lilolibuk, sik babye, ‘Se, nun babye aning kel biktiby’ tenen, pataliba, weik arye tabakuka kel kipnamake. Weik kel deice arye nyalulnye ati, yuk ninye nirya arye el ti kanye delinamake. Bukni, ninye ton walwal kanye bobuka, ululnye birye nyalul yupu ara, moubuka kum tenenmalya deice arye, talye yupu uk nyalule. Elda, yupu canga arye nyalya deice arye, malye yupu weik nyanamle. Atonye bira, talye yupu weik nyaltakalule.

<sup>3</sup>Allah Yahweh elda, mutuku-mutuku nirya tuba-tuba dilula anya arye, yata un ning do nirya, malye un ning babye, teleb un ning babye nirya ara, aning nirya dilirye kel kisulule. Tonda ninye kanye noutamak tenenyap ning nirya babye, eibuka kel kisulule. Teleb ubuka unyak ninye babye, malye ubuka unyak ninye nirya babye, elcuk sik damak ulirye, tuba-tuba fia disulule. Allah ati, tonok ning babye kum dungnuptibye.

<sup>4</sup>Ninye arye yuk nang ati, yupu nyapnuce talak ara, nimalye arye tenipdekiryē, teleb yupu uk nyanamake. Winibikce deice arye, yuk ninye sik kanye teleb ulinamake. Winipmanto ara fia teleb yo duk moupmaliba, ninye arye dakuka arepmakibuk dibikirye, kam ulamak touk unamle. Sik nirya arye, teleb yupu kekebikirye, sik kanye talima mikip kibuka melildakiryē unamake. Wininamak bukni, yuk nang arye yuk ninye ati tenena kumce, talye tilila yupu nyaltakanyake. Atilila yupu nyaltakaca deice arye, malye kanye bobikirye, dipkoprop anang sik kanye talima kam un ning ara, mitang kilinyake.

<sup>5</sup>Walwal kanye bobuka unyak nang ara, sik ni yapu arye, wenena yupu ap, lipsisikuka peterena yupu ap, nyanyak ning kekebikirye, moubuka kum dobolbanyake. Yaniltana uk unyake. Bukni, ninye ton sik ni yapu do, yuk nang do, sikce nyabice wenena yupu ap, lipsisikuka peterena yupu ap, moubuka kekenyak nang ara, fia weik kel nang unamake.

<sup>6</sup>Ninye ton, Allah yupu moubuka kekeliryē, Allah arye nyalye touk ubuka diksukumuk ululnye bira, teleb uk unamle. Winipmanto ning ara ani. Ninye arye sik aik bona ning weik deiyamikiba, weik ulamle touk, Allah yupu moubuka kekelinya bira, bona utotoa talinanye atonun unamle. Bukni, malye ning uk ululnye birye, 'Bona ning weik arye tabakuka doproprniryē, deipniba weik unamnile,' tenelul bukni, el malye ulya deice arye, el ap, el mapu silip ap sik dam ara, asum-asum nirya kanye imun ning uk yanganamle.

<sup>7</sup>Ninye ton weik kel bikna deice arye, yupu nyalulnye bira, fia teleb yupu uk nyalula anya arye, yata ninye do nirya, el nyalul yupu kekenyakce, sik babye moubuka kel kinyake. Bukni, walwal kanye bobuka unyak nang ara, sik kanye talima tenenyak ning ara, aning atonun kum tenenyake. Walwal ubuka unyake tenekiryē, talye ning uk nyaltakanyaka anya arye, yata ninye do nirya, sik nyanyak yupu kekenyakce, sik babye walwal nang uk unamake. Wininyaka deice arye, yuk nang nirya ati, tabakuka fia walwal kilinyake.

<sup>8</sup>Allah Yahweh elda, malye winin ninye arye el ti, morona ap, 'Nun malye un ning kilipsilirye, namin kipnamsil' tenen, teleb ning weik arye arina ap, wininyak ning nirya ara, el kanye deibuka kum dolonomle. Allah arye anang ati yu tenelule. Bukni, ninye ton Allah arye, "Wininamlulume, aning ara fia kum wininamlulume," nyabuka, nyasilye touk kekebikirye, moubuka wininyak ninye nirya ara, el kanye delilule. Sikce Allah ati, arina ning fia teleb ning kum upmalya babye, sik aninye arye morobice ning ara, Allah kekebuka dopdopliiryē, sik ti kanye delilule.

<sup>9</sup>Ninye ton Allah Yahweh el ulye touk, tenebuka kum ukiryē, malye winin ning uk talibuka wininyak nang ara, Allah Yahweh arye, 'Na like,' teneliryē, anang ati, fia yu ulule. Bukni, ninye ton, 'Allah el ulye touk

uptinye' tenen, fia fi dobuka, kel bikilulnye bira, Allah elce, 'Winibuka unamake,' tenelul touk, ululnye ati ara, fia kanye delilule. Atonun unyak nang ara, Allah arye fia bico tenelule.

<sup>10</sup>Ninye ton malye winin ning uk ulirye, Allah arye, "Teleb un bisik uk dobolbanamlulume," nyabuka peterelirye, "Aning ara wininamlulume, aning ara, fia kum wininamlulume," nyabuka, nyalisulul yupu moubuka kum kekenyak nang ara, aminyan talak Allah arye sik dam weik kanye imun un ning arenamle. Aning atonun, yata ninye do nirya, sik deiyok nang arye, "Moubuka unamlume," nyabuka, nyanyak yupu kum kekenyak ninye ara, aminyan talak ara, Allah arye wenebuka opliba dipnamake.

<sup>11</sup>Allah Yahweh ara, aning-aning nirya el akunum kele. Malye ubuka unyak ninye dibikirye, wekelbanamak sukum ulul ning nirya, akunum atu buklobuka sirya dakamice ning babye, aminyan talak sirya daknamak ning babye, el akunum kel bikilule. Aning ati ara, dipkoprop nyapsine. Aning-aning nirya akunum bikamuka anya arye, ninye tukwak mutuku unyak nang nirya arye, malye ubuka unyakce, sik kanye talima noutamak dungnunyak ning nirya ara, tonok ning babye, Allah ati kum dungnuptinge. Allah elcuk aning nirya akunum kel bikilule anya arye, aning nirya ara, dilulba lakak uk ulule.

<sup>12</sup>Ninye ton, yuk nang ap, Allah el yupu ap ati, 'Na like,' tenebuka, malye yupu nyalulnye bira, yuk kel nang arye el ti, "Winina kume," nyabuka lipsisikna yupu nyanmace talak ara, anye birye, sik kel nang ati, kanye yu ulule. Aning atonun, yatanye do nirya, yuk ninye ati, talye yep-yep aplirye, malye kilulnye birye, yuk kel bikamice nang ati, "Anggun ton melibuka peterepnululume," nyabuka, fia kum moropnamle. Kume, sik bidamang kanye ereldanyak nang arye, sik bidamnya ati, 'Nunda kele weik nang akunum unyap,' tenenyake. Fia kwalina uk unyak ninye anya arye, sik bidamang kanye noutamak tenenyak ning uk, talibuka unamake. Tonda, 'Yuk nang arye nyanyak yupu nirya ara, nun like,' tenenyake.

<sup>13</sup>Ninye ton, el kanye talima noutamak arye, kanye deiplinye bira, el urasin nirya etek-etek aplirye, kanye deibuka ulule. Bukni, imun kanye bobuka ululnye bira, el kanye talima ap, el kanye tenen ning ap, fia ikin weik ulula anya arye, 'Se' tenen, mikip fia kum uk ulirye, kanye deibuka kum unamle. Ikin asa uk unamle.

<sup>14</sup>Winipmanto ara, ninye ton teleb ubuka ululnye bira, din patapnamle talak ara, teleb din ning uk, dobuka denamle. Wininamle bukni, ninye ton el kanye talima noutamak fia walwal uk ululnye bira, din bama donoklamikiba, lyulamle ning awaplya babye, amalye ning uk dobuka denamle. Aning atonun, ninye ton, 'Kel bikna deiyok ning weik arye kel biktinye,' tenebuka, kel bikna deiyok ning ati elkirikilule. Anye bira,

dipkoprop elce tenebuka elamle touk, weik arye tonap tabakuka, kel kipnin banamle. Bukni, sik kanye talima ap, kanye tenen ning ap, walwal uk unyak nang ara, ‘Talya-talya yupu uk nyapsitingba kekebtibye’ tenen, pataliba ayupu atibuk, eibuka dobolbanyake. Ato nang ara, fia walwal uk unamake.

<sup>15</sup>Ninye ton utoota talina kumce, ulamice nang ati, yuk nang arye ikin ning weik sik nong deice dobuka, deilinyaka anya arye, sik aninye kam unamak talak, asum-asum nirya ara, ‘Se, yata ning ton uptibye do?’ tenen, pataliba, ikin kanye uk bobuka unamake. Ikin ning noutamak uk unamake. Bukni, yuk ninye nirya ara, teleb kanye bobuka ukiryte, fia yuk tenenyake. Sikda, ‘Kume, nun kam unyap talak nirya ara, fia teleb uk unyabe,’ tenebuka kanye deibuka fin-fina asa arye unyake. Winipmanto ara, sik weik kwalina dipnuce ati, kanye delilamak touk, unamake.

<sup>16</sup>Sik talibuka un ning mitikanun uk aupmal bukni, sikce, ‘Kume nun Ni Koprop Allah Yahweh, elcuk arenulule,’ tenebuka, tuba-tuba Allah atibuk ilil tenebuka ukiryte, el ti kanye deibuka kibuka si erenyake. Sik wininyak ninye ara, fia teleb uk unamake. Bukni, yuk nang arye aning-aning nirya dekiriryte, bona ning weik arye bulubuka deilinyak bukni, kanye deibuka kum unyake. Aninye ara, sikce tuba-tuba yuk nang ati, derena uk unyake. Wininyak talak ara, sikce yuk ninye ap, neika dukdongobuka tonok kanye bobuka, fia kum unamake. Aninye sik fatablye ning ara, ‘Fia nyaldana uk ulamtibye,’ tenebuka unamake. Sik bona ning weik aupmatu babye, sik kanye talima noutamak ara, malye kanye bobuka unyake.

<sup>17</sup>Fia teleb ning ara, ninye ton tonok lyun ning deice mal-malya lukuka deipdakiryte, mek dibice deice arye, ‘Fia telebe, na ka koprop, nun neika unyame,’ tenebuka unyake. Bukni, yuk nang ara, basam obuka weik kwalina kwalibikiriyte, dibice deice arye, ‘Nun ap neika dipnamap nang, neika una ara, nun fia like,’ tenelanyake. Basam tup weik aupmatu babye, akwalina neika dibice deice arye, ‘Nun like,’ tenebice ura, kanye talima wilipdakiryte unyake. Aning ara, fia malye uk ulule.

<sup>18</sup>Ninye ton tuba-tuba yu ning uk tenebuka ululnye bira, atenelye deice arye, minopce yu welepliba, yuk nang ap waldana ap, oldana ap uk unyake. Wininyak bukni, ninye ton kanye talima dakdongobuka nimalye arye ululnye bira, elce, ‘Yu yupu nyapnun’ tenen, moubuka tenipdepnin baliryte, teleb yupu uk nyalulnye bira, adeice arye, el damak unamak ninye nirya babye, yuk nang ap neika dukdongobuka fia teleb uk unamake.

<sup>19</sup>Ninye ton tuba-tuba, ‘Fil mikip arye dona ara na like,’ teneliryte, fil teleb ubuka kum dolulnye bira, el kam unamle talak nirya ara, patana uk uliba, imun kanye bobuka fia ikin weik unamle. Bukni, ninye ton diksukumuk uliryte, Allah el yupu uk kekebuka dobolbalulnye bira, fia

teleb uk unamle. Tonda, weik kanye imun ning ton, el damak fia kum yanganamle.

<sup>20</sup>Mapu nirya arye teleb ubuka ukirye, weik kel kipnin banyak mapu nirya ati, sik ni yapu arye fia kanye delinyake. Bukni, teleb ubuka kum ukirye, malye-malye uk wininyak mapu nirya ara, sik nin yapu, kanye uk delilamliba, amapu ati, ‘Nun like,’ tenenyake.

<sup>21</sup>Yata nang do nirya, tuba walwal uk unyak nang ara, ‘Aning ara wiriptibye’ tenen, tuba-tuba pataliba, yuk nang arye awalwal ning uk upnin balamikiba, yuk ninye ikin uplyop ura, aning eibikirye, kanye delinamake. Sik walwal ning uk patalye ninye ara, wininyaka deice arye, weik kanye imun un ning sik damak yanganamle. Bukni, ninye ton kanye moubuka tenipdekirye, ‘Teleb bisik uk dobolbanamabe,’ tenenyak nang ara, dipkoprop teleb ning uk talibuka unamake. Winipnin banamaka deice arye, sik kam unamak talak nirya ara, teleb uk unamake. Sik fil donamak ning nirya babye, nong fia weik upnin banamle.

<sup>22</sup>Tonda sik nirya arye, ‘Weik mambul ning ton winipnamabe,’ tenepmunyop ura, kabul talak arye moubuka tenepmunce, weik kel bikamice nang ap, yupu talipmunce, “Winipnamabe, aning teleb do, malye do?” nyabuka, yupu sisikmunce, anang nirya arye, yupu ton melibuka nyapsikcop ura, aminyan talak sikce kel bikicop ura, angguncce, ‘Aning wininamabe,’ tenepmamun fil dopmunyop ura, dipkoprop nong upnamle. Aning ara, kum kum danamle.

Bukni, yuk nang arye aning atonun fia kum unyake. Sik fil min kum dopmakce talak arye, ‘Aning ara teleb do, malye do?’ tenen, yuk nang ap yupu talina kum dib aryuk, talye lukparabuka fil dolbanyake. Aning nirya kum tenipdekirye, talye fil uk dolinyak nang ara, sik tenenyak ning, dipkoprop nong fia kum upnamle. Aning nirya ara kum danamle.

<sup>23</sup>Ninye ton, ‘Yupu nyapnun’ tenen, teneplirye, yupu nyanulye talak ara, el tenepmalye touk, minopce teleb yupu uk nyapliba, ninye nirya kekebikirye, kanye deilinyake. Sik nirya arye el ti, “E, nun kwit telebe,” nyanamake. Aning atonun, yata nang do nirya, weik kel deice arye, ninye melina yupu teleb ubuka nyaptingop ura, sik yupu nyabice talak, teleb ubuka nyabikiba, ninye nirya kekebikirye, kanye delinamake.

<sup>24</sup>Teleb ubuka kel kinyak nang ara, sik kanye diksukumuk upliba, teleb ubuka unyakce, Allah el yupu uk moubuka kekebikirye, ulamica ani, yuk talak dibicop ura, dipkoprop im deice bikirye kam fia unamake. Aning atonun, ninye ton anang wininyak atonun kanye talima diksukum teleb ubuka unyak nang ara, ninye dibikirye banyak bisik ara, batakuka kam una bisik uk banamake. Tukwak mutuku noutamak unyak talak ara, sik nong dipnamak bukni, dibikce babye, aminyan talak tuba tamubuka, kam bukikirye, fia kam uk unamake.

<sup>25</sup>Ninye ton kanye talima erebuka ululnye bira, el kam unamle talak fil donamle ning ap, el upnamle ning ap, el kilapu ap, el mapu silip nirya



ap ati, Allah Yahweh arye, sik wenen ning nirya, kum kilinamle. Bukni, diksukum teleb ubuka unyak youwak kilapu ara, sik talibuka unamak talak noutamak nirya ara, Allah Yahweh elce melibuka, arenamle deice arye, sik bona ning ap, sik mapu ap ati, fia melibuka kalikinamle. Sik ning ara, kum kum upnin banamle.

<sup>26</sup>Ninye ton yu kanye uk tenebuka, malye ning uk wininyak nang ara, Allah Yahweh<sup>b</sup> elce, ‘Anang ara na like,’ tenelule. Utenelel bukni, diksukum teleb ubuka unyak ninye arye nyanyak yupu ati ara, Allah arye fia kanye delilule.

<sup>27</sup>Yatanye do, ‘Yo bok weik arye koproptinirye, bona weik talinanye kiptinye’ tenen, tilila yupu nyabuka ubula dololulnye bira, aning-aning nirya, winibuka dololya deice arye, el ap, el mapu silip nirya ap ati, malye kililule. El malye ulya deice arye, bona ning weik dolonomle bukni, adeice arye, el mapu silip nirya malye winililulba, ikin ning weik unamake.

Ton nang ara, ‘Ubula dopropnamne’ tenen, mambul ning bokuka arepmantonye ati, morolbalule. ‘Anye bira kanye deipnilirye, kum aripnamnutu ning bukni, dungnubuka aripnamnil’ tenen, amorolbalulnye birye, teleb ning dobuka, weik deiyoknye ati dungnubuka arelbalule. Winilul bukni, Allah arye amalye ululnye ati, aminyan sirya talak, wenebuka oplopnamle. Ati ara, yatanye do, ‘Ayo bok ara dungnubuka dolona na like,’ teneplirye, binuka moroplirye, kum dolbalulnye bira, teleb ubuka kam fia unamle.

<sup>28</sup>Diksukum teleb ubuka ukirye, Allah el yupu nyasilye touk, tuba-tuba moubuka kekebikirye, ayupu talibuka unyak nang ara, sik nyapnamak yupu ati, min kum nyapmace talak arye, moubuka tenipdekirye nyanyake. Anang ara, sik nyanyak yupu nirya teleb uk ulule. Bukni, malye winin ning uk ton talibuka unyak nang ara, sik nyapnamak yupu kabul talak arye, moubuka tenina kumce, yu upliba, talye lukparabuka adib aryuk, malye yupu uk nyaltakanyake.

<sup>29</sup>Ninye kanye talima diksukumuk ubuka unyak ninye arye, Allah morobice ura, Allah Yahweh arye sik morobice yupu kekenamle. Bukni, tuba malye-malye uk upra banyak nang arye, moronyak ning ara, Allah arye kum kekenamle. Deiyok ara, sikce Allah ati, “Melipsilyame,” nyabuka moronyak bukni, tuba malye uk unyaka ati, Allah elda sik damak fia kum ulula anya arye, sik pataliba moronyak ning ara, fia kum kekelule.

---

<sup>b</sup> 15:26 *Yahweh* – Allah el si koproba ara, Yahweh ulule. Ibrani yupu nyanyak kili sal arye, ‘Allah el si koproba ara, lakak arye kum nyaptipnye’ tenen, ilil ulula ati ara, sikce huruf ‘YHWH’ aning uk sekenyake. Bukni, ‘YHWH’ ahuruf uk skipyop ura, ‘Ayupu nyana ara, walwal upsilyak’ tenen, nunce, ‘Yahweh’ sekenyabe. Indonesia Alkitab ara, Allah el si Yahweh ulul sukum ara, ‘TUHAN’ sekenyake. Ayupu bikna ati, laka nyan yupu nomor 49 dipdelulume.

<sup>30</sup>Ninye ton sik urasin etek-eteka abikirye, kanye deibuka unyak nang ara, ninye yuk nang nirya eibikirye, sik babye kanye deilinyake. Aning atonun, yuk nang arye nun melina ati, teleb yupu dobuka, yuk pera mutuku arye, nun dam laka nyalyasicop ura, ayupu kekebibirye, nun kanye deibuka unamabe.

<sup>31</sup>Ninye ton wenena yupu ap, lipsisikuka peterena yupu ap, nyanmakiba, kekeplirye, ‘E, ayupu ara mambul ulul yupu anya arye, na ton kekepnirye, talibuka unamne,’ tenelunye bira, yuk weik kel bikamice nang ap, neika upyop ura, kanye deibuka unamle. Deiyok ara, weik kel nang ap, el ap neika ulamikca ani, sikce weik kel bikna ning nyakiba, kekeplyop ura, aminyan talak el babye weik kel biknanye upnin banamle.

<sup>32</sup>Ninye ton yuk nang arye wenebuka peterena yupu ap, lipsisikuka peterena yupu ap, nyabice talak, sikce ayupu moubuka kum kekenyakce, melibuka kum dobolbanyak ninye ara, dipkoprop sik bidamnya ati kum kalikildanyake anya arye, wininyaka deice arye, sik dem uk malye ulilanyake. Wininyak bukni, yata ninye do nirya, yuk nang arye wenebuka peterenyak yupu ati, kanye deibikirye, moubuka kekenyak ninye ara, weik kel bikna deiyok ning ton, weik tabakuka kel kipnin banamake.

<sup>33</sup>Yata ninye do nirya, Allah Yahweh ati, ilil tenebuka ukirye, el si uk erenyak ninye nirya ara, sik peterena deiyok nang arye, peterenyakba moubuka kekebicca deice arye, weik kel bikna ning tonap, tabakuka kel kipnin banamake. Tonda, yata nang do nirya, sik talima nimalye aryuk amutam ukiba, aminyan talak yuk ninye nirya eibikirye, ‘E, anang ara, teleb uk unyaka anya arye, nun ninye deiyok nang unamsiyak’ tenen, anang dobuka erebikirye, kanye delinamake.

**Walwal arye unyak kili sal ap, moubuka tenebikirye,  
teleb unyak kili sal ap ati, nyabuk yupu**

**16** <sup>1</sup>Ninye arye sik kanye talima noutamak, ‘Wininamabe, wininamabe’ tenen, yupu talikirye, “Dipkoprop, aning uk wininamabe,” nyapting bukni, Allah Yahweh arye, ‘Dipkoprop aning uk wininamake’ tenen, yupu nyalisulule. Dipkoprop fia teleb ning ara, Allah elcuk, tenelul touk, teleb upradeipnamsil. <sup>2</sup>Ninye nirya, sik kanye talima noutamak arye, ‘Nun wininyap ning nirya ara, diksukumuk unyabe. Nun babye bisik ara, teleb uk unyabe,’ tenebuka banyake. Wininyak bukni, Allah Yahweh arye, ninye kanye talima noutamak uk dilirye, moubuka asilesulule. Ara, ‘Ninye nirya sik wininyak aning ara, yata ning tenekirye, wininyak do? Yata deiyok ati, afil donyak do?’ tenen, asilesilirye, kel kisulule.

<sup>3</sup>Aning ati, anggunce, ‘Wininamabe,’ tenelulum ning nirya ara, ‘Allah Yahweh elcuk melisilya deice arye, teleb upnin banamap’ tenen,

anggun tenelulum ning ap, winipnin banamlum ning nirya ap, Allah el tibuk arenamlume. Arepmunyop ura, Allah arye melisilyeba, anggun tenepmunce winipnin banamlum ning nirya ara, nong teleb ubuka nong unamle. Anggun wininamlum ning nirya ara, ‘Kume, nun mikip deice aryuk wininamabe,’ tenena fia kume.

<sup>4</sup>Ayupu ara talye ati kum nyapsine. Allah Yahweh arye, ‘Wininamne, wininamne,’ tenebuka, winilul ning nirya ara, minop talak arye, ‘Aning ara winipnamne,’ tenyamuk touk, aning-aning nirya kwepdeibuk ati, aning nirya teleb uk ulule. Ara, malye ubuka unyak nang arye wininamak ning babye, Allah arye, ‘Winibuka malye upnin banamake’ tenen, akunum kintinibuka tenelamuk bukni, aminyan sirya talak ara, Allah arye amalye unyak ninye ati, wenebuka oplirye, uku dilye mutuku dopkwetepnamle.

<sup>5</sup>Ninye nirya, sik kanya deilin erebuka ukirye, kwalinya nang ara, Allah Yahweh arye, ‘Anang ara na like,’ tenelule. Ara, dipkoprop elce, sik anang ati tenelye ning ara, ton fia luba kum kinamle. Nunda aning fia dipkoprop bikinyabe. Allah arye sik aninye ati, ‘Na like,’ tenelamlya ani, kum daneipnamle. Dipkoprop yuk talak ara, aninye ati weik arye wenebuka oplopnamle.

<sup>6</sup>Ninye ton teleb ubuka ukirye, Allah atibuk batakana fia kumce, el ti ilil tenebikirye, dib tenebuka teleb uk ucop ura, Allah arye sik malye unyak ning nirya, namin kipnamle. Bukni, fia teleb ning tuba tenenamle ning ara, ani. Yata ninye do nirya, dipkoprop Allah ati, ilil tenebikirye, el si erebuka kinamak ninye nirya ara, Allah el amutam teleb uk unamake. Aning atonun unyak ninye nirya arye, ‘Malye un ning tonok ning babye, kum unamabe,’ tenebikirye, fia teleb uk upnin banamake.

<sup>7</sup>Sik ninye nirya arye, teleb winin ning uk, talibuka ucop ura, Allah Yahweh arye, sik unyak ning ati, fia kanye delinamle. Allah Yahweh arye, aninye ati kanye deiplye ura, elce melipliba, aninye sik oldan nang nirya, winiryuk kanye tenen ning uk, punubuka areplirye, aninye ap ansinipdeipliba, teleb uk unamake. Minop talak ara, oldana uk ulamik bukni, aminyan talak nirya ara, sik kayapu nang koprop atonun ubuka unamake. Sik kam unamak talak noutamak nirya ara, tonap fia kum oldanamake.

<sup>8</sup>Ati teleb ning ara, Allah Yahweh arye tenelula ara ani. Yata ninye do nirya, bona ning weik arye dekuka delina kumce, talye bona utotoa talina kum ninye uk unamak bukni, teleb winin ning uk talibikirye, Allah el yupu moubuka kekebice ura, ‘Sikda fia teleb uk unyake,’ tenelule. Yuk ninye arye, ‘Bona ning weik arye doproptibye,’ tenena ap, ‘Yo bok weik arye taliptibye,’ tenena ap deice arye, malye kanye bobuka enyaka anye arye, anang arye sik yuk ninye ati, tilila yupu nyanyaka deice arye, malye kilinyake. Aninye ati ara, Allah el kanye ara, ‘Sikda fia malye uk unyaka anye arye, na like,’ tenelule.

<sup>9</sup>Ninye nirya sik kanye talima noutamak arye, ‘Aning ara winipnamne,’ tenebuka, yuk-yuk tenenyak bukni, sik dipkoprop upnamak ning nirya ara, Allah Yahweh elcuk, “Teleb bisik ara ani, dipkoprop winipnamaka ara ani,” nyabuka kintililule. Elce tenelul touk, wininamake. Yuk ton kume.

<sup>10</sup>Allah arye sik weik ninye deiyok talibuka unyak weik nang ati utenelule. ‘Na arye sik ti, na weik mikip aripneba, sik weik arye kel kin ning moubuka tenebikirye, sik mutuku noutamak unyak ninye nirya ati, teleb ubuka talinamake. Tonda, yupu diksukum ubuka yupu bokolinamak. Teleb yupu nyabikiba sik amutam unyak ninye ayupu kekebikirye, teleb uk unamake,’ tenelule.

Ati sik weik ninye deiyok nang, Raja weik nang ara, Allah Yahweh arye, el weik mikip talibuka ulul ning ara, sik ti arepliba doprobice bukni, yupu bokolina talak malye yupu uk nyabikirye, sik amutam ninye ati, malye uk ubicop ura, Allah arye fia malye kanye bonamle. Aning ara, fia malye weik unyaka anya arye, Allah arye aRaja nang ati, wenepnamle.

<sup>11</sup>Ninye arye, sik bona ning dekna ati, ‘Ikin do, kanam do?’ tenen, kiklildelamak ning deice arye, kiklipekirye, fia dipkoprop ning uk upliba nyabikcop ura, Allah Yahweh arye sik ti, kanye delilule. Deiyok ara, kiklildelamak ning, fia dib dipkoprop ning deiyoknye bira, Allah el uk ulule. Ati kiklildelamak ning, kiklildenyak bukni, tilila yupu uk nyanyak nang ara, Allah arye weik wenepnamle.

<sup>12</sup>Dan mutuku do nirya, amutuku talibuka unamak Raja weik nang nirya arye, ‘Atalenyte mutuku, keteng tamun weik arye taliptinye’ tenen, pataplyop ura, adib aryuk moubuka talina ap, teleb ubuka yupu nyana ap, sik amutuku tam unyak ninye, teleb kilina ap, aning uk unamake. Winibuka diksukumuk, winipnin bakiryte, tilila yupu nyana kum dib aryuk, amutuku teleb ubuka talibicop ura, tonok mutuku arye dipdongobuka dorunamle keteng tamun tuba talinamake.

Bukni, weik ninye deiyok Raja weik nang arye, sik talinyak mutuku nirya, teleb ubuka kum talibikirye, tilila yupu weik nyakcop ura, sik amutam unyak ninye arye aRaja nang ati, yu upliba, batakikirye bisibicop ura, sik pununa ati, ‘Yuknye nun ninye deiyoknye upnamsil’ tenen, yuknye wibuka ereipnamake. Ati ara, sik weik ninye deiyok nang, Raja weik nang nirya arye, ‘Tilila yupu nyana ap, nun amutam unyak ninye ati, malye ulina ap, ikin ning sik nong deice delina ap nirya ara, nun like,’ tenena uk unamake.

<sup>13</sup>Tonda yata nang do nirya, sik ninye deiyoknye, Raja weik nang ati, yupu laka nyalbice talak nirya ara, sikce winilamice ning ap, laka nyapnamak yupu nirya ap, tenepce tilila yupu nyana kum dib aryuk, fia dipkoprop yupu uk nyabikcop ura, sik Raja weik nang ap, yuk

ninye deiyok nang ap, ayupu kekebikirye, kanye delinamake. Sik ninye deiyoknye Raja weik nang ap, sik amutam bukni, yuk ninye deiyok nang ap nirya ara, dipkoprop yupu nyanyak ninye ati, kanye deilinyake. Tilila yupu deice arye, talye nyaltakanyak ninye ati, 'Nun like,' tenenyake.

<sup>14</sup>Ninye deiyoknye Raja arye, el amutam unyak ninye ati, yu upliba wana weik upyop ura, elce wenena yupu nyalya deice arye, el yin talin nang arye, el amutam unyak ninye ati, talye lukparabuka olyanganyake. Ati ara, Raja weik nang amutam unyak ninye nirya arye, 'Kume, nun Raja arye derepsilirye, opsilyak' tenen, kanye moubuka tenebikirye, teleb uk unyake. Sik weik kel bikamik nang arye, 'Nun ninye deiyoknye derepsilirye, opsilyak' tenen, moubuka tenenyake. Raja arye malye kanye bobuka, ninye wapmanto ning nirya ati, fia leibuka unyake. Awinin ning ara, fia kum wininyake.

<sup>15</sup>Dan talak do nirya, weik ninye deiyok nang, sik Raja weik nang kanye deibikirye, sik kanye talima mitang uplyop ura, sik amutam unyak ninye ati, teleb ubuka melibikiba, aninye nirya teleb uk unamake. Winipmanto ara, weik dou maplirye, wa wibuka kouamice ning nirya kolulamle bukni, dua arye mok bobuka yaliba, mok ceplirye, wa wibuka yala ning kouamice ning, teleb ulamle touk, weik ninye deiyoknye birye, yuknye biti kanye deiplyop ura, anye biti teleb ulinamle.

<sup>16</sup>Ton ninye arye, dekna weik ning el si ara emas ap, perak ap, 'Aning weik arye dolonamap' tenen, pataliba, fia pi dobuka elinyak bukni, aning ara mitik teleb uka. Weik teleb ning ara, ninye arye, 'Se, weik kel bikna deiyok ning, weik arye kel biktibirye, teleb uk unamap' tenen, fia pataliba, pi deibuka, diksukum winin ning uk eldenyake. Aning ara dipkoprop weik teleb ning wininyake. Aning atonun, 'Se, weik kel bikna ning kel kiptinirye, fia teleb uk unamne' tenen, aning uk weik arye pataplirye bira, weik teleb uk ulule. Bukni, 'Se, dekna weik ning, el si perak doproptinirye, bona utotoa talinanye unamne' tenen, pataliba elkirikirulnye bira, teleb kum ulule.

<sup>17</sup>Ninye ton malye un ning nirya batakirye, teleb ubuka fia diksukumuk unyak nang ara, amalye un ning tonap fia kum unamake. Sikce, 'Kume, tuba tonap malye ubipyak' tenen, fia leilonyake. Adiksukum unyak ninye ulamak touk, yatanye do nirya, 'Malye un ning nirya bataknirye, diksukumuk unamne' tenen, fia moubuka ululnye bira, el kam unamle talak noutamak nirya ara, teleb uk unamle. Ikin ning, el damak kum yanganamla anye arye, el fil donamle ning ap, unamle ning nirya ap, teleb ubuka upnin banamla ati, fia teleb uk unamle.

<sup>18</sup>Ninye ton el kam ulul talak nirya, kanye talima erebuka kwalilulnye bira, aminyan yuk talak, Allah arye anye biti wenepliba, sakuka opliba, kanye imun weik unamle. Aning atonun, yata ninye do nirya, sik kanye talima erebuka unyak ninye ara, aminyan talak ara, Allah arye aninye nirya ati, weneplriry kum daneipnamle.

<sup>19</sup>‘Malye upnyak’ tenen, el kam unamle talak nirya ara, kanye dakdongobuka ulirye, ninye bona utotoa talina kum ninye ap, neika ululnye bira, teleb uk ulula anya arye, Allah el kanye ara, ‘Elda weik teleb ning ulul,’ tenelule. Ton nang ara, fia malye ubuka kwalinyak ninye ap, dukdongobuka ukirye, maknye kiknildan ninye arye, dalubuka ubula dolamak ning, bokuka dolonyake. Aninye ara, bona weik talininye weik unyak bukni, Allah el kanye ara, ‘Aninye ara fia malye weik unyake,’ tenelula anya arye, ato unyak ninye ati, weik arye wenepnamle.

<sup>20</sup>Yata nang do nirya, sik deiyok nang arye, “Wininamlulume, aning ara, kum wininamlulume. Teleb ning ara ani, malye ning ara ani,” nyabuka, lipsisikuka peterena yupu ap, wenena yupu ap nyabikiba, ayupu moubuka kekebikirye unyak nang ara, fia teleb uk unamake. Sik unamak ning nirya babye, teleb uk upnin banamake. Aning atonun, yata ninye do nirya, ‘Allah arye teleb ubuka melipsilirye, elce nyasilye yupu moubuka kekebipyop ura, nun unamap ning nirya teleb uk unamsile’ tenen, Allah ati dib tenebikirye, fia diksukumuk ucop ura, aminyan talak, fia kanye deibuka teleb uk unamake.

<sup>21</sup>Ninye nirya weik kel bikna deiyok ning, weik arye kel bikikirye, teleb uk upra balamica ani, yuk ninye arye sik ti eibikirye, kel kipnamake. Kel kibicop ura, nyanamake, “E, aninye ara, dipkoprop weik kel bikamikce, weik mambul ning nirya ati, ‘Nong noutam ning deiyok ani’ tenen, kel bikna nang unyake,” nyabuka, aninye ati kanye delinamake. Yatanye do nirya, ‘Yuk nang ati, mambul yupu laka lebuka peterenamne,’ teneptop ura, el yupu min kum nyapmalye talak arye, aning-aning moubuka tenipdelirye, na nyanamne yupu ara ani.

‘Ayupu deiyok ara ani’ tenen, akunum moubuka teniplyop ura, aminyan talak, elce yuk ninye ati peterenamlye talak ara, ‘E, deiyok ani’ tenen, teleb ubuka kel kipnin banamake. Akunum kel kibicop ura, sik aninye nirya arye, ayupu peterenanye biti, “Nun kwit telebe, anda fia teleb ubuka peterenmasilame,” nyabuka, el ti kibikirye, kanye deibuka unamake.

<sup>22</sup>Yata ninye do nirya, fia moubuka tenipdekirye, ‘Aning winibibyop ura, aminyan talak yata wiripnamsil do? Kanam upnamsil do, ikin upnamsil do? Awinipnamsil ning ara teleb do, malye do?’ tenen, moubuka wininyake. Ara, sik winin ning min kum winipmace talak ara, minopce moubuka tenipdekirye, teleb ning uk wibuka wininyake. Aning atonun wininyak ninye, sik wininyak ning ara, winipmanto ara, mek nong dem kutukuka balamle atonun unyake.

Bukni, diksukum ubuka ninye arye, sik ayupu kum kekepmanto ukirye, keil kisok kibuka unyak ninye ati, “Wininamlulume, aning ara fia kum wininamlulume,” nyabuka wenena yupu weik arye nyaptinga babye, sik kisok kat deibuka, mandipna unyake ninye anya arye, fia moubuka kum

kekenamake. Ayupu ara, kum dobolbanamake. Kekeltana uk unamaka anya arye, ayupu nirya ara, nong fia kum upnamle. Amalye ululnye biti, “Winina fia meme,” nyabuka nyanyak yupu nirya ara, fia talye uk unamle. Dipkoprop nong kum upnamle.

<sup>23</sup>Yata ninye do nirya, sik kanye tenen ning noutamak ton, weik kel bikamik ning auplyop ura, sikce yuk ninye ati laka lebuka peterenamak talak nirya ara, dipkoprop fia teleb yupu uk nyanamake. Winibuka moubuka tenen ning dobuka, peterenyaka deice arye, sik yupu kekenamak ninye, ayupu dobuka dobolbanamake. Moubuka kel bikikirye, weik kel kibikirye, peteren nang ati, “Se, sikce peterenmasiyak wenena yupu ara, fia dipkoprop ning uk nyanmasiyake,” nyabuka, kanye deibikirye, apeteren nang ati kanye delinamake.

<sup>24</sup>Winipmanto ara, ninye arye madu mong mek purubuka dipmakiba, to leplibka, kanye deililamak touk, ninye nirya arye, teleb yupu nyabikiba, yuk ninye kekebikirye, kanye delinyake. Ateleb yupu nyabikiba, kekebikca deice arye, sik kanye talima mikip uplibka, kanye delinyake. Winipmanto ning ara, ninye ton uk dilamliba, ninye kwetena deiyok nang arye, obat dipkoprop ning arepmakibuk, sik uk dilamle ninye dibikcop ura, yok fum bisik nirya weklirye, teleb ubuka kwetelamle atonun, teleb yupu nyanyak ninye arye, sik nyanyak yupu deice arye, yuk ninye ati, teleb kilinyake.

<sup>25</sup>Ara, ninye nirya arye, sik tenebice bisik uk bakirye, ‘Kume, nun banmap bisik ara, teleb bisik anya arye, abisik uk banamabe. Nunda diksukumuk unyabe,’ tenebuka banyake. Bukni, abisik urasin teleb bisik upmatu babye, sikda moubuka kum tenipdekiryte, malye bisik uk balamicop ura, dipkoprop dipna dam uk banyake. Dipkoprop teleb bisik uk wibuka kum banamake. Aminyan talak, sik banamak bisik nirya ara, uku din mutuku uk banamake. Ati, ‘Awininamap ning ara, teleb ning do, malye ning do?’ tenen, fia moubuka tenipdemunce, banamlulume. Talye lukparabuka bana meme.

<sup>26</sup>Ninye ton ikin fil dolamlinye birye, din pataplyop ura, din patan deice uk ulirye, tenelule. ‘Kume, ikin fil donmap bukni, nun fil dolamipyta ani, sirya dakipyte ura, aminyan talak din weik arye neika dinamapa ara telebe.’ Aning ara, sik afile doninye arye, ‘Dina pataple bukni, fia pi dobuka fil dolamipyta ani, sirya dakipyte ura, din ning weik arye dipnamapca,’ tenenyaka anya arye, atenena deice arye, fia piribuka, mikip arye fil donyake. Ara, sik dina patanmalibuk, piribuka fil donyaka ati nyapne.

<sup>27</sup>Ninye ton fia yu kanye bobuka, malye uk ululnye birye, malye winin ning uk tenebuka, fatalula anya arye, el kayapu nang ap, yupu tanamak talak nirya ara, malye un ning atibuk, yupu talinyake. Malye winin ning uk nukuldakiryte, kanye delildanyake.

Bukni, sik malye winin ning uk pataliba, malye yupu uk nyanyak nang arye, sik kayapu nang damak ati, amalye yupu nukunmakiba, yuk ninye kekebice ura, malye uk ulinyake. Winipmanto ning ara, uku buk arye, aning-aning nirya dilolamle tonun, sik malye yupu nyanyaka deice arye, amalye yupu kekenamak ninye nirya ati, malye ulinyake.

<sup>28</sup>Ninye ton, ‘Asum-asum nirya yu kanye bobuka, nyaldana ap, oldana ap unamabe,’ tenekirye, sik ap neika unyak ninye ati malye ulinmaki bukni, sik ap sik neika unyak nang ati, derelana ap, oldana ap ulamikca ani, sik amalye una deiyok nang arye, kanye deibuka unyake. Winibuka unyak nang ara, winipmanto yupu ton nyapnusine. Ara, ninye arye malye yala ning koubikiba, sik yo duk moulamla atonun unyake. Tonda, din ning dibikirye, kwal talye deiplopmakiba, daupmalyani, aminyan talak tong weik lelamle tonun unyake.

Yuk yupu ton nyapnusine. Ninye bitinya nang, sik ap neika dukdongobuka ulamtiring bukni, atalak arye tonoknye birye, ‘Yuk nang kekepnamak’ tenen, el ka biti, malye yupu nyapra balibuk, yuk nang ayupu kekebikirye, el ka biti malye kanye bobikcop ura, aminyan talak sik abitinye nang babye, kanye talima wilibuka bokoldadurake. Talima wilibuka bokolidaruka deice arye, like teneldalamdake. Bukni, winipnamle ning ara, talye ati kume. Deiyok ara, ninye tonoknye birye sik neika tonok dukdongobuka ulamlinye biti, minina yupu nyabuka, nyalina deice arye, bokolilule. Minopa ara, kanye deipdanamdik bukni, aminyan talak nirya ara, malye kanye bolanamdake.

<sup>29</sup>Ninye ton yu tenebuka malye winin ning uk pataliba, talibuka ululnye bira, ‘E, nun ap, yuk nang ap, oldana uk winibibyop ura, ara teleb uka,’ tenelule. Winibuka tenelulnye birye, el kayapu koprop yuk nang ap ati, tuba-tuba tilila yupu nyalirye, anang ati malye ulilule. Winilya deice arye, el kayapu nang nirya bobuka ona dam uk, delilbalule. Elce malye ulya deice arye, el kayapu nang nirya ati, malye ulilule. Anang nirya, sik damak ikin ning weik yanganamle.

<sup>30</sup>Ninye ton, sikce yuk nang ati, sik kanye talima noutamak ara, yu ning uk tenebikirye, ‘Anang ati malye upnamabe,’ tenenyak bukni, ‘Aning ara, yuk nang arye kum kel biknamsiyak’ tenen, urasin etek-etek ana uk unyake. Tonda, anang ara, sik malye tenenyak ning laka nyana kum bukni, sibama mur-mur ana ap, asing ngikilongona ap, nong urasin nirya bamnalakana uk unyake. Bukni, sik kanye talima noutamak ara, fia malye winin ning uk tenebuka, dungnubuka unyaka anya arye, yuk ninye nirya kum kel bikinyake. Winibuka tenenyaka deice arye, yuk ninye nirya ati, malye ulinyake.

<sup>31</sup>Ninye ton el malye ulamle ning nirya bataklirye, teleb ning uk talibuka upnin banamlanye bira, el kam unamle talak ara, Allah arye el unamle talak ati, ouku weik arye tabaknamle. Anye bira, Allah yupu



nirya kekeplirye, ayupu nyalye touk, moubuka taliplirye dobolbalule. Winilya deice arye, kul potong panamle. Yuk ninye nirya arye, atonye biti, 'E, keteng tamun weik arye kam ulamuka ani, kul potong akunum ubuk. Ara, diksukum ulamuka deice arye, ulule' tenen, kel bikikirye, el ti kanye delinamake. Winipmanto ning ara, weik ninye deiyok Raja weik nang arye, sik kisok deice urasin fia teleb ning, el si ara mahkota kalulamak atonun, Allah arye diksukum ubuka ulamice, wisi nang ati, kul potong palule.

<sup>32</sup>Nong mikip weik ululnye bira, mitik teleb ulul bukni, weik teleb ning ara nyapnusine. Yata nang do nirya, yu weik upmale bukni, 'Na adib aryuk ninye wana yupu kum nyapnune. Bataknin banmanya ani, aminyan talak namin yupu uk nyapnamane,' tenelulnye bira, weik teleb ulule. Yata ninye do nirya, sikce, 'Kume, nun cuk wininmabirye, malye ubipyak' tenen, moubuka tenipdekirye, sik bidamnya ati, kalikildanyak nang ara, fia teleb unyake.

Tonda, yata mikip weiknye do nirya, elcuk yuk mutuku ninye arye, dolamik weik asik nirya uluplopturye, amutuku ninye nirya obuka daktua babye, aning ara mitik teleb ulule. Bukni, weik teleb ning ara, 'Malye ubipyak' tenen, moubuka tenipdekirye, sikce, sik bidamnya ati, kanye talima moubuka kalikildanyak nang uka.

<sup>33</sup>Ton nang ara, 'Aminyan unamap ning tenena ati ara, aning wininamap do, aning batakuka yuk ning wininamap do?' tenen, burburumna atonun ning, el si ara undi deice arye winildenyake. Bukni, dipkoprop upnamle ning nirya ara, Allah Yahweh elcuk, 'Wininamake,' tenebuka kintinipdeiyamuk ning tonok ara, dipkoprop unamle.

**17** <sup>1</sup>Teleb ning ara, anggun ap, anggun mapu silip nirya ara, yuk nang arye dinmaca ani, bouplya ati, batakanyak din ning, tarikna upmalye din ning uk dipmunce, kanye deibuka unamlume. Aning ara teleb bukni, malye ning ara nyapnusine. Ara, yuk nang ap, sik ap neika unyak nang nirya arye, fia teleb din ning ayala-yala nirya dinyak bukni, sik nirya arye derelana ap, walana ap unyake. Winibuka ulamice ning ara weik malye uk ulule.

<sup>2</sup>Ninye ton, weik kel deice arye, el deiyoknye amutam, talye fil melibuka dolulnye ulul bukni, aminyan talak ara, elcuk el deiyoknye talyamuk ning nirya talinamle. Wininamle ara, talye ati kume. Deiyok ara, anyaik deiyoknye birye deiamuk mapu nirya ara, fia malye uk ulamika ati, sik ni koprop arye, 'Na talilamse ning dobuka, na mapu malye unyak nang ati, kum arenamne,' teneplirye ati, el fil melinanye ak aripnamle.

Tonda anyaik deiyoknye, el mapu koprop arye, tuba-tuba malye uk upnin bacop ura, sik ni koprop alye weik unamle. Aning ati, sik ni koprop anyaik noutamak talilye bona ning nirya ara, noutamak arye bokuka,

el mapu koprop ap, el melinanye ap, ‘Aripnamne,’ tenelula ati, el mapu sirika arye, tuba malye-malye ubicop ura, sik ni koprop arye sik ti, aning bokuka, mitikanun uk aripnamle. El mapu koprop arye, aning weik arye kum dopdopnamake.

<sup>3</sup>Ninye arye talye tuku ap, keil ap palibuka doprobikirye, ‘Aning nirya noutamak ara, emas ap, perak ap, tabakuka aupmal do?’ tenen, weik uku dinmalyak dongobikiba, uku arye dinmalya ani, malye ning palilamlya ning nirya diplirye, kat ning fia teleb ning batakliba, emas ap, perak ap, nong uk lakak upliba dolonyake. Winilamaka deice, ninye arye emas ap, perak ap ara, uku deice arye, winilinyake. Bukni, ninye tukwak mutuku unyak ninye nirya, sik kanye talima noutamak ulul ning ara, Allah Yahweh arye asipdenamle. ‘Teleb ning ara ani, malye ning ara ani,’ teneplirye lakak uk deipnamse.

<sup>4</sup>Ninye ton, ‘Malye winin ning uk tuba-tuba wininamne,’ tenebuka ululnye bira, yuk nang arye, malye-malye yupu uk nyanyak talak ara, elce kanye deibuka, anyapmace yupu uk kekelule. Malye yupu uk kekelirye, malye winin ning uk ulule. Aning atonun, tilila yupu nyaprabanyak nang nirya arye, yuk ninye ati, malye kilina yupu uk, nyanmakiba kekenyake. Tonda, deiyok ton kum upmalibuk, lulundana yupu nyakiba kanye deibuka kekenyake. Ayupu kekebikirye, malye ning uk unyaka deice arye, yuk nang ati malye ulinyake.

<sup>5</sup>Yata ninye do nirya, talye bona utotoa talina kum ninye ati, nalibuka aku tunyak ninye ara, bona utoto talina kum ninye ati nalinyake. Bukni, winilamice deice arye, bona utoto talina kum ninye kwepdeiamuka deiyoknye Allah ati, malye nyalinyake. Aning atonun, yata ninye do nirya, bona utotoa talina kum ninye ap, yuk mutuku daanyak ninye nirya ap ati, kanye imun ning, sik damak yalyop ura, ‘Aninye ara, ikin kanye bonyaka ara, merekuka ulule,’ tenebikirye, kanye deilinyak nang ara, Allah arye awininyak ninye ati, ‘Dauplye,’ fia kum tenelule. Allah arye aninye sik wenena ati, dipkoprop wenebuka opnamle.

<sup>6</sup>Ninye ton akunum wisi deiplyop ura, elce deiyamliba, dadeipdanin, banamak ninye nirya, fia weik upra banamakop ura, el mapu weik kipnin baca ati, kanye delilule. Winipmanto ara, weik ninye deiyoknye Raja arye, kweiryang ning, sik kisok deice kalulamak tonun, wisi nang sik mapu weik ucop ura, atonun ulule. Anang ara, kanye deilinyake. Tonda sal ap, kilapu ap deibikiba, dadeipdanin banamak mapu nirya arye, sik ni yapu ap, sik nin yapu ap ati, kanye delinamake.

<sup>7</sup>Fia walwal kanye bobuka unyak nang arye, fia teleb yupu kum nyaptinge bukni, teleb yupu nyapdekiba, yuk ninye kekebice ura, “Kume, anang ara, fia walwal aryuk, malye winin ning uk unyak nang anyang arye, sikce nyapmasiyak yupu fia kum kekenamabe,” nyabuka, anang ati batakanamake. Walwal ninye arye, teleb nyana yupu peterepmace

ning ara, malye ulule. Bukni, weik malye weik ning ara, nyapnusine. Ara, weik ninye deiyok nang, sik Raja weik nang do, sik amutam yuk ninye deiyok nang do, sik amutam daunyak ninye nirya ati, tilila yupu uk nyabikcop ura, ara fia weik arye malye ulule.

<sup>8</sup>Ninye arye weik deiyok nang ati, 'Ara, nunce anang ati yo bok weik aribipyop ura, nun patasiliba, morolbinamap ning ara, dipkoprop arenamsiyak' tenen, aninye deiyok nang ati, yo bok dungnubuka aribikirye, morolbanyak talak ara, sik ninye deiyok nang kanye deibikirye, anang arye moronyak yupu kekenyake. Aning-aning nirya morolbinulinye birye, yo bok ap, yuk teleb ning ap kintinipmalye arye, ninye deiyok nang ati, dungnubuka arelbinamalye talak nirya ara, anang arye el morolye yupu kekebikirye, el ti arinyake. Elce morolul ning nirya nong ulule. Wininyak bukni, aning nirya ara, malye uk ulule nyapsine.

<sup>9</sup>Yatanye do nirya, yuk ninye arye el ti, malye kipdeipmace ning nirya ati, "Se, na kayapu, talya arye winipmanuluma anya arye, dauplye. Yuk nang kekena ak binuka sik ti, malye yupu nyapnirye, anggun ti malye kum upradeipnamsile," nyalulnye bira, weik arye akunum kel bikamuk. Yuk nang arye, el ti malye unyak ning luba kilirye, yupu tonap tabakuka kum nyaplyop ura, el ap, sik anang ap, teleb ubuka neika unamake. Sik nirya arye bico tenebuka, kanye delilanamake.

Bukni, yatanye do nirya, yuk nang arye el ti, malye kipdeipmace ning ati, "Winibuka malye ubdeipmaniake," nyabuka, sik nong deice malye yupu weik arye, nyapra balamliba, ayupu weik uplyop ura, adeice arye yuk nang nirya kekebuka, kel kibicop ura, el kayapu nang koprop ati, yupu bokipliba, kanye talima wilipdakirye, 'Nun like,' tenebuka, memeproprnamake.

<sup>10</sup>Yata ninye do nirya, malye ubikiba, weik kel bikamik ninye arye sik ti, "Anggun malye upmalum ning ara, ani, ani," nyabuka, tonok talak deice aryuk wenebicop ura, adib aryuk anang ara, 'Se, aning ara, na dipkoprop winipmanubuk nyapmaniake' tenen, moubuka kel bikinyake. Bukni, malye winin ning uk fia tuba-tuba upnin banamlanye bira, fia walwal kanye bobuka ulula anya arye, malye upliba, ninye deiyok nang arye, kama doprobikirye, yupa weik seratus kali deice arye, el balye deice kulabuka optinga babye, adeice arye kum kel kipnamle. Ara, talye ati kume. Anye birye, 'Aobuka wenepmaniyaka ati, moubuka kum kekeprnamne,' kum tenelule. El kanye malye ning batakuka, teleb ning kum punupnamle anya arye, fia tuba malye uk upnin banamle.

<sup>11</sup>Malye winin ning uk talibuka, tuba-tuba malye uk upra banyak nang arye, yu upliba nyanyake. "Nun yupu nyana deiyok nang arye nyanyak yupu nirya ara, fia kum kekenamne," nyanyake. Tonda, "Nun mutuku talisinyaka ninye deiyok nang obibirye, nun cuk amutuku nirya talinamabe," nyanyake. Winibuka malye uk unyak nang ara, sik yupu

nyana deiyok nang arye, sik yin talin nang ati, “Anang tomopmunce, tapu koubuka nun dam boyalulume,” nyabikiba, anye bira bobuka sik damak boyakiba, fia yu kanye bobuka wenenamake.

<sup>12</sup>Teleb ning ara, bai tam noutamak, yu fia weik ulamle kam, el si beruang, kil beruang arye el mi tunim apliba, ‘Aning deiyok ati tunim apmale,’ teneplirye, fia yu weik upliba, anang ati olyanamale. Aning ara ikin bukni, weik ikin usilye ning ara nyapnusine. Bura tam beruang kil arye, ‘Ninye opnun’ tenen, olyangalamle touk, malye ubuka ulinye, malye upliba eipmunyop ura, el ti, “Amio, anda dipkoprop malye upmalame. Aning ara bataklyame,” nyabuka wenepmunyop ura, anye birye anggun ti, yu weik upliba, opnamsile. Aning ara, weik ikin upnamsile.

<sup>13</sup>Yata ninye do nirya, yuk ninye arye sik ti, fia teleb ubuka melilamiki bukni, aminyan talak ara, sik melilamice ninye ati, tamubuka malye kipdeibicop ura, fia malye uk unyake. Amalye un ning winibicop ura, dipkoprop aminyan talak noutamak nirya ara, sik aik noutamak aniryuk ikin ning weik, tuba-tuba panapliba, malye kanye bobuka, ikin fia weik unamake. Kanye imun ning, sik damak tuba-tuba yanganamle.

<sup>14</sup>Winipmanto ara, mek bisik wakibikirye, kukdeibikiba, mek mikip arye balamle atonun, ninye arye kabul deiyok koubuka, derelana unamak talak ara, adib aryuk, adeiyok ning ati, “Dauplye,” nyabuka batakaldongonamlulume. Opdanmanto unyak ninye ati, lyelina telebe. Kumop ura, ninye arye derepdakirye, ayu yupu uk tuba nyapdanin, bakibuk weik upnin balyop ura, sikce nyaldanamal ning ap, oldanamak ning ap ara, min kum kum danaipnamsile. Ati, yu upliba, deiyok koubice talak aryuk, lyelina telebe. Yu yupu tuba nyaldana kume. “Dauplye,” nyabuka, batakaldongonamlulume.

<sup>15</sup>Ninye ton, dipkoprop malye un ning ubikiba, amutuku yupu bokolina deiyok nang arye, ninye yupu lipsisikuka bokolin talak noutamak arye, “Kume, anang ara malye kum upmaka anya arye, lopdongoplulume,” nyabuka lopdongobicobicop ura, Allah Yahweh arye, ‘Aning ara na fia like,’ tenelula anya arye, sik ninye deiyok nang ati, weik arye wenepnamle. Aning atonun, yuk ninye ara, dipkoprop teleb ubuka ulamica ani, amutuku yupu bokolina deiyok nang arye, ninye yupu lipsisikuka bokolin talak noutamak arye, “Kume, anang ara dipkoprop malye upmaka anya arye, wenebuka oploplulume,” nyabuka wenebicop ura, Allah Yahweh arye, ‘Aning ara na fia like,’ tenelula anya arye, sik ninye deiyok nang ati, weik arye wenepnamle.

<sup>16</sup>Ninye ton, malye winin ning uk upnin balulnye birye, “Kume, na yo bok weik aripnumunya deice arye, weik sekolah binuka kel kipnirye, weik kelnye unamne,” nyabuka nyaptu babye, el yupu kekena fia kume. Anye bira, el kanye talima noutamak ara, ‘Weik kel bikna deiyok ning, fia patanulule’ tenen, kum ululnye anya arye, ayupu ara talya

nyaltakalule. Ati, anggunce, ‘Sekolah wekenamle’ tenen, atonye biti, yo bok arepmunyop ura, talye uk ititilalulume. Aning ara, dipkoprop nong ton fia kum upnamle.

<sup>17</sup>Ninye tonoknye ton, dipkoprop el ka biti, ‘Na kwit,’ tenebuka, kanye deipdanuka ulamdice nang ara, sik ikin uplye talak ap, yuk nang arye, ikin ning deibice talak nirya ara, “Kum batakdananame,” nyabuka ulamdake. Ati ikin uplyop ura, sik anang bitinye ara, dipkoprop melilana uk ulamdake. Aning atonun, nun kwit capu koprop ap, nun du yapu koprop ap ara, tonok mun fum tam arye, deiamsik nang unyaka anye arye, yata talak do nirya ara, melilana uk unyake.

<sup>18</sup>Ninye ton, sik kanye moubuka kum tenipdenmakiryuk, sik kayapu nang bona ati, “Nun cuk anang sik bona talye doproprnyabe. Kum arepmanto ubicop ura, nun cuk tamubuka arenamsiyabe,” nyanyak nang ara, fia dipkoprop walwal arye nyanyake. Aning atonun, yata nang do nirya sik damak unyak ninye ati, “Nun cuk, anang sik bona talye doproprnyabe. Kum arepmanto ubicop ura, nun cuk aning ara tamubuka aripnamsiyapca,” nyanyak nang ara, fia dipkoprop walwal arye nyanyake. Anang arye kum arepmanto ubikiba, ikin ning ton sik damak yalyop ura, aninye sik bona punubuka kum arepmanto unamsile. Ati, “Yuk nang sik bona nun cuk punupnamabe,” nyana meme.

<sup>19</sup>Yatanye do nirya, elce, yuk nang nirya ati, ‘Weik arye derenamle,’ tenebuka nyalulnye bira, dipkoprop el bidamang ati malye kililalule. Ayupu nyalulnye bira, ‘Malye winin ning uk talibuka, malye uk unamne’ tenen, kanye delilule. Tonda, ninye arye, ‘Nun aik ubula don nang yanuka weksicak’ tenen, weik cang foka wibuka antanapdongamik bukni, yuk malye winin nang arye, aning eibikirye, ‘E, anye birye fia teleb dekna weik ning el aik fum tam dongobuka ati, afoka dobuka,’ tenebikirye, aminyan talak, ‘El ning ubula doproprnamap’ tenen, anang arye, el aik yanuka weknamake. Winibikirye, malye kilinyake. Aning atonun, yata ninye do nirya, kwalibuka etekdop yupu nyabikcop ura, aminyan talak alye uk daknamake.

<sup>20</sup>Yatanye do nirya, tilila ning uk talibuka ulirye, talye yupu nyalulnye bira, el fil donamle ning nirya ara, nong ton fia kum unamle. Ikin ning weik, el dam uk yanganamle. Aning atonun, yatanye do nirya, kanye kwalibuka ululnye bira, el fil donamle ning nirya ara, nong ton fia kum unamle. El dam ara, weik kanye imun ning aning-aning nirya weik yangaliba, el nong deice saknamle.

<sup>21</sup>Yata nang mapu do nirya, sikce delilamak mapu walwal una ap, tuba-tuba malye una ap, upnin bacop ura, amapu sik ni yapu ap, sik nin yapu ap uk, kanye talima ikin ulule. Aning atonun, ninye ton, el mi tuba-tuba malye uk upnin balirye, ‘Amutuku ninye deiyok nang arye nyanyak yupu fia kum kekenamne,’ nyaplyop ura, el li koproba ara, fia kanye kum delilule.

<sup>22</sup>Ninye kanye talima teleb upliba, kanye deibuka unyak nang ara, sik nong nirya babye, atonun ubuka mikip arye, teleb ubuka unamake. Bukni, ninye kanye talima ikin upliba teniltona uk unyak nang ara, sik kanye talima ikin weik uplirye, kanye imun kanye uk, bobuka unyak atonun, sik nong arye dipdongobuka, yok noutamak nirya atonun, upnin banamle anya arye, teleb ubuka kum unamake. Ikin kanye uk unamaka ati, sik kanye tenina ning ara, ‘Se, aning-aning nirya ara, kum winilamtipye,’ tenena uk unamake.

<sup>23</sup>Ninye arye malye ubikiba, ‘Ninye deiyok nang arye, yupu bokipnamak’ tenen, wenena aik delilbanyak bukni, amutuku weik ninye deiyok nang, kanye talima malye nang uk, ucop ura, sik malye upmace nang, sik kayapu arye, yo bok weik arelyanganyake. Aning weik arye, dungnubuka aribicop ura, amutuku deiyoknye birye, aning lipsisikuka yupu bokolina kum dib aryuk, arepmace yo bok uk dungnubuka dopdoplirye, yupu moubuka kum lipsisikuka bokolilule. Winipliba, amalye winipmace nang arye, talye lukparabuka weik arye tonap malye uk upnin banyake.

<sup>24</sup>Ninye ton, weik kel bikna deiyok ning akunum kel bikamlinye bira, ‘Weik kel bikna deiyok ning uk, tonap tabakuka kel kipnamne’ tenen, moubuka tenipdelirye, kel kina deiyok ning uk elkirikilule. Winipra balulnye bira, el tenelamlye touk, kel biknin banamle. Bukni, walwalnye bira, teleb ubuka kum tenelula anya arye, el tenepmalye touk, nong kum ulule. Anye bira, ‘Deiyok ani,’ tenena kumce, ‘Otam mutuku bitinye do? Sirik tam mutuku orbitinirye kel kipnamne do?’ tenen teninmalirye, el patalye ning ati elkirikilul bukni, moubuka kum kel biknamla anya arye, aning nirya, nong ton fia kum unamle.

<sup>25</sup>Yata nang do nirya, sikce delilamik mapu walwal una ap, tuba-tuba malye una ap, upnin bacop ura, amapu sik ni yapu arye, malye kanye bobuka, kanye talima sukunamle. Sik nin yapu ara, talima ikin upliba, ‘Se, yata ning deiyok ati, na deipse mi malye uk ulul do?’ tenebuka teniltona uk ulirye, engena weik unamle.

<sup>26</sup>Yata nang do nirya arye, ninye ton el upmalye ning, deiyok malye ning ton kum upmalibuk, yupu bokolina deiyok nang arye, lulubdeipnirye, talye ikin ning delina ap, ona ap, ubikirye, “An malye una ati, yo bok weik arenamsilame,” nyabuka, ateleb unanye wenebicop ura, wininyaka deice arye, sik anang ara, weik malye ulilanyake. Aning atonun, ninye deiyok talibuka unyak nang weik arye, sik amutam talibuka unyak ninye ati, diksukum yupu uk peterebiki bukni, sik deice tam yuk weik ninye deiyok nang arye, adeiyok nang ati wenebikirye, talye uk obicop ura, aning ara weik malye unyake.

<sup>27</sup>Ninye weik kel bikamice nang arye, weik kel kibuka unyaka deice arye, yupu nyan talak ara, yupu canga arye kum nyanyake. Yupu

bumang uk nyanyak bukni, sikce nyanyak yupu ara, weik kel bikne ning uk nyanyake. Aning atonun, weik kel kinyak nang ara, sik yupu nyapnuce talak ara, ‘Malye yupu nyapmap do, ara teleb yupu nyapnamap do?’ tenenmakirye, nyabice talak ara, tenipdekirye, nimalye arye nyanyake. Yuk nang arye sik ti malye updeipnamak babye, minopce derena uk kum unyake. Sik kel nang arye, ‘Nun kayapu ati, derebibyap’ tenen, sik nyanyak yupu moubuka kalikildanyake. Sik talima teleb unyak nang anya arye, namin yupu aryuk nyanyake.

<sup>28</sup>Ninye tonok ton, walwalnye unmatua babye, elce, ‘Walwal yupu nyapnun’ tenen, moubuka tenipdelirye, yupu minopce nyana kum bukni, talye tunimabuka buklyop ura, yuk nang arye anye bira eibikirye tenenyake. ‘E, anye bira, talye lukparabuka yupu kum nyanmala anya arye, elda akunum weik kel bikamuknye ulul darebe,’ tenenamake. Walwalnye ulul bukni, moubuka tenina kumce, talye yupu kum nyaltakalulnye, tunimabuka buklyop ura, yuk nang arye, el ti, ‘Se, elda kel bikamuknye kum ulul danya,’ tenenamake. Ati, teleb ning ara, ‘Minopce na yupu nyapnun’ tenena kume. Talye tunimabuka bunamlulume.

**18** <sup>1</sup>Ninye ton, yuk ninye ap, neika dukdongobuka kum unyakce, ‘Bokuka yuk-yuk unamabe,’ tenebuka unyak ninye ara, sik bidamnya ati, tuba-tuba, ‘Nun babye yuk unamabe,’ tenebuka unyake. Aninye ara, sik patalye ning uk tenenyake. Tonda, sik bidamang atibuk, moubuka kalikdakirye unyake. Aning atonun unyak nang ara, yuk nang sik tenelamak ning nirya ati, ‘Nun like,’ tenekirye, yuk nang ap, ansinibuka neika kum unyake.

<sup>2</sup>Ninye ton, walwal kanye bobuka malye winin ning uk tenelul ning ara, weik kel bikamice nang arye, laka nyanyak yupu ap, “Teleb ubuka un ning ara ani,” nyabuka, nyanyak yupu ap, fia moubuka kum kekelule. Anye bira, ninye yuk nang arye nyanyak yupu kum tenelirye, elcuk, ‘Na akunum bikamse ning laka nyapnusin ning ara ani. Na arye winiptinye, tenenun ning ara ani,’ tenelul touk, aning uk tenebuka nyalula anya arye, elcuk, ‘Na kele,’ tenebuka ulule. Bukni, dipkoprop anye bira, weik kelnye kum ulule. Ati ara, fia dipkoprop el kel kum kinamle.

<sup>3</sup>Ninye ton, fia tuba malye uk upnin balulnye birye, yuk ninye damak yanuka ulirye, dipkoprop nimalya arye kume. Minopce aninye ati, malye ulilule. Winipliba, sik yuk mutuku unyak ninye nirya arye, anye ap, el neika dukdongobuka unyak ninye ap nirya ati, ‘Sik fia malye uk unyaka anya arye, nun like,’ tenebuka, aninye bataknamake. Ara, amalye un ning ati, “Yanuka winiplulume,” nyalya deice arye, amutuku ninye nirya, malye unyakba, yuk mutuku ninye arye, ‘Nun like,’ tenebikirye, bataknamake. Akunum batakikirye, leipdobicop ura, amalinye ap neika unyak ninye arye, ‘Se, yata ati do?’ tenen, alye weik dakaldanamake.

<sup>4</sup>Ninye ton, Allah el yupu noutamak arye, “Aning ara wininamlulume, aning ara fia kum wininamlulume,” nyalisulul yupu kekebuka unyakce, diksukumuk unyak nang ara, teleb uk ubuka unamake. Sik aninye ara, teleb yupu nyanamaka deice arye, yuk ninye nirya ati, bico tenebuka melinamake. Teleb ubuka melibicop ura, aninye sik damak teleb un ning yanganamle.

Winipmanto ara, ninye arye, mek fia kumak banmakiba, mek weik arye patanmaliba, malye kanye bobuka enmaca ani, fia teleb mirin mek pu eibuka dibikirye, tamubuka kam bunyake. Aning atonun, Allah yupu nyasilye touk, teleb yupu nyananye birye, yupu nyaplyop ura, ayupu kekenamak ninye weik arye melilule. Mirin mek pu fia ati dobuka balamliba, ninye arye amek kwebuka dibicop ura, nong nirya teleb ulamle touk ulule. Ara, anye birye yuk ninye nirya ati, bico tenebuka melilula ati nyapsine.

<sup>5</sup>Ninye arye malye ubikiba, yuk nang arye wenena aik bobice talak ara, ninye yupu bokolina deiyoknye birye, ‘E, anye bira, na ka koprop,’ teneplyop ura, el malye wamlye ning awamli bukni, ‘El winipmal atonun dipdeniryte, yupu lipsisikuka bokeipnune,’ kum tenelule. ‘Na kwit’ tenen, “Dauplye,” nyaplyrye, amalye wamlyne batakalule. Aning ara, fia malye weik ulule.

Aning atonun, yuk nang ara, malye kum upmace bukni, yuk nang arye, minina yupu deice arye, “Sik malye wininmak ning ara ani, ani,” nyabuka, lululina yupu sik nong deice deilinyake. Deiyok kum upmale bukni, yupu bokolina deiyoknye bira, malye ululnye birye, “Diba, anggun malye upmalum ning ara ani, ani,” nyabuka taruk pukdongobuka nyalya deice arye, aninye wenebicop ura, fia malye weik ulule. Allah el kanye ara, ‘Ninye yupu lipsisikuka bokolina deiyoknye arye, malye unyak ninye talye lolilamak ning babye, teleb unyak ninye bukni, deiyok kum upmale bukni, wenelamak ning babye, fia malye weik ulule,’ tenelule.

<sup>6</sup>Tonda, walwal kanye bobuka ululnye birye, tuba-tuba malye yupu weik nyaliryte, amalye yupu canga arye, talye nyala deice arye, dipkoprop ninye ati, ninye wana yupu weik panalule. Winibuka ulya deice arye, el nyalye yupu kekenyak ninye arye, el wenena ati, weik arye onamake. Ara, talye ati kume. Deiyok ara, elce nyalul yupu nirya ara, malye yupu uk, nyalula anya arye, amutuku ninye arye, el wenena ati, yo kama arye, el nong deice onamake.

<sup>7</sup>Walwalnye birye, malye-malye yupu weik nyaltakalulnye bira, winibuka ulya deice arye, el bidamnye nong uk nirya olildalule. El bidamang nong uk wena youldalule. Ara, talye ati kume. Walwal kanye bobuka, malye yupu weik nyalulnye bira, el si fum bisik arye nyaliba, yuk nang kekebikirye, ‘E, anye birye nyalul yupu ara, nun like’ tenen, yu upliba, el ti wenebuka onamake. Tonda, ayupu nyalya deice arye, ikin ning weik, el damak yanganamle.



<sup>8</sup> Winipmanto ara, ninye arye teleb din ning bokuka, mitik-mitika arye sekuka, yuk nang ati, bokuka arepmakibuk, sik nirya arye dibikcop ura, to lelamle tonun, malye unyak ninye arye, yuk nang ati, minina yupu nyanmakiba, yuk nang kekebikirye, kanye deilinyake. Ayupu ara dipkoprop kum nyanyak bukni, yuk nang arye kanye deibuka kekenyake. Bukni, winibuka unyaka ara, fia malye weik ulule. Deiyok ara, ninye nirya arye, talye-talye yupu nyaltakakiba, yuk ninye kekebice ura, ayupu ara ninye talima noutamak biliba, fia unamle. Aning ara, kum kum danamle. Tuba tenina uk unamake. Ati ara, ninye arye talye nyaltaklamak yupu ara, ninye oldan ning atonun ulule.

<sup>9</sup> Ninye deiyok nang arye, “Afil donamlulume,” nyabuka ninye yuk-yuk ati, bokuka aribikiba, ton nang arye, ‘Kume fil dona ara, nun like. Fil kum donamabe’ tenen, batakklamak nang ara, ‘Ninye yuk nang obuka, kum kipdeiptibye’ tenelamak touk unyake. Tonda, ‘Teleb bona ning, atu buklobuka, kum kipdeiptibirye bataknamap,’ tenelamak touk unyake. Aning atonun, ‘Fil dona ara, nun like,’ tenenyak nang ap, ‘Teleb ning atu buklobuka kum kiptibye,’ tenenyak nang ap, sikda kanye delildana uk, unyaka anya arye, sikda du weit atonun nang unyake.

<sup>10</sup> Ninye arye, ‘Yuk mutuku ninye ati yanuka opsicak’ tenen, weik cang keil aik dolamikak, fum tam dungnubuka wekelbalamak touk, Allah Yahweh elda, weik mikipnye ulula anya arye, elce el ti dib tenenyak ninye, fia melibuka kalikinamle. Yata ninye do nirya, sik malye unyak ning nirya batakikirye, ‘Allah el yupu nyasilye touk, aning uk talibuka diksukumuk unamabe’ tenen, teleb ubuka unyak ninye arye, Allah el dam uk yanganamake. Allah el damak akunum yacop ura, Allah arye sik ti, fia melibuka kalikinamle.

<sup>11</sup> Allah ati dib tenebuka unyak ninye arye, winibuka unamak bukni, bona weik talin nang, sikce tenenyaka ara yuke. Sikce utenenyake. ‘Kume, nun dekna weik bona ning, ayala-yala nirya bulubuka deiamupa anya arye, aupsuka deice arye fia teleb uk unamabe. Ikin ning nun damak kum yanganamle,’ tenenyake. ‘Abona ning weik arye talibuka ubya deice arye, melipnin basiliba unamabe. Ikin ning nun damak kum yanganamle,’ tenenyake. Tonda, sikce, ‘Ninye arye weik kota mutuku ukirye, mikip cang keil foka angtanabuka dolamikiba, teleb uk ulamak touk, nunda weik bona weik talin nang unyaba anya arye, nun dam ara, kanye imun ning ton fia kum unamsile,’ tenenyake. Winibuka tenenyak bukni, walwal uk unyake.

<sup>12</sup> Ninye ton sik kanye talima erebikirye, kwalibuka ukirye sikce tenebuka, ‘Se, nunda weik teleb nang unyabe,’ tenebuka unyaka deice arye, dipkoprop aminyan talak ara, saknamake. Yuk ninye amutam uk unamake. Bukni, ninye ton mitang asa arye, kanye talima daktongobuka ululnye bira, teleb uk upnin baliba, yuk ninye nirya eibikirye, el ti kanye delinamake.

<sup>13</sup>Yata ninye do nirya, ninye arye nyanmace yupu, ayupu nirya min kum kekepmakiryuk, awinipmal ning ati, minopce, “E, ayupu ara nun akunum tenipmapa anya arye, wininamlume, aning ton kum wininamlulume, deiyok ani, ani,” nyabuka, laka nyanyak nang ara, anang arye sicuk, awinipmalye ning ati, malye yupu nyalinyake. Deiyok ara, awinipmaca ning nirya nong noutam ning min kum kekepmace talak arye, ‘Winiplulume, winipsilyame,’ nyanmaka atia. Aminyan talak ayupu nirya moubuka talikirye, deiyok noutam ning ton, laka nyabikcop ura, sik minop talak arye talye lukparabuka nyanmace ninye ara, alye dakaldanamake. Ara, yupu nong noutam ning, kabul nyanmace talak arye, sikcuk malye yupu nyapmaca deice arye, alye dakaldanamake.

<sup>14</sup>Yata ninye do nirya, sik dib kanye mikip uliba unyak ninye ara, sik weik kanye imun uk dinmalya babye, sik dib kanye mikip tuba ulula anya arye, uk dinmalya ani, kum uplyop ura, tuba yum uk unamake. Weik kanye imun uk dinmalya babye, kam uk unamake. Bukni, yata ninye do nirya, ikin kanye bobikirye, talima buku sukubuka uk dilamliba, teniltona uk unyak ninye ara, sik dib kanye mikip kum ninye anya arye, mikip fia kum uk unamake. Weik kanye imun uk do, yuk ikin ning do, sik damak yalyop ura, dipkoprop ikin weik unamake.

<sup>15</sup>Ninye wik kel nang arye winibuka tenenyake. ‘Winiryuk ning tonap tabakuka kel biktibye’ tenen, weik kel bikna deiyok ning atibuk pataliba, tuba-tuba weik arye tabakuka kel kinyake. Akunum kel bikamik ninye arye, ‘Kume yuk teleb kel bikna deiyok ning, tonap tabakuka kel biktibye’ tenen, pataliba, tuba kel biknin banamake.

<sup>16</sup>Yatanye do nirya, ‘Weik ninye deiyok nang dam bitiniry, yupu taleptibye’ tenen, pataplanye bira, teleb arin ning ton kintinibuka delinamle. Aning kintiniplyop ura, aminyan talak lo uplyop ura, weik nang dam arelbilye talak ara, ‘Telebe, nyalyasilyame,’ nyanamake. ‘Ninye deiyok nang damak yupu talilbitibye,’ tenenyak ninye ara, anang ati, teleb arin ning ton kintinibuka deilinyake. Deiyok ara, ‘Aning ton arepbibya deice arye, lo ton aripnamsiak’ tenen, wininyake.

<sup>17</sup>Ninye yupu bokolin talak ara, tonoknye birye minopce laka nyanmaliba, sik kekenmace ninye arye, ‘E, anye bira, dib nyapmasile,’ tenelamak bukni, sik nyaldanmarice nang, tonoknye birye, nyaplye yupu kekebikce ura, ‘E, anye bira, nyaple yupu ara, nong dipkoprop ning ara anyaple,’ tenebikca deice arye, yupu bokolina deiyok nang arye, dipkoprop teleb kibuka yupu bokolinyake. Tonoknye birye, nyaplye yupu ara, ‘Akunuma,’ nyabuka, ‘Dib,’ tenena fia meme.

<sup>18</sup>Ninye arye, tenilamak talak ara, ‘Yatanye teleb ulul do? Yatanye malye ulul do?’ tenen, moubuka tenebikirye, anyapdanmace ning ati, burburumna el si undian deice arye, donmaca ani, ‘Anye el si laka uplynye binyuk, el ti yupu bokipnuyap’ tenen, wibuka dolonyake. Ninye

tenilamak talak ara, burburumna el si undian wininyak ning ara telebe. Winibuka tenenyak bukni, sik yu tenepdanmace nang ara, sik neika mining damak fia kum unyake. Anang ara, sik kayapu nang koprop bukni, ‘Yata wiripnamap do?’ tenen, yupu talipmace talak ara, nyalana uk unyake. Winibuka unyak ninye ati ara, dekna dona ati, bikilamak ning el si ara, undian donamlulume. Laka uplye ning uk wipdeipmunyop ura, yupu tunimabuka unamake. Atonun, ninye bitinya nang arye, yu upliba, nyapdanmarice ning ati, ‘Minop adib aryuk, teleb kipdeiptibiba, tuba tamubuka tonap, kanye talima dukdongobuka, neika uptiring’ tenen, ninye deiyok nang arye, undian deice arye, sik abitinye nang ati, yupu lipsisikuka bokolinyake.

<sup>19</sup>Na kayapu nango, dipkoprop yupu nyapsine. Tonok mutuku ninye arye, yuk mutuku unyak ninye ati, ‘Omutuku ninye olbinamabe,’ teniptinge bukni, ormutuku ninye arye minop talak weik cang keil foka akunum angtanabuka wiamik ning auplyop ura, aning ara mitik ikin weik upnamsile. Deiyok ara, amutuku noutamak talye lukparabuka kum wekelbinmanto atia.

Bukni, ikin weik ning nyapnusine. Ninye sik bitinye ara, sik nang susuk urudak bukni, tonoknye birye, el weit ati, ikin ning weik el nong deice deipliba, el du birye, fia malye kanye bopliba, derepdaricop ura, aning ara ikin fia weik unamle. Ara, sik nang susuk koproba urudaka ati nyapne. Sikce yu teneldalamdak ning ara, minopce lipsisikuka bokeipmanto kume. Winipmanto ara, ninye arye weik kota mutuku aik weik dolamtingce, kat ning besi dobuka, anyaik antanapdongobuka weik cang foka ikicop ura, fia ikin deice aryuk weknamlume. ‘Akota kanam aryuk wekelbinamtibye’ tenena kume. Aning atonun, sik du weit unyak ninye, yu upliba derelana weik akunum winiplinye bira, minopce ayupu lipsisikuka bokeipmunce, teleb ubuka kum delinamlume.

<sup>20</sup>Winipmanto ara, ninye nirya arye, teleb din ning ayala-yala nirya weik arye dinmaca ani boupliba, kanye deililamak touk, weik kel bikamuknye birye, kel bikna deice arye, teleb yupu nyapliba, ninye nirya kekebikirye, sik kanye talima noutamak, imun kanye bobuka unyak nang nirya, ‘Ae, akunuma’ tenen, weik kanye delinamake. Weik kel nang arye, kanye talima melina teleb yupu uk nyabikiba, ikin kanye bobuka unyak ninye kekebikirye, sik kanye talima noutamak deibikirye, aminyan talak, fia kanye weik delinamake.

<sup>21</sup>Yata nang do nirya, ‘Yupu canga arye nyanamne’ tenen, pataliba weik arye nyanyak nang ara, sik sitang deice arye nyanyak yupu ati, “Dauplye,” nyabuka, kum nyaltakanamake. Yupu weik arye nyanyak ninye ara, ‘Ayupu deiyok ara, nun cuk nyanmaba anya arye, nun deice uk kipnamsila’ tenen, unamake. Aning ara talye ati kum nyapsine. Ninye sitang deice arye nyanyak yupu ara, mikip weik ulul ning anya arye, yuk

ninye ayupu kekebice ura, ton nang ara, malye kanye bobikirye, malye uk upnin banamake.

Ton nang ara kanye deibuka teleb uk upnin banamake. Ninye arye nyanyak yupu deice arye, ninye nirya lyelona ap, yuk ninye malye ulina ap ulule. Adeiyok bitinya ning ulula ati, ninye nirya arye sik yupu nyapnuce talak nirya ara, moubuka tikikirye nyanamake. Ayupu deiyok ara, sik deice uk upnamele ati nyapsine.

<sup>22</sup>Yata nang do nirya, kil dopmakce nang ara, akil fia teleb ubuka, talima binan arye, dakdongobuka ulul kil dobcop ura, fia teleb uk unamdake. Diksukumuk ulul kil dopmunyop ura, 'E, na Ni Kopro Allah Yahweh aryuk, fia teleb kil arepmanile' tenen, Allah ati, "Telebe," nyabuka kinamlulume. Aning ara, talye ati kum nyapsine. Talima namin asa arye dukdongobuka, fia diksukumuk ulul kilapu ara, Allah Yahweh elcuk aresulula ati nyapsine. Ara, fia teleb dekna ning atonun aresulule.

<sup>23</sup>Ninye talye bona utotoa talina kum ninye arye, ikin ning sik dam yalyop ura, malye kanye bobikirye, dipkoprop sik patanmaliba, tenenmace yupu nyapnuce talak ara, 'Malye yupu nyabibibuk, melipmanto usinyak nang arye bataksicak' tenen, moubuka tenipdekirye, baplopnin bakirye, yupu binan aryuk nyanyake. Bukni, sik weik nang ara, aning atonun kum wininyake. Ikin ning weik sik damak yalyop ura, sik yupu nyapnuce talak ara, 'Teleb yupu mitang asa aryuk nyapnuyap,' tenena fia kumce, 'Malye yupu nyapnuyap do? Teleb yupu nyapnuyap do?' tenen, kum tenildenyake. Sik weik nang arye, talye yu kanye bobuka, mikip arye, yuk nang kekenmacak, talye lukparabuka, malye yupu uk nyaltakanyake.

<sup>24</sup>Ton nang ara, "E, nun ap neika dukdongobuka unamabe," nyabuka, nalina yupu nyanyak bukni, sik ap neika unyak ninye ati, fia malye uk ulinyake. Sik ap neika unyak ninye sik dam ara, ikin ning fia weik arye yanganamle. Ton nang ara, "E, nun ap neika dukdongobuka unamabe," nyabuka nyanyak bukni, anang ap neika unamak ninye ara, teleb uk unamake. Ara, anang ap, sik kayapu nang ap, fia teleb ubuka melilana uk unamake. Anang arye, sik neika unyak ninye ati, 'Anang ara, nun du weit atonun unyake,' tenenyaka anya arye, kanye deibikirye, sik ap neika dukdongobuka unyak ninye ati, teleb ulinyake.

**19** <sup>1</sup>Fia teleb ning ara, bona utotoa talina kum ulul bukni, malye un ning tonok babye kum ulirye, fia diksukumuk ubuka ulamlinye bira, fia teleb uk unamle. Fia malinye bira, walwal uk ulirye, malye yupu uk weik arye talye nyaltakalule. Anye bira, el si bam bol fum bisik ara, malye yupu uk pananamle.

<sup>2</sup>Ninye tonok ton, el un ning moubuka kum kel kiplirye, talye lukparabuka ululnye bira, 'Mikip arye fil dopnun' tenen, doptu babye, malye uk unamle. Ara, malye winin ning uk talibuka ululnye el ulula

atia. Tonda, yatanye do nirya, 'Kume, sik arye kum unamne' tenen, el mining kanye aniryuk, 'Talye lukparabuka banamane,' tenelule. Tonda, 'Apil-afil nirya, minopce aryuk, sirya dakanamne' tenen, balulnye bira, moubuka tenena kumnye ulula anya arye, 'Teleb ubuka ban bisik ara ani' tenen, kum kel kiliry, malye bisik uk balule.

<sup>3</sup>Ninye sik bidamang aniryuk, ititildanyaka deiyok ara, talye arye kume. Sik bidamang arye, walwal unyaka deice arye, ititildanyake. Malye ulilanyak bukni, sik bidamang tenenyaka deice arye, 'Kume nun ikin weik usilye ning arisilya deiyoknye bira, Allah elca,' nyabuka, Allah Yahweh ati, malye yupu nyanyake. Bukni, dipkoprop sik ikin ning dolonyaka deiyok ara, sik deice uk ulule.

<sup>4</sup>Bona weik talin nang ati, yuk ninye weik arye eibikirye, 'E, anang ap, neika unamabe. Nun kayapu nang unamaka anya arye, anang neika unamabe,' tenekiry, bona talin nang damak weik arye yanganyake. Bukni, bona utotoa talina kum ninye ati ara, sik mining damak unyak ninye ap, sik kayapu nang ap arye, 'Abona talin kum ninye arye, kum melipsitinge' tenen, batakanyake.

<sup>5</sup>Ninye ton tilila yupu nyalulnye bira, aminyan talak dipkoprop tomobikirye, wenema aik delilbinamake. Tonda, tenepce talye yupu nyanyak ninye ati ara, yuk ninye nirya arye sik ti, 'Yo, auplule, sik talye daunamake,' nyabuka kum namin kipnamake. Aminyan talak ara, atilila yupu nyanyak nang babye tomobikirye, wenena aik dongonamake.

<sup>6</sup>Ninye nirya arye, sik weik ninye deiyok nang damak fia piribuka yakiry, 'Se, aweik nang ara, nun ti kanye deipsitingce, teleb ubuka melipsiting,' tenebikirye, fia pi dobuka prilenyake. Aning atonun, ninye kanye talima arye, 'Se, aning ara fia mambul ning' tenen, pataplye ning ara, dobuka, yuk nang ati, bico tenebuka talye arilulnye, el dam uk ninye weik arye yanganamake. Ara, talye ati kume. 'Anye bira kanye deipsuturye, nun ti, e aninye ara, na kayapu nang unyake, tenebuka melinamsil' tenen, anye biti, kanye deibuka inilonyake.

<sup>7</sup>Tonda ninye ton fia bona utotoa talina kum uliry, aning-aning nirya kum talibuka kum ululnye bira, el mining yala nang arye batakanyake. Tonda, el yala nang ap, el kayapu nang ap neika mining dam unyak nang nirya babye, el ti luba kipdongobikirye, batakanyake. Winibuka winibicop ura, bona utoto talina kumnye birye, 'Se, na kayapu nang ap, na yala nang ap, dan tam unyak do?' tenen, fia pi dobuka dobolbalul bukni, anang ton fia kum eipnamle. 'Eipsiliry, moropsilyak' tenen, batakikirye, kwarabuka memelonyake.

<sup>8</sup>Yatanye do nirya, weik kel bikna ning atibuk, dobolkirikululnye bira, elcuk el bidamnye atibuk bico teneldaliry, teleb kilidalule. Aning atonun, yatanye do nirya, 'Deiyok ning ara ani' tenen, weik kel bikna deiyok ning uk, moubuka talilinye bira, kanye deibuka ulule. Elce wininamle ning nirya ara, teleb uk unamle.

<sup>9</sup>Ninye yupu lipsisikuka bokolin talak ara, ninye ton tilila yupu uk nyalulnye bira, dipkoprop wenena aik deibikirye, wenebuka ikin ning, el nong deice delinamake. Aning atonun, tenepce talye yupu uk nyaltakalulnye bira, aminyan talak dipkoprop Allah arye el ti, wenebuka oploplibla dipnamle.

<sup>10</sup>Malye ulirye fia walwal uk ululnye birye, fia teleb aik weklirye, aning-aning nirya talibuka, fia teleb ubuka ulyop ura, yuk ninye eibikirye, ‘Se, aning ara, dipkoprop malye uk ulule,’ tenenamake. Weik ninye deiyok nang, Raja arye delinyak mapu, sik deice tam ukirye, talyamiki bukni, yuk ninye nirya eibikirye, ‘Se, aning ara, fia malye weik ulye ning ara ani,’ tenebikirye, malye kanye bonamake. Ara, ninye deiyoknye el amutam talye fil melinanye ulul bukni, elce el deiyoknye kibuka, taliplibla unamle ning ara, fia kum winipmanto ning unamle ati, ‘Aning ara malye ulule,’ tenenyake.

<sup>11</sup>Ninye ton weik kel bikna ning akunum kel bikamlinye bira, yuk ninye arye el ti, malye upmacop ura, elce minopce sik ti yu upliba, kum walule. Sik yuk ninye arye el ti, malye ubikiba, elce namin kiplye ura, yuk teleb nang eibikirye, ‘Se, elda dipkoprop teleb uk ulule,’ tenenamake.

<sup>12</sup>Tonda, ninye deiyoknye Raja, weik arye yu upliba wana ati, weik arye nyalul yupu ara, weik yu kus, el si ara singa arye, weik yupu nyapliba, ninye nirya ilil weik ulamle touk, ulule. Raja arye yu upliba, ninye talye lukparabuka olula ati nyapne. Bukni, ninye deiyoknye Raja arye, yuk nang ati kanye deiplyop ura, winipmanto, mutmuta deice, mok dumduma sakmalirye, palipmaliba, teleb ulamle touk, winilule. Raja arye, el kanye deililul ninye ati, teleb kibuka melilula ati nyapne.

<sup>13</sup>Walwal arye malye uk unyak mapu ara, sik ni yapu nong deice weik ikin ning dobuka deilinyakce, malye ulinyake. Aning atonun, yata kilapu do nirya, yu upliba, weik arye yep-yep anyak kilapu ara, sik akanye yapu, fia lik ulule. Winipmanto ara, mek kolkol ana ara, batakaldongona kumce, fia atibuk sakanmalirye, lelim lelapliba, ninye arye, ‘Se, alelim nyalye ning ara, kum datue’ tenen, lik weik ulamak touk, ayu kilapu arye, waldana yupu weik arye nyakiba, sik akanye yapu kekenyakce, lik weik ulule.

<sup>14</sup>Urasin teleb aik ap, talin ning ayala-yala nirya ara, sik apu yapu ap, sik ni yapu ap arye, talilamica ani, dibikirye batakikcop ura, anang uk dolonyake. Bukni, teleb winin ning uk taliplirye, kanye moubuka tenelirye, teleb uk ulul kil do bicop ura, sikce, ‘E, na Ni Koprop Allah Yahweh, elcuk amambul ning aripnuke,’ tenen, el ti, “Telebe,” nyanamlulume. ‘Ninye dopnamak’ tenen, teleb ubuka unyak kilapu ara, Allah elcuk wibuka aresulule.

<sup>15</sup>Lik-lik asa arye unyak nang, sik dam ara, wi talin ning uk yangaliba, mana uk unyake. Sikda fil teleb ubuka kum donyaka anya arye,

'Maltakna uk unamabe' tenen, talye-talye uk unyake. Aning atonun, 'Aning winipnamne do, aning winipnamne do?' tenen, lik kanye bobuka, unyak nang ara, obina ayana kinyaka anya arye, sikda din pataliba, imun kanye bobuka unamake.

<sup>16</sup>Yatanye do nirya, Allah el nyalilye yupu uk talibuka ululnye bira, el bidamnye nong uk, kalikilalule. Elda teleb uk unamle. Bukni, Allah el nyalilye yupu ati, 'Na like, ayupu kum kekenamne,' nyabuka, ayupu yaniptaplirye, malye yupu uk nyalulnye bira, dipkoprop dipnamlarya. Aminyan talak, Allah arye aninye wenebuka oplopnamle.

<sup>17</sup>Yata nang do nirya ara, talye bona utotoa talina kum ukirye, aning-aning kum talinyak ninye ati, melinyak nang ara, Allah Yahweh ati, melilamaka atonun unyake. Winibuka melinyak ning ara, Allah arye luba kum kipnamle ati, yuk talak Allah Yahweh arye, el na tenen ning tamubuka, sik ti yamubuka arenamle.

<sup>18</sup>Anggun mapu ap, anggun ap neika unamlum talak nirya ara, sik malye ubicop ura, moubuka peterebuka wenenammlulume. Wininalum talak ara, wenepmunce, lipsisikuka peterenammlume. Winipmunyop ura, anggunce, 'E, aminyan talak nirya ara, nun mapu teleb ubuka unamak' tenen, kanye deibuka, dina uk unamlume. Bukni, anyapmasin touk, kum upmunyop ura, malye winin ning uk ukirye, dipna dam uk bicop ura, amapu sik nirya dipnamaka deiyok ara, sik ni yapu deice uk unamle. Winipnamle ning ara, lipsisikuka kum peteryaminya deice arye, talye lukparabuka malye winin ning uk talibuka, unamaka deice arye, dipnamaka ati nyapsine.

<sup>19</sup>Ninye ton minopce yu tenebuka derebicop ura, elce fia yu unamle. Yu deice arye malye uplyop ura, aminyan talak ara, amutuku talina deiyok nang arye, el ti tomobuka tapu koubikirye, "An malye ulamluma anya arye, dekna ning ara, fia weik ning aripsilyame," nyabuka, wenena aik dongopnamake. Sikce el melina ati ara, 'Se, nun mi ara, kum wenepnammlulume' nyabuka, wenena aik fum tam arye loplobuka lyepmunya babye, dipkoprop ami ara, moubuka kum kel kipnamle. Kum kel biknamla anya arye, dipkoprop yuk aminyan talak babye, amalye winilamlye ning ara, tuba tamubuka tonap, tabakuka upnin baliba, tonap tomobuka tapu koubikirye, wenena aik dongobikiba, tuba tamubuka, ton lyelona uk unamlum do, kum do? Aning ara, fia moubuka tenenammlulume.

<sup>20</sup>Ninye deiyok nang ap, weik kel nang ap arye, wenena yupu deice arye, lipsisikuka peterena yupu ap nyabikiba, moubuka kekepmunce, anirya dopropmunyop ura, aminyan talak ara, sik babye, weik kel bikna ning, talibuka umunce, teleb ubuka unamlume.

<sup>21</sup>Ninye kanye talima noutamak arye, 'Aminyan talak ara, wininamabe, winibuka unamap ning ara ani,' tenebikirye, sik kanye

tenena weik unyake. Bukni, Allah Yahweh elce, ‘Wininamake,’ tenyamsuk touk, ubuka unyak ning ara, fia nong upnamle. Elce tenesilye ning uk, wininamlulume. Ninye arye tenenyak ning uk, tenebuka una fia kume. Allah elce tenelul ning ara, ninye arye kum bisinyake. Ara, winipmanto kume.

<sup>22</sup>Ninye arye, ‘Se aning ayala-yala nirya doproptibirye, bona weik talin ninye unamabe’ tenen, kanye talima engena uk unyaka ara, fia malye unyake. Teleb ning ara, talye bona utotoa talina kum ninye ulamtibye. Tonda, ‘Talye bona utotoa talina kumnye unun anya arye, alye dakalanune,’ tenetibye bukni, anye birye nyalul yupu ara, tilila yupu uk nyalula anya arye, ‘Aning ara, malye un ning ara, fia weik arye ulule,’ tenetibye.

<sup>23</sup>Allah Yahweh atibuk ilil uliba, Allah ati kanye deibuka ululnye bira, el winilya deice arye, kanye deibuka fia teleb uk unamle. Allah atibuk ilil tenebuka, el si uk erenyak ninye ara, kanye deibuka teleb uk unyake. Wininyak ninye, sik dam ara, weik ikin ning ton, fia kum yanganamle.

<sup>24</sup>Ninye ton fil dona ati lik weik uliba, fil teleb ubuka talibuka kum dolinye bira, el din ning babye, lik uplibuk, talye taruk deice uk talipmalya ani, saklirye kum uplye ura, kum dilule. Fil dona ara, sik lik weik unyaka anya arye, sik din ning kum danin balya babye, ‘Nun fil dobipya deice arye, din ning dekuka dinamabe,’ kum tenenyake. Talya-talya kanye uk bobuka unyake. Sik babye din ning ati ara, fil kum donamake.

<sup>25</sup>Ninye ton kwalina uk ulirye, yep-yep ana ap, ngilik-ngilik ana ap, weik nyalulnye bira, obuka wenepnamlulume. Winipminyop ura, yuk nang, sik walwal atonun unyak ninye eibikirye, kanye moubuka tenebikca deice arye, kel kipnamake. Bukni, teleb ubuka ululnye ati ara, malye uplye talak ara, wenebuka ona kum dib aryuk, yupu uk lipsisikuka peterepmunyeba, elce ayupu moubuka kekeplirye, dobolbanamla deice arye, weik kel bikna ning, tonap tabakuka kel kiplirye, teleb uk unamle.

<sup>26</sup>Yata mapu do nirya, sik nin yapu ap, sik ni yapu ap ati, sik talilamice ning, ubula dopdopliirye, sik aik fum tam arye, ‘Anggunda bai tam bindoplulume,’ nyabuka, yakalkwetenyak mapu ara, fia malye weik unyake. Sik wininyaka deice arye, sik mining damak unyak ninye nirya ati, malye ulinyake. Winibikiba, anyaik ninye ap, sik tam ninye ap nirya ara, alye dakaldanamake. Tonda, yuk mutuku ninye nirya aning eibikirye, ‘Se, sikda fia malye wininyake,’ tenenamake.

<sup>27</sup>Se, nai mio, apeteren ning ati ara, ance, ‘Ayupu ara tonap moubuka kum kekenamne,’ tenepmince, batakminyop ura, malye bisik uk, binamlame. Akel bikna yupu ap, lipsisikuka peterena yupu ap nirya, dipdebuka batakminyop ura, tuba tonap kum tenenamlyame. Aning nirya batakmince, malye bisik uk binamlame.



<sup>28</sup>Ninye yupu lipsisikuka bokolin talak ara, tilila yupu uk nyalulnye birye, utenelule. ‘Kume, ninye arye dipkoprop ulamak touk, yupu lipsisikuka bokolina ara, na like. Uang yo bok weik arepnikiba, doproprnunyop ura, yupu bokolinamne’ tenen, tilila yupu uk nyalule.

<sup>29</sup>Ninye deiyok talibuka unyak nang arye, ‘Talye tilila yupu ap, nalinyak nang ap, sik wenena ati, wenena ning kintinibuka delinyake.’ Aning atonun, el si fum bisik arye, malye yupu uk panalulnye ap, fia walwal unyakce, malye ning uk talibuka, malye unyak ninye ap, sik wenena ati, kama dobuka, sik balye deice weik arye kulanamake.

**20** <sup>1</sup>Yu mek dinyak nang ara, kanye wangabikiba, malye weik unyaka ati ara, ayu mek el si ara bir ap, anggur ap, ton yuk yala ning nirya ap ara, weika arye dina meme. Yu mek weika arye dibikiba, sik kanye wangabica deice arye, fia weik yupu ding nyanyakce, malye ning uk talibuka unyake. Yu mek dibikiba, kwisi yung teleb ning nirya wangalamak nang ara, sik teleb kanye ton, fia kum bopmakirye, yuk nang ati yep-yep anyake. Tonda, yuk nang ati, olana uk unyake. Ati ara, ‘Yu mek dipnuyap,’ tenebikirye, malye bisik uk balamice nang ara, kel bikna ning talibuka kum unyake. Sikda, fia walwal nang uk unyake.

<sup>2</sup>Winipmanto ara, bai tam ulamle kuse atonun ning, el si ara singa kuse fia weik ning, yu uplirye, nguru-nguru alamle touk, fia ninye deiyoknye, Raja el yu ara, aning atonun ulule. Ara, fia yu weik singa kus arye, ninye olamle atonun, sik Raja nang babye atonun, malye unyak ninye ati, yu upliba wenenyake. Ati yatanye birye aRaja ati, ‘Yu upnutu’ tenen, dulsusulamlanye bira, el bidamnye arye, el mining atibuk olilalule.

<sup>3</sup>Moubuka kum teneplirye, talye kanye bobuka walwal deice uk ululnye bira, ‘Tuba walana uk uptibirye, olana uk uptibye’ tenen, malye yupu uk nyaltakalule. Bukni, fia weik kel nang arye, ‘Kanye talima dukdongobuka, neika una ara teleb uka,’ tenenyaka ati ara, yuk nang arye sik ti, malye ubica babye, adib aryuk kum derenyake. ‘Yupu walana ap, ninye olana ap ara, na like,’ teneplirye, yukak kilolbalule. Ati ara, yuk ninye arye sik kel nang ati, kanye delinyake.

<sup>4</sup>Wa win talak fil doptua babye, sikda, ‘Wa fil dona ara, nun like,’ tenenyak ninye anya arye, ‘Wa ara nun kum winamabe,’ tenenyake. El kwit capu nirya, wa wilamice talak ara, el ton fia kum wilule. Ati ara, el fil dona lik ulamlinye bira, el kayapu yuk nang, sik wa wiamica libuka dinyak talak nirya ara, el anye bira, din ning aning-aning nirya ton, libuka kum dilule. Din ning patana deice uk unamle. Elda, ‘Yata ning diptinye do?’ tenen, ebrebanamle bukni, nong ton kum upnamle. Elda, din patana deice uk unamle.

<sup>5</sup>Winipmanto ara, ninye arye mekwen lokamikiba, mek delilul sukum ara, karwu fia weik ulula ati ara, amek fum tam ulul ning ara,

minopce adib aryuk, kum eiptibye. Aning atonun, ninye talima fum tam tenelamice ning ara, adib aryuk minopce beta kel kum kiptibye. Bukni, fia weik kel biklamlanye bira, moubuka asipdeliba, ninye sik talima fum tam tenenyak ning nirya ara, laka nyanamake.

<sup>6</sup>Ninye weika arye nyabuka laka nyanyake. “Kume, nunda fia dipkopropa bico tenesinyaba anya arye, anggun ti fia kum batakanamsiabe,” nyanyake. Bukni, sik anang noutamak arye, ninye fia weik tam ara, talye yupu nyaltakanyake. Bukni, talye yupu nyaltakana kumce, “Dipkoprop anye bira, na kwit kopropa, na talimanye ulule,” nyabuka, fia bico tenesilirye, kum batakasululnye bira, fia el ti eiptibye bukni, anye bikilul touk, yuk nang ton weik kum unyake. Dipkoprop bico tenesinyak ninye ara, tonok-tonok uk unyake. <sup>7</sup>Malye ning nirya bataklirye, fia diksukumuk ululnye bira, malye ning tonok ning babye, talibuka kum ulule. Teleb uk ulule. Ati ara, elce deipnamle mapu ara, teleb un ning uk talibuka unamake. Allah arye anye ap, elce delinamle mapu nirya ap ati, Allah arye sik ti, teleb kibuka delilula deice arye, diksukum unyakce, teleb uk unamake.

<sup>8</sup>Yata talak arye do, fia ninye deiyoknye Raja tonok, ninye malye winilamice nang, yupu lipsisikuka bokolina ati, bun ning deice buklirye, ninye nirya sik ulamak touk eiplirye, ‘Yata nang teleb unyak do, yata nang malye unyak do?’ tenen, kel kilirye, malye unyak ninye wibuka yukak delilule.

<sup>9</sup>Yata ninye do nirya, ninye tukwak mutuku unyak ninye noutamak ara, tonoknye birye mikip asa yupu nyapturye, ‘Se, na ara, fia teleb uk uniry, na talima fum tam nirya ara, malye ning tonok babye fia kum unune. Na tuba kam unamne talak nirya ara, malye un ning ap, yuk malye winin ning ayala-ayala nirya ap, fia kum unamne. Na ara, kanye talima diksukum teleb uk kibuka ununye,’ tenebuka kum nyaptinge. Ninye tukwak unyak kili sal nirya ara, fia teleb ninye ton, fia kum unyake. Aning ati, sikce, ‘Na ara dipkoprop teleb kibuka unune,’ nyan yupu ara, kum nyaptinge. Ayupu nyabica babye, tilila yupu uk nyanyake.

<sup>10</sup>Ura, ninye nirya arye, bon-bona dekikirye, ikin ati erelana ap, kililena ap, nukuna ap unyak talak ara, dipkoprop kum unyakce, sik bidamang uk weika arye dolonyake. Wininyak ninye ara, nun Ni Kopropa Allah, el si Yahweh elilulce, ‘Aning ara, fia na like,’ tenelule. Ninye ton bon-bona dekna ap, ikin ati, erebuka delina ap, kililena ap, unyak talak arye, ‘Nun uk weik dopropnuyabe,’ tenenyak nang ati, nun Ni Kopropa Allah el si Yahweh tuba-tuba elilulce, ‘Awininyaka ara, na like. Aning ara fia na like,’ tenelule.

<sup>11</sup>Tonda, nunce yata mapu do nirya, sik unamak ning ati, ‘Yata wiribuka unamak do?’ tenen, moubuka dinamabe. Winibuka dina uk ulamibiba, sikce teleb unyak ning ara, lakak uk ulule. Aning atonun,

sikke malye uk unyak ning babye, lakak uk ululba eibuka kel kinyabe. Aning ara kum duknuptinge. Aning atonun, nunce wisi nang sik winilamice ning eibibirye, ‘Sik wininyak ning ara, fia teleb kibuka unyake,’ teneptibye. Teneptibirye, ‘Aning ara, fia teleb unyake, anang ara, tuba-tuba malye uk winipribanyake’ tenen, kel kinyabe.

<sup>12</sup>Nun Ni Koproba Allah el si Yahweh arye, ninye amul kwepdeiamsuk ara, kekepmanto ning ton kwelisulule. Aning atonun asing ara, ‘Aning-aning nirya dilamikirye, teleb kibuka unamak’ tenen, asing eipmanto ning ton kwelisulule. Yata nang do nirya, amul aupliba, moubuka kekenamak nang ap, asing arye teleb kibuka elinamak ap ara, ‘Teleb uk unamak’ tenen, Allah Yahweh arye abitinye ning kwepdeiamsuk.

<sup>13</sup>Yata nang do nirya, mikip arye fil dona kum, talye maltakna uk unyak nang ara, yuk talak sik talinyak ning kum upribaliba, sikda dipkoprop bona utotoa talina kum ninye uk unamake. Aning atonun, yata ninye do nirya, ‘Fil ara nun like,’ tenenyak ninye unyak touk kum unyakce, teleb kibuka fil mikip arye wa wina ap, yuk fil aning-aning nirya ap, dolamak nang ara, yuk talak sik fil dolamak ning nirya, dipkoprop nong uplirye, weik upliba, tuba-tuba libuka dinyakce, sik ap sik mapsilip nirya ap, sik kayapu yuk nang nirya ap, bokuka dinyake.

<sup>14</sup>Tonda, ninye nirya arye, aning-aning nirya deibuka deklamak sukum, pasar do, dekna ning deibuka delinyak aik do, bikirye, ‘Nun patapsil ning deknamabe,’ tenebikirye, aning deiamlyenye binyak, nyanyake. “Se, aning ara, fia teleb ning kum anya arye, dekna ning kulukeipsutumce, mitiktonun nyapsutumba, nunce dektibye,” nyanyake. Bukni, aning nyaplobuka dekickop ura, sik kayapu yuk nang kekenmace bikirye, “Nunda weik kel nang unyabe. Aning ara, dekna mitiktonun deice aryuk dekmabe,” nyabuka kimilanyake. Sik kayapu yuk nang ati, “Diba, aning ara dipdelulume. Dekna weik ning bukni, mitikanun arye aripsikke deksik,” nyabuka kimilanyake.

<sup>15</sup>Yatanye do nirya ara, tuku fum tam noutamak ap, bon-bona deibuka delinyak aik fum tam ap, eibuka bakirye, dekna weik ning ati enyake. Ara, urasin teleb dekna weik ning, emas ap, kat keil dekna weik keil, el si ara berlian ap ati, enyake. Wininyak bukni, nunda ninye ton diksukum teleb kibuka ulirye, tuba-tuba teleb uk ulirye, fia weik kel bikna deiyok yupu uk, nyalulnye binyak, enamabe. Bukni, atonye bira, adib aryuk minopce eibuka, beta kel kum kiptibye. Deiyok ara ani. Kel fia weik bikna ning, akunum kel bikamik nang ara, weik kum unyake. Tonok-tonok uk unyake.

<sup>16</sup>Tonda ninye arye nyanyake. Sikce, “Anye bira, na beta kel kum bikse bukni elce, ‘Deknune,’ nyanmal ning ati, winitalak dekna kum arepmal ning ara, aminyan talak na aryuk melibuka areptinye,” nyanyake. Tonda, sikce nyanyake, “Kume, anye bira na walwal bukni, moubuka

tenipdenirye, aminyan yanuka aripnamasile. Winipnamala ati, el dekna ning, menenga ona ara, na aryuk aripnamsine.” Yata nang do nirya, anggunce ayupu atonun nyapsilyop ura, ‘Dib nyapmasila,’ tenena meme. Ninye ton atouk yupu nyaltakalulnye bira, dipkoprop fia weik kelnye birye kum nyalule.

Ati ara, ayupu atonun talya dem uk nyaltakalamak nang ati, teleb ati ara, sik bon-bona do, butum aling do, sik mambul dekna weik ning do, dobuka dokola delinamlulume. Deiyok ara ani. Sikce, “Abona ning menenga opnamne. Na aryuk aninye asiknye birye doproprnulye bon-bona ati, dekna ning kum aripsilyop ura, na arye punupnamsine,” nyaptu bukni, aminyan talak dipkoprop kum aripsilyop ura, el ning dokola deipnamlum ning ara, tamubukaOLONamlulume. Anye elda, dipkoprop fia weik kel kiamuknye kume. Aning atonun, malye unyak kilapu ati, “Sik dekna kum cuk, talye dopronamak ning ati ara, na aryuk dekuka punupnamsine,” nyaplop ura, anggung bon-bona deiyok nang arye, el mining dekna weik butum aling ton dobuka, dokola delinamlulume. Anggun ning talye dopromsice touk, ayupu nyaltakalyenye, menenga tamubuka kum aripsilyop ura, el mining ning urdem uk doproprnamlulume. ‘Anggun ning ititipdamunyak’ tenen, teleb ning ara, el kanye delin ning tamubukaOLONamlulume.

<sup>17</sup>Tonda ninye tonoknye birye, el kayapu yuk nang ati, ur talye yupu deice arye, mambul dekna weik ning ap, fia din fia teleb ning ap, doproprnamle. Ara, talye yupu lyaltakalul deice arye doproplirye, ateleb din ning diplirye, kanye delilule. Bukni winipmanto ara, aminyan talak el dinamle ning nirya ara, talya karin arye el si bam bol fum tam ara, keil wenenga weklamle touk, unamle. Deiyok ara, tilila yupu nyabuka deice arye, teleb ning dololamuk bukni, aminyan talak ikin ning weik, el dam yanamle.

<sup>18</sup>Anggunce, ‘Mambul weik ning ton winiptibye’ tenen, kintinipmunyop ura, teleb ning ara kabul talak arye, yuk fia weik kel bikamice nang nirya ati, laka nyapmunyeba, yupu arina ap, “Winipnamabe,” lak lena ap, nyapmunce, aning nirya ara, fil donamlulume. Aning atonun, yuk fia weik kel bikamik nang ati, ‘Olbinuyabe,’ tenepmunyop ura, teleb ning ara, kabul talak arye, “Winipnamabe,” nyana ap, yupu arina ap, unamlume. Sik fia weik kel bikamik nang arye nyanamsiak yupu, moubuka kekepmunce, wininamlume. Moubuka tenilena kumce, talye lukparabuka minopce, ‘Mambul weik ning ara, talye luparabuka wininamabe,’ tenena meme.

<sup>19</sup>Ninye ton yuk nang sik kekena ati, ‘Talye yupu uk lyaltakanamne’ tenen, patalibuk ululnye, el dam ara, anggung mambul yupu ton, fia kum nyanamlulume. Ati, anye el kekenak ara, moubuka bikmunce nyanamlulume. Aning kumop ura, ‘Ninye ton talye yupu bobuka

nyalbitiniba, ninye nirya kel biktinge' tenen, patalyeba nyalbalule. Winiplyop ura sikce, 'Ayupu ara lakak kum nyanamabe,' tenelamlum ning nirya ara, elce talye lukparabuka, laka arye nyalbalula atia.

Ati, atalya yupu bobuka nyalbalulnye kekelye sukum ara, anggun mambul yupu kum nyanamlulume. Tonda aning atonun, yupu nirya bobuka, 'Yuk ninye weika arye kekenamak' tenen, patalibuk ululnye bira, neika una meme. Anggun mambul yupu bobuka, anye dam kum nyalbanamlulume. Aning ati, 'Yuk nang arye talye nyanyak yupu kekebuka nyapra banamne,' tenelulnye ap, neika ansinibuka kum unamlume.

<sup>20</sup> Winipmanto ning ara, lukunyan talak noutamak weisa tangaplirye kuna dakliba, aning nirya kum elilamak touk, yata ninye do nirya, sik nin yapu ap, sik ni yapu ap ati, malye yupu nyabuka suplinye bira, Allah arye aninye ati, minopce wenebuka oplomliba, dipnamake.

<sup>21</sup> Tonda tonok mi do, kamnye do, wel kil do, el li koproba diplyop ura, el li koproba talyamukce, 'Na weik sisin dekna weik ning,' tenelamuk ning nirya ara, el mi arye minopce weika arye dololirye, kum kibuka deipnamle. Minop talak el li birye talyamuk talak ara, aning nirya fia teleb uk langdilamuk bukni, akamnye do, kam kil do, minopce doproplirye, talipliyel talak ara, minopce kum daneipnin balamlyani, fia kum danalule. Minop talak aning nirya doproplyop talak ara, kanye deipnamle bukni, aminyan talak ara, adekna weik dokola ning bokuka aripnin balamlya deice arye, sirya dakliba kum danamle. Ati, aminyan talak ikin kanye bobuka unamle.

<sup>22</sup> Ninye tonoknye ton, anggun ti malye kipdeipsilyop ura, anggunce tamubuka, 'Anye binyak, el babye malye kipdeipnuyabe,' tenebuka, kum nyanamlulume. Anye biti, minopce kwang dakna meme. Teleb ning ara, ouku batakuka dilamunyani, Allah el si Yahweh arye anye binyak, tamubuka wenepnamle. Amalye winyamsilye ning ati, anggun bidamang aryuk tamubuka minopce kwang kum dakanamlulume. 'Allah arye dipkoprop anang wenepnamlarya' tenen, ouku batakuka, dina uk unamlume.

<sup>23</sup> Tonda ninye weika arye tilila ning wininyak nang arye wininyake. Bona ning dekna ap, ikin ati kililena ap, nukna ap wininyak talak ara, dipkoprop ning kum upmalibuk, talye dem ati, "Aning ikin ara ani. Aning el dekna ara ani," nyabuka nyaplobikirye, sik dekna ning talye dem ati, weika arye dolonyake. Wininyak bukni, nun Ni Koproba Allah, el si Yahweh aninye unyak ning elilulce, 'Aning ara fia na like,' tenelule. Allah Yahweh elda, bon-bona dekna ap, ikin ati kikliken talak ap, nukne talak ap arye, yuk nang ning talye yupu nyabuka dolonyak nang ati, tuba-tuba elilulce, 'Na like,' tenelule.

<sup>24</sup> Nun Ni Koproba Allah, el si Yahweh arye, nun unamap ning ap, fil donamap ning ap, bisik banamap mutuku nirya ap, el akunum kel

bikamsuke. Allah Yahweh arye, ‘Aninye ara, wininamake, amutuku ton banamake,’ tenelamukce, aminyan talak nunce wininamap ning ap, nun dam yanamsil ning ap, akunum tenebuka kintinipdeiamsuk ati, nun bidamang kanye tenena deice aniryuk, yata wiribuka kel kiptibye do? Kume, nunce kum winiptibye.

<sup>25</sup>Ton ninye ara, sikce sik teleb ning ati, tonok-tonok nang arye, moubuka kum tenebica deice arye, sik ning minopce yuk nang ap, Allah ap ati, “Anggun ti aning arenamabe. Tonda Allah ati arenamabe,” nyabuka nyalin yupu deice arye nyaltakanyake. Aninye ara, moubuka tenilena kumce, nyannyaka anya arye, aminyan talak ila tuba tonap teneipdekirye, ‘Se, anyalina yupu kum nyapmatinye,’ tenebikirye batakanye.

Ara, fia malye. Aninye arye wininyaka atonun, maka mangkau arye wena tapu wepmaca fum tam balibuk, youlamle. Aning atonun, ninye tonoknye ton, kabul talak arye moubuka kum tenipdelirye, “Allah ap, ninye yuk nang ap ati, winipnamne,” nyaltakalulnye bira, atonun ulule. Teleb ning ara, kabul talak arye moubuka teneiptinge.

<sup>26</sup>Winipmanto ning ton nyapnusine. Sik gandum wa win ninye arye, gandum duk deice bol koplobikirye, duk teleb ning uk wibuka, yukak dokola delilbanyake. Aning atonun, fia ninye deiyoknye Raja ara, fia weik kelnye koprop ulule. Ninye deiyoknye Raja ara, fia weik kelnye koprop ulirye, dipkoprop dilula anya arye, teleb ninye ulamikca noutamak arye, malye ning uk talibuka unyak ninye nirya wibuka, yuk tam delilbalirye wenelule. Winilirye, malye winin ninye nirya ara, teleb winin ninye noutamak arye, wibuka yukak deiplirye, wenenamle.

<sup>27</sup>Winipmanto ning ara, ninye arye weisa ubikiba, sik ning wangamlirye, saklamle ning nirya, lakak upliba teleb kibuka eibikirye, dolonyake. Aning atonun, nun ni Allah Yahweh arye, ninye talima fum tam, malye winibuka duknulamice ning nirya eibuka, kel kilula anya arye, aning nirya ara, lakak uk ulule. Ninye talima fum tam arye malye kibuka duknuyak ning nirya ara, Allah ati kum duknuptinge. Allah Yahawe arye ninye talima fum tam ulul ning nirya elilule.

<sup>28</sup>Tonda ninye deiyoknye Raja tonoknye birye, el talibuka unamle mutuku noutamak arye, nyanamle yupu nirya ara, el talinamle mutuku ninye nirya ati, bico teneplirye nyanamle. Ara, ‘Malye winipmanto ning ara batakikirye, teleb winin ning uk wininamak’ tenen, el talinamle mutuku ninye nirya ati, bico teneplirye nyanamle. “Amutuku talibuka unamsina ati, anggunda fia teleb kibuka unamlume,” nyabuka nyalin yupu nyalilamle touk, fia amutuku uk talibuka ulule.

Winibuka ululba, el amutam unyak ninye nirya arye, el ti kanye deibuka ukirye, el nyalul yupu nirya ati, kum yaninyake. Teleb ubuka unyak Raja nang arye, sik talinyak mutuku ouku weika arye kam

unamake. Tonda, keteng tamun weik noutamak arye, sik mutuku fia talinamake.

<sup>29</sup>Welnye el nong mikip ululnye binyak, yuk nang nirya arye el ti, kanye fia delinyake, ‘E, anye bira fia teleb uk ulule,’ tenenyake. Aning atonun, wisi nang babye, teleb kibuka diksukumuk ulamikiba, kul potong palye nang ati, yuk nang arye, “Anang ara fia telebe,” nyabuka, kanye delinyake.

<sup>30</sup>Ninye arye, malye winibikiba, ninye deiyok nang arye, sik nong deice wenena ning weik deibicop ura, adeice arye weika arye kel bikinyake. Sik min arye malye ning uk talibuka winilamice ning batakanyake. Wenena deice arye ninye talima teleb kililule. Aning atonun, ninye ton malye winin ning uk winibuka ululnye bira, deiyok nang arye, tomobuka wenepira ikin ning weik, sik nong deice delinyake. Winibicop ura, amalye ning uk talibuka ululnye, kel kiplirye aminyan talak teleb uk unamle. Deiyok nang arye, el ti wenenyaka deice arye, el talima fum tam tenelamlye, malye ning nirya ara, kum danapnamle.

**21** <sup>1</sup>Allah Yahweh arye, mek kwepdeiamukce, “Na tenepnye touk, teleb kibuka banamlyame,” nyapdeiamukba, winitalak abisik uk balule. Aning atonun, fia weik ninye deiyok talibuka unyak nang, sik Raja nang babye, Allah Yahweh arye sik kanye talima talilule. Ati ara, Allah arye, ‘Aning winipnamle, aning kum wininamle. Aninye talibuka wininamle’ tenen, kanye deibuka tenelye touk, Raja nang sik kanye talima talibuka tamupdeipliba fil donyake.

<sup>2</sup>Ninye nirya arye, sik yuk-yuk unyak ning nirya ati ara, ‘Kume, nunda teleb ubuka unyap,’ tenenyake. Bukni, ninye arye sik talima fum tam arye, ‘Adeiyok ati afil donamne, adeiyok ati ayupu nyanamne,’ tenebikirye, ulamak ning nirya ara, lakak kum ulul bukni, ninye tukwak ninye, sik talima fum tam ara, Allah Yahweh arye kel kislulule. Ati, ‘Sik talima teleb do, malye do?’ tenen, asibuka winilasulule.

<sup>3</sup>Dipkoprop winin ning ap, diksukum ubuka ninye yupu lipsisikuka bokolina ap ara, teleb kibuka ubibyop ura, Allah Yahweh kanye delisulule. Awinina ati ara, fia weik arye kanye delisulule. Bukni, ninye arye, ‘Nun malye unyap ning namin kipnamsil’ tenen, kam ning obuka uku danyaka deice arye, mitiktonun aryuk kanye delisulule. Allah arye, ‘Aning ara fia weik mambule,’ tenesulula ara, diksukum una uka.

<sup>4</sup>Ninye ton sik asing dilakirye, kwalinyak nang ara, sikce, sik mining kanye talima erelanyake. Winibuka unyaka deice arye, fia malye uk unyake. Sik kanye talima fia malye uk unyak ninye arye, aning nirya unyake.

<sup>5</sup>Ninye ton, ‘Na winipnamne ning ara ani,’ tenelul touk, fia pi dobuka fil teleb kibuka dolulnye bira, el tenelul ning uk, dipkoprop el dam yanamle. El fil donamle ning nirya nong upnamle. Bukni, yuk nang

arye, ‘Kume, aning ton winiptibye,’ tenenyak ning nirya ara, nong kum upnamle. Deiyok ara, sik kanye moubuka tenena kumce, ‘Polasa aryuk afil dobiryee, sirya daknamabe,’ tenekiryee, teleb kibuka fil kum donyaka anya arye, sik talinyak ning nirya kum upra banamle.

<sup>6</sup>Tonda talye bon-bona atibuk, ‘Aning dobukapneryee, bona utotoa talin nanye kipnamne,’ nyabuka tilila yupu nyalulnyee bira, aning-aning weika arye dololul bukni, el dololul ning nirya ara, kum kipnin banamle. Winipmanto ara, tuku mikip keteng bupu arye welepliryee, minopce kum balamle touk, tilila yupu deice dololamle ning babye, kum kipnin danamle. Tonda, ninye arye wena tapu wemikiba, bai tam kam ulul ning mangkau arye banmalebuk, youbuka olamle atonun, tilila yupu nyanyakce, bon ning dolonyaka deice arye, dipna dam bisik uk banyake.

<sup>7</sup>Ninye ton, tuba-tuba malye winin ning uk winikiryee, yu ubuka unyak nang ara, ninye deiyok nang arye nyanyak yupu, ilil ubuka kum unyak ati ara, sikce, ‘Teleb ubuka unamabe,’ kum tenenyake. Malye ning uk talibuka wininyaka ati ara, sik malye wininyaka deice arye, ikin ning weik sik nong deice yanganamla deice arye, dibinamake. Sikda, olan ninye atonun unyake. Winipmanto ara, sikce malye wininyaka deice arye, sikce sik bidamang ati, olilanyake.

<sup>8</sup>Malye winin ning uk ati, fia tuba tenebuka unyak ninye arye, dipkoprop malye unyaka ati ara, sikda kwanim bisik uk banyake. Sikce, yuk ninye ati, talye yupu uk nyaltakanyake. Bukni, fia diksukumuk ubuka unyakce, pung bisik uk banyanyak ninye ara, fia teleb uk unyake. Sikce wininyak ning ati, ‘Malye ning ani,’ kum nyaptibye.

<sup>9</sup>Sal ap, sik kilapu ap, fia urasin teleb weik aik neika unmating bukni, anang sik kilapu arye, sik akanye yapu nyanmace yupu kum kekebikiryee, bisibuka malye yupu uk nyabicop ura, yupu deice arye walana uk unyake. Winibicop ura, anang ara utenenyake. ‘Kume fia teleb ning ara, urasin teleb aik batakipyop ura, alip aik umunyak dam uk, nun yuk-yuk unamabe. Im alip aik kup-kup tam, malye sukum bukni, nun yuk-yuk utipyop ura, kanye deibuka unamabe,’ tenenyake.

<sup>10</sup>Sal ton tuba-tuba malye winin ning uk ululnyee bira, amalye winin ning uk tuba teneliryee, el kanye talima fum tam arye, ‘Malye winin ning atibuk winipribanamne,’ teneliryee patalule. El kwit capu koproba, el ap neika unyak nang ati ara, bico tenebuka fia kum melilule. Sik ikin ning noutamak uptua babye, amalyenye biryee, sik ti fia kum melinamle.

<sup>11</sup>Teleb winin ning ati, yep-yep abuka malye yupu nyanyak ninye ati, ninye deiyok nang arye, anang ati wenebicop ura, yuk nang ton moubuka beta kel kum kinyak nang, eibice deice arye, mitiktonun arye kel kinyake. Bukni, fia weik kelnyee bira, teleb ubuka ulamline binyak, lipsisikuka peterenyaba deice arye, adib aryuk teleb kibuka kel bikilule. Mangkau arye malye upliba, sik deiyok nang arye, “Winipnamlyame,”



nyabuka weneplyop ura, ayupu kekelya deice arye, teleb kibuka kel bikilule.

<sup>12</sup>Allah elda, tonok malye winin ning uk, bobuka kum ulule. Elda fia diksukum una deiyoknye ulule. Winibuka ulirye, sik malye winin ning uk, talibuka unyak kili sal ati, ‘Yata malye ning ton unamak do?’ tenen, Allah arye sik unyak aik ati, moubuka kalikilule. Teleb kibuka dinamle. Winibuka dilamlye ani, amalye winin ning uk tuba winipda bacop ura, adeice arye akili sal ati, weneplyirye oltakalule.

<sup>13</sup>Yata ninye do nirya, mitangnye birye el patalamle ning ati, ‘Se, na melipnulukume,’ nyabuka, malye nyabuka morolamle ning ati, moubuka kum kekebicop ura, amul kunukdongobikirye aminyan talak ara, sikce fia imun kanye bobuka, tuba malye nyanmatinga babye, yuk ninye arye sik ti, fia kum melinamake. Batakalongona uk unamake.

<sup>14</sup>Ninye ton yu kanye bopmalinye biti, yuk nang arye dinmacak kum bukni, anye biti teleb arin ning duknubuka arepmunyop ura, ila tuba tamubuka kanye talima nimalyap asa uplirye, el yu tenelye ning bataklirye, anggun ap neika teleb kibuka upnamsile. Yuk tenesinyak nang ati, teleb arin ning arepmunyop ura, aning doproplirye, yu tenenmalye ning ara talima namin upliba, ila tuba tamubuka teleb kibuka unamle.

<sup>15</sup>Ninye nirya walana ap, olana ap, unyaka ati, wenena aik bobikirye, ‘Yupu lipsisikuka bokeipnamap’ tenen, yupu nyanyake. Ara, ayupu walanmaca kan-kan arye, sik yupu lipsisikuka bokolina deiyok nang arye, dipkoprop winipmace touk, wenebuka yupu bokeibicop ura, sik diksukum unyak ninye nirya arye, fia kanye deibuka teleb uk unyake. Bukni, ninye ton, malye-malye uk tuba winipra balulnye bira, sik yupu bokolina deiyok nang arye wenebikiba, ayupu moubuka kekeplirye, ‘Se, aning ara, na winipse ning ati, teleb kibuka wenen yupu nyapmaniake,’ teneplirye, ayupu kekebuka lukuldalule. Tonda, ‘Weik arye wenepnamniake’ tenen, ilil weik ulule. Malye winilulnye birye, ‘Ayupu ara, na like,’ tenelule. ‘E, aning ara dipkoprop nyapmaniake,’ tenebuka, kanye fia kum delilule.

<sup>16</sup>Ninye ton teleb kibuka kum tenebikirye, talye kanye bobuka malye-malye uk unyak ninye ara, ‘Aning winibibiba, aminyan talak yata wiripnamsil do?’ tenena kumce, malye bisik uk dobolbanyak ninye ara, dipkoprop ninye diplamice, ninye kanye unyak sukumuk banyake.

<sup>17</sup>Yata ninye do nirya, ‘Se, fia teleb ning uk talibuka, bona utotoa talin nang uk unamabe’ tenen, bouku sukuna uk unyak ninye ara, aminyan talak talye bona utotoa talina kum ninye uk upnamake. Deiyok ara, ateleb ning dolonyaka deice arye, sik mining talilamik ning ap, yo bok nirya ap kum upribaliba, bona utotoa talina kum ninye uk unamake. Deiyok ara, dekna ning ap, anggur tapu mek dekna ap, yuk talye ning

dekna ap deice arye, sik talinyak ning nirya kum upliba, bona utotoa talin nang kum unamak bukni, bona utotoa talina kum ninye uk upre banamake.

<sup>18</sup>Ninye ton, tuba-tuba fia malye winin uk tenebuka winipra banyak ninye ara, Allah Yahweh arye, amalye ning talibuka wininyak ninye nirya ati, weik arye weneplyrye opnamle. Ara, winipnamle deiyok ara, malye wininyak ninye nirya oplirye, teleb diksukumuk unyak ninye nirya ati, teleb kipdeiplirye lyepnamle.

<sup>19</sup>Ninye ton kil doplirye, ‘Na ap, na kil ap, teleb ubuka neika unanam’ tenen, el ap el kil ap neika ururak bukni, anye el kil arye malye kanye boplyrye, el akanye nyalye yupu bisik uka deren uk ulyop ura, malye kanye boplyrye, tuba-tuba, “Ane winin malam ning ara, deiyok yata ati do? Aning winina ara, fia na like,” nyalule. Aning atonun nyalul kil ara, el akanye birye, el yu kanye boplyrye, ‘Kume teleb ning ara, na yuk unamne. Mok fia cena kumce, mek kum baliba, ninye kum unyak mutuku noutamak ara, na yuk unamne. Akil ap neika kum upthenemnye. Na like,’ tenelulue.

<sup>20</sup>Ninye ton teleb kibuka ululnye el fil dolula deice arye, dekuka talilye ning ara, teleb kibuka el aik fum tam delilule. Winilula deice arye, teleb aik noutamak ulule. Tonda, elce talilul ning weik upra banamle. Bukni, walwal aryuk unyak ninye ara, sik fil dobikirye, dolonyak yo bok ara, adib aryuk sik patan ning dekenyaka deice arye kum upliba, tonok ning babye dokola kum delinyake. Ati sik doprobikce ning ara, minopce kum danalule.

<sup>21</sup>Yata nang do nirya, teleb winin ning uk patalyeba, ‘Allah arye nyasilye touk unamabe. Tonda yuk nang ati bico tenebuka melilana uk unamabe,’ tenebikirye, aning atibuk dobolnyak ninye ara, teleb uk unamake. Sikce kam una deiyok ning ap, Allah arye, ‘Wininamake,’ tenyamsuk deiyok ning ap dolonamake. Tonda, yuk ninye arye sik ti, ‘Se, aninye ara, dipkoprop teleb uk unyake,’ tenebikirye, sik ti kanye delinamake. Teleb kibuka una deiyok ning doprobicop ura, sik upribanamaka ati, Allah arye ouku cang arye arepliba, fia teleb uk upre banamake.

<sup>22</sup>Kel fia weik deice arye, fia teleb kibuka ululnye bira, el mal olan nang, sik fia weik kota mutuku noutamak, mikip yin talin nang arye kalikuka dinmatinga babye, el biturye amutuku nirya obuka uku sice buklopnamle. El mal olan nang arye, ‘Kume fia weik cang keil foka ap, keil aik ap dobupa noutamak unyaba anye arye, yata ninye arye obuka sirya daksiting do, kume,’ tenelamik bukni, fia weik kelnye birye aning nirya dakloplirye, aninye ati obuka sirya daknamle.

<sup>23</sup>Yata nang do nirya, yupu nyana ati, ‘Malye yupu talye lukparabuka, kum nyapnyup’ tenen, sik sitang ara moubuka kalikdakirye, ‘Yupu weika

arye kum nyapnuyabe,' tenen, mitikanun uk nyanyak nang ara, ikin ning weik sik dam kum yanganamle. Yupu weika arye talye lukparabuka nyanyak nang ara, ikin ning sik dam yanamle. <sup>24</sup>Ninye ton erepdanuka kwalibikirye, dina uk unyak nang ara, minopce talima erenyakce, 'Malye winiptibye' tenen, ilil fia kum kanye bobuka, weika arye malye winin ning uk unyake. 'Winibibiba, ikin ning nun dam yanamsil do?' fia kum tenenyake.

<sup>25</sup>Fil dona ati ara, 'Na like, fil kum donamne,' tenelulnye bira, fil aning-aning nirya teleb kibuka kum dolule. Ati, el patan ning ati, 'Se, aning ap, aning ap, doproptinye' tenen, patalibuk, malye winin ning talibuka unamla deice arye, el bidamnye arye, el bidamang atibuk olilanamle.

<sup>26</sup>Fil dona ati ara, 'Na like, fil kum dopnirye, talya urdem uk unamne,' tenelulnye bira, el patan ning nirya ati ara, fia tenena uk unamle. Yata ning do nirya, mitiktonun arye akunum doproplyop ura, 'Akunuma,' kum tenelule. Elda, 'Se, weika arye tonap tabakuka doptinye' tenen, fia weik arye patalyeba, pirina uk unamle. Bukni, Allah arye, 'Tukwak kili sal winibuka teleb unamake,' tenyamsuk touk, aning uk tenebikirye, teleb uk unyak kili sal ara, yuk nang ati bico tenebikirye, weika arye arinyake. 'Na uk doproprune' tenen, kum unyake.

<sup>27</sup>Malye ning uk talibuka ulinye birye, 'Na malye unun ning, Allah arye kilipnuturye, namin kipnamnil' tenen, teleb ning boyalirye, Allah ati areplya babye, Allah arye anye biti el kanye fia kum delilule. Aning uk kum bukni, amalye ulinye birye, 'Aning dobuka Allah ati aripnyop ura, Allah arye teleb ning aripnilirye, weika arye melinamnile,' teneplirye, el kanye talima fum tam ulul ning duknuplirye, atenena deice arye, Allah ati areplyop ura, Allah Yahweh arye anye biti kanye fia kum delilule. 'Anye na like,' tenelule.

<sup>28</sup>Ninye yupu lipsisikuka bokolina ati, bulubice talak ara, tilila yupu uk nyaltakalulnye biti ara, sik deiyok nang arye, "Anda monoklyame, yupu tonap kunusa dobuka kum nyanamlyame," nyabikirye, el nyalul yupu sekelongonamake. Bukni ninye ton yupu nyapnamalye ning nirya moubuka tenepdelirye, 'Deiyok ning ara ani, ani' tenen, akunum moubuka tenepdelirye, diksukum yupu nyalulnye biti ara, sik yupu lipsisikuka bokolina deiyok nang arye, "Telebe, anda yupu dukdongobuka nyapra banalame," nyapnamake.

<sup>29</sup>Ninye ton dipkoprop ning uk winilulnye bira, "Teleb una ara ani, malye ning ara ani' tenen, el wininamle ning nirya moubuka tenelya deice aryuk, aning nirya tenebuka kintinililule. Bukni, malye ning uk winilulnye bira, 'Yuk ninye kel biknicak' tenen, ilil fia kum kanye bobuka weik winiplirye, erepdanuka kwalilule. Dipkoprop el wininamle ning min kum tenepmali bukni, el urasin ara, ilil una kum kili sal wininyak touk kibuka, talye lukparabuka balule.

<sup>30</sup>Yata ninye do nirya, sikce, ‘Wininamabe, teleb una ara ani. Nunce fil donamap ning ara ani,’ tenebikirye, ‘Yata wiripnamap do?’ tenen, fia weik kel kilamik nang ap, yupu taliptingce, fia mambul kirikuka piripdeca babye, Allah Yahweh arye, ‘Wininamne,’ tenyamuk ning ati ara, tukwak ninye arye kum malye kiptingce. Allah arye tenelul touk ulula atie.

<sup>31</sup>Sik mal olalban nang arye, ‘Nun kuda balye deice bukibirye, nun mal olan ninye ati olbinamap’ tenen, aning-aning nirya kintiniptinga babye, sik mikip deice aniryuk, sik mal olan ninye ati obuka sirya kum daknamake. Allah Yahweh, elcuk, ‘Aninye obuka sirya daknamle. Aninye arye otam ninye ati, oplopnamake,’ tenelye touk, nong upnamle. Allah tenepmalye touk, obuka sirya daknamle. Ninye arye teneipdeting bukni, Allah arye tenelye touk afia wininamle.

**22** <sup>1</sup>An bon-bona ning fia weika arye deiaminba, bona weik talinanye ulaminyop ura, aning ara mitik teleb bukni, teleb ubuka diksukumuk ulaminye bukni, yuk nang eibikirye an ti, “Anye bira fia diksukum ubuka ulula ati, telebnye ulule,” nyabuka an ti kipkicop ura, ara fia weik telebe. Aning atouk, yuk ninye nirya arye, an ti, ‘Elda teleb ululnye’ tenen, an ti erepkicop ura, ara fia telebe. Urasin teleb ap, dekna weik ap ulul ning el si ara emas ap, perak ap aupmatua babye, ara mitik teleb uka. Weik teleb ning ara, yuk nang arye, an ti kisal donyake.

<sup>2</sup>Bona talina weik kili sal ap, bon-bona ning nirya kum talikirye, talye bona utotoa talina kum ninye ap ara, sik bitinye ara atonun uka. Deiyok ara, sik Ni Koproba Allah Yahweh aniryuk sik bitinye ara, kwepdeibuke.

<sup>3</sup>Fia moubuka tenena kanye teleb tenelinye bira, malye un ning el binmalyak aupmalebuk, moubuka eiplirye kel biklyop ura, adib aryuk leilolule. ‘Amalye un ning dam kum unamne’ tenen, memebuka yukak balule. Bukni, walwal ninye ara, moubuka kum tenebikirye, ‘Abisik ara talye parapkabuka banamane’ tenen, balamak kili sal ara, fia weik ikin ning dolonyake.

<sup>4</sup>Allah Yahweh atibuk, ‘Elda fia weik mambule’ tenen, Allah ati ilil ululba, kanye talima darabuka, Allah ap, yuk kili sal ap, kanye lamapdongobuka arye, sik amutam ululnye bira, fia kanye weik deipnamle. Aminyan talak ara, Allah arye meliliba, kam una deiyok ning ap, dengna ning ap arenamle. Tonda, yuk ninye arye, sik teleb wininyak nang ati, ‘Sikda teleb kibuka unyake’ nyabuka, sik ti kanye delinamake.

<sup>5</sup>Wena wiamica fum bisik mangkau arye weklirye youlamla atonun ap, tonda yo tingkul deice yan yanibikiba, olamla atonun ap ara, sik malye winin ning talibuka malye uk winipribanyak ninye ara, aminyan talak, fia ikin ning uk talibuka unamake. Bukni, yatanye do nirya, ‘Na malye upnyeba, na talima ap, tenen ning ap, dib kanye ap malye winipdeipdanyak’ tenen, fia moubuka kalikilalulnye bira, amalye winin

ning nirya dam kum balule. ‘Malye ning arye na talima ap, na dib kanye ap ati, liproprniliba, malye kipdeipnilyak’ tenen, yuk teleb un bisik uk balule.

<sup>6</sup>Anggun mapu nirya ati ara, ‘Teleb un ning uk talibikirye, teleb bisik uk banamak’ tenen, moubuka peterenamleme. Winipmunce, sik mapu nirya ati wenebuka, teleb kibuka peteremunce, anggun mapu teleb un bisik uk banamake. Sik mitik mapu unyak talak noutamak, teleb kibuka peterepmunyop ura, aminyan talak anggun mapu akunum nebicop ura, diksukum un bisik kum batakanamake. Sik mangkau arye tia talak ati, yuk malye bisik badekiba, malye winipmakca babye, aminyan talak ila tuba tonap, moubuka tenebikirye, malye winin ning batakikcop ura, tamubuka teleb un bisik uk yanamake.

<sup>7</sup>Sik bona utotoa talin nang arye, bona utotoa talina kum ninye ati talinyakce, sik nong deice ikin ning delinyake. Tonda ninye talinyak ning ati, ‘Aminyan tamubuka punupnamkin’ tenen, tia doproprnamne ati, ‘Bon doproprnun,’ tenebuka morolulnye bira, el ti arilul deiyoknye birye, el deice tam unamle. Ninye arye sik patan ning ati, “Se, ance aning tia talak ati aripniminyop ura, aminyan talak tamubuka aripnamkine,” nyabuka morobikceba, aning talina deiyoknye birye, sik morobice ning bokuka arilulnye birye, sik morona ninye deice tam ulirye, “Wininamlulume, wininamlulume,” nyabuka unamle. Sikda, el amutam uk unyakce, talye fil melina ninye atonun unamake. Bokuka arina deiyoknye birye, sik ninye deiyoknye atonun unamle. ‘Abon ning tia doproprnamne ati, aminyan punupnamkine,’ tenebuka morolulnye, el amutam unamle.

<sup>8</sup>Winipmanto ara, ninye arye malye yala ning uk koululnye bira, nong lin talak nirya ara malye ning uk kinamle. Aning atonun, yata nang do nirya, sik malye winin ning uk talibuka upra balamica ani, aminyan talak ara, ikin ning weik sik nong deice yanamle. Tia talak ati, amalye unyak ninye arye, yuk kili sal ati, yu kanye bobuka, sik nong deice ikin ning weik delinamak bukni, aminyan talak ara, Allah arye amalye unyak kili sal wenebuka oploprnamle. Winipnamle talak ara, aninye nirya kum daneipnamle.

<sup>9</sup>Ninye ton, el kanye teleb asa arye ulamlinye birye, sik talye bona talina kum ninye ati, bico teneplirye, el talilul din ning noutam arye bokuka, bona talina kum kili sal ati areplirye, teleb kibuka melilula ati ara, Allah Yahweh arye el dam yalirye fia melinamle. Ateleb kanye bonanye birye, bona talina kum ninye ati melilul touk, Allah arye anye biti weika arye melinamle.

<sup>10</sup>Ninye ton malye winin ning uk tenebuka winibikirye, yuk ninye ati, ‘Nun like,’ tenena ati, malye yupu ap, yep-yep an yupu ap, minilan yupu ap nyanyakce, yuk kili sal sik nong deice delinyak kili sal wenepmunce, ‘Anggunda nun neika una kume. Yukak bindoplulume,’ nyapmunba,

anggun kan-kan arye akunum yukak bindobikcop ura, anggun tuba aunamlum kili sal nirya ara, kanye teleb bobuka, teleb uk unamlume.

Malye una ap, malye yupu nyana ap, unyak kili sal batakmumce, yukak yakuka dopkwetepmunyop ura, anggun yuk ninye nirya ara, kanye deibuka unamlume. Ninye olana ap, yupu deice arye walana ap, kum upliba, teleb uk unamlume. Bukni, sik malye unyak kili sal ap ansinibuka tuba umunyop ura, ikin ning uk anggun deice unamsile.

<sup>11</sup>Ninye ton el kanye diksukum ulirye, teleb un ning uk patalibuk, kanye delilulnye bira, elda amutuku fia ninye deiyoknye Raja el kwit koproba unamle. Aning atouk, amutuku ninye deiyoknye ateleb yupu uk nyalulnye biti, kanye deiplirye, ‘E, anye bira teleb yupu uk nyalulnye bira, na kwit koproba unamle,’ tenenamle. Amutuku talina fia ninye deiyoknye Raja birye, ateleb yupu nyalinye biti, kanye deibuka unamle.

<sup>12</sup>Yata kili sal do nirya, sikce kel weik bikna yupu uk nyanyak kili sal ati, akili sal ap, sikce nyanyak yupu ap ati, Allah Yahweh arye, ‘Aninye melinamne’ tenen, fia moubuka dilirye, kalikilule. Bukni, ninye ton talye minina yupu ap, tilila yupu ap uk nyapra balulnye biti ara, Allah arye anye biti, ‘El tenelye ning ap, el wininamle ning ap ati, kum danamle’ tenen, anye deice ikin ning delilula deice arye, kum danalule.

<sup>13</sup>Fil aning-aning nirya dona ati, ‘Na like, urdem uk unamne,’ tenebuka ululnye bira, aik fum uk ulirye, talye nyalul yupu ara ani. Dipkoprop kum upmalibuk, ‘Fil kum donamne’ tenen, talye yupu nyalul ning ara, “Se, bai binyop ura, bai mutuku tam fia yu weik ulul kuse atonun ning, el si ara singa kus arye, bai tam tikmalya arye bai tam banibuk, bisik noutam arye opnamnile,” nyabuka talye yupu uk nyalule. Aning atouk, “Se, ninye asik weik dolamikce, noutam bisik binyop ura, malye nang arye, yu upliba opnikcak,” abuka, talye yupu uk nyalule.

<sup>14</sup>Tonda, talye-talye yolamak kilapu arye nyanyak yupu, sik walwal nang arye kekebicop ura, olilanyake. Winipmanto ara, ninye arye tuku fum tam lukuka, batakamikiba, yuk nang talye mangkau kanye bobuka balirye, afum bisik sakuka olamla atonun, sik talye yolalamak kilapu arye nyabikce yupu kekenyak nang ati ara, Allah Yahweh arye amalye unyak nang ati, el yu sik nong deice deiplirye, wenebuka oplopnamle. Allah arye wenebuka oplopnamle nang uk, talye yoltanyak kilapu arye nyanyak yupu kekenyake.

<sup>15</sup>Aning atouk, sik mitik mapu arye, ‘Kume nunda malye un ning atibuk winiptibye,’ tenebuka unyak ning ara, sik talima fum tam palibuka ulule. Bukni, sik ni yapu ap, sik nin yapu ap arye, ‘Kume, nun mapu sik malye ulamak ning batakikirye, teleb asa arye unamak’ tenen, kama deice arye debuka wenepmunce, lipsisikuka peterepmunyop ura, amapu, sik malye winilamikce ning batakuka tamubikirye, ila tamubuka teleb winin ning uk talibuka unamake.

<sup>16</sup>Yata nang do nirya, ‘Bon-bona weik talibuka unyak ninye ati, teleb ning aribibya deice arye, kanye deipsikirye, aminyan talak melibuka teleb kinamsiak’ tenen, arinyak kili sal ara, aminyan talak bona utotoa weik talin nang kum unamak bukni, talye bona talina kum ninye uk upre banamake. Aning atouk, dan kili sal do nirya, talye bona talina kum ninye ati, ‘Aninye ara nun like’ tenen, malye kinyak kili sal ara, Allah arye wenepriba, aminyan talak sik talinyak ning nirya kum upriba, sik babye talye bona talina kum ninye uk ubikirye, ikin asa uk unamake. Bona talina weik ninye ati, arinyak ninye ap, tonda, bona talina kum kili sal ati, ikin ning sik nong deice delinyak kili sal ap ara, sik bidamnye atibuk ititilinyake.

**“Kel fia weik bikamik nang arye nyanyake,” nyabuk yupu**

<sup>17</sup>Na nyapnusin yupu, moubuka amul kukeipmunce, kekenamlulume. Sik kel weik bikamik nang arye nyanyak yupu, fia moubuka kekenamlulume. Tonda, na arye lipsisikuka peteresinye yupu nirya ara, moubuka kekepmunce, ‘Nun babye aning uk talibuka unamap’ tenen, fia pi dobuka pirinamlulume. Diksukum teleb kibuka una ati, peteresunun yupu moubuka kekepmunce, ayupu uk talibuka unamlulume.

<sup>18</sup>Aning winipmunyop ura, na nyasinye yupu nirya moubuka talima fum tam deipmunce, kanye deibuka unamlulume. Aning atouk, na arye peteresinye yupu nirya ara, akunum kel kipmunce, ninye ulamak touk urasin dipdemunce, teleb yupu uk nyanamlulume. Ati na arye peteresinye yupu moubuka kel bikmunce, anggun si bam bol deice arye kintinipdeibuka umunce, yuk kili sal ati tamubuka peterenamlulume.

<sup>19</sup>Anggunce winipmunyop ura, Allah Yahweh arye dib tenen ning anggun deice deipnamsile. Na arye anggun ti peteresinya deiyok ara, ani. Ara, na peteresinye yupu moubuka kekepmunce kel bikribamunyop ura, nun Ni Koproba Allah Yahweh ati, mikip arye diba tenebuka unamlume. Adeiyok ati peteresunune.

<sup>20</sup>Diksukum una ati, weik kel bikna deiyok yupu, 30 ning ara, minop talak arye dipdongobuka winitalak noutamak, na arye sekuka anggun dam kum deiyamsise do? Ara, anggun ikin unamsil talak ap, anggunce, ‘Yata wininamap do?’ tenen, kanye teniltona unamlum talak ap, anggunce, ‘E, nun wininamap ning ati, teleb ning ara ani, malye ning ara ani’ tenen, moubuka tenepmunce, ‘Teleb uk wininamak’ tenen, peterelamsise.

<sup>21</sup>Aning atonun, na arye anggun ti peterelamsise deiyok ton ani. Ara, ninye deiyok nang arye, ‘Fil donamak’ tenen, anggun dobuka dolkwetenamsiak talak ara, na arye peterelamsise ninye nirya, ‘Teleb yupu nyanamak’ tenen, peterelamsise. Tonda, ninye deiyok nang arye, anggun ti, “Yata deiyok ning ati, afil donmalum do?” nyabuka asipdenamsiak

talak ara, anggunce moubuka tenepmunce, adeiyok nang ati tamubuka, teleb kibuka laka nyapnamlulume. Ara, ‘Na arye peterelamsise ninye nirya, teleb yupu uk nyanamak’ tenen, peterelamsise.

<sup>22</sup>Tonda, sik mitang kibuka unyak ninye, aning-aning nirya kum talinyakce, talye urdem uk unyak ninye ati ara, anggun nirya arye, aninye ati, ikin ning sik nong deice fia kum delinamlulume. Winipmunyop ura, ara fia malye unamluma ati nyapsine. Tonda, anggunce, ‘Kume, aninye ara, talye bona utotoa talina kum kili sal ati ara, sik mikip kum ninye ati, sik talinyak ning ati, talye alabuka doproptibe,’ fia kum tenenamlulume. Aning atonun, ninye yupu lipsisikuka bokolina ati, yupu lipsisikuka bokolina deiyok nang dam bimunyop ura, sik mitang unyakce, talye bona utotoa talina kum ninye ati, yaniptapmunce, ikin ning bobuka sik nong deice kum delinamlulume. Aning nirya ara, fia malye una ati nyapsine.

<sup>23</sup>Ayupu ara, talye ati kum nyapsine. Deiyok ara ani. Anggunce, urdem bona utotoa talina kum ninye ati, ikin ning bobuka sik nong deice deipmumnyopda, Allah Yahweh arye, anggun malye winipmalum nang ati, wenepsiliryne, anggun talilulum ning nirya dopropliba, kum danamsile. Allah Yahweh arye, sik talye kankan ninye ati bico tenepliryne, sik ikin ulul ning nirya moubuka elilulce, kalikuka melilule.

<sup>24</sup>Tonda, ninye tonok ining arye mikip upliba, yu welepliryne minopce ninye derepmantonye ap neika ansinibuka una meme. Ara, ‘Anang ap neika ulamipyani, sik malye ulamak touk, aminyan talak nun babye, winibiyak’ tenen, anang ap neika fia kum unamlume. <sup>25</sup>Anyapmasin touk minopce yu upliba, yuk ninye ati derena uk ululnye ap neika ansinibuka umunyop ura, yuk talak anggun babye, el ululnye atonun upnamlume. Winipmunyop ura, anggun bidamang aryuk, wena fum bisik dongobuka youlilalume.

<sup>26</sup>Tonda, anggunce yuk nang melina ati, kum nyanamlum yupu ara ani. Ara, ‘Kume anggunce yuk nang talinyak ning, tia talak ati dopropmunce awamliba, yuk talak sikce aning ila tamubuka kum arepmanto upsilyop ura, na aryuk punupnamsine,’ nyabuka, nyalin yupu fia kum nyanamlulume. Tonda aning atonun, yuk nang arye tia talak ati dopronamak ning pununa ati ara, ‘Kume, na kwit capu nang arye, tamubuka kum arepmanto ubicop ura, na aryuk tamubuka aripnamsine,’ nyabuka, nyaltakna yupu fia kum nyanamlume.

<sup>27</sup>Ara, talye ati kum nyapsine. Deiyok ara ani. “Anggunce, Nun cuk aminyan talak punupnamsiabe,” nyaplopmunye touk punubuka kum arepmanto upsilyop ura, yata winipnamlum do? Sik yuk nang arye tia dopromik ning tuba tamubuka kum arepmanto upsilyop ura, aning pununa ati, aminyan talak anggun talilulum ning nirya, doprobikirye, anggun umunce malulum aik noutamak babye, anggun amsuna ap,



anggun manak delilulum ning ap, talye lukparabuka doproprnamsiaka ati nyapsine. Ati ara, “Na arye tamubuka aripnirye, punupnamsine,” nyabuka nyalin yupu fia kum nyanamlume.

<sup>28</sup>Aning atonun, minop talak noutamak arye anggun apu yapu arye, ‘E, anye el talilul tuku ani. Yuknye bira, el talinamle tuku ani,’ tenena ati delilamik bikilina ati, delilamik keil ara, anggunce, ‘Atuku nun cuk doproprnamap’ tenen, sikce deiamik keil dobuka yukak fia kum delinamlume. Ara, ‘Yuk ninye arye talilamik tuku ara, bikilina ati deililamik keil dobuka, yukak deipnyop ura, na arye uk atuku talinamne’ tenen, ubula dolona ara fia meme, nyapsine.

<sup>29</sup>Anggun ton elilulum do? Ninye ton el fil aning-aning nirya fia teleb kibuka fil dolulnye eipmunyop ura, moubuka dinamlulume. Anye bira, aminyan talak, weik ninye deiyok nang, sik Raja nang melilna ati, weik mambul fil dobuka unamle. El fil ara, fia teleb kibuka fil dolula anya arye, talye daunyak ninye ati, sik amutam ulirye, sik ti fil kum donamle. Aning kum bukni, sik weik ninye deiyok Raja nang ati, sik aik fil talibuka donamle.

**23** <sup>1</sup>Anda weiknye ap neika bukmince, dina dinamlum talak nirya ara, elce kintinibuka deipnamkil din ning nirya ati, fia moubuka tenepnamlyame. Tonda el ti, ‘Yatato weik deiyoknye ulul do? Diksukum ululnye do, talye yupu nyalulnye ulul do?’ tenen moubuka tenenamlyame. <sup>2</sup>Anggunce, ‘Se, elce kintinibuka deipmasil dina ning ara, fia teleb anya arye, weik arye dinamabe,’ tenepmunyop ura, topnong kapu dobuka, sik ngang damak deililamak atonun winipnamlulume. Ara, ‘Elce arenmasilye ning deice arye, inipropsiliba, aning dibipyre ura, kanye deibuka elce nyasilye yupu moubuka kekebibiryre, adib aryuk malye ubipyak’ tenen, ‘Nun bidamang ngang sekdanamap do?’ tenenammlulume. Moubuka tenipmunce, moubuka unamlume. ‘Anye birye arepmasilye ning dibibiryre, talye lukparabuka malye ubipyak’ tenen, moubuka tenenammlume.

<sup>3</sup>Aweik deiyoknye birye, fia telebto ning aripsilyop ura, dipmunce to leplib, kanye deipnamlum bukni, anye birye tenepce, malye yupu nyapsiliba, ‘Talye elce el tilila yupu nyapliba, mangkau arye kekepmunce, malye upmunyak’ tenen nyapsine. Ati, nimi deiyoknye birye, fia teleb ning kintinibuka deipsiliryre, ‘Telebe, anggun nirya talye dilyalulume,’ nyapsilyop ura, fia kanye moubuka teninamlulume. Ara, to weik arye min-min lelamle ning atibuk, fia kum tenenammlulume. Aning winibuka tenepmunya deice arye, din ning delin yo deice deililbimunnyop ura, tilila ning uka. ‘Nimnye deiyoknye birye fia teleb ning arepmasila ara, yata deiyok ati arepmasil do?’ tenen, moubuka tenenammlulume.

<sup>4</sup>Aning atonun, anggunce, ‘Se, bona weik talin ninye unamap’ tenen, mambul kanye bobuka mikip arye fil kum donamlulume. ‘Aning-aning

nirya dopnirye, sisinanye weik unamap' tenen, fil weik arye dopnin balamunya ani, aminyan talak ara, mikip fia kum unamsile. Kanye imun ning ap, bona weik talin un ning ap, atibuk tenena kume. Weik kel nang arye, aning uk tenebuka kum umyak atonun, teleb ubuka unamlume. 'Se, nunda bona weik talin ninye utibye' tenena kumce, atenena ning nirya ara, batakmunce teleb uk unamlume.

<sup>5</sup>Yo bok ap, bona ning ap nirya ara, asing elimunce umunye ning nirya ara, tuba elinmamunye talak noutamak aryuk, kum upnamlarya. Winipmanto ara, bip maka eipmunba, adib aryuk minopce im noutamak lakuka balamle atonun, bona weik talin ning babye, minopce kum danin banamle. Winipmanto ara, bip maka pol laklirye, talye karin arye lakuka balule. Winilamle atonun aning nirya ara, fia kum upnamlarya.

<sup>6</sup>Tonda, sik talinyak ning nirya ati, 'Kume aning nirya ara, na tenen ning uk ulule. Yuk nang ton fia kum arenamne,' tenenyak ninye ap neika bukmunce, el ap din ning dina kume. Atonye birye kintinibuka deiplye din ning ati, 'Se, aning ara telebe' tenen, dina kume. <sup>7</sup>Aning ara talye ati kum nyapsine. Aning atonun ululnye birye, sik ti, "Telebe, tamubuka yamunce, adina ning dobuka tonap tabakuka denamlume," nyapnamasil bukni, ara tilila yupu arye nyapnamsile. Ara, el nimalye arye teleb yupu nyanamle ning ara, teleb ulul bukni, dipkoprop el kanye talima noutamak tenelul ning ara yuke. Ati atonye ap, bukuka neika kum denamlume. <sup>8</sup>Aning nyapsiliba, anggunce dobuka dipnamlum ning nirya ara, tamubuka duklopnamlulume. Tonda, anggunce el ti fia teleb yupu sisikdanamlum ning nirya ara, aminyan talak nong ton kum upnamle.

<sup>9</sup>Tonda, ayupu nyapsine. Sik malye ulamice ninye arye, 'Aning winipnyop ura, aminyan talak ara yata wiripnamnil do?' tenena kumce, talye walwal arye talye lukparabuka unyak ninye ara, sik kekena ak fia weik kel yupu nyana kume. Deiyok ara, anggunce nyanamlum yupu nirya ara, weik teleb kel bikna yupu ulul bukni, sik walwal aryuk unyak ninye ayupu kekebikirye, anggun ti, 'Se, sikce kel yupu nyanmaka ara, nun like,' tenena uk unamake. Ati walwal aryuk unyak ninye kekena ak, weik kel yupu nyana ara kume. Sikda anyuk fia moubuka kum kekenamake.

<sup>10</sup>Anggunda minop talak arye, 'Aninye sik teleb tuku ani, yuk ninye sik wa wiliba tuku ara ani' tenen, keil dobuka, tuku ati wilibuka ikdongamik keil ara, dobuka yuk tam donokna fia meme. Tonda sik kwangnamne mapu ati arelamik tuku noutamak binuka wa wena kume. 'Amapu ara, mikip kum mapu anya arye, sik tuku ubula doproptibye' tenena fia meme. 'Sik kwaknan mapu, atuku noutamak wa wibikirye, kounamak' tenen, kintinibuka deiamik mutuku noutamak ara, anggun wekna fia kume.

<sup>11</sup>Aning ara, talye ati kum nyapsine. Luba kildongona kume. Mikip fia kum ninye ap, kwaknan mapu ap ati, melibuka kalikilulnya bira, el

mikip fia weiknye ulule. Ara, sik Ni Koproprop Allah, elcuk sik mikip fia kum ninye ati, melibuka kalikilule. Ara, elce, sik aninye ati lyelolule. Anggunce amikip kum ninye ati, malye upmunyop ura, aminyan talak Allah elcuk, anggun ti yupu lipsisikuka bokeipsilirye, wenenamsile.

<sup>12</sup>Ati sik weik kel peterena deiyok nang arye peteresinyak yupu nirya ara, 'Ayupu nirya moubuka kekebibirye, talinamap' tenena uk unamlume. Ton ning ara, sik peteren deiyok nang arye peterenamsiyak yupu, weik kel yupu deice arye nyanyak talak ara, anggun amol deice arye apeterenyak yupu nirya moubuka kekepmunce, kel kinamlulume. Talye amol deice aryuk, kekeltakana kume.

<sup>13</sup>Tonda anggun ni yapu arye, anggun mapu nirya ati, peterenamlum talak ara, 'Se, malye ubikiba, wenebipyop ura, sikce malye kanye bopsicak' tenen, ilil asa deice arye peterena fia kume. Ara, anggun ni yapu arye, sik bidamang mapu ati, mitik yo kama arye wenebuka kulapmunya babye, sik amapu ara kum dipnamake. Wenepmunya deice arye kel kipnamake.

<sup>14</sup>Mitik yo kama deice arye, sik mapu kulapmunce, wenepmunyop ura, kel kipnamake. Bukni, anggunce sik mapu ati, kam unamak talak noutamak nirya ara, 'Malye kanye bopsikirye, nun ni yapu ara, nun like, tenepsicak' tenen, kum wenepmunyop ura, malye-malye uk upnin banamake. Malye uk ubicop ura, aminyan talak ninye dibinyak ninye wenena ati, wekelbanyak mutuku noutamak binamake. Ati, 'Aminyan talak ara, amalye mutuku noutamak bicak' tenen, sik mapu ap neika unamlum talak noutamak nirya ara, malye ubicop ura, amapu ati, teleb ubuka wenebuka peterenamllume.

<sup>15</sup>Aning ati ara, dipkoprop yupu nyapsine. Se, na mapu koprop, anggun kanye talima noutamak ara, weik kel deice, teleb ning uk tenebuka umunyop ura, na arye anggun ti kanye fia delinamsine. Ara, anggun fia teleb kanye uk bobuka, weik kel deice uk umunye ura, na talima noutamak nirya arye anggun ti, 'Telebe,' tenenamsine. <sup>16</sup>Aning atonun, anggun si bam bol deice weik kel arye, fia teleb yupu nyalamunba, kekepnypop ura, na arye anggun ti fia kanye delinamsine. Anggunce diksukum yupu uk nyapmunye ura, na arye fia kanye delinamsine.

<sup>17</sup>Tonda, anggunce yuk ning fia malye-malye unyak ninye ati, 'Se, sik aninye wininyak ning ap, sikce talinyak ning nirya ara, na ton taliptinirye, sik wininyak atonun winiptinye,' tenena fia meme. Aning ara kum wininamlum bukni, anggun na mapu nirya arye, nun ni Allah Yahweh ati, 'Elda weik telebnye ulule' tenen, el tibuk ilil tenebuka umunce, el si uk fia erenamllume.

<sup>18</sup>Aning winibuka ulamunyop ura, Allah arye melisilyeba, aminyan upnamsil ning nirya ara, fia teleb uk unamle. Tonda, anggunce, 'Dipkoprop nun ni Allah arye melipsilirye, teleb kibuka delinamsil'

tenen, el tibuk talibuka unamlum nirya ara, dipkoprop nong upname. Anggunce, 'Aminyan talak teleb ulinamsile,' tenelulum ning nirya ara, fia kum wangalsikninamle. Dipkoprop nong upnamlarya.

<sup>19</sup>Se, na yapu anggun nirya kekepnululume. Anggun kam unamlum talak nirya ara, 'Nun unamap ning ara, winibuka weik kel bikna deice aryuk unamabe' tenen, unamlume. Tonda, 'Mankau kanye arye, malye ubipyak' tenen, anggun unamlum ning nirya ati ara, dipkoprop moubuka tenepmunce, malye ning nirya batakuka, teleb winin ning uk talibuka unamlume. <sup>20</sup>Tonda na mapu, anggun nirya arye, yu mek kanye wangalamak mek, weik arye dinyak ninye ap, neika dukgongobuka una fia meme. Aning atonun, 'Tup ning ap, yuk teleb din ning ayala-yala nirya, fia weik arye diptinye,' tenenyak ninye ap, neika dukdongobuka kum unamlulume.

<sup>21</sup>Ayupu ara, talye ati kum nyapkine. Deiyok ara, kanye wangalamak mek weik arye dinyak nang ap, teleb din ning uk pataliba, 'Weika arye diptinye,' tenenyak nang ap nirya ara, dipkoprop sik anang ara, yuk aminyan talak noutamak nang uk unamake. Aning atonun, ninye ton wimana atibuk patalul nang ara, fil kum donyaka anya arye, aminyan talak, bona utotoa talina kum nang uk ukiryne, sik minop talak talyamice ning nirya kum upnin balyop ura, sik butum aling nirya ara, pun ning uk ongopra unamake. Deiyok ara, sik anang ara, 'Fil dona ara, nun like,' tenenyak nang unyaka atia.

<sup>22</sup>Tonada, na mapu, anggun nirya ara, anggun ni yapu koproba, anggun deipsik nang sikce anggun ti, 'Aning wininamlulume, aning ara kum wininamlulume,' nyalisinyak yupu nirya ara, fia moubuka kekenamlulume. Anggun deipsik nang arye nyalisinyak yupu nirya, moubuka kekenamlulume. Aning atonun, anggun nin yapu koprop, anggun deipsik kilapu akunum wisi dalyop ura, elce nyaplye yupu moubuka kekepmunce, el amutam nimalye awinibuka unamlulume. Anggunce anggun nin yapu ati, 'Sikda fia teleb kilapu,' tenebuka kinamlume. Deiyok ara, anggun nin yapu kumop ura, anggun kum ulamtuma ati nyapsine.

<sup>23</sup>Winipmanto ara, ninye arye weik dekna weik ning dekipop ura, 'Aning ara fia talinamne' tenen, batakana kumce, fia moubuka talilamak touk, anggunce dipkoprop yupu ap, weik kel kina yupu ap, peterena teleb yupu ap, diksukum una deiyok ning ap, 'Aning ara, weik ilile' tenen, fia pi dobuka dolonamlume. Dopropmunce, kel bikmunyop ura, aminyan winipnin banamlum talak noutamak nirya ara, aning nirya ara, fia kum batakanamlulume.

<sup>24</sup>Tonoknye birye, el mi deiyamli bukni, yuk talak ami neplirye teleb ning uk taliplirye weik kelnye unamle. Tonda, anye bira, nun Ni Koprop Allah Yahweh arye, 'Aning ara wininamlume, aning ara fia

kum wininamlume,' nyabuka deiamsuk touk, aning uk talibuka upyop ura, el li koprop ami eiplirye, dipkoprop fia kanye delinamlume. Sik mapu arye weik kel bikna deiyok ning doprobikirye, fia teleb uk ucop ura, sik ni yapu arye amapu ati, fia kanye deibuka unamake. <sup>25</sup> Anggun nirya ara, malye kum unamlume. Teleb ubuka diksukumuk upmunyop ura, anggun ni yapu ap, anggun nin yapu koprop ap arye anggun ti, kanye deilinamsiyake. Ara, teleb anya arye, aning uk unamlume.

<sup>26</sup> Se, na mapu nirya ara, anggun kanye talima ap, anggun tenen ning nirya ara, anggun Ni Koprop Allah el deice uk delinamlume. Allah arye, 'Aning ara wininamlulume, aning ara kum wininamlulume,' nyapdeiyamsuk yupu nirya ara, aning uk eibuka, fia moubuka kel kipmuncce, 'Allah arye nyapdeiamsuk touk, abisik uk binamap' tenen, Allah el yupu uk moubuka talinamlulume. <sup>27</sup> Aning ara talye ati kum nyapsine. Winipmanto ara, ninye arye, 'Na sakuka opmanto kikin bisik ara ani,' tenena kumce, talye lukparabuka banmakirye, afum bisik sakikirya, min kutukuka binmanto kum ulamak touk, ninye arye talye-talye yoltakalamak kilapu dobuka yolkiriklamlanye bira, el bidamnye arye el bidamang atibuk malye kililalule. Atonye bira, kum lypedanmantonye ulule. Elda, ikin ning weik dolonamlume.

<sup>28</sup> 'Ninye arye yo bok aripsitingce, talye yopsitinge' tenen, pataliba tenenyak kilapu ara, ubula dolamak nang atonun unyake. Ubula dona nang dungnupmakirye, yuk nang mangkau kanye bobuka bakibukni, 'Anang oplobuka, sik ning ubula dalubuka doproprnuyabe,' tenelamak touk, sik talye yoltakanyak kilapu arye, ninye eibikirye, aninye ati atonun tenebuka unyake. Akilapu ara sal arye kum tenepmakibuk ubula dolonyaka ati nyapne. Atalye yoltakalamak kilapu arye wininyaka ati ara, ninye weik arye kanye imun ning dolonamake. Akilapu ap neika unyak nang ara, ikin fia weik unamake.

<sup>29</sup> Kanye wangalamak mek weik arye dinyak ninye ara, teleb kum unyake. Amek weik arye dibikcop ura, aminyan talak ikin ning weik, sik damak yalyop ura, fia mambul kanye bobuka engenyake. Aning atonun, anang ap, yuk nang ap, yupu deice weik arye oldana uk unyake. Tonda, atalak-atalak noutamak nirya ara, sikce, 'Se, nun ikin usulule,' nyabuka, malye nyabuka engena uk unyake. Tonda, deiyok ton kum upmale bukni, kanye wangalamak ninye arye, yuk ninye ap oldanmacop ura, dila weik upliba, sik ining balule. Sik kanye wangalamak mek weik arye akunum dibikcop ura, sik asing bi doklirye miripliba, el nong nirya uk dilule.

<sup>30</sup> Anyapmasin touk, aikin ning sik damak yangalamle ninye ara, talye daunyak ninye kume. Asing bi doklamle ning ap, yupu deice arye nyalakirye, oldanyak. Amalye kanye dobuka malye nyalamake ninye ap, deiyok ton kum upmalibuk, obikiba dila weik ulamle ninye ap ara, talye daunyak ninye kume. Aikin ning sik damak yangalamle ninye ara, kanye wangalamak mek weik arye dinyak nang atia.

<sup>31</sup>Kanye wangalamak mek weik arye dinyak ninye ara, ikin ning weik dolonyakce, mambul kanye bobuka unyaka anya arye, anggun na mapu ara, akanye wangalamak anggur mek, eipmunce, el urasin fia teleb uplya babye, aning weik arye dina meme. Amek urasin teleb upliba, dipmunnye talak, to lepsutua babye, ‘Amek dobuka dinamabe’ tenena kume.

<sup>32</sup>Anggunce kanye wangalamak yu mek dimunye talak ara, ‘Kume amek ara, to weik nun kanye deibabe,’ tenemunce, ‘E, ayu kum dipnamap ning ara, teleb uk,’ tenenamle bukni, aning weik arye dimunyop ura, dipkoprop aminyan talak ikin weik unamlume. Winipmanto ara, ninye on kwatima arye si topsiliba, aminyan talak kanye imun ning ulamsil touk, kanye wangalamak mek weik arye dimunyop ura, aminyan talak ikin ning weik anggun damak yanganamlarya.

<sup>33</sup>Ara, talye ati kum nyapsine. Kanye wangalamak mek weik arye dimunyop ura, anggun kanye wangapsilye ura, kum winipmanto ning anggun asing arye elinamlume. Aning atonun, anggun kanye noutamak arye, kum winipmanto ning tenemunce, kanye moubuka tenena kumce, talye-talye yupu weik arye nyanamlume.

<sup>34</sup>Winipmanto ara, mekwen deice balamle kapal deice, ‘Mapnamap’ tenen, mapdeca babye, mek kuruninikna mikip arye donmalya ani, bupu piriplierye, uk weik dibuka, dukna duklamake. Aning atonun, sik kanye wangalamak yu mek fia weik arye dinyak ninye ara, sik mun uk diliba dukunyake. Winilamle touk, mekwen deice balamle kapal, ‘Kum mikip arye bobinamsil’ tenen, dana-dana ikuka, domikce cang yo konak, ninye arye welebuka bukamakibuk, weik kumanya mikip doplierye, butum aling lapkwetamice ning arye, litukunmaliba, el mun uk diliba, dukna fia weik arye dukunamle. Aning atonun, sik ninye kanye wangalamak yu mek fia weik arye dimunyop ura, mun uk disilyebuk, dukna dukunamlume.

<sup>35</sup>Kanye wangalamak yu mek weik arye dipmamunba, anggun kanye wangapmunye talak ara, ninye arye opsica babye, ‘Na uk ton adinmanile,’ kum tenenamlume. Aning atonun, ninye arye yu upliba, weik arye opsiceba, dila upmasilya babye, ‘Anang arye opmaniyake,’ kum tenenamlume. ‘Awinipmaniyak ning ara, aning arye winipmaniyake,’ kum tenenamlume. ‘Awininmanungu talak, na ara wi talimanua anya arye, tuba tamubuka tonap kanye wangalamak mek dipnamne,’ tenenamlume. Anggunda aning nirya moubuka tenena kum, walwal deice arye, ayupu nirya ara nyanamlume. Ati kanye wangalamak mek, weik arye dina meme nyapsine.

**24** <sup>1</sup>Tonda malye ulamlanye biti, ‘Se, el winilul ning ap, elce talilye ning ap ati, na babye talibuka uptinye’ tenen, kanye kum delinamlume. Aning atonun, ‘Anye ap neika utinimnye,’ kum tenenamlulume. <sup>2</sup>“Malye ulamice nang ap neika kum unamlulume,” nyapmasina ara, talye ati kume. Deiyok ara ani. Amalye winilamice

nang arye, weik arye malye kanye bobikirye, ‘Malye winin ning uk winibirye, yuk nang ati opnamabe,’ tenenyake. Aning atonun, sik si fum bisik arye fia malye yupu uk nyanamake. Anang sik ap neika umunyop ura, ‘Sik malye ning uk talibuka ulamak touk, na mapu anggun babye atonun malye upmunyak’ tenen, nyapsine. Ati amalye uk wininyak ninye ap neika una kume.

<sup>3</sup>Teleb ubuka diksukumuk unyak ninye arye, sik weik kel bikinyak deice arye, ‘E, dipkoprop, anyaik ara, teleb ubuka doptibye,’ tenebikirye, weik kel bikamica deice arye, moubuka donyake. <sup>4</sup>Tonda, sik weik kel bikamica deice arye, fil teleb ubuka, dopnin balamica ani, aminyan talak, sik aik wilibuka domikce aik nirya ara, teleb ning uk dekipop ura, delinyake. Dengna weik ning ap, kanye delin ning ap, ayala-yala nirya dekipop ura, sik aik fum tam wilibuka domikce aik nirya, delinyake. Malye ning dobuka, sik aik fum tam kum delinyake.

<sup>5</sup>Ninye yuk nang arye, ton nang ati tenenyaka ara, ‘Se, anye bira el nong nirya mikip weik ulula anya arye, elda fia telebnye ulule,’ tenenyake. Utenenyak bukni, na arye anggun ti nyapnusine. Sik weik kel bikamikce nang ara, fia telebe. Weik kel bikna ara mambul weik ati nyapsine. Bukni, nong mikip weik unyak nang ara, mitik teleb uka.

Aning atonun, yin talin nang arye nong mikip kibuka unyak nang babye, ara mitik teleb tenenyap bukni, yin talin nang do, talye nang do, weik arye kel bikamikce nang ara, weik mambule. Weik kel bikna deice arye, yin talibuka unyak nang ara, fia dipkoprop teleb unyake. Bukni, yuk yin talin nang ton, sik nong mikip weik uptu babye, sikce kel kinyak ning, mitikanun uk uplyop ura, sikda weik teleb kume. Deiyok ara, nong mikip una ara, mitik mambul bukni, weik kel bikna ara, weik mambule.

<sup>6</sup>Anyapmasina ara, talye ati kume. Deiyok ara, yin talin nang babye, weik kel bikikirye, moubuka tenenyaka deice aryuk, yuk yu ninye ati olbisinyake. Walwal ubuka unyaka deice arye, kum bisinyake. Tonda, yata un ning do nirya ati, weik kel nang arye, “Teleb ubuka una ara ani. Winibuka, winibuka unamlulume,” nyabikiba, moubuka kekepmunya deice aryuk, teleb ubuka unamlume.

<sup>7</sup>Bukni, sik walwal ninye ati ara, weik kel bikna deiyok ning ara, fia weik arye arelula anya arye, sikce moubuka kum kel biktinge. ‘Deiyok ani’ tenen, moubuka kum tenepmanto ninye unyake. Weik kel nang bulubikirye, yupu talinamak sukum ara, sik walwal nang arye, yupu nyapmanto kum unyake. ‘Teleb ubuka unamap ning ara ani,’ tenebuka kum kel kiamica ati, deiyok nang arye yupu talipmace talak ara, talye tunimabuka bunyake. Sikce, mambul yupu kum nyanamake.

<sup>8</sup>Yatanye do nirya, ‘Tuba-tuba malye uk winiptinye,’ tenebuka ululnye bira, yuk ninye arye, el ti, “Elda tilila yupu nyalulnye. El upnamle ning nirya ara, malye ning uk talibuka unamle,” nyabuka el ti lik upliba, batakalongonyake.

<sup>9</sup>Yata ninye do nirya, ‘Malye ning uk talibuka ulamtibye,’ tenekiryee, malye winin ning uk tenebuka upnin bacop ura, ara fia malye una ati nyapsine. Wininyaka ati ara, Allah arye, ‘Aning ara, malye winin ning uk winina ara, na like,’ tenelule. Aning atonun, yata ninye do nirya, teleb un ning ati, ‘Kume, aning ara na like’ tenen, teleb un ning nirya ati, yep-yep alamak ninye ara, yuk teleb un ning talibuka unyak ninye arye, amalye unyak ninye ati, ‘Kume, sik anang ap, neika fia kum unamabe,’ tenebikirye, aninye ati batakalongonyake.

<sup>10</sup>Yata malye un ning do nirya ati, anggun Ni Koprop Allah ara, dilula anya arye, elce amalye un ning ati wenepnamle. Winipmanto ara, ikin ning weik, sik damak yalyop ura, ‘Se, na ikin unmana anya arye, adib aryuk batakunne,’ tenebikirye, ‘Fia pi deibuka piriipdeniryee, teleb unamne,’ tenebuka una kumce, adib aryuk batakmunyop ura, anggunda dipkoprop mikip kum ninye ululume. Winibuka umunyop ura, ara malye ululume.

<sup>11</sup>Aning atonun, deiyok ton kum upmalibuk, yu nang arye, ‘Ninye ton wenebuka opnuyap’ tenen, tapu koubuka deibikirye, wenenak bobice talak eipmunye bukni, ‘Aninye ati lyeproprnuyap do, kum do?’ tenen, ilil-ilil upmunyop ura, malye ululume. Ara, fia winina meme. Deiyok kum upmalibuk, ‘Anang talye lukparabuka opnuyabe,’ tenebikirye, tapu koubuka bobanamak talak ara, anggunce lyelonamlulume. Mangkau kina kume.

<sup>12</sup>‘Aninye daopnyake’ tenen, mangkau kipmunye ura, anggunce nyalulume. “Aning ara, nun deiyok kume, aninye opnuyak ning ara, moubuka kum kel kepmapa anya arye, yata wiriptibye do, kume. Dauplye,” nyalulume. Winibuka anyuk nyamunye bukni, anggun Ni Koprop Allah arye, ninye kanye talima nirya diliryee, yupu lipsisikuka bokolisulule anya arye, dipkoprop anggun kanye talima noutamak tenelulum ning babye, elce kum kel biktu do? El bidamnye aryuk anggun talima noutamak usilye ning nirya kel kipsiliryee, melibuka kalikisulule anya arye, dipkoprop el kele. Anggun tenelulum ning ap, anggunce winilulum ning ap nirya ara, kum dungnuptume. Allah arye aning nirya dilulnye anya arye, elcuk ninye nirya yuk-yuk winilamice ning ati, tamubuka wenenamsile. Aning ara, luba kina meme.

<sup>13</sup>Na mi anda akunum kel kiamlume. Mong arye mong mek dobuka delinyak ara, to ning ati, kanye deibuka dilulume. Ara, mong el aik dobuka purubikirye, among mekwen teleb ning uk, dobuka dipmunyop ura, kanye deililulume.

<sup>14</sup>Aning atonun, weik kel bikna deiyok ning ton dopropmunyop ura, an kanye talima teleb uk upnamkilaraya. Weik kel bikna deiyok ning ton kekepmunce, aning uk talibuka umunyop ura, aminyan talak anggun unamlume nirya ara, fia teleb uk kipnin banamsile. Anggunce, ‘Se, aning



winiptibye, aning ton winiptibye' tenen, fia patapsilye ning ara, nong upnin banamlarya. Ton kum kum dananamsile. Bukni, weik kel bikna deiyok ning batakmunyop ura, aminyan talak ikin ning uk, anggun damak yanganamlarya.

<sup>15</sup>Anyapmasin malye un ning niryra ara, fia kum wininamlulume. Tonok ning ara, fia malye unyak nang arye, teleb ubuka unyak ninye ati, 'Sik aik wekuka, sik delilamak ning niryra, ubula dalubuka doproptibye,' tenelamak touk, kum wininamlulume. Diksukumuk unyak ninye, unyak mutuku noutamak niryra ara, malye kum wininamlulume. Diksukum unyak ninye ati, malye kilildana fia meme.

<sup>16</sup>Aning ara, talye ati kum nyapsine. Deiyok ara ani. Diksukumuk wininyak ninye ara, yuk nang arye, sik ti malye kipdeibikiba, ikin upmatu babye, aminyan talak, tuba tamubuka tonap, teleb upnamake. Aning atonun, yu nang arye, like tek barye ubuka, sik teleb unyak ninye ati, malye winibicop ura, mambul kanye bobuka ikin upmatu babye, aminyan talak tuba tamubuka dukdongobikirye, teleb uk upnin banamake. Diksukum wininyak ninye ara, teleb wininyak bukni, malye wininanye bira, weik kanye imun ning, el damak yalyop ura, atalak aryuk, malye kanye bobuka batakalule.

<sup>17</sup>Tonda, anggun ti yu tenesinyak nang ara, yuk nang arye, obicop ura, 'E merekuka opmake. Aning ara telebe' tenen, aning ati kanye delina fia meme. Aning atonun, anggun ti yu tenesinyak nang, anang imun kanye bobuka ucop ura, anggunce anang ati, 'E merekuka ikin kanye bobuka unyake,' tenebuka kanye kum delinamlume. <sup>18</sup>Aning ara, talye ati kum nyapsine. Anggun olan nang ikin weik upliba, eipmunce kanye deipmunyop ura, anggun Ni Koprop Allah el si Yahweh arye, eibuka kel kipnamsile. Kel kipsilyop ura, 'Aning ara malye,' teneplirye, anggun oldan nang ati weneplirye, ikin ning sik nong deice deipmalye ning ara, tuba tamubuka dopropliba, anggun oldan nang ara, teleb uk unamake.

<sup>19</sup>Sik fia malye winin ning uk talibuka malye weik unyak ninye ati ara, 'Se, sik anang ati, yata winipnamap do?' tenen, mambul kanye bona kume. Aning atonun, sik malye unyak ninye arye talinyak ning ap, wininyak ning ap ati, 'Se, na babye ateleb ning talibuka uptinye. Winipnirye, sik wininyak touk winiptinye' tenen, patana fia meme.

<sup>20</sup>Ayupu ara, talye ati kum nyapsine. Deiyok ara ani. Sik malye winin ning uk, talibuka unyak ninye ara, aminyan talak fia kum upnin banamake. Sikda fia kam fia kum unamake. Winipmanto ara, winitalak ara, weik weisa lapmalirye, dirina weik upmalye bukni, aminyan talak tangapnin banmalya ani, tangaldolamle tonun, sik malye unyak ninye ara, aminyan talak kum danin banamle.

<sup>21</sup>Se, na mapu, anggun ti weik mambul yupu nyapnusine. Anggunda, anggun Ni Koprop Allah Yahweh ap, anggun mutuku talibuka unyak

weik ninye deiyok nang ap ati, ilil tenebuka umunce, kinamlume. Allah arye nyasilye yupu ap, anggun mutuku noutamak talibuka unyak weik ninye deiyok nang ap arye, nyasikce yupu ati, yanibuka kum batakanamlulume. Allah arye nyasilye yupu ap, weik ninye deiyok nang arye nyasikce yupu ap, moubuka kekenamlulume.

<sup>22</sup> Ayupu ara talye ati kum nyapsine. Allah ap, weik ninye deiyok Raja nang ap ati, sik yupu yaninyak ninye ati ara, minopce wenebikirye, talye karin arye, weik kanye imun ning, sik amalye ninye nong deice deilinyake. Yatanye do nirya, Allah ap, weik ninye deiyok nang ap arye, malye unyak ninye wenena ati, sik damak weik kanye imun pirilen ning yanuka delinamle ning ara, laka nyapsiting do? Kume, Allah ap, weik ninye deiyok nang, Raja nang ap arye, sik yupu yanibicop ura, amalye winin ninye wenena ati, arenamak ikin ning ara, laka kum nyapmantoe. Bukni, weik ikin weik upname. Mitikanun kume.

**Weik kel bikamik nang arye, dukdongobuka  
nyabik yupu tonap tabakuka nyabuk yupu**

<sup>23</sup> Aning atonun, weik kel bikna deiyok ning, akunum moubuka kel bikamik nang arye, nyalamkik yupu ton ani. Ninye yupu lipsisikuka bokolina talak ara, sik malye winipmace nang ati, ‘E, anye bira, malye upmal bukni, na kwit koprop ulula anya arye, kum wenepnamne,’ tenena kume. Aning atonun, ‘E, anye bira, na ka koprop fia kum ululnye anya arye, elce malye upmal ning ati, weik ikin ning deibuka wenepnamne,’ tenena kume.

<sup>24</sup> Yatanye do nirya, sik malye winin ning uk talibuka, malye weik ulamice ninye ati, “Kume, sikce malye kum unyake,” nyalamak nang ati, yuk ninye nirya arye, ayupu bokolina deiyok nang ati, ‘Se, sikda nun like,’ tenenamake. Ayupu bokolina deiyok nang ati, yuk-yuk mutuku ninye nirya arye, “Kume, amalye unyaka deiyok nang ara, nun like. Sikda, fia malye uk unyaka anya arye, anang ap neika kum unamabe,” nyanamake. Anang ati batakanamake.

<sup>25</sup> Bukni yupu bokolina deiyok nang arye, malye ubuka unyak ninye ati, wenebikirye, ikin ning sik nong deice delinyak ninye deiyok nang ati, yuk-yuk mutuku ninye nirya arye, anang ati, teleb yupu nyabikirye, kinamake. Winibuka, ayupu aninye yupu bokolina deiyok nang arye, dipkoprop malye wininyak ninye, sik wenena ati, ikin ning sik nong deice deibikcop ura, Allah arye adeiyok nang ati, teleb kilinamle.

<sup>26</sup> Yatanye do nirya, yuk nang arye asipdekiba, ‘Tenepece arye kum nyaplopnune,’ teneplirye, ‘Dipkoprop ning uk nyapnamne,’ teneplirye tamubuka nyalamlanye bira, fia teleb uk ulule. Anye birye, sik asipdece nang ati, dipkoprop fia teleb ning uk, akunum nyabikirye, sikda teleb uk unyake.

<sup>27</sup>An wa wibuka kum kintinipdeiyamin cuk, minopce an ap, neika ulamunye ninye ati, ‘Sik aik minopce dopnamne,’ tenena meme. Sik wa tuku ap, sik bai tam unamak ning nirya ap, akunum kintinibuka upminyop ura, sik aik dona telebe.

<sup>28</sup>Tonda, anggun ap neika ulamunye ninye ati, deiyok ton kum upmalibuk, ninye yupu lipsisikuka bokolin talak ara, “Sik wininmace ning eipmunya ara, ani-ani,” nyabuka laka kum nyanamlulume. Atonun anggunce ton, anggun kayapu nang kum winipamce ning ati, talye minina yupu fia kum nyanamlulume. Tonda, yata yupu do nirya, anggun si bam bol deice arye, talye yupu fia kum nyanamlulume.

<sup>29</sup>Tonda, “Yuk nang arye, na nong deice ikin ning deipnike. Ati, kwang dakana ati, na arye tamubuka ikin ning dobuka, sik nong deice deipnamne,” nyana kume. Aning atonun, “Yuk ninye nirya arye, na ti winipmaniyak touk, na arye tamubuka sik ti, kwang daknamne,” nyabuka kum unamlulume.

<sup>30</sup>Na wa win damak ap, anggur tapu duk wa winak ap, diprongobuka banmanu talak ara, awa tuku nirya ara, urasin fia malye ubuka anya arye, na arye, ‘Kume awa winak ara, ninye tonok fil dona liknye birye nyabuk. Akumop ura, dipkoprop anggur tapu duk wa wibuknye bira, fia walwalnye birye wibuke,’ tenepse. <sup>31</sup>Ara, talye ati kum tenepse bukni, awa win damak nirya binuka dipdesiba, awa win dam noutamak ara, tace ning ap, kamuma ap uk pabuke. Tonda, awa winak ati, domik keil foka nirya ara, daksakuka, akunum eipse.

<sup>32</sup>Aning nirya akunum eipse ning ara, moubuka tenipdesirye, kel kipse. Kel kepsop ura, ‘Aning ara ani,’ moubuka bikse. <sup>33</sup>Ara, yata ninye do nirya, sikce, ‘Kume, atalak ara, wi unmanile ati, mapmanya ani, tuba bukroproirye, otalak arye afil donamne,’ tenenmalirye, taruk mungguruk dakuka, bukaplya ani, tuba wi talipliba, tuba tamubuka mapmalya uk, wininyak nang ara, aminyan talak ara, fia bona utotoa talina kum ninye uk unamake. Sikce talinyak ning nirya kum danin banamle.

<sup>34</sup>Winipmanto ara, ubula don nang arye, talye karin yangalamak touk, sikce talinyak ning nirya ara, minopce kum danamle. Tonda, aning atonun yin talin nang arye, ‘Yuk nang talinyak ning ati, ubula dopropruyap’ tenen, yin dobuka sik anang damak minopce yangalamak touk, sik fil ati lik tenenyak ninye ara, adib aryuk bona utotoa talina kum ninye uk unamake. Sik talinyak ning nirya ara, kum danamlarya.

#### Raja Salomo weik kel deice arye, ayupu ton sekuk

**25** <sup>1</sup>Ayupu ara, Raja Salomo weik kel deice arye nyabuk. Ayupu nyabuk ning ara, Yehuda mutuku weik ninye deiyok kibuka, talyamuknye Sisinanye Raja Hizkia, el amutam fil dona nang arye sekdeiyamik. Ara, ‘Israel ninye arye, ayupu moubuka kel bikikirye, teleb ubuka unamak’ tenen, sekdeiyamik.

<sup>2</sup>Allah ara, weik deiyoknye ulula ati, elce, 'Aning lakak arye, laka kum nyanamne. Aning ara dungnupnamne,' teneplyop ura, el deiyok aulula anya arye, teleb uka. Winilula ati ara, ninye tukwak ninye nirya arye, el ti, 'Se, elda dipkoprop aning-aning nirya talibuka deice tam Weik Deiyoknye ulule,' tenekiry, el si uk erenyake. Bukni, ninye tukwak ninye talibuka, ninye deiyok kibuka unyak nang ara, Allah arye duknyamuk ning ati, 'Se, aning ara moubuka kel biktibye' tenen, moubuka dipdekirye, 'Deiyok ani' tenen, mitikanun arye kel biknin banyake. Wininyaka ati ara, sik amutam unyak ninye arye aRaja nang ati, kibuka si erenyake.

<sup>3</sup>Im alip tam fia erepdobuka ati, yatanye birye ei binuka eipturye, kel biktu do? Tonda tukwak mutuku noutamak ap, tuku amutam ap, fia karu weik ulula ati, yatanye birye ou binuka eipturye kel biktu do? Kume, aning kum winipmanto. Aning atonun, sik ninye deiyok kibuka talinyak Raja-Raja nang arye tenenyak ning ara, talye daunyake ninye nirya arye, kum teniptinge. Sik weik ninye deiyok nang, sik kanye talima noutamak arye, tenenyak kanye ara, yuk nang arye kum kel kipmanto unyake.

<sup>4</sup>Ninye arye tuku palibikirye, tuku fum tam arye, keil ap, tuku ap dobuka deibikiba, 'Teleb ning ani, malye ning ani' tenen, wibicop ura, uku fum tam dongobikiba, uku arye malye ning nirya diproplyop ura, dekna weik ning, el si ara, perak uk laka upnamle. Yuk malye ning ap tabakuka kum upnamle. Perak ara, doprobikirye, aperak teleb kina weik kel nang arye, urasin fia teleb ning memebuka deilinyake. Malye ning tabakuka tuba uplye talak ara, teleb ning kum memeptinge.

<sup>5</sup>Ayupu nyapmasin touk, ninye deiyoknye Raja damak malye winin ning uk talinyakce, malye fil uk donyak nang nirya ara, Raja damak arye minopce kum kipdeipniba, aminyan talak ara, asisinye arye talinamle mutuku noutamak unamle ning nirya ara, fia diksukumuk unamle. Raja diksukumuk unamle deice arye, elce talinamle ninye ap, elce fil donamle ning ap, el amutuku-mutuku nirya talinamle ning ap ara, fia teleb uk unamle. Winibuka ulye ura, yuk mutuku ninye arye, el ti kum obuka sirya daknamake. Diksukumuk unamle deice arye, aninye ap, amutuku ap fia talinamle.

<sup>6</sup>Sik weik ninye deiyok talibuka unyak Raja nang damak unamlum ninye ara, talima erebuka, kwalibuka kum wininamlulume. Tonda, 'Nunda weik kel nang unyaba ati, ninye deiyoknye birye kekepsilirye, melipnamsile,' kum tenenammlulume.

<sup>7</sup>Deiyok ara ani. Teleb ning ara, ninye deiyoknye Raja arye, anggun wininamlum ning moubuka dipdeliry, el babye kanye aryuk, 'Anggunda, na damak, yanululume. Anggun ti erepdeipsiniry, teleb ak deipnamsine,' nyaptue. Anggun bidamnye aryuk, 'Nunda teleb nang unyabe' tenen, ereipdamunce, Rajanye damak binuka bukmumnyop ura, aRaja arye, el

amutam mambul fil donyak nang sik kekena ak arye, 'Kume, anggunda talye nang anya arye, yukak bindoplulume,' nyabuka wenepsilyop ura, weik malye upnamlume. Nyaplyop ura, dipkoprop alye dakaldanamlume. Ati, teleb ning ara, weik deiyoknye aryuk ereipsutue.

<sup>8</sup>Tonda, anggun bidamnye asing arye dilulum ning ati, moubuka tenena kum bukni, kweldana adib aryuk, 'Kume, atalak aryuk minopce ninye yupu lipsisikuka bokolina deiyok nang damak, laka nyalbanamabe,' tenena kume. Minopce, sik yuk nang ati, 'Anang arye malye wininmak,' nyaplopmonce, bobuka yupu bokolin aik minopce kum dongolbanamlulume. Deiyok ton kum upmale bukni, anggun neika ulamlum nang ati, wenepmunba yuk nang arye, anggun nyanmamunye yupu kekepsicop ura, dipkoprop anggunda alye dakaldanamlume. Yuk kel nang arye, dipkoprop yupu nyabikiba, anggunce nyanmamunye yupu kekepsicop ura, aminyan talak yata winipnamlum do? Fia alye dakdanuka binamlume.

<sup>9</sup>Anggun ap, anggun damak unyak nang ap, yupu ton auplyop ura, anang sik dam uk, yupu talilbinamlulume. 'Ninye yupu bokolina deiyok nang arye, yupu lipsisikuka bokipnamsiyake,' tenena kume. Tonda, yuk nang ap yupu talinamlum talak ara, yuk nang arye duknubuka nyasikce yupu, lakak anyuk kum nyaplopnamlulume. Anggun kayapu nang arye, 'Se, na ikin unulul ning ara, ani. Na talima noutamak tenenun ning ara ani,' nyabuka nyasikce yupu ara, yuk talye daunyake ninye kekenak ara, lakak arye laka kum nyanamlulume.

<sup>10</sup>Yuk nang arye, sik tenenyak ning dungnubuka nyapsicebuk, anggun ti ayupu lakak aryuk, yuk nang kekenak talye nyaplopmonba, yuk daunyake ninye arye ayupu kekebice ura, anggun ti, 'Kume, anang ati ara, mambul yupu kum nyanamabe. Sik kanye bona kum dib aryuk, yuk talye daunyak ninye nirya ati, talye lukparabuka lakak uk nyalbinamake. Sikda, malye uk unyake,' nyabuka, anggun nong deice ikin yupu deilinamsiake. Adeice arye alye weik dakaldanamlume.

Winipsikcop ura, aning kum kum danamle. Tuba-tuba anggun si deice malye yupu nyanamsiyake anya arye, yuk ninye nirya arye, aning kum luba kinamake. Tuba tenena uk unamake. Ati ara, anggun kayapu nang arye, duknuna yupu nyapsikcop ura, yuk ninye kekenak ara, fia laka kum nyanamlulume.

<sup>11</sup>Winipmanto ara, kat ning dobuka, puturubuka delina kel nang arye, dekna weik ning emas dobuka tapu duk bum urasin atonun kibuka deibikirye, lokiyamik pala ning, perak arye memepdeiyamica deice deibikiba, urasin fia teleb upliba, ninye nirya arye, kanye deililamak touk, yuk ninye ikin upliba, sik melina ati, anggunce aninye ati teleb yupu nyapmonce, melipmunyop ura, yuk ninye nirya arye, 'Se, ayupu ara fia telebe,' tenebikirye, kanye delinamake.

<sup>12</sup>Ninye deiyok nang arye nyanyak yupu kekepmantonye, mangkau arye malye uplyop ura, weik kel nang arye, “Malye unmlam ning ara, ani. Teleb uk unamlam ning ara, ani,” nyabuka wenebicop ura, ayupu kekepmantonye bira, kekeplirye teleb unamle. Winina ara, fia teleb uka. Aning atonun, weik kel nang arye, dekna weik ning emas dobuka, amol dongona ning memebicop ura, urasin fia teleb ulule.

<sup>13</sup>‘Mambul weik yupu dobuka, laka nyalbanamak’ tenen, deiyok nang arye, yupu laka nyana nang wibuka deibikirye, dopkwetebikiba, ikin uptu babye, dipkoprop ayupu dobuka, teleb ubuka binuka laka nyanyak nang ara, sik deiyok nang arye, alaka teleb yupu laka nyalbanyak nang ati, weik arye kanye deibuka unamake.

Aning atonun, ninye arye wa wibikirye, yala ning koubuka daulamica ani, owala noutamak arye kouamice ning, awa lin talak akunum uplyop ura, yangalule. Ara, ninye arye awa wibuka kouamica ani, im deice arye mok ceplirye, kouamice ning deice saklyop ura, bupu ulamlye ning nirya, namin upliba, awa deiyok nang arye kanye deilinyake. Winiplyop ura, sik fia weik kanye deilinyake.

<sup>14</sup>Aning atonun, dou mamlya ani, mok cepnulye talak ara, dua ap kumanya ap unmalya deice arye mok bobuka yangaliba, ninye nirya arye, ‘Mok cepnule,’ tenenyap bukni, amok ara kum yangalule. Aning winilamla atouk, ton ninye arye tuba-tuba, “Aning ara aripnamkine,” nyabuka nyaltakanyake. “Ateleb ning aripnamkine,” nyaltakanyak bukni, nyaplomice ning ara, dipkoprop kum arinyake. Winilamak touk anang sik damak kum yangalule. “Se, mok cepsetue,” nyabuka morolulnye ap, “Se, ateleb ning aripnutue,” nyabuka morolulnye babye, atonun ururake. Sik morolenyak ning ara, fia kum yangaliba, urdem uk ururake. Aning nirya nong kum uplyop ura, sik bitinya malye kanye boprikirye, teleb kanye bobuka kum ururake.

<sup>15</sup>Tonda, ninye tonok kanye talima erebuka deice tam ulul weik deiyok tonoknye, anggun moromunye ning nirya ara, fia kum kekenamsile. Bukni, anggun kanye talima nimalye arye, lamapdongobuka umunce, aning nirya moubuka tenyeipdemunce, teleb yupu deice arye fia tuba-tuba moronamlume. ‘Minop aripnamsile,’ tenena kumce, nimalye aryuk teleb ubuka nyabuka moropmunyop ura, talima erenanye birye, el kanye namin upliba, aminyan sirya talak amorolamunye ning arenamsile. Teleb yupu deice arye, fia tuba-tuba nimalye arye, moropmunyop ura, sik kat talima unyak nang ap, ‘Anang sikce nyanyak yupu nun like’ tenen, batakasinyak nang ara, sik talima namin upnamle.

<sup>16</sup>Ara, anggunda, ‘Mong mek dipnyup,’ tenepmunye ura, among mek dobuka, mitikanun dem aryuk dinamlume. Ayupu ara, talye ati kum nyapsine. Deiyok ara, among mek like tonok talak aryuk, weik arye dimunyop ura, dipkoprop anggun mun uk disilyeba, dukna duknamlume.

<sup>17</sup>Aning atonun, anggun kayapu nang, aik uk tuba-tuba binuka kum unamlume. Deiyok ara, anggun kwit aik uk fia binuka umunyeop ura, el lik upliba, anggun ti kanye kum delinamsile. El kanye lik uplyop ura, ‘Se, anye bira, asum-asum nirya, na aik uk yanganyak nang ara, na like,’ tenenamsile.

<sup>18</sup>Ninye arye, ‘Oldanuyap,’ tenebice talak ara, ya ap, yin ap, kat yo tace ap, aning nirya bobica deice arye, yuk ninye ati olbanyake. Aning atonun, sik kayapu nang koprop, sik ap mining damak ulamice ninye ati, ninye yupu bokolin talak noutamak ara, deiyok ton kum upmale bukni, ‘Atalak aniryuk wenebuka yupu bokibikirye, wenena aik bobinamak’ tenen, anggunce anang ati tilila yupu nyapmunyop ura, dipkoprop fia malye winilulume. Ara, ninye oltakana atonun ululume.

<sup>19</sup>Ara, anggun kele, anggun yan do, si do, uk weik arye dipsilye ura, aning arye tuba-tuba sekeldongon uk upsiliba, uk dina uk unamsile. Aning ara, min kum danmanto kum ning anya arye, aning ara kum batakdatum. Aning atonun, Aning atonun, anggun damak weik kanye imun ning usilye talak ara, tonoknye birye, “Kume, anggun patapsilye ning nirya ara, na arye melipnamsine,” nyabuka, nyalina yupu nyalul bukni, dipkoprop anye birye, fia kum melipsilyop ura, anggun talima uk dinamile. Anye birye, tonok ning babye, kum melipsilyop ura, anggunce, ‘Se’ tenen, malye kanye bobuka unamlume. Aning atonun ubuka uplyop ura, el fia malye upmale. Ato un ning ara, kanam aniryuk kum namin kiptume, malye kanye bobuka tenina uk unamlume.

<sup>20</sup>Winipmanto ara, ninye tonok weik suse dilamliba, tonoknye birye, yu weik ulamle mek, el si cuka arye asuse deice dikdongopliba, uk weik dinamle. Anye birye asuse dilamlinye biti, fia malye ulule. Aning atonun, ninye ton weik kanye imun upliba, teniltona uk ulya deice arye el talima uk dilule. Winilamle bukni, yuk nang el damak yacop ura, aning kum winilamnanye ato ubikirye, kanye delina ap, mot sebuka ulina ap, winibicop ura, anang arye fia malye upnamake. Anang arye, uk dilamlinye biti, mot senamkirye, kanye deibuka winilinyaka deice arye, el ti malye ukiba, el talima uk weik arye dinamle. Winibuka wininyak ninye ara, fia malye unyake.

<sup>21</sup>Ara, anggun ti, ‘Anang nun lik, anya arye opnamtibye,’ tenelamsikce nang, din ning pataplye talak ara, anggunce anang ati, adib aryuk din ning arepmunba dinamake. Aning atonun, anggun oldan nang mek pataplye talak ara, anggunce anang ati teleb mek kwebuka arepmunba dinamake. <sup>22</sup>Aning ara talye ati kum nyapsine. Deiyok ara, ani. Anggunce anggun oldan nang ati, sik pataplye ning ati melibuka arepmunye ura, winipnamlum deice arye, anggun oldan nang alye dakaldanamake. Anggunce anggun oldan nang ati, melibuka arepmunyop ura, Allah Yahweh arye, anggun teleb winipmamunye nang ati, menenga dekna ning arenamsile.

Bukni, Allah el si Yahweh arye, anggun oldan nang ati, weik ikin ning sik nong deice delinamle. Winipmanto ara, ninye arye uku tuba dinmalye yo sirika dobuka, yuk nang kisok deice paklamak touk, Allah arye sik oldan nang ati, weik ikin ning, sik nong deice delinamle.

<sup>23</sup>Winipmanto ara, outam arye weik kumanya mikip yangalye talak ara, adib aryuk weik mok ap bobuka yangalule. Aning atonun, deiyok ton kum upmale bukni, ton nang arye yuk nang ati, minina yupu deice arye, ‘Sik malye wininyake,’ nyabuka, talye yupu nyalonyake ati ara, wininyaka deice arye, yu weik upliba, ton tam nang arye, ton tam nang ati dereldana uk ubikirye, oldana uk unyake.

<sup>24</sup>Sik anang bitinye ara, tonok weik teleb pala lo weik aik fum tam noutamak ulamtiringa babye, atalak nirya ara, akil ara kanye deibuka kum ulirye, malye kanye boplrirye, yu uliba el akanye biti, fia derena uk upyop ura, el akanye bira, fia ikin kanye bobuka unamle. Bukni, teleb ning ara, aweik teleb aik, alip tam aruma dubak bukni, derelana kumce, fia lamapdongobuka utop ura, kanye deibuka uptue. Ara, ayu weik kil ap neika una kum atia.

<sup>25</sup>Winipmanto ara, ninye ton weik fil donmaca ani, mek patapliba, yuk nang arye ikip mek kwebuka arepmakibuk, dibikirye kanye delilamak. Aning atonun, nun kayapu nang, yuk pera mutuku daulamice talak ara, yuk nang arye anang ati, teleb yupu boyanuka nyapsikiba kekebibirye, kanye deilinyabe.

<sup>26</sup>Winipmanto ara, teleb mirin mek pu balamlyak bukni, amek pu damak malye weik upliba, ninye arye, ‘Se, winitalak ara, amek ara fia malye upmala anya arye, nunce kum diptibye’ tenen, batakanyake. Ateleb mirin mek malye upliba, ninye arye kum dipmanto ubicop ura, ara fia malye. Aning atonun, Allah arye, “Aning ara wininamlume, aning ara fia kum wininamlulume,” nyalisilye yupu kekebuka, fia diksukumuk ulamice ninye bukni, yuk malye ulamlinye birye, “Winiplulume,” nyapliba, malye winibicop ura, adeice arye diksukum ulamlye ninye malye ulilule. Aning ara weik malye ulule.

<sup>27</sup>Winipmanto ning ton nyapnusine. Mong mek ara, fia dina teleb ning anya arye, teleb lelule. Bukni, ‘Among mek tonok dinamne’ tenen, weik arye dimunyop ura, dipkoprop mun uk dinamsile. Aning atonun, yuk ninye arye anggun ti, ‘Se, anang ara teleb unyak nang,’ tenepsikirye, tuba-tuba kibuka kanye deipsikiba kekemunce, ‘E, anyapmasiyak yupu ara kekena telebe. Tuba nyapsitinge,’ tenenamylume. Bukni, anggunce, ‘Se, ninye nirya arye, nun ti kibuka kanye deipsitinge’ tenen, patapliba, aning tuba-tuba tenena uk umunyop ura, fia malye unamlume. Winibuka tenena uk umunyop ura, anggunce anggun bidamnye atibuk, malye ulildalamylume.

<sup>28</sup>Winipmanto ara, tonok mutuku ninye arye weik asikak domtingce, sik weik cang keil foka domting bukni, sik oldan nang, amutuku yatingce,



'Amutuku unyak ninye opnuyap' tenen, akeil foka paklobuka, talye lukparabuka wektingce, amutuku ninye nirya opnamtinge. Winiptingop ura, amutuku noutamak ulul ning nirya ara, atu kiploptingce, kum daneiptingce. Amutuku ulamting ninye ap, sik talilamting ning ap nirya ara, kum daneiptingce. Aning atonun, ninye ton elcuk, el bidamnye ati, moubuka kalikildana kum kiamukce, 'Na malye upnyak' tenen, kalikdalirye, moubuka kum tenelulnye bira, atonye bira, elcuk el bidamnye atibuk, malye kilil danamle. Elda fia walwalnye ulule.

**26** <sup>1</sup>Winipmanto weik dou man talak kiyamliba, dou malamlirye bupu weik ulamliba, mok ceplirye mul dumduma weik arye saklyop ura, ninye nirya arye, 'Se, aning ara yata ati upsil do? Aning ara kum winipmanto,' tenebikirye, malye nyanyake. Aning atonun, ninye arye weik uku dinibikirye, 'Wa wibuka, yala ning ap weik arye kounamabe' tenen, kintinibuka koulamiki bukni, mok weik ceplirye, kouamice ning deice saklirye, keirye dibuka malye kiplopliba, ninye arye, 'Se, aning ara, fia malye,' tenebuka, malye nyanyake.

Aning atonun, walwal una ap, 'Deiyok ani,' kum tenepmanto ap ululnye ati, yuk ninye nirya arye, kanye deibikirye anye bira erebicop ura, yuk ninye nirya arye, 'Se, aning ara, yata deiyok ati, walwala ululnye biti ereipmak do?' tenen, malye kanye bonyake.

<sup>2</sup>Maka bukmalya erepdoplrirye, im deice lakuka balirye kum amulamle touk, ninye arye yuk diksukum unyak ninye ati, "Sikda malye weik unyake," nyabuka lulundana yupu deice arye nyaplopting bukni, atilila yupu nyabikca babye, diksukum unyak ninye damak yalirye, sik nong deice kum upnamle. Anang ara, ikin ning kum dopropnamake. Deiyok kum upmala ati, yuk ninye nirya atilila yupu kekebikirye, 'Kume, anang ara, teleb uk unyak nang anye arye, ayupu ara, tilila yupu uk ulule' tenen, moubuka kel kipnamakca.

<sup>3</sup>Keledai basam u fum bisik tapu kerikdongobikirye, atapu talibuka lipdobikiba, balamle touk, fia walwal una ap, 'Malye winin ning uk mangkau arye unamne,' tenen, amalye winin ning uk talibuka unyak ninye ati ara, sik wenena ati, kama dopropmunce, sik balye tam kulanamlulume. Winipmunya deice arye, kel kipnamake. Kumop ura kume. Aning atonun, ninye arye kuda basam balye deice tam bukikirye, "Bilyame," nyabuka, yo barala arye, akuda el balye deice kulalamak touk, sik malye winin ning uk fia talibikirye, walwal kanye bobuka, malye weik unyak nang ara, sik peterena ap, wenena ap ati, adib aryuk kama dopropmunce, sik balye deice kulabuka wenenammlulume.

<sup>4</sup>Walwal tuba unyak ninye arye, yu upliba, yupu deice arye oldana uk unyak talak ara, sik fia walwal arye nyalamak ning, kekepmunce, sik nyanyak yupu atonun tamubuka kum nyanamlulume. Sik walwal kanye bobuka nyanyak nang arye, nyanyak yupu kekepmunce, sik nyanamak

touk, walwal arye tamubuka nyapmunyop ura, anggun babye awalwal arye nyanyak ninye atonun unamlume. Ati, winina meme nyapsine.

<sup>5</sup>Bukni, walwal tuba unyak ninye arye yu upliba, yupu deice arye oldana uk ukirye, anggun ti malye yupu nyapsikcop ura, talye kanye bobuka kum luba kipnamlume. Sik walwal arye nyanyak yupu kekepmunce, tuba tamubuka, weik kel yupu nyapmunce, sik nyanyak yupu ara, sekdongopnamlulume. Sik walwal deice arye nyanyak yupu kum sekdongopmunyop ura, sik walwal arye nyanyak ninye ara, ‘E dipkoprop, nunda kel nang atonun unyabe,’ tenebikirye, malye yupu ap, walwal yupu ap, tuba-tuba nyanamsiake. Ati ara, walwal arye nyanyak ninye ati, ‘Yo, dauplye, sikce danyanmanyake’ tenen, kum luba kipnamlume. Weik kel yupu nyanamluma deice arye, sik walwal arye nyanyak yupu ati, sekeldongonamlume. Winipmunyop ura, tunim anamake.

<sup>6</sup>Walwal tuba ululnye biti, ‘Anye birye na mambul yupu dobuka, yuk nang ati laka nyalbinamtile,’ tenepmunce, ‘Ayupu laka nyalbinamle’ tenen, walwal kanye bobuka ululnye anyuk wibuka deipmunba, anggun mambul yupu bobuka laka nyapra balyop ura, aminyan talak ikin ning weik, sik damak yanganamle. Winipmanto ara, anggunce anggun bidamnye yan ya sekdamunba, ikin weik ulamsil touk, unamsile. Tonda, walwal nang arye, ninye olamle yu mek dipmakiba, adib aryuk uk weik dinmalya ani, dibilamak touk, anggunce, walwal unyak ninye ati, “Na mambul yupu bobuka laka nyalbilyame,” nyapmunyop ura, aminyan talak ikin weik unamsile. Ati, ‘Walwal uk unyak ninye arye melinamsiyake,’ tenena kume.

<sup>7</sup>Winipmanto ara, yan malye ulamlanye, el yan talye dawinipmali bukni, yanibuka kum balamle touk, sik walwal kanye bobuka unyak ninye arye, weik kel yupu ap, domon yupu ap bobuka, laka nyapnin banmace talak ara, ayupu teleb ubuka nyapmanto kum unyake. Ara, talye ati kume. Sik walwal uk unyak ninye arye, ‘Ayupu ara deiyok ara ani’ tenen, kum kel kinyaka atia. Talye nyaltakana uk unyaka anya arye, sikce, ‘Weik kel yupu nyapnuyabe,’ tenenyak bukni, yan malinye birye teleb ubuka kum balamle atonun, walwal unyak ninye arye, weik kel bikna yupu dobuka, laka kum nyapmanto unyake.

<sup>8</sup>Moubuka kel kin ning kum kel bikmaliryuk, yuk ninye arye, fia walwalnye biti, “Anye bira weik kel bikuknye,” nyabuka el ti kibuka erebicop ura, ara fia walwal arye wininyake. Winibicop ura, aminyan talak ikin ning weik, sik damak yanamle. Winipmanto, keil duk dobuka, kartapel deice koupdongobikirye, fibuka dopdekibuk, akeil akunum koupdongopmanyaka anya arye, kum balamle touk, unyake. Ati, walwal ninye erepdeipmunce, ‘Nun deiyok nang unamsiake. Tonda, nun mambul fil donamsiyak’ tenen, anang ati kibuka kum kanye delinamlulume.

Winipmunyop ura, dipkoprop aminyan talak, ikin ning weik anggun damak yanganamsile.

<sup>9</sup>Weik kel yupu aupmatu babye, fia walwal kanye bobuka malye ning uk talibuka ululnye birye, ayupu ara teleb ubuka laka nyabuka, kum petereptue. Dipkoprop ara, malye yupu uk nyapnamle. Aning atonun, winipmanto ara, ninye kanye wangalamak yu mek dipmace nang arye, tace ning bobikirye, yuk ninye damak lukunmakirye, malye ulamak touk, fia walwalnye birye, weik kel yupu bobuka, laka nyalbitu bukni, teleb ubuka kum petereptue. Anye birye, malye yupu uk nyanamle.

<sup>10</sup>Yata fil dona deiyoknye do nirya, ‘Ninye ton wibuka deipniba, na mambul fil donamak’ tenen, sik winilamice ning, kum kel bikamice nang bukni, talye dabalamicen nang ap, walwal kanye bobuka, talye-talye uk ulamicen nang ap ati, wibuka doproplirye, anang ati fil areplyop ura, fia malye ulule. Adeice arye ninye weik ititildanyake.

Winipmanto ara, walwalnye birye, ‘Yuk ninye ton outam unmak do, kum do?’ tenena kum aryuk, moubuka dildena kum dib aryuk, el mal doplyop ura, ninye unmakca damak poubilya deice arye, ninye fia weik olamle. Aning atonun, fil dona deiyok nang arye walwal ninye ap, kum kel bikamik ninye ap wibuka doprobikirye, ‘Nun fil donamak’ tenen, mambul fil arebica babye, fia walwal arye donyake. Winibicop ura, ninye weik ititildanyake.

<sup>11</sup>Winipmanto ara, kam dukna dukloplirye, tuba tamubuka asukum uk binuka dilule. Aning atonun walwal unyak ninye arye, malye wininyak ning ara, kum batakanyake. Tuba-tuba aning uk, tuba tamubuka wininyake. Ara, malye winin ning uk talibuka unyak ninye ara, malye ubikiba, kel nang arye wenenmakirye, lipsisikuka petereptinga babye, aning moubuka tenena kumce, mince malye winilamikce touk, tuba tonap malye uk upnin banyake. Sik talima malye uk upra banyak ninye ara, aminyan talak amalye ning uk, talibuka unyak ninye ara, malye un ning, tia talak atibuk batakmaca ani, tuba tamubuka, amalye ning uk talibikirye, malye weik upnin banamake.

<sup>12</sup>Ninye arye wininyak ning moubuka dinamlulume. Yata nang do nirya, sik babye sik bidamang atibuk, ‘Nunda weik kel nang unyabe,’ tenelanyak ninye ara, dipkoprop walwal uk unyake. Dipkoprop aning-aning nirya kum kel bikamik bukni, tuba walwal kanye bobuka unyak ninye arye, “Se, nun ti peterepsululume,” nyabuka moropsicop ura, nunce moubuka, lipsisikuka peterebibi buk, anang ara kel biktinge. Bukni, yuk ninye ara, sikce sik bidamang atibuk, ‘Nunda weik kel nang akunum unyabe,’ tenelanyak ninye ara, lipsisikuka kum peterepmanto unyake. Kel nang arye nyanyak yupu ara, moubuka kum kekenyake. Sikda makna kintinildan nang unyak ninye anye arye, sik bidamang aryuk tenen ning uk tenenyake. Yuk nang arye nyanyak yupu ara, fia kum kekenyake.

<sup>13</sup>‘Ikin fil donamne ning ara, na like, kum donamne,’ tenebuka ululnye bira, ‘Yuk nang arye, fil dolbilyame, nyapnicak’ tenen, nyalule. “Kume, bai tam bana na like. Aik fum tam uk unamne. Deiyok ara, bai tam banyop ura, bai tam ulamle weik yu kus, el si ara, singa arye yanuka opnilyak ati, bai tam kum binune. Tonda, ninye aik dobupa noutamak banyap bisik ara, weik yu singa kus arye, yanuka opnilyak ati, bai tam binuka fil kum donamne,” nyalule. Dipkoprop deiyok kum upmale bukni, talye nyaltakalule. Deiyok ara, anye birye, fil dona lik ati winilule.

<sup>14</sup>‘Ikin fil kum donamne, na like’ tenen, aik fum tam uk ulirye, talye-talye uk balinye bira, winilule. Winipmanto ara, aik bublan tirikne ning, ensel arye domikca pakicop ura, dangultolamle tonun, fil dona ati lik ululnye bira, el babye amsuna deice uk maplirye, dangultolule. Bukroplirye, fil kum dolbalule.

<sup>15</sup>‘Ikin fil kum donamne, na like’ tenen, aik fum tam uk ululnye bira, dina din talak ara, anye bira el din ning talibuka bukmaliryuk, el taruk dobuka, ‘Dipnyak’ tenen, el taruk dobuka, el si bam bol dam kum dongolule. Anye bira, lik-lik asa ululnye atia.

<sup>16</sup>‘Ikin fil kum donamabe, nun like’ tenen, aik fum tam talye daunyak ninye ara, sik babye, sik bidamang atibuk, tenelanyak ning ara, ani. ‘Nunda, weik kel nang unyabe,’ teneldanyake. Winipmanto ara, dipkoprop weik kel nang ara, tek barye aulamtingce, weik kel yupu nyaptinge. Anang arye, weik mambul yupu ara, teleb ubuka laka nyaptinge bukni, sikce sik bidamnya ati, ‘Nunda weik kel nang unyabe’ tenen, makna kum kintinildanyake. Bukni, fil nirya ati, ‘Nun like,’ tenenyak ninye arye, ‘Kume, sik atek barye nang ara, walwal aryuk nyanyak bukni, nun tonok ara, weik kel deice arye, teleb yupu uk nyanyabe,’ teneldanyake. Ayupu nyanyak ninye ara, dipkoprop walwal uk unyak bukni, sik bidamang kanye talima erepdakirye, walwal deice arye, ayupu nyanyake.

<sup>17</sup>Ninye ton yuk nang weik yupu nyabuka, oldanmakca noutamak binuka, “Anggunda yata deiyok ati nyaldanmalumce, oldanmalum do? Anggun bataklulume,” nyabuka, tabakuka binuka yupu nyanyak nang ara, fia walwal arye unyake. Ara, opdanmanto unyaka ati nyapne. Winipmanto ara, fia walwalnye birye, talye dabanmalirye, el kum talamlye kam bukni, talye daunmalye kam, el amol mikip arye talibuka lilolirye, akam arye si tolamle atonun, wininyake. Ati, deiyok kum bikmakiryuk, talye banmace talak ara, yuk nang arye yupu deice waldakirye, oldace talak ara, anang dam binuka, yupu tabakuka kum nyanamlulume. Yupu ton fia kum nyanamlulume.

<sup>18-19</sup>Ninye ton el ka biti, tilila yupu nyaplopmalye bukni, yuk talak ara, “Amio na talye nyaplopkise,” nyaltakalule. Atonun, yupu nyalulnye bira, motona talyamliba, sirim taliplirye, ‘Ninye opnun do?’ tenen, tenilena

kumce, mal talye-talye dolamak touk ulule. Anang arye moubuka kum tenipdekirye, yuk nang nirya bulubuka wekmakca noutamak donyake. Aning atonun, ninye ton uku dinmalye uku sirik dobuka, el kwit asik deice doplirye, ‘Aning ara na walwale,’ nyabuka, el ka bitu dungnuldongolule. Anye bira, moubuka tenilena kum anya arye, ‘Anye bira na kwit koproba ati, kanye imun kipdeipniba, ikin kanye bobuka unamle do?’ fia kum tenelule.

<sup>20</sup>Ara, ninye arye yo dobuka, uku dapmakiba, winiryuk dibuka sirya dakropliba, yo tabakuka kum dabicip ura, uku tangalamle touk, ninye arye malye yupu ap, lulundana yupu ap, batakirirye, malye yupu tonap kum nyaldacop ura, ninye arye yupu deice arye pakalanyake ning ara, kum upliba, talye yupu tunimabuka unamake. Bukni, tuba-tuba malye yupu nyabikcop ura, tuba-tuba nyalakirye, oldana uk unamake.

<sup>21</sup>Aning atonun winipmanto ara, uku duk ongonmalye ning dobuka yuk yo damak deipmunba, adinmalya uku arye, yuk yo ton minopce sekroplirye dilamle tonun, weik yupu deice arye, “Anda yata ati do?” nyabuka, yu yupu deice arye wenena yupu ap, waldana yupu ap nyalirye, yuk nang ati, derelulnye bira, el malye yupu nyalya deice arye, minopce yu upliba ninye weik tonap yupu deice arye waldakirye, oldanyake.

<sup>22</sup>Talye tilila yupu ap, lulundana yupu ap, “E, aning ara dip, na asing arye elilamse ning ara ani-ani,” nyabuka nukunyak yupu ara, ninye nirya teleb ubuka kekebikirye kanye deilinyake. Winipmanto ara, din ning fia telebto ning dipkwetebikiba, sik mun fum tam biliba, kanye delilamak tonun, ninye arye talye-talye nyanyak yupu, yuk nang kekena ak nyabikcop ura, kekebikirye, sik talima noutamak malbalule. Ninye arye talye nyaltakalamak yupu, yuk nang ton kekebice ura, kanye deilinyake. Aning ara, malye uk unyake.

<sup>23</sup>Winipmanto ara, kira tuku doprobikirye, talye lulin makau memebikirye, ‘Urasin teleb upnamle’ tenen, urasin teleb ning, perak dobuka, akera tuku arye kintinibuka deipmace ning deice, palibuka deibikiba, urasin fia teleb ulule. Aning atonun, talima fia malye uk unyak ninye ara, sik si bam bol deice arye teleb yupu nyakiba, ayupu kekebice ninye arye, ‘E, sikda teleb nang unyak,’ tenenyak bukni, dipkoprop aninye sik talima noutamak ara, tuba fia malye uk ulule.

<sup>24</sup>Ninye ati yu tenebuka wilililulnye, el nyalye yupu ara, ‘Kekena fia telebe,’ nyapktu babye, aning ara dib kum tenenamylume. Yu weik ululnye, el talima noutamak ara, tilila ning uk langdibukce, tuba aulula anya arye, teleb yupu nyaptu babye, dib tenena kume. <sup>25</sup>Ati el anye birye, ‘Teleb yupu nyapnyop ura, yuk nang kekepnicip ura, sikce na ti, ‘E, elda telebnye ulule,’ tenenamniake,’ tenelule. Bukni, sik talima noutamak, yu ning tuba awablibuk, sikce nyanyak yupu ara, ‘Dib nyanmaka,’ tenebuka, kum unamlume. Ato ninye ara, yuk nang ati, tuba, ‘Nun like,’ tenena uk unyake.

<sup>26</sup>Yu tenebuka wililin ning, sik talima noutamak awamli bukni, tenepce teleb yupu ap, teleb una ap uptinga babye, aminyan talak sik talima noutamak yu ning ap, ninye ati, 'Like' tenena ap, tuba aubuka deice arye laka upliba, yuk ninye nirya arye, eibikirye kel kipnamake. Fia talima malye uk usilye ning ara, kum duknupmanto.

<sup>27</sup>Tonda yata nang do nirya, yuk ninye ati, 'Aninye ara na lik ati ara, tuku fum bisik saktinje,' tenebikirye, tuku palibuka bisik botolinyak bukni, aminyan talak ara, sikce palibuka deibik tuku fum sakuka opnamle. Aning atonun, yata nang do nirya, 'Yuk nang ati opnamak' tenen, keil lukuka kurukuka dolkwetenyak nang ara, aminyan talak akeil aryuk, tuba tamubuka sik nong deice yanuka opnamle.

<sup>28</sup>Ninye ton el sitang deice arye, el kayapu nang ati, tilila yupu nyaltakalulnye bira, dipkoprop el kayapu nang ati, 'Sikda na like,' tenelirye, sik ti malye ulilule. Aning atonun, sik talima noutamak arye, 'Anang ara nun like,' tenenyak bukni, tenebuka yupu deice arye, 'Kume, anggunda telebe, nun ap neika ulamtibye. Anggun ti kanye deibabe,' nyabuka, talye yupu deice arye nyaltakanyak ning ara, dipkoprop anyanyak yupu deice arye, sik kayapu nang ati malye ulinyake.

**27** <sup>1</sup>Na ara, 'Ambusum arye or yanamal talak ara, aning nirya ati dipkoprop winipnamane,' nyabuka, kanye deipmunce, makna kintinildan yupu kum nyanamlulume. Ara, 'Orsum ara, aning winipnamale' tenen, moubuka kum kel kipmanto atia. 'Aning winipnamale' tenen, kum kel kipmamincuk, 'Orsum ara, aning winipnamale,' nyana kume nyapkine.

<sup>2</sup>An babye upminye ning atibuk, 'Se, na ara fia teleb ning uk wininune,' tenelyame. "Na ara weik mambulnye," nyabuka, an si uk erelina kume. Teleb ning ara, yuk nang arye, an winiminye ning ati, "E, anye bira dipkoprop fia teleb ubuka ulule. Elda teleb fil uk dolulnye," nyabuka, an si uk kel kibikirye, an ti kanye delinamake. Ati, an bidamnye aryuk an si erelana meme.

<sup>3</sup>Keil ap, keil wininga ap, sik ikin ara dipkoprop ikin bukni, moubuka tenen ning kum teneplirye, walwal kanye uk bobuka ululnye birye, elce yuk ninye ati, malye ulilamle ning ara, fia ikin weik uliba, talima noutamak fia weik arye uk dilule. Ati keil ap, keil wenengna ap ara, kanamto ulul bukni, walwalnye birye malye ulilamle ning ara, fia weik ikin ulule.

<sup>4</sup>Tulum weik upsiliba, malye yupu weik arye nyabibiba, yuk nang kekebikirye, talima uk dilule. Tonda obuka bataklobikirye, yan tamnanyake. Tonda, winipmanto ara, weik mek oplirye, aning-aning nirya dobuka bobaliba, ninye arye, 'Se, aning ara mambul weik,' tenebikirye, engenyake. Talima uk dilamsil ning ap, mek oplirye nun ning bobalamsil ning ap ara, mitik ikin ulul bukni, aminyan talak aning

nirya ati, “Dauplye,” tenebibirye, tuba tamubuka teleb kanye bobuka unyabe.

Bukni ninye tonoknye birye yuk nang ati, ‘Sik talinyak ning ara, na aryuk taliptinye’ tenen, el talima uk dilamliba tenelinye bira, yata nang arye el ap neika upting do? Kume, atenenyak ninye arye, malye weik kilisikiba, ikin fia weik usulula anya arye, ninye nirya arye ato nang ati, ‘Nun like,’ tenenyake. Kume, aning ara, ikin fia weik anya arye, aning ara malye weik ulisulule.

<sup>5</sup>Teleb ning ara, malye ubibya babye, yuk nang kekenmakak aryuk, yupu nyabuka wenena ara teleb uka. Bukni, tonoknye birye, yuk ninye ati bico tenelul bukni, laka kum nyapliiry, kunusa doplyop ura, ara ikine. Dungnubuka talima noutamak aryuk, tenena ning ara, weik malye ati nyapsine.

<sup>6</sup>Malye winibibyeba, nun kayapu nang arye, “Amio, anda dipkoprop fia malye upmalum ning ara, lakak arye ani-ani,” nyabuka wenepsicop ura, ‘Ayupu ara na kwit koprop arye nyapmanila ati, aning ara, teleb uka,’ tenetibye. Bukni, nun oldan nang arye, nun ti, anggun talima noutam ara, ‘Anang ati tuba optibye,’ tenesinyak bukni, yuk nang kekenak ara, ‘E, na kwit kopropa, na kanye deipkine,’ nyaptingce mutupsiting babye, anang ati dib kum tenenamulume. Ayupu ara, tenebuka aryuk nyanyaka anya arye, sik talima noutamak aryuk, ‘Aninye malye kipdeiptinye,’ tenelulnye bira, ninye onanye atonun ulule.

<sup>7</sup>Din ning weik arye dibipye ura, boupmasilye talak ara, fia min-min lelul ning, ‘Madu mong mek diptibye’ tenen, kum patasulule. Tonda din dina fia kumce, patapsilye talak ara, “Sik lelul dina auplule,” nyabuka batakanyak ning babye, kanye deibuka talye mangkau kibuka diptibye. Ara, din ning weik arye patana atia.

<sup>8</sup>Winipmanto ara, maka ulamle yo taruk arye erepdaka, yukak lakuka balirye, yuk yo taruk deice malbalamle taruk ara, ilil weik ulule. Aning atonun, yatanye do nirya, el mutuku koprop noutamak, el ulamlye aik arye batakuka, yuk pera mutuku balulnye bira, mambul kanye bobuka ilil unamle. <sup>9</sup>Winipmanto ara, yata ning do, nun nong deice nintong teleb nyana ati, teleb minyak mek arye likmakiba nintong teleb nyasiliba, nun kayapu nang arye kekebuka kanye delisinyake. Aning atonun, nun malye winibibyeba, nun kayapu koprop arye nun ti, ‘Na kwit el talima ap, el winilul ning ap, teleb uk unamle’ tenen, wenepsutua babye, nunce, ‘Aning ara teleb uka,’ tenenyabe.

<sup>10</sup>Tonda, anggun kayapu nang koprop ap, anggun ni yapu, sik kayapu nang ap ati, fia luba kum kinamlulume. Anang ara, fia kum batakanamlulume. Deiyok ara ani. Aminyan talak anggun patapsilye ning kum upliba, ikin weik upsilyop ura, anggunce anggun kwit capu silip koprop ati, “Se, anggunce melipsutume,” nyabuka, kum moronamlume.

Ikin upsilye talak ara, nun du weit pera mutuku ulamicop ura, sik damak morolbitibye bukni, fia teleb ning ara, nun ap neika mining damak ulamice nang ati, moroldanamabe. Teleb ning ara ani.

Ati ara, anggunce utenenamlululme. ‘Nun babye mining damak unyak nang ara weik mambule. Nun kwit capu silip koprop ara, mambul bukni, sikda pera mutuku unyak ninye anya arye, sik damak kum morolbinamabe,’ tenenammlulume.

<sup>11</sup>Nai mio, anda weik kel bikna deiyok ning weik arye kel bikminyop ura, na arye an ti weik arye kanye delinamkine. Yuk nang arye na ti, “El malye ulule, tonda elda fia malinye uka,” nyapninga babye, an na mi koprop anya arye, fia kanye deilnamne.

<sup>12</sup>Teleb ubuka tenilamlanye bira, ‘Aminyan talak yata wiripnamnil do? Awinipnaman ning ara teleb do, malye do?’ tenen, moubuka tenina uk ulule. Winilula ati, ‘El opnamne,’ tenepmalye ning, dungnupmalye babye, lakak uk eliname. Bukni, kanye moubuka tenena kum anye birye, malye-malye uk winilula anya arye, anye bira walwal uk upnin banamle. Elda, ‘Aminyan talak yata wiripnamnil do? Awinipnaman ning ara teleb do, malye do?’ tenen, moubuka tenina uk, fia kum ulule. Mangkau kanye bobuka mangkau arye balule anya arye, weik pirilen ning el damak yanamle ning ara, kum leipropanamle. Ati ikin ning weik el damak yanganamle.

<sup>13</sup>Yata nang do nirya, sik kum kel bikamice nang bukni, anang arye, “Kume, anang ara nun ning tia ati bona dopropmaca ani, aminyan talak tamubuka punupnamsiyake. Ati atalak noutamak ara, sik tia ati dopropnamak ning, nirya tamubuka kum aripsicop ura, na aryuk punupnamne,” nyanyak nang ara, kanye moupnamlulume. Ayupu nyaptinga babye, sik kum kel bikamice nang arye tia ati dopropnamake pununa ati, ‘Dipkoprop punupnamsiyake,’ tenen, dekna weik ning ton dobuka, na tenen delinamlume. Sikce talye nyaltaklamak yupu uk dib kum tenenammlulume.

Aning atonun, ninye asik nang yakirye, ‘Sik ning tia ati dopropmaca ani, aminyan talak tamubuka aripnamsiyabe’ tenen, “Nunce tia ati dopropmaca ani, aminyan talak tamubuka aning aripnamsiyabe,” nyabikcop ura, sik mining damak unyak nang arye, “Yo, telebe, aninye asik nang arye, aning tamubuka kum aripsicop ura, nun cuk punupnamabe,” nyaptinga babye, anggunce anang sik dekna weik ning ton dobuka na tenen delinamlume. Ara, talye ati kume. Anggun kum kel kiamlum nang do, ninye asik nang do, bataksikirye tamubuka yanuka aning kum punubicop ura, adekna weik ning, na tenen deiyamunye ning ara, dopropmunce, kum danamle ning ara, punupnamlume.

<sup>14</sup>Tonda, yata nang do nirya, mapmaca ani, bukrobikirye, berentam buklobuka, sik mining damak ninye ati, “Telebe,” nyabuka weik yupu



deice arye yukubicop ura, sik mining damak unyak ninye ara, ‘Se, anye bira, weik yupu deice arye nyapmasil yupu ara, kekena nun like. Anye bira ayupu nyana batakmasuturye, mitik yupu arye nyapmasetue,’ tenenamake.

<sup>15</sup>Tonok kil arye weik yupu nyaliba, el akanye ati fia tuba-tuba derelul kil ara, weik mok celye talak lelim weik arye tuba-tuba lelamle tonun ulule. El akanye birye, ‘Se, ayupu tuba nyalye ning ara, batakue’ tenen, malye kanye bonamle.

<sup>16</sup>Ara, anyanmatu ning ati, yatanye birye, “Anda tunim aplyame,” nyaptop ura, akil adib aryuk tunim nyaptu do? Kume aning ara, kum winipmanto. Winipmanto ara, kumanya mikip arye dolye talak ara, ninye arye, “Kumanya tunim aplyame,” nyaptingba, kum tunim nyaptue. Tonda, sik taruk tatang deice minyak mek weik palipsilyop ura, yuk ning nirya babye, kum talepmanto usulule. Aning atonun, yupu weik arye nyalul kil ati ara, el akanye birye, “Se, na ka kilo, an anyanmalam yupu ara, tunim aplyame,” nyaptu babye, akil kum tunim nyapnamle.

<sup>17</sup>Sal arye, ‘Parang ya do, kapak ya do, kat ning arye memenyabe,’ tenebikirye, kat ning uk doprobikirye, parang ap, kapak ya ap memenyake. Aning atonun, sal arye sik kayapu nang ati, “Teleb un ning ara ani, malye ning ara ani,” nyabuka, neika yupu talipmakiryte, teleb ubuka kel bikikirye, sikce sik tibuk teleb ulilanyake.

<sup>18</sup>Yata ninye do nirya, sik deiyok nang arye ara, yo kouamikiba, sik amutam nang arye ayo melibuka kalikin makiryte, moubuka fil dolamikirye, dola kwelamica ani, yo duk si, Ara, yo duk mouplyop ura, ayo duk moupmaliba, afil dona nang arye, yo duk dakuka dinyake. Aning atonun, yata fil dona nang do nirya, sik deiyoknye birye, el dekna weik ning dobuka, na tenen deipliba, sikce aning melibuka kaliklamica ani, tabakuka weik kipnin balyop ura, adeiyoknye birye, el amutam fil dona nang ati, dekna ning ton dobuka sik ti, “Telebe,” nyabuka, el dekna ning bokuka, anang ati arenamle.

<sup>19</sup>Winipmanto ning ara, mekwen deice dinmaki bukni, mekwen deice kanya balamle atonun, sik urasin laka ulule. Winilamle atonun, ninye talima noutamak ulul ning ara, ninye urasin deice arye, lakak upliba elinyabe.

<sup>20</sup>Tukwak mutuku noutamak, ninye dibinyak ninye nirya, wekelbanyak sukum ara, lo tuba aulule. Ninye kum nukmanto dibikirye, dibinyak ninye wekelbanyakak wekica babye, amutuku ara kum langdiptue. Tonda, ninye dipna deiyok ning fia aupnamle. Ninye weik dibinamaka babye, aminyan talak ninye tonap tabakuka dipnamake. Aning atonun, ninye tukwak ninye arye, ‘Se, aning doproptibirye winiptibye’ tenen, patapliba, talima uk dilamle ning ara, fia unamle. Ninye patana deiyok ning ara, ‘Akunuma asukum uk deipne,’ kum tenepmanto. Patalul ning ara, fia aunamle.

<sup>21</sup>Ninye arye tuku palibikirye, kat ning atuku fum bisik noutamak ara, ‘Emas ap, perak ap, fia teleb ning aupmal do?’ tenen, atuku dobuka uku dabicip ura, uku dadinmalya ani, uku arye malye ning nirya diproplyrye, fia teleb ning emas ap, perak ap, batakalule. Auku ara, winildena atonun ning ulule. Aning atonun, ninye arye yuk nang ati, sik si erepnikirye, anang ati kibicip ura, dipkoprop anang sik talima noutamak ulul ning, lakak upliba, eibuka kel kipnamabe.

<sup>22</sup>Tonda ninye nirya arye, duk ning el si ara gandum, el bol nirya ara, wilibikirye, aninye sikce agandum duk dobuka, kat keil tonok lokiyamice fum dongobuka tikikiba, el bama yuk, duk yuk kilule. Bukni, sikce kanye moubuka tenena kumce, walwal uk unyak ninye dopropmunce, kat keil deice deibuka, aninye sik nong teikuka, atu kiploptuma babye, sik walwal ubuka unyak ning nirya ati, anggunce fia kum wilibuka bokeiptume. Ara, kum winipmanto atia. Sik awalwal uk unyak ninye ara, fia malye uk upnin banamake.

<sup>23</sup>Tonda domba basam ap, kambing basam ap, basam sirika ap weina deiyok nang arye, anggun weimunya ning ayala-yala nirya ati ara, ‘Sik una urasin ara yata wiribuka unyak do?’ tenen, fia moubuka dinamlume. Moubuka kel bikmunyop ura, aning nirya fia pi dobuka, teleb ubuka umunce weinamlume.

<sup>24</sup>Ayupu ara, talye ati kum nyapsine. Dekna weik ning ara, fia ati kum unamle. Atalak ara, bona weik talin ning taliplum bukni, ‘Aminyan talak ara, aning nirya tuba aunamle do, kum do?’ tenen, kum kel kiptume. Tonda, sik weik ninye deiyok Raja nang arye talinyak ning ap, talinyak mutuku ap ara, atalak aupmal bukni, ‘Aminyan talak ara, aning-aning nirya kum upnin banamle do, kum do?’ tenen, kum kel biknamabe. Ati ara, anggun winitalak talilulum ning nirya ara, teleb ubuka kalikinamlulume. Moubuka talepmunce, teleb ubuka fil donamlulume. ‘Aning nirya talibuka uniry, talye kanye bobuka, fia wininamne,’ tenelulum ning babye, fia kum unamle. Aning nirya ara, tia ning uk ulule.

<sup>25</sup>Aning atonun, wa win dam do, bai tam mutuku do, talye palamle mutmuta nirya sekuka bululinyake. Ara, ninye weilamak ning sik din dina atia. Tonda tia ati, ya arye tuplopmace ning, tuba tamubuka yuk ning palule. Aning nirya ara, tia ning uk ulule. <sup>26</sup>Ati anggunce domba basam fia teleb kibuka weilamunya ura, aminyan talak adomba basam el potong kobuka, adomba potong arye butum aling wibuka deibicip ura, butum aling ongonamlulume. Tonda, domba basam nong dobuka yuk nang ati dekropminyop ura, anang arye yo bok deice deikirye, ayo bok dopropminyop ura, aminyan talak weik pala tuku ton deknamlame.

<sup>27</sup>Aning atonun, anggun kambing basam teleb ubuka weilamunya ani, aminyan talak ara, moum yung weik aripsikiba, anggun ap, anggun

kilapu ap, anggun mapu ap, anggun aik unyak ninye nirya ap arye, dinamlume. Ati ara, anggun talilulum ning ayala-yala nirya ara, fia pi dobuka teleb ubuka kalikinamlulume.

**28** <sup>1</sup>Ninye ton teleb ubuka una kumce malye winin ning uk talibuka ulamice nang ara, yu nang arye sik ti kum dobolyanganmakibuk, sikcuk lilil upliba, bik-bik abuka bai tam sakuka banyake. Bukni, ninye ton diksukumuk ubuka ululnye elda, kanye imun ning aupli bukni, lilil una kumce, kanye lamapdongobuka ulule. Winipmanto ara, bai tam singa kus mandipna arye tiklamle tonun, ubuka unyake.

<sup>2</sup>Yata mutuku do nirya, ninye mutuku-mutuku nirya malye unyak nang aryuk amutuku ap, aninye ap talibikirye, weik ninye deiyok nang ubicop ura, amutuku nirya talibuka, yupu nyana deiyok nang ap, ninye deiyok nang kibuka unyak nang ap ara, minopce punuldanyake. Bukni ninye ton diksukumuk ubuka ulamice nang arye, amutuku ap, amutuku unyak ninye ap talibikirye, weik ninye deiyok nang ubicop ura, amutuku unyak nang ap, amutuku noutamak unamle ning nirya ara, teleb uk unamle.

Deiyok ara, sikce weik kel kiamik ning ap, moubuka tenena deice arye, sik unyak mutuku ap, sik amutam unyak ninye ap, teleb ubuka talinyakba, aning nirya teleb uk ulule. Ati ara, weik ninye deiyok nang una ati akunum ubikcop ura, minopce kum punulanamake.

<sup>3</sup>Fia bona utotoa talina kum nang bukni, yuk ninye arye anang erepdeipnikiba, bona utoto talina kum nang arye, weik ninye deiyok nang kibikirye, amutuku nirya talinyak bukni, sikce sik amutam ulamice, bona utotoa talina kum ninye ati, weik ikin ning sik nong deice deibikcop ura, ara fia malye weik ulule. Winipmanto ara, mok ceplirye, ninye arye koulamak ning deice saklyop ura, aning ayala-yala nirya ara teleb ubuka palule.

Bukni, weik mikip mok celamlirye, weik arye saklyop ura, ninye arye koulamak ning ayala-yala nirya ara, nirya oplobuka atu kilule. Bona utotoa talina kum ninye bukni, weik ninye deiyok ning talibikirye, sik amutam bona utotoa talina kum ninye ati, ikin ning weik sik nong deice deililamak nang ara, aning atonun unyake. Sikda fia malye uk ubuka unyake.

<sup>4</sup>Yatanye do nirya, sik weik ninye deiyok nang arye, “Aning ara wininamlulume, aning ara kum wininamlulume,” nyalice yupu ati, ‘Ayupu ara nun like’ tenen, yaniltalamak nang ara, winilamice deice arye, dipkoprop fia malye winin nang ati erenyake. Ara, talye ati kume. Ninye neika teleb ubuka una ati, “Wininamlulume, aning ara ton fia unamlume,” nyabuka deilinyak yupu ati, yaniltana uk unyak ninye ara, fia malye ning uk, talibuka unyak nang arye, wininyaka ati nyapne.

Bukni yata ninye do nirya, ninye neika teleb ubuka una ati, “Wininamlulume, aning ara ton wininamlulume,” nyabuka deilinyak

yupu ati kekebikirye, ayupu uk talibuka diksukumuk unyak ninye ara, wininyaka deice arye, wenena yupu yaniltana uk unyak nang ap, malye ning talibuka unyak nang ap ati, yupu sekenyake.

<sup>5</sup>Ninye ton diksukum una kumce, malye winin ning uk talibuka ululnye bira, elce teleb diksukum uning nirya ati ara walwal uk ulule. Diksukum uning ap, ninye yupu kekebuka teleb lipsisikuka bokolina ap ara, ‘Deiyok ara ani. Teleb uning ani, malye un ning ara ani’ tenen, fia kum tenepmanto ulule. Bukni yatanye do nirya, tuba-tuba Allah el si Yahweh arye nyalul yupu kekeplirye, Allah el si uk erelulnye bira, diksukum uning nirya dipkoprop kel kiplirye, ‘Deiyok ani,’ tenelirye, fia moubuka bikilule.

<sup>6</sup>Teleb ning ara, el fia bona utotoa talina kumnye ulul bukni, el talima fia diksukumuk ulule. Ninye ton bona weik talinyak bukni, tilila yupu nyapmaca deice arye, fia malye-malye uk upnin banyake. Talye daanyak ninye arye, ‘Se, bona weik talinyaka ara, fia telebe,’ tenenyak bukni, Allah el kanye ara, ‘Kume, bona utotoa talina kum ulamle bukni, talima diksukum ululnye bira, fia telebe,’ tenelule.

<sup>7</sup>Kam nang ap, kabunye kilapu ap unyak bukni, weik ninye deiyok nang arye, “Wininamlulume, aning ara fia kum wininamlulume,” nyapdeipmace yupu moubuka kekebikirye, aning uk talibuka dobolbanyak kam ninye ara, dipkoprop weik kel ninye unyake. Bukni, ninye deiyok nang arye nyanyak yupu yaniplobikirye, talye-talye daanyak mapu ap neika ukirye, teleb una kumce, malye ning uk talibuka dobolbanyak kam nang ara, dipkoprop fia walwal aryuk unyake. Aning atonun unyak mapu ara, sik malye unyaka deice arye, sik ni yapu ap, sik nin yapu ap ara, alye weik dakalinyake.

<sup>8</sup>Yatanye do nirya, ‘Bona talina ning uk taliptinye,’ tenebuka ulamlinye bira, malye winin ning uk ulule. Anye birye, yuk nang ati, ‘Yo bok arepkiniba, tia talak noutamak talyamninye ani, aminyan talak ayo bok tamubuka aripnamnilame,’ nyanyak bukni, ayo bok tamubuka aripnamak talak ara, “Uang yo bok weik tonap tabakuka aripnululume,” nyabuka, ikin weik ning anang nong deice deilinyake.

Wininyak ninye ara, ‘Weik arye tabakuka doproptinye,’ tenenyak bukni, aminyan talak ara sikce doproptnamak yo bok ap, yuk bona weik talin ning ap nirya ara, kum danin banamle. Allah arye, ikin ning sik nong deice deipliba, ‘Bona weik talinye uptinye,’ tenelulnye bira, aminyan saknamle. Bukni, Allah arye melipliba, ninye bona utotoa talina kum ninye ap, mikip fia kum ulamice ninye ap ati, bico tenebikirye, teleb ubuka melinyak ninye ara, Allah arye erepdeipnamle. Aminyan sirya talak ara, sicuk bona weik talin ning dopdopnamake.

<sup>9</sup>Allah ap, ninye deiyok nang ap arye, “Aning ara wininamlulume, aning ara fia kum wininamlulume,” nyapdeipmace yupu, yaniltana uk

anyak ninye ara, Allah ati moroptinga babye, Allah arye ato ninye arye moronyak yupu fia kum kekenamle. Ato ninye arye Allah ati morolamak yupu kekeplirye, ‘Sikce moroniyak yupu ara, na like,’ tenelule.

<sup>10</sup>Yata ninye do nirya, teleb ubuka diksukum ulamlanye biti, “Nun ap malye un ning neika wininamabe,” nyabuka, inina yupu deice arye iniprobikirye, malye kilinyake. Sikce winibikce deice arye, sikce sik bidamnya ati, malye ulilanyake. Allah arye aninye wenepnamle. Bukni, yata ninye do nirya, sik talima diksukumuk ulirye, tilila yupu nyana kum aryuk, teleb winin ning uk talibuka anyak nang ara, aminyan talak dekna ara, teleb ning uk dopdopnamake.

<sup>11</sup>Bona weik talibuka anyak ninye ara, sikce sik bidamnya ati, ‘Nunda weik kel nang anyabe’ tenen, sik talima ereldanyake. Bukni, sik aning-aning nirya talina kum ninye ati, sik bona utotoa talina kum ninye arye, sik bona weik talin nang arye ulamak ning, urasin nirya kel bikirye, ‘Kume, bona weik talinyak bukni, dipkoprop sikda weik kel nang kum unyake.’ Allah arye, ‘Aning ara mambul weik ning,’ tenelul ning ara, fia kum wininyaka anya arye, Allah el kanye ara, ‘Sikda bona utotoa talina kum ninye atonun unyake,’ tenelule. Dipkoprop talima teleb ninye bukni, bona utotoa talina kum ninye arye, bona weik talinyak bukni, kanye talima malye ninye ati, akunum kel bikinyake.

<sup>12</sup>Ninye ton teleb ubuka diksukumuk anyak nang ara, Allah arye, “Aning ara wininamlulume, aning ara fia kum wininamlulume,” nyapdeiyamsuk yupu moubuka talibikirye, weik ninye deiyok ning talibuka, sik anyak mutuku talibikirye, deiyok nang unamak talak ara, yuk talye daanyak ninye nirya arye, ‘E, anang ara fia telebe,’ tenebikirye, kanye deibuka unamake. Bukni, malye winin ning uk talibuka ulamlinye bira, erepdeibikiba, elce weik ninye deiyok talibuka, el unamle mutuku uk taliplirye, ninye deiyoknye uplyop ura, yuk talye daanyak ninye nirya arye, ‘Se, kanye imun ning nun dam yanuka upsilyak,’ tenebikirye, ninye kum unyakak bik-bik abuka duknulbinamake.

<sup>13</sup>Yata ninye do nirya, ‘Nun malye ulamupu ning, yuk nang arye kel biksicak’ tenen, sik malye winilamice ning kum batakikirye, tuba malye winin ning uk dungnubuka ulamice ninye ara, aminyan talak teleb kum upnin banamake. Bukni yata ninye do nirya, sik malye ulamice ning nirya ati, ‘Na malye winipse ning ara ani,’ nyabuka, laka arye laka nyabikirye, amalye un ning bataklamak ninye ara, Allah arye sik malye anyak ning ati, aninye adib aryuk wenebuka oplomtu bukni, bico teneplirye, sik malye anyak ning nirya kum kipdeiplirye, aninye ati melibuka teleb ulinamle.

<sup>14</sup>Aning atonun, yata ninye do nirya, malye upmace talak ara, adib aryuk sik kanye talima noutamak arye, ‘Se, nun malye upmape,’ tenebikirye, adib aryuk amalye un ning bataklamak ninye ara, Allah

arye aninye ati melibuka teleb ulinamle. Bukni, yuk nang ara malye ubikiba, deiyok nang arye, “Nun kayapu, anggunda malye upmalume,” nyabuka wenebicop ura, aninye ara, fia talima kat ninye unyaka anya arye, ‘Awenen yupu nun like, kum kekenamabe,’ tenekiry, awenen yupu ara yanina uk unyake. Aning uk wininyak ninye ara, aminyan talak weik ikin ning dopdopnamake.

<sup>15</sup>Ninye ton malye winin ning uk talibuka ulamlanye biti, ‘Nun ninye deiyoknye upnamsil’ tenen, wibuka erepdeibikiba, elce amutuku ninye nirya taliplyop ura, aning ara fia malye weik ulule. Ayupu ara talye ati kum nyapne. Winipmanto ara, bai tam ulamle yu singa kus do, bai tam ulamlanye ninye olamle ning, kam ning el si beruang do, ninye ati talye lukparabuka obikirye dinyake.

Aning atonun, sik malye ning uk talibuka unyak nang arye, weik ninye deiyok nang bikikirye, talibuka ubicop ura, sik amutam bona utotoa talina kum ninye ara, fia ikin weik ning dobuka, sik nong deice deilinyake. Ati, bai tam kam ulamlirye ninye olamle ning arye, ninye malye unyak nang arye, deiyok nang ubikirye, sik amutam unyak ninye deice, ikin ning delinyaka ara neiktoto uka. Abitinye ning ara, kanye imun usulule.

<sup>16</sup>Ninye deiyoknye, el mapu arye do, yuk ninye deiyok talibuka ulamice nang arye do, sik amutam ulamice ninye ati, yaniltalamaka deiyok nang ara, dipkoprop fia walwal aryuk unyake. Bukni, yata weik deiyok Raja nang do, sik tenepce yupu nyana ap, tilila yupu nyana ap, uang yo bok ubula dolona ap, fia kum ubikirye, diksukumuk ubicop ura, sik talinamak mutuku ap, sik ap teleb uk upnin banamake.

Sik diksukumuk unyaka deiyok nang arye, ‘Kume, malye una ap, tilila ning uk winina ap nirya ara, nun like,’ tenenyaka anya arye, yuk nang arye, ‘Nun deiyoknye duknubuka melinamsil’ tenen, yo bok dungnubuka arepdetinga babye, teleb ubuka unyaka deiyok nang arye, “Kume, aning ara kum dopropnamabe,” nyabuka, amalye winin nang ati wenenyake. Wininyaka ati ara, sik weik ninye deiyok nang talibuka unamak talak ara, lo fia weik arye unamake. Yuk deiyok nang arye minopce kum punupnamake.

<sup>17</sup>Ninye ton yuk nang oplolpiba, el ining ara, el deice uk uplanye bira, yuk nang arye el ti, ‘Doplampiya ani, tomopnamapa ara, anye bira wenebuka oplonnamabe’ tenen, dobona uk unamake. Anye bira, yuk nang arye fia kum melinamake. Tonda, ‘Ninye deiyok nang arye anye bira wenepnamak’ tenen, ninye onanye biti, kalikuka melipmunce, duknuna fia kume. Ninye olulnye biti, melina meme.

<sup>18</sup>Diksukumuk ulirye, tilila yupu fia kum nyalulnye bira, Allah arye anye biti lyeplirye, teleb kipdeipnamle. Bukni, yata ninye do nirya, sik kam unyak talak noutamak arye kwalin bisik uk banyak ninye

ara, aminyan talak Allah arye aninye ati, wenebuka oploplirye, sirya daknamle.

<sup>19</sup>Ninye ton asum-asum nirya wa mikip arye wilamlanye bira, nong upliba libuka dilule. El din ning ara, kum kum danalule. Bukni, asum-asum nirya wa moubuka wina kumce, tonda fil teleb ubuka dona kumce, talye-talye ulamlinye bira, aminyan talak el patapnamle ning nirya kum danin balamlya ani, aminyan talak ara, din dina kumce din bulang uk unamle. Elda, fia ikin weik unamle. Deiyok ara, elce fil teleb kibuka dona kum ati, ‘E, aning winipnamne do, aning winipnamne do?’ tenen, kum winipmanto ning, talye ning atibuk tenelula atia.

<sup>20</sup>Diksukum kanye bobuka, teleb winin ning uk talibuka ulamice nang ara, “Winipnamabe,” nyabikirye, aning batakana kumce, dipkoprop nyapmace touk wininyak nang ap, aminyan talak Allah arye sik ti dekne ning melibuka arenamle. Bukni, ‘Kume, na ara minopce bona weik talinanye uptinye’ tenen, minopce pirilulnye bira, malye uk ulula anya arye, aminyan talak ikin ning weik, el damak yanganamle.

<sup>21</sup>Ninye arye, sik kayapu nang ati, “Anggunda teleb uk ululuma anya arye, melinamabe,” nyanyak yupu ap, tonda deiyok kum upmale bukni, yuk daunyake ninye ati, “Anggunda nun kayapu nang koprop kum ululuma anya arye, wenena uk unamsiyabe,” nyabuka, nyanyak yupu ap ara, fia malye uk ulule. ‘Nun kwit bira ani, talinye bira ani’ tenen, talima wilildabirye, malye yupu kum nyapdatibye. Aning ara fia malye uning bukni, ton nang ara, “Kume, roti mitikanun do, mitik ning nirya babye, aripsumunyop ura, anggun patan ning dungnubuka arenamsiyabe,” nyanyake. Winibuka nyanyak ara, fia malye weik unyake.

<sup>22</sup>Ninye ton, ‘Nunda aning-aning nirya weik arye dopropbibirye, minopce bona weik talin nang unamabe,’ tenekirye, sik kayapu nang pataple ning kum melipmanto unyakce, malye un ning ap, tilila un ning anyuk winipnin banyake. ‘Nunda minopce bona weik talin nang unamabe,’ tenenyak bukni, sik malye-malye unyaka deice arye, aminyan talak sik talinyak ning nirya kum danin baliba, fia bona talina kum ninye uk unamake. Ati, ‘Minop bona weik talin nang kiptinye,’ tenena kume.

<sup>23</sup>Ninye arye malye upmace talak ara, sik kayapu nang arye, sik ti wenena yupu nyalinyak nang ara, sirya daknamle talak, anang nirya arye, wenena yupu nyanyak nang ati, “Wenelamsika deice arye, meilyamsika ati, sikda fia teleb nang unyake,” nyabuka, sik ti kanye delinamake. Allah arye, anang ati, menenga ning aripnamlarya.

Bukni, ninye arye malye ubikiba, tonoknye birye, ‘Anang kum wenepnun’ tenen, teleb yupu uk nyapliba, kekebikirye kanye deilinamak bukni, sirya talak ara, anye biti, kanye kum delinamake. Atonye birye utenelule. ‘Yuk nang nirya arye, nun kwit bira fia telebnye, tenepnamniak’ tenen, teleb yupu uk nyaliba, kekebikirye kanye deilinyake.

Winibuka atalak ara, kanye deilinyak bukni, sirya talak ara ninye nirya arye, anye biti kanye kum delinamake. Anye bira bataknamake. Tonda, Allah arye, ato nang ati, weik arye wenepnamle. Bukni, diksukum yupu uk nyalinye ati, fia weik arye kanye delinamake. Weik teleb ning ara, ninye yupu bokolina ati, lipsisikuka dipkoprop yupu uk bokolinamlulume. ‘Yuk nang arye na ti kanye deipnamniyake,’ tenena ara, fia kume.

<sup>24</sup>Yatanye do nirya, el li ap, el lin ap, sik ning ubula dopdoplirye, minin yupu deice arye, “Aning ara, na deipnirik nang bitinya, sik ning uk dopropmana anya arye, aning ara malye kum wininune,” tenebuka pililamlanye bira, dipkoprop fia weik malye ulule. El li ap, el lin ap talilamdeice ning, talye lukparabuka ubula dololula anya arye, yuk nang arye, aning-aning talye lukparabuka ulultaklamak nang atonun ulule.

<sup>25</sup>Ninye ton, ‘Nunda aning-aning nirya weik arye dopropbibirye, minopce bona talin nang unamap bukni, yuk nang nirya ara mitika aryuk dolonamake,’ tenekirye, aning-aning nirya ati, ‘Nun ning uk’ tenen, malye kanye bobikirye, aning nirya minopce dolonyak ninye ara, fia malye unyake. Sikce yuk ninye nirya ati, malye ulinyake.

Wininyaka deice arye, ninye nirya yu upliba, walanmaca ani, olana deiyok kounyake. Bukni, anggunda aning fia kum wininamlulume. Yatanye do nirya, anggun Ni Koprop Allah Yahweh ati, ‘Elcuk melinamsil’ tenen, dib tenebuka ulamunyop ura, aminyan talak dipkoprop fia teleb ning aripsilyop ura dopropmunce, teleb uk unamlume.

<sup>26</sup>Aning atonun, yata nang do nirya, sik bidamang kanye tenina deice aryuk, ‘Nunda weik kel nang unyaba anya arye, yuk nang arye nyasikce yupu ara dauplye,’ tenekirye, sik bidamang kanye talima dib tenebikcop ura, ara walwal nang atonun unyake. Bukni yata ninye do, sikce, ‘Kume, weik kel nang arye nyasikce yupu kekenamabe,’ tenebikirye, weik kel nang arye nyanyak yupu ara, moubuka kekebibirye, aning talibuka dobolbanyak ninye ara, dipkoprop teleb uk unamake. Ati, anggun damang kanye talima noutamak arye tenelulum ning ati, ‘Akunuma,’ tenena meme.

<sup>27</sup>Yata ninye do nirya, sikce bona utotoa talina kum ninye patanmalye ning ati melibuka arilamak ninye ara, sik bona utoto talina kum ninye melinamaka deice arye, sik bidamang patanamle ning nirya, fia kum danin banamle. Bukni, yata ninye do nirya, bona utoto talina kum ninye sik patanmalye ning ati, ‘Nunce kum melinamabe’ tenen, asing kulongonyak ninye ara, ikin upnamle. Ara, yuk nang arye sik ti, ‘Sik anang ara malye uk unyake. Yuk ninye ati bico kum tenesinyaka anya arye, sik ti supnamabe,’ tenenamake. Ati, aminyan talak ninye melina kum ninye ara, ikin kanye bobuka unamake.

<sup>28</sup>Malye winin ning uk talibuka ulamice nang arye, tonok mutuku nirya talibikirye, weik ninye deiyok nang kibuka ulamice talak ara,



sik amutam unamak ninye nirya arye, ‘Se, ikin ning nun dam yasilyak’ tenen, duknubanyake. Bukni, amalye ning talibuka unyak ninye dibicop ura, teleb aryuk kanye talima lamapdongobuka, fia diksukumuk ulamice ninye, sik yupa weik tonap tabakuka upnin banamake. Winibikirye, weik ninye deiyok ning talibuka, unyak mutuku talibuka ukirye, diksukumuk ubuka, ninye yupu lipsisikuka bokolinamake. Winipnamak talak noutamak nirya ara, sik amutam unyak ninye nirya arye, fia kanye deibuka unamake.

**29** <sup>1</sup>Yatanye do, malye uplye talak ara, ninye deiyok nang arye, “An malye unmalam ning ara, bataklyame, winina meme,” nyabuka wenenyak bukni, el mandipna kanye uplirye, ‘Kume, sik deiyok nang arye nyaninyak yupu ara, fia kum kekenamne’ tenen, sik yupu yaniltalulnye bira, aminyan ara Allah arye el ti tonok talak aryuk wenepliba, kum upradeipnamle. Akunum weneplirye, kum kipdeiplyop ura, anye bira, yata wiribuka lipsisikuka deiptingba, tamubuka teleb uptu do? Ara, fia kum winipmanto.

<sup>2</sup>Teleb uk ukirye, talima darapdongobuka fia diksukumuk ulamice ninye arye, weik ninye deiyok nang ukirye, sik talibuka unamak mutuku ara, diksukumuk ubuka, ninye yupu lipsisikuka bokolinamak talak noutamak nirya ara, sik amutam unyak ninye nirya arye, kanye deibuka unamake. Bukni, malye winin ning uk talibuka ulamice nang arye, tonok mutuku nirya talibikirye, weik ninye deiyok nang kibuka unamak talak ara, sik amutam unamak ninye nirya arye, ‘Se, ikin ning nun damak yanganamsil ning ara, nun like’ tenen, imun kanye bobuka engenamake.

<sup>3</sup>Yatanye do, weik kel bikna ning atibuk, pataliba fia tenina uk ululnye bira, el li birye el ti, kanye delilule. Bukni, yatanye do nirya, talye yoltanyak kilapu, sik tam kildolulnye bira, el talilul yo bok nirya ara, kum kipdeiplirye ititildalule. Winibuka kum dalyop ura, ikin weik unamle.

<sup>4</sup>Tonda, ninye deiyok talibuka ulul Raja arye, teleb ubuka taliplirye, ninye yupu bokolin talak, diksukum yupu uk nyaplyop ura, el talinamle mutuku nirya ara, fia teleb uk unamle. Bukni, amutuku moubuka talina kumce, malye winina deiyok nang arye, sik amutam ninye ati, “Yo bok weik arye arenamsilame,” nyabuka, aning weik arye dolonyaka deiyok nang ara, sik talinamak mutuku ap, sikce talinamak ninye nirya ap ara, ikin fia weik upnin banamle.

<sup>5</sup>Yatanye do, el kayapu nang, sik neika unamak ninye ati malye ubice ura, wenena kumce, ‘Yo dauplye’ tenen, teleb yupu uk nyalulnye bira, dipkoprop el kayapu nang, sik nong youna ati, elce tapu wena atonun webuka kintinililule. Elce wenena yupu ap, lipsisikuka nyana yupu ap, kum nyaplyop ura, el kayapu nang arye, tuba malye uk upnin balamica ani, aminyan talak ara, ikin weik upnamle.

<sup>6</sup>Ninye ton malye winin ning uk talibuka ulirye, malye uk ululnye bira, el bidamnye aryuk wena welidalule. Bukni, talima diksukum ululnye bira, teleb ning uk talibuka ulula anya arye, elda kanye deibuka fia teleb uk unamle. El ap, sik yuk diksukum unyak ninye ap, kanye deibikirye, mot sebuka unamake.

<sup>7</sup>Teleb ubuka ukirye, dipkoprop ning uk talibuka diksukumuk unyak nang ara, mikip fia kum ninye ap, bona utotoa talina kum ninye ap ati, ‘Diksukumuk ubuka ubirye, aninye ati teleb kilin ning ara, ani-ani,’ tenebuka, moubuka kel bikinyake. Bukni, malye ning uk talibuka unyak nang ara, bona utotoa talina kum ninye ap, mikip fia kum ubuka ulamice ninye ap ara, sik patalamle ning ati, fia kum tenenyake.

<sup>8</sup>‘Malye winin ning uk uptibye’ tenen, patalye nang ara, teleb un ning nirya ati, nilik-nilik abikirye, aku tunyake. Wininyaka deice arye, aning-aning nirya, fia weik arye ulul mutuku, kota noutamak unyak ninye nirya ati, malye kilinyake. Sik malye yupu nyanyaka deice arye, amutuku ninye nirya ara, yupu waldana ap, olana ap, unyake. Bukni, teleb winin ning uk talibuka unyak nang ara, weik kel bikna deiyok ning kel kiyamica ati, yuk ninye yu upliba, waldana uk unmace talak ara, “Kume nun kayapu, aning ara batakulume. Tunimabuka unamlume. Teleb ubuka neika unamabe,” nyabuka, namin yupu nyanyaka deice arye, yu un ning nirya ara, kum kilinyake.

<sup>9</sup>Tonda, weik kel bikinanye ap, walwal uk ululnye ap, waldanmarice talak ara, ‘Winira ninye yupu lipsisikuka bokolina deiyok nang dam binimnyeba, sikce ayupu bokeipnamsiyake’ tenen, anyaik bitiringa babye, awalwalnye bira, el talima noutamak malye yupu welepliba, surikuka aku tununa ap, weik yupu deice malye yupu nyana ap, fia nyanamle. Wininmalyop ura, sik nyaldanmarice ning ati, ‘Deiyok ara ani,’ tenebuka, sirya kum daknamdake. Ikin uning ap, dereldaning ap awamli bukni, yupu bokolina aik arye, batakuka bindopnamdake.

<sup>10</sup>Yu kanye bobuka unyak nang arye, ‘Ninye ton optibye,’ tenena uk unyake. Fia yu weik nang unyaka anya arye, kanye talima diksukumuk unyak ninye ati, ‘Nun like,’ tenenyake. Tonda, sik talima yu weik unyak nang arye, ‘Se, sik teleb ning uk talibuka unyak ninye ara, nunda talye lukparabuka oltakana uk uptibye,’ tenekirye, patalule.

<sup>11</sup>Fia walwalnye birye, ninye ati derenamalye talak ara, tenilena kumce, talye lukparabuka mikip arye, lakak yu yupu nyaltakalule. Bukni, weik kelnye bira, el talima noutamak yu upmalya babye, yupu nyapnulye ura, nimalye arye tenebuka, yupu nyapnin banmalya ani, namin yupu uk nyalule.

<sup>12</sup>Tonda, weik ninye deiyok talibuka, pemerintah deiyok nang arye, minina yupu ap, tilila yupu ap talye lukparabuka nyanyak nang arye nyanyak yupu kekebikirye, “E, na kayapu nang ati telebe,” nyabikirye,

atilila yupu nyanyak nang ati, kinamak ura, sik amutam fil don nang pegawai nang nirya babye, atonun tilila yupu nyalakirye, malye uk ubuka unamake.

<sup>13</sup>Bona utotoa talina kum ninye ara, sik deice tam talibuka ukirye, ikin ning bobuka, sik bona utotoa talina kum ninye, sik nong deice deilinyak ninye deiyok nang ap, nirya arye, sik tenebice ning uk wininyake. Ara, abitinye yala ninye ati, Allah el si Yahweh arye, sik asing lapdeiplirye, el dirina arepliba, sik asing arye aning nirya elinyake. <sup>14</sup>Weik ninye deiyoknye birye, mikip fia kum ninye ap, aning-aning nirya kum talinyakce, fia bona utotoa talina kum daunyak ninye ap ati, teleb ubuka yupu bokeiplyop ura, elce amutuku ninye ap, amutuku ap talinamle talak ara, lo fia weik upnin banamle. El ti minopce kum punupnamake.

<sup>15</sup>Sik mitik mapu ara, mangkau arye malye ubicop ura, 'Dauplye' tenen, luba kum kipnamlume. Sik ni yapu ap, sik nin yapu ap arye, adib aryuk peterena ap, wenena ap ubica deice arye, weik kel bikna deiyok ning yangalule. Bukni, sik ni yapu ap, sik nin yapu ap arye, sik mapu ati kum wenebikiba, sik talye kanye bobuka daulamica ani, aminyan talak ara, sik fia malye-malye uk unamaka anya arye, winibuka malye unamaka deice arye, sik nin yapu ati, alye dakalinamake.

<sup>16</sup>Malye winin ning uk talibuka ulamice nang arye, tonok mutuku nirya talibikirye, weik ninye deiyok nang kibuka unamak talak ara, sik amutam unamak nang nirya babye, malye winin ning uk talibuka ukirye, malye weik upnin banamake. Bukni, yuk mutuku nang arye, amalye ubuka ulul ninye deiyoknye biti, obuka daknamak talak ara, amutuku noutamak, sik diksukumuk unyak ninye arye, moubuka dinamake.

<sup>17</sup>Tonda, anggun mapu nirya ati, teleb ubuka peterepmunya deice arye, teleb ubuka kel bikicop ura, aminyan talak teleb uk upnin balamikiba, eipmunce, kanye deibuka unamlume. Anggun mapu arye, teleb ning uk talibuka ulamicop ura, sik ni yapu ap, sik nin yapu ap arye, 'Se, nun mapu ara, yatato ning uk unamak do? Malye unamak do, teleb unamak do?' tenen, ilil kum unamake. Kanye deibuka sik nirya teleb uk unamake.

<sup>18</sup>Allah arye, "Aning ara wininamlulume, aning ara fia kum wininamlulume," nyapdeiyamsuk yupu ap, atalak noutamak ara nun talima noutamak nyasilye yupu nirya ap, 'Ayupu nun kum kekepnuyabe,' tenebikirye, yaniptabicop ura, fia malye winin ning uk unyake. 'Aning ara teleb do, malye do?' tenena kumce, sikce tenenyak ning uk, talye lukparabuka malye upnin banyake. Bukni, yata nang do nirya, Allah arye, "Aning ara wininamlulume, aning ara fia kum wininamlulume," nyapdeiyamsuk yupu kekebuka, mitang asa arye umunyop ura, kanye deibuka teleb uk unamlume.

<sup>19</sup>Ninye ton, anggun amutam fil melibuka don nang arye, malye ubicop ura, sik wenena ati, yupu nimalye arye lipsisikuka kum wenenamlulume.

Yupu deice aryuk wenepmunyop ura, afil dona ati melinang arye, moubuka kum kekenamake. Sik deiyok nang arye nyanamak yupu, ‘Deiyok ani,’ tenen, moubuka tenepnamak bukni, sik deiyok nang arye, “Winipnamlume,” nyabuka wenenamak yupu ara, kekebuka fia kum dobolbanamake. Sik anang ara, sik deiyok nang nyace yupu batakalongona uk unamaka anya arye, sik fil melina nang ara, mikip arye wenenamlulume.

<sup>20</sup> Aning atonun, anggun ton tenipdelulume. ‘Anyapnusin yupu ara, dib do, tilila do? Tonda, anyapnusin yupu ara, teleb ning do, malye ning do?’ tenen, moubuka tenina kumce, talye luparabuka malye yupu uk nyaltakalulnye bira, teleb ning ara lipsisikuka kum petereptume. Lipsisikuka laka nyaptuma babye, anye birye, anggun yupu fia moubuka kum kekenamle. Walwal ululnye bira, moubuka peterepmunyeba, kel kipnamle bukni, moubuka tenena kumce, talye luparabuka minopce yupu nyaltakalulnye bira, kum lipsisikuka petereptume. Anye biti ara, ‘Dauplye’ tenen, batakanamlulume.

<sup>21</sup> Sik amutam ukiryte, sik fil melibuka don nang ara, mitikop dorapce dipdongobuka nepnin balamlya ani, akunum neplyop ura, atalak noutamak nirya, el patalamle ning nirya ap, el morolamlye ning nirya ap, talya lukparabuka arepmunyop ura, aminyan talak weik arye akunum neplyop ura, mandipna kanye weik upnin baliryte, anggun nyapmunye yupu nirya yaniptapliryte, fia kum kekenamsile. Elda, ‘Na deiyok nang arye, nyaninyak yupu ara, kum kekenamne, na like,’ tenenamle.

<sup>22</sup> Ninye ton minopce yu welepliba, yuk nang ati walamlanye bira, el yu weik ulya deice arye, el ap yuk nang ap, oldanyake deice arye, oldana weik arye oldanyake. Atonye bira, yu weik ulya deice arye, malye un ning fia weik arye talibuka ulule.

<sup>23</sup> Teleb kanye bobuka, talima darapdogobuka ululnye bira, namin asa arye ulamlya ani, yuk ninye arye anye biti, eibuka kel kibicop ura, ‘Elda teleb ubuka ulule’ tenen, ereibikirye, el ti kanye deibuka kinyake. Bukni, sikce sik bidamnya ati, talima erepdakiryte, maknye kikipdanuka unyak nang ara, yuk nang arye sik wininyak ning, kel kibicop ura, anang sik amutam uk deipnamake. Anang ati, kanye deibuka kum kinyake. Mangkau kilongona uk unamake.

<sup>24</sup> Ninye ton ubula bolamlinye ap, sik neika melibuka ululnye bira, el bidamnye ati malye kililule. Tonda, wenenak anyuk dauliryte, “Na ap, anye ap, nunce ubula doproprnumu,” nyabuka, akunum laka nyaplyop ura, wenebikirye, ikin ning fia weik arye deilinyake. Bukni, ubula dolulnye ap, sik neika melibuka ululnye birye, aning nirya laka kum nyaplyiryte, tunimabuka uplyop ura, aminyan talak Allah arye, anye biti weik arye wenepnamle.

<sup>25</sup> Ninye ati ilil tenebuka unyak nang ara, ikin kanye bobuka unyake. Tonda, sikce atalak-atalak nirya ara, ‘Se, yata wiripnamak do?’ tenen, ilil

asa ukirye, dungnuldanyake. Bukni, yata nang do nirya, Allah Yahweh atibuk, 'El bidamnye aryuk melibuka kalikinamnile' tenen, el tibuk dib tenebuka ululum nang ara, anggun damak ausilirye melisiliba, kanye deibuka umunce, fia teleb uk unamlume. Tuba ilil kum unamsile.

<sup>26</sup>Tonda, ninye nirya fia weik arye, 'Aweik ninye deiyok nang arye ton melipsitinge' tenen, tukwak mutuku talibuka weik ninye deiyok nang, pemerintah nang sik urasin ati pataliba enyake. Anang sik dam uk morolbanyake. Bukni, dipkoprop, 'Fia teleb uk unamne' tenen, pataliba ululnye bira, 'Na Ni Koprop Allah Yahweh, elcuk melinamnile' tenen, Allah el dam uk ulirye, el tibuk fia moronamle. Allah aryuk anye biti, teleb ulinamle. Teleb ubuka una deiyok ning ara Allah Yahweh elcuk aresulule.

<sup>27</sup>Talima teleb ululnye bira, diksukumuk ulula anya arye, sik malye ning talibuka, malye uk unyak nang arye, anye biti, 'Nun like,' tenenyake. El ti telebe tenebuka kanye kum deilinyake. Aning atonun fia diksukumuk unyak ninye arye, sik malye unyak ninye ati, telebe tenebuka kanye kum deilinyake. Fia teleb unyak ninye babye, malye unyak ninye babye, sik nirya ara, 'Nun like' teneldanyake.

**Ninye si Yake, el mi Agur birye mambul yupu  
nyapdeiamuk ati nyabuk yupu**

**30** <sup>1</sup>Minop talak ninye ton, el si Yake, el mi Agur birye mambul yupu nyapdeiamuk ning ara ani.

Diba na ni Allah, na ara mikip fia kumnye ununa anya arye, winira na mikip akunum kum danin banmanile. Na ikin kanye bobuka unmana deice arye, fia tenina uk ununa anya arye, 'Se' tenen, mikip fia kum uniliba, fia tenina uk unune.

<sup>2</sup>Na ara, fia weik walwalnye ununa anya arye, 'Teleb ubuka un ning ara ani,' tenebuka kum unune. Yuk weik kel nang arye unyak atonun, kum unune. Na ara talye kam ulamle ning arye, kanye moubuka kum tenelamaka atonye unune. <sup>3</sup>Winibuka una ati ara, Allah elda, malye ning tonok ning babye kum ulirye, fia teleb uk ulul bukni, na ara el winilul ning moubuka kum bikamse. Na ara, fia walwal kopropnye unune. Aning atonun, tukwak ninye bukni, sikce weik kel bikna deiyok ning, akunum moubuka kel bikamik nang arye tenenyak ning ara, na fia kum tenenune. Allah ulul ning ap, weik kel bikna deiyok ning ap ara, mitik ning babye, na arye ton fia moubuka tenenirye, kel kum bikinune. Na ara, walwal kopropnye unune.

<sup>4</sup>Yatanye birye, im deice welepmatu ani, tamubuka kolukuka yatu do? Aning atonun, yatanye birye kumanya balamle ning nirya, el taruk arye talipturye tonokak bulubuka deiptu do? Aning atonun, yatanye birye weik laut mekwen nirya, el butum aling arye kitibuka deiptu do? Yatanye

birye mutuku sirya, im sirya ap, tukwak mutuku noutamak ulul ning ap, im noutamak ulul ning ap nirya ara, kwepdeiamuk do? Aning-aning Kwelina Deiyoknye ap, el mi koprop ap, sik si arando? Yatanye birye aning bikamuka deice arye, na ti laka lebuka peterepntu do?

<sup>5</sup>Allah ance nyalisilyam yupu nirya ara, fia dipkoprop uk ulule. Tonok yupu babye, tilila yupu ton kum ulule. Yata mutuku ninye do nirya, angguncce, 'Allah aryuk melibuka kalikinamsile. Nun olan nang arye opsicak' tenen, nun melina ati, Allah aryuk aninye ati, obuka bisipnamle. Ati ara, ninye mutuku-mutuku nirya, Allah an dam uk, bulubuka wekelyanganyake.

<sup>6</sup>Yatanye do nirya, Allah arye nyasilye yupu aupmal bukni, 'Na arye yupu tonap tabakuka nyapnune,' tenena meme. Anggun bidamnye aryuk yupu tabakuka kum nyanamlulume. Winipmuncce, yupu talye-talye ning ap, tabakuka nyapmunyop ura, Allah arye anggun ti wenenamsile. Tonda, aminyan talak yuk ninye arye sik ti, "Kume sik bidamang kanye tenen ning aryuk, tabakuka nyapsika ati, sikda tilila yupu nyana nang uk unyake," nyabuka wenenmamsiyake.

<sup>7</sup>Se, na ni Allah, na moropmakin ning ara, na min kum dipmanye talak arye, 'Abitinye ning ara aripnutume' tenen moropkine. <sup>8</sup>Tonok ning ara ani. Ara, ance meliniminba, na arye tilila yupu nyan ning nirya ara, kum nyanamne. Bitinye ning ara ani. Ara, fia bona talina kum ninye ulamice ning ap, bona weik talin ninye ulamice ning ap ara, na damak arye dobuka, yuk tam dadelilyanamnilame. Aning nirya, na dam uk batakmnye ura, bona talina kum ninye ulamice ning ap, bona weik talin ninye sik winilamice ning ap nirya ara, na damak kum yanganamnilame. Teleb ning ara, dipkoprop na patanilye touk, aning uk aripnutumba, kanye deibuka teleb uk unamne. 'Winibuka melipnutumba, teleb ubuka unamne' tenen, na ni Allah an ti moropkine.

<sup>9</sup>Aning moropmakina ara, talye ati kume. Deiyok ara ani. Na ara bona weik talinanye ulamtinyeto ura, na arye an ti, "Yo, Allah elda yatanye ulul do? Na ara aning-aning ayala-yala nirya talinune anya arye, Allah elda kum patanulule," nyabuka, mandipna arye nyapkitinye. Tonda, na ara fia bona utotoa talina kum ninye ulamak touk ulamtinyeto ura, aning-aning nirya ara, na ton fia kum ununa anya arye, weik arye pataniliba, na arye yuk ninye talinyak ning ubula dopra balamtinye. Winibuka balamtinyeto ura, yuk ninye eipnitingce, na ni Allah an fia teleb ulyamnye si deice arye, malye-malye yupu nyalinamkiyake. 'Ati, na malye winipnyak' tenen, na ni Allah, ancuk melibuka kalikinamnyame. Na patanamnil touk, fia aning uk melibuka aripnamnilame.

<sup>10</sup>Anggun kayapu nang ati, "Sik malye unyake," nyabuka, anggun fil don deiyok nang dam, fia kum nyalbanamlyame. Anggun kayapu nang ati malye yupu fia kum nyanamlulume. Malye yupu nyapmunyop ura,

anggun kayapu nang arye yu upliba, anggun ti supsikiba, aning nirya ara, anggun dem uk dolonamlulume. Amalye un ning nirya dopropmunye ura, anggun uk malye kilildanamlume. Amalye yupu nyanmamunya deice arye, ikin ning weik anggun nong deice yanganamsile.

<sup>11</sup>Ton ninye ara, sik ni yapu dorapce, deipdanin yangalamik ninye nirya ati, supnin yangalamik. Winipdanin, yangalamik ani, sik nin yapu nirya babye, fia teleb kanye ton bobuka kum ulamik. Winibuka ulamikce, sik ti, “Telebe,” nyabuka kanye kum dellilamik.

<sup>12</sup>Atonun, sikce deipdanin yangalamikce, sikce sik bidamang ati, ‘Nunda fia teleb nang uk unyabe,’ tenelamik bukni, dipkoprop sik aninye nirya ara, fia tuba malye uk ulamik. Awinibuka unyaka atonun unyak ninye nirya ara, winipmanto ara, nininga fia weik ulul bukni, mek fia kum kekenyak ninye ulamak touk unyake.

<sup>13</sup>Tonda, amalye unyak ninye nirya ara, bisina weik ukirye, fia makna kintinildakirye, sik bidamang aryuk ereldanyake. Sikce, ‘Nun tonok ara, fia teleb nang unyap bukni, yuk ninye nirya ara, malye uk unyake,’ tenelanyakce, kwalina uk unyake. Aninye ara, fia malye uk unyake!

<sup>14</sup>Afia malye-malye upra banyak ninye, sik si nirya ara, parang ya si atonun unyake. Aninye sik dumdam si ara, topnung kapu tace atonun ulule. Winibuka ulula anya arye, tukwak mutuku unyak ninye arye, ‘Aninye ara, fia mambul kume,’ tenenyake. ‘Sikda, talye bona utotoa talina kum ninye uk unyake,’ tenenyak ninye nirya ap, mikip fia kum ninye ap nirya ara, obuka kum danibikirye, sirya dakanyake.

<sup>15</sup>Yo kan-kan talye ulamle ibye arye, ‘Ninye ining ton dipnun do?’ tenen, ninye nong deice doulyalirye, si topdongobuka ining dilul bukni, elce, ‘Na akunum dipman arye boupmanile,’ kum tenelule. Amitik mirin ibye el si bam bol deice arye nyalule, “Na ara ninye ining uk fia dinamne,” nyalula anya arye, ninye ining fia weik dinmalya babye, ‘Akunum dipman arye, boupmanile,’ kum tenelule.

<sup>16</sup>Aning atonun, winilyeto, dum baryeto dinmalya babye, bouna kum ulule. Tonok ning ara, ninye diplamak ninye unyakak ap, mapu delina kum you kilapu arye, ‘Nun mi ton deiptibye’ tenen, pirilenamak bukni, mi fia kum deipmanto unamake. Aning atonun, sesal selamle tuku deice ara, mok purwe saktua babye, fia namin kum uptue. Tonda, uku dinibikiba, uku buk dingum abuka doulyalirye, dipnin banmalya ani, sirya kum dakalule. Aning dum barye ning nirya ara, fia kum boupmanto, tuba fia patana uk unamle.

<sup>17</sup>Ninye ton el li koproba ap, el lin ap, sik akunum wisi dadikirye, aik bukdice talak ara, sik bitinya ati, aku tubuka malye yupu nyalulnye bira, aminyan talak Allah arye, anye bira wenebuka oploplirye, bai tam donokliba, gagak maka ap, rajawali maka ap arye, anye bira el asing ara, lukuka dipnamdake.

<sup>18</sup>Weik mambul ning winilye ning ap, tonda dum barye ap ati, ‘Se, sik wininamak ning ara, yata wiribuka winipting do?’ tenen, deiyok ara fia kum tenepse. <sup>19</sup>Tonok ning ara, bip maka ara, el pol deice arye lakuka balule. Bukni, bip maka lakuka balibuk eipnyop ura, ‘Se, yata wiribuka el pol potong aryuk lakuka balul do?’ tenenune. Bitinye ning ara, cang kwatima tonok arye, weik cang keil bukamturye, alap ulamtu keil deice balya ara, eipnyop ura, ‘Se, yata wiribuka alap keil deice kanam asa balul do?’ tenenune. Winilye ning ara, weik laut mekwen deice balamle kapal arye mekwen deice arye banmalya ani, el tenepmalye sukumuk balul bukni, laut mekwen deice ara, el bisik binmanto ak dala ton kum ulule.

Ati, teleb ubuka balul bukni, aning eipnyop ura, ‘Se, laut mekwen deice ara, bisik laka kum ulula anya arye, yata wiribuka akapal laut arye amekwen deice banmalya ani, el tenepmalye sukumuk balul do?’ tenenune. Banmalye bisik ara laka ton ulul do? aning ara, kum winipmantoe. Dum barye ning ara, kamnye kil ap, kamnye ap, kanye deipdarica deice arye, anye birye akil ati, dopnamne teneplirye, teleb ubuka kanye delilule. ‘Aning babye mambul ulule,’ tenenune.

<sup>20</sup>Tonok ning ton, na arye moubuka kum tenipnamtinye ning ulule. Ara, kil tonok el akanye akunum dobuk kil bukni, el akanye ap neika teleb ubuka una kumce, talye ulamlirye, yuk nang ap talye yoprakirye, malye ulamlya ani, adib aryuk akil arye nyalule. “Kume, na yata malye unya ati wenepmanilam do?” nyalule. Winibuka nyalul bukni, dipkoprop fia malye ulula anya arye, ayupu nyalul ning ara, ‘Yata wiribuka ayupu talye nyaptu do?’ tenen, moubuka kum teninune.

<sup>21</sup>Aning atonun, tukwak ninye arye wininyak ning winilye do, dum barye do, malye unyaka deice arye, tukwak mutuku nirya sirim talina atonun ulule. Tukwak mutuku unyak ninye mutuku-mutuku nirya, ‘Adum barye ning ara, dipkoprop fia malye weik ulule,’ tenenyake. Amalye un ning ara, ani. <sup>22</sup>Tonok ning ara, ninye amutam ulirye talye fil melinanye bira, yuk nang arye erepdeiptingba, ninye deiyoknye Raja kiptu ura, ninye nirya arye, ‘Se, aning ara yata ati do?’ tenebuka malye kanye bonyake. Bitinye ning ara, ani. Ara, fia walwalnye birye, malye weik upnin balamlirye, ‘Na tenepnye ning uk nirya talye lukparabuka winiptinye,’ tenelirye, el teneplye touk upnin balirye, doproplyop ura, yuk ninye nirya arye, ‘Se, aning ara yata ati do?’ tenebuka malye kanye bonyake.

<sup>23</sup>Winilye ning ara, tonok kil ara, el kam ulul talak upnin banamle ning nirya ara, yu weik ap, malye kanye bona ap, aning uk kipnin balamlya ani, ‘Ninye nirya ati lik upliba, na like,’ nyalamle kil ara, aminyan talak ninye ton akil doproplyop ura, yuk ninye nirya arye, ‘Se, aning ara yata ati do? Sik neika teleb ubuka kum unamdake,’ tenebuka malye kanye bonyake. Dum barye ning ara, ani. Ara, tonoknye



el dobuk kil, akil amutam ulamlirye talye fil melibuka dolamlye kil bukni, el akanye birye mince domlye kil bataklirye, atalye fil melina kil doproplyop ura, yuk ninye nirya arye, ‘Se, aning ara yata ati do?’ tenen, malye kanye bobuka unyake. Adum barye winin ning nirya ara, ninye mutuku-mutuku nirya, ‘Aning ara fia malye un ning uk,’ tenenyake.

<sup>24</sup>Tonda, tukwak mutuku noutamak ara, fia mitik ning dum barye unyake bukni, amitik ning ara, fia weik kel ning unyake. <sup>25</sup>Tonok ning ara, fia mitik ning el si ara tulik ulule. Elda mikip weik kum bukni, ‘Aminyan talak yata ning dinamne do?’ teneplirye, el denamle ning tuba-tuba bulubuka delilbalule. <sup>26</sup>Bitinye ning ara, ani. Mutuku gon deice ulamle kam ning, el si ara pelanduk, el nong mitik ulirye, el mikip ara mitang uk ulul bukni, el aik ara, mutuku gon keil si dam dolule.

<sup>27</sup>Winilye ning ara, sul kwising ara, sik deiyoknye ton kum ulirye, “Winibuka unamlume,” nyabuka, yupu kum nyalul bukni, sik yuk aryuk bulubukabikirye, ninye yin talin nang lelebuka balamak touk, asul kwising babye, kum nukmanto bulubukabikirye, lelebuka banyake. <sup>28</sup>Dum barye ning ara, mitik ball taruk deice yanibuka balamle bal el si ara cicak, ninye taruk arye tomonyak bukni, weik ninye deiyok Raja nang sik fia teleb aik fum tam babye, aunyake.

<sup>29</sup>Tonda, tukwak mutuku noutamak ara, dum barye talye kam ning ton mikip arye yaribuka, sik tenepmace sukumuk banyake. <sup>30</sup>Tonok ning ara, bai tam ulamle yu weik kus, el si ara singa, elda bisina weik ap, yu weik ap ulul ning anya arye, aning ayala-yala nirya, banmaca noutamak arye, mikip dobuka balule. Elda ilil una kum dib aryuk, yata ning do nirya, yuk kam ning aupmalye babye, talye mangkau kibuka mikip dobuka balule. Ilil fia kum tenelule. Elda, yuk bai tam kam ulamle ning nirya deice tam ulirye, sik deiyoknye atonun ulule. Yuk bai tam kam ulamle ning ayala-yala nirya ara, el amutam unyake.

<sup>31</sup>Bitinye ning ara, yim kambing basam ap, winilye ning ara, yim ayam nirya ap, sik nirya mikip arye banyak talak ara, kisok erebuka kwalilamake. Dum barye ning ara, weik ninye deiyok nang, sik Raja nang arye, ‘Na yin talin nang ap yuk mutuku ninye olbinuyap’ tenen, menekuka banmaleba, sik amutam nang nirya melibuka banyake. Anyapmasin ning nirya ara, urasin teleb ubuka banyake.

<sup>32</sup>Siry a ning ara, ayupu ton nyapsine. Anggunce, kwalina uk upmalum ning ap, ‘Malye winin ning uk unamap,’ tenena uk, upmalum do, kum do? Moubuka tenipdemunce, awalwal una ap, malye una ap auplyop ura, anggun taruk arye, sik si bam bol ipdongopmunce, yupu tunimabuka unamlume. Anggunce, “E, nunda talima erebibirye, walwal winin ning uk winibupu,” nyabuka, makna kintinina kume. Tonda, ‘Ayupu nyabibiba, yuk nang arye, nun ti, ‘Se sikda, bisina weik nang unyake,’ nyabuka, si erenamsiyake,’ tenena kume. Anggunce malye umunye ning

ara, yuk nang sik kekenak, laka kum nyanamlulume. Winibuka malye uk umunya arye, alye dakdamunce, talye lamapdongobuka unamlulume.

<sup>33</sup> Anggun akunum kel bikamlume. Sapi basam el moum yung doprobikirye, longteng-longteng abicop ura, aminyan talak roti din ning deice likilamak ning, el si ara mentega, nong kipnamle. Atonun, ance ninye u malukminba, u fum bisik arye ining saknamle. Aning atonun anggunce yuk ninye ati, yu tenepmunce, yu yupu nyapmunye ura, dipkoprop ayupu nyapmunya deice arye, yuk ninye nirya babye, yu upliba, weik arye tekildanamake. Tonda, adeice arye olanamake.

**Ninye deiyoknye el si ara, Sisinanye Raja Lemuel birye sekdeipsuk yupu**

**31** <sup>1</sup> Ayupu ara, ninye deiyok kibuka ulamuknye el si ara, Sisinanye Raja Lemuel birye nyabuk. Amambul yupu ara, el lin birye el ti peterelamukba, kel kiamukce sekdeipsuk.

<sup>2</sup> Na mi koprop, na arye deipkisinye, an ti na talima an deice deipkise. Ara, na arye Allah ati morolamsa deice arye, el kekepnuke aripnuke deipkise. Ati, na arye an ti mambul yupu nyapnukine. <sup>3</sup> An mikip ukilye ning ara, talye daunyak kilapu ati, talye-talye uk kum arenamlyame. Ninye deiyok talibuka Raja unyak nang weik arye, talye daunyak kilapu ati tenilamiyop ura, aminyan talak akilapu arye, an ti malye ulinamkiyake. Ati ara, talye-talye daunyak kilapu ati, fia tenina kum unamlyame. Akilapu sik dam bana kume.

<sup>4</sup> Aning atonun, anda Raja Lemuel, ance yu mek kanye wangalamak mek dipmince, kanye wangapmince, ‘Malye winin ning winipminyak’ tenen, nyapkine. Ati ara, anyapkin yupu fia tenina uk unamlyame. Teleb unyak Raja nang arye, kanye wangalamak mek weik arye kum dinyake. Weik ninye deiyok nang arye, sik amutam unyak ninye ati, talinyaka anya arye, kanye wangalamak mek weik tonun patalul buk, kum dinyake.

<sup>5</sup> Ayupu ara, talye ati kum nyapkine. Deiyok ara ani. Ara, weik ninye deiyok nang, Raja arye yu weik mek weik dibicop ura, sik fil dona deiyok ning nirya luba kinamake. Winibicop ura, bona utotoa talina kum ninye do, mikip fia kum ninye do, ikin kanye bobuka unyak ninye do, ninye arye, ‘Aninye ara mambul kum ninye anya arye dauplye’ tenen, yanildongonyak ninye ap, sik amutam unyak ninye nirya ati, teleb ubuka kum meliptinge. Tonda, yu mek dibice deice arye, sik kanye wangapliba, ninye yupu teleb ubuka kum bokipnamake. Sik amutam unyak ninye ati, yaniltana uk ubikirye, aninye nirya ati malye ulinamake. Ati, Raja nang ara, kanye wangalamak mek weik arye dina kume, nyapkine.

<sup>6</sup> Yu mek dipmakiba, kanye wangalamak nang ara, sik kanye talima nirya luba kilsinilul nang ara, sikce sik bidamnya ati olildanyake. Ara, dibina damak unyak ninye arye amek dinyake. Tonda, kanye imun weik

upliba, ‘Nunda fia kum winipnamtibye’ tenen, malye kanye bobuka unyak ninye arye, ayu mek weik arye dinyake. <sup>7</sup>Tonda sik anang nirya arye, yu mek dinyaka ara, sik ikin ning noutamak unyak ning ap, sik talin ning nirya kum upmalibuk, fia bona utotoa talina kum ninye uk unyak ning ap, luba kibikirye, ‘Nun ikin usilye ning nirya tenena kumce, talye kanye bobuka unamap’ tenen, yu mek, kanye wangalamak mek dinyake.

<sup>8</sup>Anda ninye deiyoknye, Raja ulyama anya arye, yuk ninye ara, an amutam ukirye, yupu mikip arye nyapmanto kum ninye ap, ninye arye, ‘Aninye ara auplye’ tenen, yanildongonyak ninye ap ati, tenemince, sik melina ati yupu melibuka nyanamlyame. Ton tam nang arye, yuk nang ati tomobikirye, “Anang oplopnuyabe,” nyabikcop ura, ancuk aopnuce ninye sik melina ati, yupu melibuka nyanamlyame. Winipminya deice arye, ninye yupu teleb nyabuka bokipnamake. Anda Raja Lemuel birye, sik bona utotoa talina kum ninye nirya ati, ‘Anang ara na tam nang uka,’ tenebuka, melibuka kalikdanamlyame.

<sup>9</sup>Dipkoprop tuba tamubuka tonap nyapkine. Anda ninye deiyoknye Raja akunum unmalama anya arye, ance sik mitang unyak ninye ap, bona utotoa talina kum ninye ap, yupu mikip arye nyapmanto kum unyak ninye ap ati, teleb yupu nyabuka, lipsisikuka bokolinamlyame. Winipminya deice arye, aninye ati teleb kilinamlyame. Sik damak teleb kibuka umince, talinamlyame.

**Diksukum ulirye, ninye yupu kekebuka,  
amutam ulul kil ati, nyabuk yupu**

<sup>10</sup>‘Diksukumuk ulamturye, el akanye nyaptu yupu uk kekebuka amutam upmanto kil uk, ato kil eibuka doptinye’ tenen, fia piribuka elamtuma babye, adib aryuk el atonun kil ara, minopce kum eipnamlame. Fia teleb ulirye, el akanye yupu kekepmanto kil ara, minopce eibuka kum binuka dopropmanto anya arye, atonun kilapu ati ara, fia piribuka epdetum bukni, ikin dib aryuk epnamlume. Aning atonun, akil urasin ara winipmanto, weik nong teleb dekna weik keil el si ara, intan berlian keil ara, urasin fia weik teleb ning ulul bukni, aning ara mitik mambule. Bukni, fia teleb ubuka ulul kil ara, weik mambul ulule.

<sup>11</sup>Aning atonun kil doptunye bira, el kil arye nyaptu yupu nirya ara, dib teneptue. Akil arye nyalamle touk winilula atia. Akil ap, anye ap neika unamdak talak nirya ara, akil arye el akanye biti, melinamle deice arye, anye bira teleb uk upnin banamle. Elce akil ati fia kanye deibuka unamle.

<sup>12</sup>Akil el kam unamle talak noutamak nirya ara, el akanye dam malye un ning ton kum wininamle. Ikin ning el dam kum delinamle. Sik

kam tuba unamdak talak nirya ara, anye birye el kil arye teleb ubuka melinamle. Winibuka ulirye, teleb fil uk donamle. <sup>13</sup>El akil ara, kil-kil deice aryuk butum aling wina ati, wilamak tapu ebuka dolona ap, tonda domba basam potong bulubuka delinamle. Aning nirya bulubuka deiplyop ura, el akil arye, sik nong bupu kina ati, pi deibuka butum aling wilamak tapu olamlirye fil donamle. Butum aling wilamak tapu oplirye, aning nirya kintinipliyop ura, adeice arye nong bol deice ongolamak butum aling winamle.

<sup>14</sup>Tonda winipmanto, mekwen deice balamle kapal, el si ara kapal, akapal arye pera mutuku arye dawamlye bona ning libuka, bo yangalamle touk, el akil aryuk, el mapu silip sik dina ati, yuk pera mutuku arye din ning libuka boyangalule.

<sup>15</sup>Tonda el akil aryuk, sik aik fum mapu silip, tuba mapmace karin aryuk, buklirye berentam talak sik din ning ati, dakuka kintinililule. Tonda el akil aryuk, sik aik noutamak fil dona kilapu ap, sik wa win dam fil don kilapu ap ati, “Anggunda apil-afil donamlume,” nyabuka, ‘Sik fil donamake,’ teneplirye, fil yuk-yuk bokolilule. <sup>16</sup>El akil aryuk, sik wa wena ati, tuku ton epra balamlya ani, sik wa wena tuku akunum eiplyop ura, atuku deiyoknye biti, yo bok areplirye atuku dekelule. Wa win tuku akunum dekllyop ura, sal arye wa wilamliba, akil arye anggur tapu duk yala koulule.

<sup>17</sup>El akil arye, ‘Aminyan talak ikin fil donamne’ tenen, el kanye talima mikip kilina ap, el nong nirya moubuka dildana ap, ulirye kalikilalule.

<sup>18</sup>El akil ara, elce libuka delilul ning ara, dekna teleb ning uk dekllyop ura, el mapu silip fatalul ning dekelilule. Aning atonun, yuk nang arye, ‘Deknamap’ tenen, deililamak ning ara, akil el mapu silip fatalul ning dekelbalamle talak ara, dekna fia teleb ning ton epra balule. Akil ara, fil dona ara, lik kum kil anya arye, berentam talak arye dipdongobuka, fil donmalya ani, lukunyan kipliyop ura, weisa uplirye fil dolule.

<sup>19</sup>Yuk kilapu nirya ara, fil dona kum talak ara, talye dikdik sebuka bunyak bukni, akil ara dikdik sena kumce, aling wilamak tapu fia ona uk ulule. <sup>20</sup>Tonda, el akil ara, yuk bona utotoa talina kum ninye ati ara, ‘Na ning kum bokuka aripnamne’ tenen, kunusa kanye bona kum kile. Elda fia kanye teleb arye yuk bona utotoa talina kum ninye ati, bico tenelirye, melibuka arilule. Tonda, yata patan ning do nirya, yuk ninye fatablye talak ara, akil arye bico tenelirye, melibuka arilule.

<sup>21</sup>El akil ara, weik mok li min kum cepmalye talak arye, bupu butum aling akunum wibuka kintinililula anya arye, mok ceplirye, weik arukna li uplya babye, ‘Se, yata winipnamne do?’ tenen, kanye kum walwalalule. Ara, talye ati kume. El mapu silip arukna kiplye talak, bupu butum aling kintinina ati, bupu butum aling akunum wibuka kintiniyاملula atia.

<sup>22</sup>Tonda el babye akil aryuk, ‘Weik arukna li uplye talak ara, bupu upnamle’ tenen, domba basam potong doplirye, bupu butum aling

akunum wiyamlula atia. Abutum wina ati, kain ara fia urasin teleb ning, kurun ning ap, mirin ning ap, bi ning ap arye akunum wiyamlula atia.

<sup>23</sup>El akil domlinye bira, amutuku kota noutamak ulamice ninye talibuka, unyak deiyok nang noutamak arye, weik erenanye ulule. Sik mutuku talibuka weik ninye deiyok nang bulubikirye, yupu talinyak talak nirya ara, el anye ap neika unyake. Amutuku ninye nirya arye, anye biti weik arye kanye deibuka unyake.

<sup>24</sup>Tonda, el kil aryuk, ‘Yuk ninye dekenamak’ tenen, urasin fia teleb butum aling bukni, deiyating delina ati, kintinipdeibuka wiplirye, ‘Dengna deiyok nang arye dekenamak’ tenen, deipliba, yuk nang arye dekenyake. Winilya deice arye, yo bok ara fia weik dololule. <sup>25</sup>Akil ara, weik mikip ap, weik kel bikna ap, aning-aning nirya ati, fia moubuka tenena ap, doyanamle talak ati kabul talak arye kintinilina kil ulula anya arye, elda, ‘Se, aminyan talak ara ikin ning na damak yanilyak’ tenen, moubuka tenelirye, ilil kum ulule.

<sup>26</sup>El akil ara, weik arye yu yupu ton kum erebuka nyalule. Elda fia moubuka tenipdelirye, weik kel bikna yupu uk nyalule. Tonda yuk ninye ati lipsisikuka peterelamle talak ara, yu yupu arye kum nyalul bukni, nimalye aryuk, teleb yupu nyalya deice arye, yuk ninye ati peterelule.

<sup>27</sup>El akil ara, mikip kanye bobuka, fin-fina asa arye, el mapu silip winipnamak ning ap, patapnamle ning ap atibuk, moubuka tenipdelirye, afil uk dobuka kintinililule. ‘Fil uk dona ara, nun like’ tenen, talye kanye bobuka daanyak kilapu ara, aminyan talak ikin kanye bobuka unamak bukni, akil ara, fil teleb ubuka dolula anya arye, ikin ning el damak kum yanganamle.

<sup>28</sup>Winilya deice arye, el mapu arye sik nin biti, ‘Elda fia teleb kil ulula anya arye, Allah arye teleb kilinamle’ tenen, el ti teleb yupu uk nyakirye, weik arye kanye deilinyake. Aning atonun, el akanye birye, el kil ati fia kanye delilule. <sup>29</sup>Akil el akanye birye, el kil ati nyalule. “Fil teleb kibuka donyak kilapu ton, weik aanyak bukni, aunyaka noutamak arye, an uk ara, weik arye teleb ulyame. Yuk kilapu ara, mitik teleb unyak bukni, an uk ara, fia teleb fil uk dolyame. Yuk kilapu wininyaka atonun kum winilyame,” nyabuka, akil el akanye birye, el ti kanye deibuka kilule.

<sup>30</sup>Ninye arye, kilapu ulamice ning urasin eibikirye, tenenyaka ara nyapnusine. Ara, sal arye, “Se, akilapu banmace ning ap, teleb ubuka yupu nyalamak ning ap, urasin kamo teleb ubuka unyak ning ap ati, fia teleb unyake,” nyabikirye, akilapu ati, ‘Sikda fia telebe,’ tenenyak bukni, akunum wisi danin bacop ura, aning nirya ara kum danin banamlarya. Bukni, yata kil do nirya, Allah ati dib teneplirye, kanye talima amu kibuka ulirye, Allah atibuk ilil ulul kil ara, weik mambul kil ulule. Akil atonun unyak kilapu ati ara, yuk ninye nirya arye sik ti, kanye delinyakce, “Sikda fia telebe,” nyabuka unamake.

<sup>31</sup>Akil ara, fil ayala-yala nirya teleb ubuka dolula anya arye, el fil dolya deice arye, dololulum ning nirya ara, akil kanye delina ati, bokuka el ton arenamlume. El akil ara, dan tam do, el balulak nirya ara, ninye yuk nang arye, akil winilul ning ati eibikirye, “Akil ara teleb kile,” nyabuka, el ti kanye deibuka kinamake.